



क बरेल ठर्या

ओसो स्कूल पेकोरा पीटो

मूल हिंदी - प्रदीप
गोंडी अनुवाद - जनी

बेरेल मर्ग

ओसो स्कूल पेकोरा पीटो

बेरेल मर्रा ओसो स्कूल पेकोरा पीटो
मूल हिंदी – प्रदीप कुमार
हिंदी 2022
गोंडी लोप्पा पहली बेरा – 2023
गोंडी अनुवाद – जनी

प्रकाशक
जंगोम प्रेस



विषय सूची

इतिहास ता आतंक.....	6
बेरैल मर्ग संगे मुलाकात	9
दूसरा दिव्या काजे केपना.....	13
सामूहिक मेहनत वन मानुष तल मानेय बने किता	20
आदिम समाज	28
उत्पादन शक्तिंग.....	39
अतिरिक्त उत्पादन ओसो लूट गुलाम प्रथा.....	47
गुलाम प्रथा: मानव विकास ता उन्नति ता हर्ष	57
मना देश 5000 साल मुन्ने बद्रम मत्ता?	62
जाति व्यवस्था ता जन्म ओसो	
आधा आबादी दूसरा आधा आबादी ता गुलाम बनेमाता	66
समाज ओसो बदलेमाता	80
सामंतवाद: बहादूर राजकुमार ओसो	
सुंदर राजकुमारी वाले व्यवस्था आयो	86
सामंतवाद समाज ता विकास लोप्पा बाधा बनेमातास्के.....	98
उर्वे निर्य ते कलियता मूंड शब्द बराबरी, मुक्ति ओसो भाईचारा	106
नव साक्षर मजदूर लोरा सवाल	113
उत्पादन ता जिन सक्रिय आत्ता मति मजदूर लोर किन बाताले दोरको.	120
मार्क्सवाद-मजदूर लोरा कैदे मत्ता क्रांतिकारी हथियार आंदू.....	133





इतिहास ता आतंक

स्कूल ता आखरी कक्षा ता गंटी नेकता इत्तेके ने दसवीं कक्षा ता विद्यार्थीरा लोप्पा कोल्हार शुरू आत्ता। इतिहास ता कक्षा उंदी वेरीं वेस्सन लेक्कटा कंजकाड़ लेक्काने मंता। उचुन विद्यार्थीर किन विड़चसी वेल्ले विद्यार्थीर इद विषय तुन इनपड़े विचार कीवोर। अकबर मुन्ने पुटतोरे लेवेके अशोक मुन्ने पुटतोर? चंद्रगुप्त मौर्य ओसो चंद्रगुप्त विक्रमादित्य पोरोल वरोर मानेय ना मत्ता लेवेके अलग-अलग लोकुरा पोरोल मत्ता? कौटिल्य ओसो कालिगुलाम ना बाता संबंध मत्ता? ओसो दुनिया मेटा तारीख सुरता तासनादु, महाभारत ता लड़ाई जीड़ना तुकू कम हिल्ले। इदे आयवा बस्केटल इतिहास ता पूना गुरूजी महेंद्र सर वात्तोर, अस्केटल बिचारा लोरा पिस्वल खराब आत्ता लेक्का आत्ता। महेंद्र

सर इनवा लेवा ओनकिन महेंद्र राक्षस, इंदाना वेल्ले बेस आया। बेड़गा संगे पिट्टहिंतोर अस्के ओरु बेड़गा बेगा दलगा मंता इंजी वेने हूड़ोरे। बेड़गा ता देब्बा तिंजी 15 अगस्त 1947 वेने 26 जनवरी बनेमांता अनि इंदिरा गांधी महात्मा गांधी ना मेय्याड़। बस्के एवनल रोज 5-7 विद्यार्थिर ओहरांडे बनेमायोर अस्के एवनल महेंद्र गुरूजी किन वेने चैन वायो आंदूर।

रवि वरोर मेंदुल-नांदुल बेस मत्ता पेकाल आंदूर, बहादुर मंतोर, पढ़ाई लोप्पा वेने उचुन बेसे मंतोर। मति इतिहास ता गंटी नेकता इत्तेकेने ओना मनीला हेपुर संगे जोर-जोर आंता। ओरु, ओसो उंदी बेरा नेंडु ओना हानाल आयर इंजी पुंजी मंतोर। निन्नेटा महेंद्र गुरूजी ना पिट्टिहता बेड़गा ता देब्बा ता नोमुर इंजे वेने मत्ताए। कक्षा मारनास्के बद्रमो महेंद्र गुरूजी, ओनकिन तेहची चेतावनी हीतोर-“नाड़ी निम्मा मुगल लोरा पतन ता कारण वेहा परवेके नन्ना... नीवी तोला ओड़िहचियाकान!” बिचाराल रवि! नरकापल्लिंग पाट कितोर, मति बचोन पाट कीसोर हत्तोर अचोने मरंगसोर दांतोर। मुन्ने बस्के ने इचोन मुश्केल परिस्थिति ते अरवा मत्तोर। इतिहास ओनकिन बस्केने विचार वायोए मति बद्रमाई अदिन पाट कीसी काम ताकि कियानोर। ओरु हमेशा- इद इतिहास बारांकु करहांतोर? इंजी बहस कियानोर। ओनकिन नेंड एवनल सैकड़ों हजार साल मुन्ने डोलसी तोड़ियो आत्ता लोकुरा बारे ते नेंडु पढ़ेमासी बाता फायदा आंता इंजी समजेमाताद हिल्ले! बस्के-बस्के ओरु सम्राट अशोक, अकबर, औरंगजेब लेक्काटोरा पोरो वेल्ले होंग आंतोर। अस्के लोप्पा-लोप्पा मुरंगितोर ओरकिन इद्रम ता कब्बड़कु कियाना जरूरत बारांकु आत्ता! ओरु इचोन लड़ाईग लड़ेमायवेके माकिन अविना तारिख सुरता तासा लागो आयवड़। अविन शाळा ता पुस्तक बने कियानोरा पोरो वेने होंग वांता। ओरकिन रांगसोरे मिस्सता लाश तेंडसी ओरु बाता बेहरा काम कियानूर।

ओना इव सवाल कुना जवाब बोरे विद्यार्थि नगा दोरको आयनदू। शुरू-शुरू ते ओरु वेल्ले हिम्मत कीसी तम्मा गुरूजी किन इद सवाल कितोर मति ओरु कोंडांग तोहतांकु, पेरके बस्केने इद्रम ता सवाल कियाना हिम्मत आयो आत्ता। बचोनो बेरा ओरु इद सवाल ता जवाब ओनगा वेने हिल्ले बहे इंजी आल्सानोर। विद्यार्थिरा नड़मा इद सवाल पूछेमाता पेरके महेंद्र गुरूजी ना

नौकरी दांता बहे इंजी वेने आल्सनदू मंदू, बारांकु इत्तेके इतिहास करहाना रोमतेके महेंद्र गुरुजी ना वेने स्कूल ते जरूरत मन्त्रो आया र अनि ओरु अंगडम आयनूर ओनकिन स्कूल तल तेंडमूडायर इंजी आल्सनोर। ओना पिल्ला-पेकोर करविने डोलिंतोर, महेंद्र गुरुजी ना रेंगल कोंडांग तोहना कारण जरूर इदे मंदियर बहे।

कुल मिले कीसी रवि किन तन्ना सवाल कुना जवाब दोरको ओसो इतिहास ता कक्षा वेने रोमो आत्ता। महेंद्र गुरुजी ना आतंक जरूर बेरसता अनि इतिहास ता पोरोल वात्ता इत्तेकेने विद्यार्थिरा धिर्-धिर् सांगना शुरू आयनदू।

नेंडु वेने अदिनाए वेरीं मत्ता। मुगल लोरा पतन ता कारण वेहचोरे नडमाए लेस्कसी मौर्य साम्राज्य ता पतन ता कारण पोरो एवतोर। महेंद्र गुरुजी ना कैदल गाज लेक्का बेडगा ता देब्बा अरतास्के तोड्डी तल सिंधू घाटी सभ्यता ता पतन ता कारणकु पेसना शुरू आतांग। ताना पेरेके बाताल आत्तायो ताना बारे ते वेहवेकेने बेस आया र। ओनकिन कोर् बने कीसी मोरकुल ओसो कूलांग रेंगल कियमूडाता। अद दिव्या 20 मिनट मुन्ने गंटी नेकसी छुट्टी आत्तादू बेस आत्ता। प्रिंसीपल साहब सब्बे अध्यापक लोर किन जरूरी मीटिंग काजे केयतोर लेवेके बाताल आसी मनवड इंजी सुरता वातेके रवि ना मेंदुल सांगिंता। कक्षा लोप्पा उचुन विद्यार्थिर किन ओना पोरो जीवा नोयनदू। ओरा लोप्पटल वेल्ले तोर रवि ने लेक्काने मत्तोर। महेंद्र गुरुजी ना बेडगा मुन्ने ओरु धिर्-धिर् सांगनोर। उचुन विद्यार्थिर रवि ना पोरो वेल्ले कव्वानोरु।

उचुन अपमान ओसो उचुन नोमुर आतांकु रवि ना जीवा सुडला आयनदू। छुट्टी आत्ता, सब्बे विद्यार्थिर लोन हरीं पोयतोर। रवि किन लोन दायला वेस्सो आत्ता। ओरु स्कूल तल शहर ता उलटा दिशा ते ताकना शुरू कितोर, अगा सुडला अनि हीकट पोसी मत्ता गेडा मत्ता।



बरेल मर्रा संगे मुलाकात

गेड़ा ते उंदी बेहरा बरेल मर्रा मत्ता। बरेल टोंडांग वेल्ले मुन्ने भूम पोरो एवसी खुद बरेल मर्रा ता सहारा बनेमासी मत्तांग। बरेल ता असली मोदोल बस्केनो डोलसी मत्ता अनि इंजे अदु तन्ना टोंडांग ना सहारा ते पूयना-हादना किया मत्ता। बरेल तुन हूइसी उंदी पाइना, बेहरा ओसो सोबा मत्ता लेक्का दिसिंता। ओनकिन बरेल ता दड़िंता दड़मी ते, ताना पोरो उदसी मत्ता पिट्टेंग ना चीं-चा केंजसी बेस लागनदू। ओरु बरेल ता उंदी कुर्सी लेक्का मत्ता मोदोल पोरो उदसी बरेल मर्रा ते रोयतोर। अस्के ओनकिन वेल्ले आराम दोरकता। उचुन जोम आतांकु ओसो उचुन दड़िंता दड़मी ता प्रभाव आतांकु तीरम-तीरम ओना कोंडांग पियतांग अनि हुस्कड़ वायलाता। बोनादो केयना लेंग केंजसी ओरु तेदतोर। इगा ओनकिन केयानोर बोर मंतोर? ओना लोतल बोरे ओनकिन परहकसोरे इगा एवनल वात्तोर? इद्रम इत्तेके लेंग बद्रम पुंदा वासोर हिल्ले। जरूर ओना केव्वी नेकसोर मत्ता लेक्का आत्ता। ओन किन ओसो उंदी बेरा लेंग केंजा वात्ता, इंगो ओना पोरोल पोयसी बोरे केयसोर मत्तोर। अद लेंग बोरे वरोर मुयतोनाद मत्ता! ओरु तेदसी नालुंग बगिल हूइतोर मति अगा ओनकिन विड़चसी दूसरा बोरे वेने दिस्सोर। ओसो उंदी बेरा बोर केयतोर? इंजे ओनकिन वेर्री वेस्सलाता। ओरु तन्ना गोती तोरा तोड्डी तल ओह्हरांडेस्कुना बारे ते पीटोंग केंजसी मत्तोर। इदे आयवा ओरु बेहरा मुयतोर बरेल मर्रा ते ओह्हरांडेस्कु मत्तांग इंजी वेने केंजसी मत्तोर। नेंड

ओना दिय्याए खराब मत्ता लेक्का मंता, उंदी ओह्हरांडे स्कूल ते कलियता अनि दूसरा इंजे ओना पेरके अर्ना तैयारी किया मंता। ओरु अगाटल तुरंत वित्तला आल्सतोर। अस्केने ओसो उंदी बेरा लेंग केंजा वाता:-

“वेरियमा रा। नन्ना बेरेल आंदान।” इद लेंग वेल्ले जीवा कीसी वात्ता अनि ताना लोप्पा वेल्ले माया मत्ता। “बेरेल वेने बस्केने वड़का परित्ता या? नन्ना कंजका मंताने बाह....” इंजे वेने ओना वेर्ी अद्रमे मत्ता, ओरु वित्तना हर्री हूड़सोर मत्तोर।

“जीवा ता पेकोर, नन्ना बेरेल वड़का मंतान। वेरियमाटु, नन्ना ओह्हरांडे आयोन।” बेरेल तल ओसो उंदी लेंग केंजा वात्ता, “निम्मा बोर आंदिन? निम्मा बारांकु परिशान मंतिन। नन्ना नीवा मदद किया परित्ताना?”

रवि इंजे वेने वेल्ले बक्काह आसी मत्तोर। ओनकिन बाताल आसोर मंतायो, बाताले समजेमासोर हिल्ला मत्ता। इद बदे पूना तिप्पल मंताए लेवेके बदे जादू! ओनकिन अगाटल वित्तना लेक्का लेवेके अगा रोमना लेक्का आसोर हिल्ले। ओरु तन्ना वेर्ी तुन रोमी कियाना पूरा कोशिश कीसोरे “निम्मा नावा बाता मदद किया परित्तिन? नावा ओसो नीवा दुनिया बचोन अलग मंता इंतोरा।”

बेरेल ता गंभीर लेंग वात्ता, “इंगो, इद पोल्लो निज्जमे। नावा ओसो नीवा दुनिया वेल्ले अलग मंता। मति नन्ना उंदी मुयता बेरेल मर्रा आंदान, नीवा बाताले काम वाया परित्तान। मुयतोर, दुक्कम तूस्तेके कम आंता इंतोर अदिनके नन्ना नीवा बदे काम वायवेकाई नीवा तिप्पल केंजसी नीवा तिप्पल ता बोजा हल्को किया परित्तान।”

बेरेल ता जीवा लेंग केंजसी रवि कम से कम बदे नुकसान ता संभावना हिल्ला लेक्का मंता इंजी आल्सतोर। इद उंदी पोल्लो ओना वेर्ी तुन खत्म कित्ता मति महेंद्र गुरुजी ओसो इतिहास ता पोल्लो इद बेरेल मर्रा तुन वेहाना इंजी वेने बदे फायदा हिल्ला लेक्का मत्ता। मति ओनकिन इंजे वेने इद बदे मायावी शक्ति आंदू इंजी वेर्ी वेस्सा मंता। इंजे तो अदु वेल्ले जीवा कीसी वड़का मंता, अदिन बस्केने वेने होंग वाया परित्ता। अदिनके अदु बाता पूछेमांतायो, वेहचियाना अनि इगाटल पेस्तेके बेस आंता। ओरु अद दिय्या संक्षिप्त ते पीटो केंजी कितोर।

पूरा पीटो केंजता पेरके बेरेल टहटह इन्नाह कव्वता, “अद्रमा, इचोन सुडला पोल्लो?” इद पोल्लो केंजसी रवि किन होंग वात्ता। ओरु “नीकिन इतिहास पढ़ेमाया लागतेके नन्ना नीकिन सवाल पूछेमायेनान! पोल्लोंग कियाना अनि दूसरोरा पोरो कव्वना वेल्ले हल्को मंता।” रवि ना मेंदुल ता नोमुर ओसो उंदी बेरा तेदता। ओना कोंडा ते कन्निर पेस्ता।

“अरे-अरे, निम्मा तो होंग आतिन रा। नन्ना अद्रमे मजाक कीसोर मत्तान। वेल्ले सदी नल बोनाए संगे पोल्लोंग कित्ताद हिल्ले। इंजे वड़कतांकु कव्वा वेस्ता। निम्मा नावा पोल्लो बेस लागवेके नाकिन माफ कीमू। मति असल इत्तेके नावा काजे इद वेल्ले सुडला पोल्लो मंता।”

रवि ओसो उंदी बेरा गंगा-गोदावरी आत्ता। वीर मानेय लेवेके बाताल मत्तेकाई वेल्ले बुद्धि मत्ता लेक्का मंता। इदिना पढ़ाई-लिखाई लेवेके इतिहास संगे बाता संबंध मंता! ओरु इचोने इंजी “कम से कम निम्मा नावा पोरो कव्वमा!”

बेरेल गंभीर आत्ता। अदु “पेका, नन्ना नीवा पोरो कव्वोने। अल्ले, वेहा निम्मा बचोन साल तोनिन मंतिन?”

“नन्ना पूरा 15 साल तोनान”

“ओसो नन्ना सिर्फ 350 साल तोनान।”

रवि मोयोल पोरोटल अरता लेक्का आत्तोर। “बाता!!! 350 साल। ओसो पोंगड़िग किया मंतिन!” “हिल्ले, वीरा नीवा औरंगजेब मंतोर एय्यो, ओरु दिल्ली ता राज गद्दी ते उदसी मत्तोर अस्के नन्ना सुडला मत्तान। अस्के नन्ना नीवा अचोर लाटी मत्तान। अस्के दिल्ली लोप्पा वेल्ले नेत्तुर पोंगता।”

रवि बदे दूसरा दुनिया ते वात्ता लेक्का आत्तोर। उंदी विड़चसी उंदी हक्का-बक्का आयना लेक्कटा पोल्लोंग केंजा वाया मंतांग। नेटा दिव्या बचोन अंगड़म आत्तायो, नुल्पेह बेरांग अचोने बेस आया मंता। अस्के एवनल ओना वेर्री पेसिस मत्ता।

“अल्ले, बेरेल दादा, हिल्ले-हिल्ले बेरेल आजी! निम्मा इचोन बेहरा मंतिन इंजी नाकिन विश्वास वासोरा हिल्ले।”

“हा-हा-हा! पेका, निम्मा होंग आयमा” वेल्ले कव्वता पेरके बेरेल वड़कता, “बाता कियाकान, नन्ना उचुन मजाक कियानोनान। वेल्ले साल

तल कव्वताद वेने हिल्ले। अदिन काजे नेंडु वेल्ले कव्वा मंतान। नन्ना निज्जमे औरंगजेब ना कालम तोनान आंदान। नावा बाबाल कुतुब मिनार बने कियाना नवाब ना कालमतोर मत्तोर अनि नावा परादादल नीवा चंद्रगुप्त विक्रमादित्य किन हूइसी मत्तोर।”

“अद्रम इत्तेके निम्मा नाकिन वीर सब्बे तोरा बारे वेहा परिंतिन। वेहा आजी नाकिन।”

“इंगो, बारांकु वेहोन आयकान, वेहाकाने! अदिनके नन्ना इव सब्बे नावा काजे वेल्ले हल्को मंता इंतान। नन्ना नीकिन नावा पिस्वल ते आत्ता घटनांग ना बारे ते वेने वेहा परिंतान। नन्ना नीकिन, नावा दादा ना तोड्डी तल केंजता पोल्लोंग, नावा दादाल तन्ना दादा ना तोड्डी तल केंजताव ओसो ओरु तन्ना परदादा ना तोड्डी तल केंजता पीटोंग ना बारे ते वेने वेहा परिंतान।”

रवि वेल्ले गिर्दा आत्तोर। ओनकिन तन्ना उंदी बेहरा समस्या हल आसोर मत्ता लेक्का दिसता। बेरेल ता टोंडांग संगे टुंडसोरे, “धन्यवाद बेरेल आजी। निम्मा नावा बचोन बेहरा मदद किया मंतिनो निम्मा पुनविन। इंजे जुल-जुल आया मंता, यायल नन्ना गायब आत्ताद हूइसी परिशान आयार। नन्ना नाड़ी नरकुम वायकान। नाड़ी इतवार मंता, नावा स्कूल ता छुट्टी मंता। नाड़ी नरकुम नाकिन निम्मा महेंद्र गुरुजी पुनवा मत्ता पोल्लोंग वेने वेहकिन।”

रवि किन बेरेल तन्ना वेइंगसी मत्ता टोंडांग ओना तल्ला पोरो कै वाटता लेक्का कीसोर मत्तापु आत्ता। दूसरा दिव्या वायकान इंजी वेहची ओरु लोन हत्तोर।

दूसरा दिव्या काजे केपना

नरकापल्लिंग हुस्कड़ वायो। बचोनो बेरा ओरु तन्ना मेंदुल तुन जर पोयता बहे इंजी बोयसी हूड़तोर। बचोनो बेरा ओनकिन अगा मुन्नेटले मकसी तन्ना गोती तोर मजाक कियाना लेक्का आत्ता। चेतमासी- हुंजसी बदमाई ओरु नरकुम एवनल हर्री हूड़तोर। नरकुम आत्तास्केत जल्दी-जल्दी एर तुंगसी तियार आसी बेरेल मर्रा तिगा वेल्ले मुन्ने एवतोर। ओरु तन्ना गोती तोर मजाक कित्ताद हिल्ले इंजी पक्का कियाला आल्सतोर। ओना बोर गोती तोर इद्रम कीतेके मुन्नेने एवसी ओना पर्दाफाश कियाना इंजी आल्सतोर। मति अगा बोरे हिल्ला मत्तोर। उल्टा बेरेल मर्रा ओना हर्री हूड़सोर मत्ता। ओनकिन हूड़सी, “वाह, निम्मा तो मुन्ने ने वातिन। वायु, इगा उदा।”

रवि बेरेल ता आरामदाय कुर्सी लेक्कटा मोदोल पोरो उदतोर अनि बेरेल मर्रा ता ऊंगसोर मत्ता टोंडांग ओना तल्ला पोरो कै वाटता लेक्का किया मंतांग। “अल्ले पेका, वेहा निम्मा बाता पुंदाला आल्सा मंतिन?”

रवि तन्ना सब्बे सवाल कुन बेरेल मर्रा मुन्ने तास्तोर। ओरु महेंद्र गुरुजी किन पूछेमायला आल्सतेके वेने पूछेमाया परवा मत्ता सवाल कुन वेने बेरेल मर्रा मुन्ने तास्तोर।

सवाल कुन केंजता पेरके बेरेल मर्रा गंभीर आत्ता अनि “नीवा सवालकु वेल्ले बस मंतांग। मति इविना जवाब वेने नीवा सवाल कुना लेक्का वेल्ले बेहरा मंता। निम्मा नावा पोल्लोंग वेल्ले बेस केंजतेके, नन्ना नीवा काम वायना लेक्का बचोनो पोल्लोंग वेहा परितान।”

रवि खुश आसी “इंगो, इंगो, नन्ना नीवा सब्बो पोल्लोंग वेल्ले ध्यान हीसी केंजकान। मति नाकिन रांगमा। नाकिन रांगाड़ तुकू वेल्ले वेर्री वेसिंता।”

बेरेल मर्मा ओसो उंदी वेल्ले कव्वता “हा.....हा.....हा..... आयो रा पेका, नन्ना नीकिन इनपडे रांगोन इत्ता।” पेरके ताना टोंडांग ओना केल्लुकुन ऊड़ना शुरू कीतांग।

रवि किन बेरेल मर्मा संगे बेस लागता। ओरु पूछेमातोर, “बेरेल आजी, नाकिन उंदी पोल्लो वेहा, लोकुर इतिहास बारांकु पढ़ेमांतोर? इदिन पढ़ेमायवेक वेने तो मावा काम तार्किताए। असल ते माटु इदिन बारांकु पढ़ेमायान, बस्कोनो डोलता, तोड़ियो आतोरा बारे ता बारांकु पाठ कियाना?”

बेरेल मर्मा गंभीर आत्ता, “आयो रवि, इद्रम आल्सना बेस हिल्ले। बोर्तम्मा इतिहास पुन्नोर इतिहास ओरकिन तेहची पोद्दिय गुमिया वाटसिंता इंजी केंजसी मंदाकिने।”

रवि- “नाकिन समजेमायो रा बेरेल आजी। इतिहास बद्रम बोनकिने पोद्दिय गुमिया ते वाटा परिंता?”

बेरेल मर्मा- “बोर तम्मा पाड़ना पिस्वल तल सबक एतोर, ओरकिन वायना कालम ते कष्ट भोगे माया लागिंता। उंदी सुडला तल समजेमायकाल एय्यो। निम्मा नावगा वायनास्के हर्दे काटांग वाल्ले पोरकांग दिसतांग?”

रवि- “इंगो आजी, निन्ने इत्तेके नन्ना अगा हिरकसीए मत्तान मति नेंड अविनगडल बचेमासी वात्तान।”

बेरेल मर्मा- “नन्ना इदे पोल्लो नीकिन समजे कियाना कोशिश किया मंतान। निम्मा निन्ने काटांग मत्ता पोरकांग ने हिरकसी मत्तिन। इदु नीवा पाड़ना कालम ता पन्ना बनेमाता। निम्मा उचुन आल्सा इद घटना निन्ने घटेमाता मति निम्मा इदिन मरंगवा लेवा सुरता तासतिन, अदिनगल सबक एतितिन। अदिनके नेंड निम्मा काटा ने हिकवा लेवा इगा एवनल वाया परतिन। इदिन निम्मा निन्ने ने मरंगसी मत्तेके नेंडु बाताल आसी मनवड़? उचुन आल्सा।”

रवि किन उंदी पूना वेहच दोरकता लेक्का आत्ता। ओनकिन उचुन-उचुन समजे मासोर मत्ता। बेरेल वड़कसोर हत्ता “नीवा पाड़ना कालम मत्ता लेक्का ने नावा वेने मंता। नीवा यायल-बाबा ना दादोर-आजीर, ओरा दादोर-आजीर..... माट सब्बे तोरा उंदी पाड़ना कालम मंता। पाड़ना कालम ते मना पूरखा नोर बद्रम मंदानोर, बाता कियानोर, ओरा तिंदना-उंडना, रहन-सहन,

वड़कना-करसना, आचार व्यवहार, इव सब्बे मावा इतिहास ता विषय आंदू। इतिहास लोप्पा मानेय वेल्ले बेसता काम कितोर अद्रमासी पूरा मानवता तुन फायदा आत्ता। संगे ने बचोनो काम मानेय ना काजे नुकसानदायक काम वेने कितोर। नीकिन मानेय गलत काम बातल ओसो बारांकु कितोर इंजी पुनवा मत्तेके अव गलतिंग दुहरे कियाना खतरा हमेशा मंदिता अनि एंदना-करसना-कव्वना दुनिया पूरा ध्वस्त आंता। दूसरा बगिल निम्मा मानेय ना बेसता काम बातल ओसो बारांकु कित्ताद मंता इंजी पुनवा मत्तेके बदे काम कियानास्के हमेशा कन्प्यूज मंदाकिन। बद काम कियाना बद कियानाथो इंजी हूडसोर मंतिन। अदिन काजे निम्मा नीवा वायना कालम तुन सवरे कियाना इत्तेके मुन्ने नीवा पाड़ना कालम तुन पुंदाना जरूरी मंता।”

रवि ना जिज्ञासा (बदे विषय ता बारे ते पुंदाना इच्छा) इंजे वेने शांत आत्ताद हिल्ले। “मति मावा कक्षा ते राजा-रजवाड़ी ओसो महाराजा लोरा कहानिग वेंहिनतोर। ओरु बस्के पुटतोर, बस्के डोलतोर, इव सब्बे पाठ कीसी-कीसी मावा ऐसी-तैसी आंता।”

बरेल मर्ग गंभीरता ते इत्ता - “इंगो, इद वेल्ले दुक्कम ताद मंता। असल ते वेल्ले लोकर सोबा ता राजकुमारी ओसो बहादूर राजकुमार लोरा प्रेम कहानिग लेवेके दुस्साहसी राजा लोरा जीत कुना कहानिग, ओरा महल कुना लोप्पा बने कित्ता षडयंत्र कुने इतिहास समजेमांतोर। इद्रम तोर नेंड वेने वेल्ले मंतोर। ओरे रास्ता पुस्तकिंग निम्मा पढ़मासोर मंतिर बहे। वेल्ले लोकर इविन हूड़ना तम्मा तरीका बदले कितोर। ओरु इतिहास तुन राजा-रजवाड़ी लोरा महल तल तेंडसी लोकरा कड़ा ते ओयना।”

रवि ना नोमुर ते मलम होकता लेक्का आत्ता। ओरु गलत आयवा महेंद्र गुरुजी गलत मंतोर बारांकु इत्तेके ओरु इतिहास गलत तरीका ते करहा मंतोर।

बरेल मर्ग रवि ना परिस्थिति समजे माता। अदु “इत्तेके इतिहास लोप्पा होशियार, बहादूर, बुद्धिमान लोकर हिल्लेर इंजी आयो। हर देश, हर समाज लोप्पा इद्रम ता लोकर पुटसोर मंदिंतोर अनि ओरा कित्ता बेहरा-बेहरा काम कुन नेंड वेने लोकर सुरता कींतोर। इद्रम ता लोकर इतिहास लोप्पा वेल्ले

महत्वपूर्ण भूमिका निभे कितोर। माटु इद्रम ता महान लोकर किन सुरता तासना मति सिर्फ इद्रम लोकरा कहानिंग पाठ कियाना इतिहास आयो।”

रवि - “आजी, इतिहास शुरू बस्के आत्ता?”

बरेल- “इद भूम पोरो मानेय ना जन्म आत्तास्केटले। माटु अदिन इतिहास इनवा लेवा प्राचीन इतिहास लेवेके प्राक इतिहास (प्रागैतिहास Prehistoric) पोरोल ते पुंतोम। मानेय बस्केटल रासना शुरू कितोर अस्केटल इतिहास अदि इतिहास इंतोम।”

रवि- “आजी, नीवा पोल्लौंग बदे हट्टो लेक्का मंतांग। मानेय मुन्नेटले रासला पुनवा मत्तोर? इद्रम बद्रम आया परिंता? मानेय वेने शुरू तल भूम पोरो मत्तोर, मति निम्मा बस्केटल मानेय भूम पोरो मंदांना शुरू कितोर इंतिना। इद पोल्लो वेने नाकिन वेल्ले लेस्की किया मंता।”

बरेल- “असल पोल्लो इद्रम मंता केंजा। धार्मिक पुस्तक लोप्पा मानेय ना जन्म तुन बचोनो रकम ता उल्टा-पल्टा कहानिंग बने कित्ताद मंता। हर धर्म ता मानेय, मानेय ना जन्म ता बारे ते पुस्तक लोप्पा रास्ता लेक्का मानेमांतोर मति वैज्ञानिक लोर धार्मिक पुस्तकिंग लोप्पा काल्पनिक पोल्लौंग मंतांग, अविना सच्चाई संगे बदे रिश्ता हिल्ले।”

रवि- “असल सच्चाई बातल मंता?”

बरेल- “पेका, इद भूम पोरो करोड़ों साल तल बचोनो रकम ता जीव-जंतु मंतांग। बचोनो जीव करोड़ों साल तल इगा राज कियानवु, इंजे खत्म आतांग अनि अविना जागा पूना जीवकु पोयतांग। निम्मा डायनासोर ता पोरोल केंजसी मंदाकिन। हाथी तुकू बचोनो गुणा बेहरा ओसो लंबा-चौड़ा जीव बचोनो करोड़ साल एवनल पूरा भूम पोरो राज कीसोर मत्तांग। अस्के इव जीव कुनाए राज ताकसोर मत्ता। मति लगभग 6.5 करोड़ साल मुन्ने इव डायनासोर खत्म आतांग।”

रवि- “बारांकु? बद्रम?”

बरेल- “सही-सही इत्तेके नन्ना वेने वेहा परवोन। नीवा वैज्ञानिक ओसो वेल्ले खोज कीसी इदिना जवाब हिया परिंतोर। भूम पोरोटल बदे उल्कापिंड (Meteorite) संगे टकरे माता, अद्रमासी पूरा भूम ध्वस्त आत्ता। लेवेके तिंदना-उंडना कमी आत्ता लेवेके बदे दूसरा कारण वेने मंदा परिंता।”

रवि ना कोंडा मुन्ने उचुन जोम मुन्ने टीवी ते हूइता फिल्म ता चित्र दिस्सना शुरू आत्ता। डिस्कवरी चैनल पोरो वेने ओरु इद्रम ता जीव कुना पेड़कांग, मेस्कुना पोरो उंदी कार्यक्रम हूइसी मत्तोर।

“पेरके बाताल आत्ता, आजी”

बरेल- “डायनासोर डोलसी बचोनो करोड़ साल पेरके भूम पोरो चिम्पाजी, ओरांगुटान लेक्कटा जीव विकसित आतांग। लगभग दस लाख साल मुन्ने इवे जीव कुन लोप्पा मानेय ना पुरखा लोरा जन्म आत्ता।”

रवि- “आजी, निम्मा तो हट्टोंग वाटा मंतिन। मना विज्ञान ता पुस्तक लोप्पा वेने मना पुरखा नोर मूजल मत्तोर इंजी रास्ताद मंता। मति इद्रम बद्रम आया परंता?”


बरेल- “बारांकु आया परवो? निम्मा पेड़म हिल्ला पोपोय पंडी, तरबूज तिनविना? मुन्ने ते हिल्ला मत्तांग इंजे बेगाटल वातांग? इविना पेड़क वैज्ञानिक लोर प्रयोगशालांग लोप्पा तैयार कितोर। मना भूम वेने उंदी बेहरा प्रयोगशाला लेक्का ने मंता, मति इगा प्रयोग तीरम-तीरम आंता।

बस्केने डीडटी दवाई हिदकसी नुस्मेंग हौकमूडांदू, मति नेंड अदु दवाई नुस्मेंग पोरो काम कीसोर हिल्ले। इत्तेके नुस्मेंग दवाई ता प्रभाव तल बचेमायला काजे तम्मा मेंदुल लोप्पा बदलाव कीतांग। इविन माटु पूना गुण इंतोम। अद्रमे मावा पूरखा नोरा संगे आत्ता ओरु मूज ओसो वनमानुष तल पूना गुण विकसित कितोर अनि मानेय बनेमातोर।”

रवि- “आजी, नाकिन इंजे वेने समजेमासोर हिल्ले। उचुन ओसो स्पष्ट कीमू।”

बरेल- “150 साल मुन्ने इंग्लैंड ते वरोर वैज्ञानिक मत्तोर। ओना पोरोल चार्ल्स डार्विन मत्ता। ओरु वरोर जीव वैज्ञानिक मत्तोर। लगभग 35 साल ओरु पांजांग, कोहड़ांग, गेड़ा, समुद्र ओदा वेलियसी-वेलियसी लाखों करोड़ साल मुन्ने डोलता जानवर कुना पेड़कांग ओसो अवशेष (पिस्ता हिस्सांग) जमा कीसोर मत्तोर अनि अविना अध्ययन कीसोर मत्तोर। ताना पेरके ओरु दुनिया तुन उंदी पूना सिद्धांत हीतोर “**जैविक क्रमविकास ता सिद्धांत**”। ओरु वेल्ले सबूत कुना संगे भूम पोरो दिस्सना रक-रकम ता जीव-जंतु ओसो मर्राक, पोरकांग, अविनकु मुन्नेटा पोरकांग, जीव कुनल पुटतांग इंजी साबित

कितोर। प्रकृति लोप्पा बदलाव वातेके जीव तन्ना अस्तित्व तुन बचे कियाला काजे तम्मा लोप्पा बदलाव तत्ताना कोशिश कींतांग। प्रकृति संगे तालमेल किया परवा जीवकु पिसिंतांग अनि बाकी तवु डोलिंतांग। इद्रमे भूम ता सब्बे जीव कुना जन्म आत्ता। मानेय वेने इद्रमे पुटतोर।”



रवि- “वनमानुष लोप्पा इद्रम बदलाव वात्तागडल मानेय पुटतोर? अद बदलाव नेंड वेने आया मंता या?” रवि आश्चर्य समुद्र लोप्पा नाड़ियसोर मत्तोर।

बेरेल मर्रा तन्ना पोल्लोंग शुरू कियाला काजे शब्द परहकसोर मत्ता अस्केने अचानक रवि वड़कतोर, “आजी, निम्मा नाकिन बकवा बने किया मंतिन बा.....। इव सब्बे पोल्लोंग निम्मा बद्रम पुंजी मंदाकिन। निम्मा बेगाने

दाया परविन ओसो नीवा बोरो दादोर-पेपीर वेने दाया परवोर इंदानास्के निम्मा इव सब्बे पोल्लोंग बद्रम पुत्तिन?”

बेरेल मर्रा टहटह इन्नल कव्वता। कवसोर-कवसोर पूरा बेरेल मर्रा होले माया मंता, “वेल्ले बेस..... वेल्ले बेस.... ही.....ही... हा.....हा.. आयो रा पेका नन्ना बेकेने दाया परवोन मति बचोनो जीव-जंतुंग तो नावगा वाया परिंतांग। हूड़ा, नावा सबसे पोरोटा कांदा पोरो बेहरा पिट्टे उदता, अदु हजारों किलोमीटर तल परियसी साइबेरिया तल वात्ता। नेंडु नरका अदु नावगा आराम कीसी नाड़ी परियसी दायार मति नेंड नरका अदु नाकिन जेक मत्ता साइबेरिया ता वेल्ले पोल्लोंग वेहियार। इद्रमे बचोनो पिट्टेंग नावगा वासोर मंदिंतांग। अवु आपस ते वड़किंतांग, नावा संगे ओसो नावा दादो-पेपीर ओसो नावा दादोर-पेपीरा दादोर-पेपीर वेने पुंजी मत्तोर अव पोल्लोंग नन्ना नीकिन वेहा मंतान। समजेमातिना! बेरेल मर्रा ता ऊंगसोर मत्ता टोंडांग रवि ना केंलकुन ऊड़सोरे उंदी हल्को चपात वाटता।”

अस्केने क्रैंक-क्रैंक इंजोरे अद पिट्टे अगाडल परियता। रवि अद पिट्टे ओनकिन बाय-बाय किया मंता इंजी आल्सतोर। इंजे ओनकिन बेरेल मर्रा ता पोल्लोंग पोरो विश्वास आत्ता। ओरु सिर्फ “इंगो, इद निज्जमे इत्तोर।”

सामूहिक मेहनत वन मानुष किन

मानेय बने कित्ता

कक्कारे कीसोर बेरेल मर्रा रवि किन पूछेमाता, “निम्मा नाकिन मानेय ना बुनियादी गुण बाताल मंतायो वेहा परिंतिना?”


रवि- “नावा कक्षा ता गुरुजी नाकिन मानेय बुनियादी रूप ते स्वार्थी मंतोर इंजी वेहतोर। इदे मानेय ना बुनियादी गुण वेने आंदू।”

बेरेल मर्रा- “हिल्ले, स्वार्थी मानेय ना बुनियादी गुण आयो। सामूहिक मेहनत मानेय ना बुनियादी गुण आंदू। स्वार्थ पोरोल ता गलत रुझान मानेय ना लोप्पा सिर्फ 5-7 हजार साल मुन्ने ने पुटता। इदिनकु मुन्नेटा मानेय स्वार्थ बाता आंदू इंजी पुनवा मंतोर। तम्मा जन्म तुकू बचोनो लाख साल पेरके एवनल मानेय गोहड़ी ने मंतोर। ओरगा सिर्फ ओरा सामूहिकताए मत्ता। वरोर करविने मंतोर इत्तेके सब्बे तोरे करविने मंतोर अनि वरोर ना पोट्टा निंदिता इत्तेके सब्बे तोरा पोट्टा निंदिता। अस्के सब्बे तोर कलियसी शिकार कियानोर, कलियसी वेलियानोर, कलियसी मेहनत ते बाकी काम वेने कियानोर। बोरे वरोर मानेय उदसी तिंदाना अनि बाकी सब्बे मेहनत कियाना, वरोर मानेय दूसरो ना मेहनत पोरो कब्जा कियाना लेक्कटावु अस्केटा मानेय आल्सा वेने परवोर। बचोनो आदिवासी समुदाय लोप्पा “नन्ना” इंदाना शब्द वेने हिल्ले। अगा सिर्फ माटु इंदाना शब्दे मंता। असल ते मानेय ना लोप्पा इद सामूहिकता वाले गुण हिल्लेके मानेय वेने भूम पोरो मन्नोर आंतोर। सामूहिकता मानेय ना खुंखार जानवर कुनल रक्षा कींता। सामूहिकता ता कारण ते मानेय पूना-पूना पोल्लोंग करियंतोर। इदे गुण मत्तांकु मानेय भूम ता उंदी वेल्ले कमजोर प्राणी तल भूम पोरो टा राजाल लेक्का बदलेमाता।

अदिनक मुन्ने वेने इदे गुण ता कारण ते ओरु वनमानुष तल मानेय बने मातोर।”

रवि- “बद्रम?”

बरेल मर्रा- “इद लाखों साल पाड़ना पोल्लो आंदू। लगभग 40-50 लाख साल पाड़ना। भूम पोरो मानेय इंजे पुटवा मत्तोर। मर्राक पोरो मंदाना मूंजाल लेक्का मत्ता वनमानुष इंजे भूम पोरो मंदाना शुरू कितोर। असल ते वनमानुष लोप्पा उंदी बेहरा बदलाव वात्ता। अवु मुन्नेटा रेंडु काल कुना इस्तेमाल इंजे ताकला काजे कियवा लेवा ब दे चीज तुन पोयला काजे ज्यादा इस्तेमाल कियाना शुरू कीतांग। निम्मा मदारी ना मूंजल तुन हूडितिर अदु पेरके टा कालकुना पोरो ताकिंता अनि कैदे लाटी पोयंता, अद्रमे



प्राकृतिक लेवेके स्वाभाविक रूप ते वनमानुष वेने कियाना शुरू कित्ता। इग गुण उचुन-उचुन मर्रा पोरो मंदानास्के विकसित आसी मत्ता मति वनमानुष भूम पोरो मंदाना शुरू कितोर अस्के इद गुण विकसित आयना शुरू आत्ता। इंजे अदु तम्मा मुन्नेटा कालकु ना इस्तेमाल ताकला काजे आयवा कै लेक्का ज्यादा इस्तेमाल कियाना शुरू कीतांग। मर्रा ता कांदी, बंडांग, बंडा आदी, लाटी पोयना शुरू कीतांग। ताकना काम ज्यादा से ज्यादा पेरकेटा कालकुना संगे कियानवु। ओसो तीरम-तीरम अवु सीधार ताकला करियतांग। ताना पेरके क्रांतिकारी बदलाव आत्ता अनि वनमानुष किन मानेय लेक्का बदले कित्ता। इद बदलाव ता क्रिया लोप्पा सामूहिक मेहनत सबसे महत्वपूर्ण भूमिका निभे कित्ता।”

रवि- “इद सामूहिक मेहनत बातल आंदू?”

बरेल मर्मा- “सामूहिक मेहनत इत्तेके, जानवर कुना समूह लोप्पा काम ते बंटवारा इत्तेके उंदी बेहरा मुश्किल काम तुन बचोनो लोकुर कलियसी कियाना, ताना लोप्पा हर काम ता उंदी हिस्सा तुन पूरा कियाना। उदाहरण तुकू शिकार कियाला काजे शिकार ता नालुंग बगिल वेल्ले हुशियार ते घेराव कियाना अनि घेराव कियाना ओसो घेराव तुन सुडला कीसी शिकार पोरो उंदे बेरा हमला कियाना। इव सब्बे काम पूरा तालमेल संगे कियवेके उंदी बेहरा जानवरे आयवा उंदी नुस्मे वेने हौका परवोर आंतोरा।”

रवि- “मति नन्ना पुता लेक्का वेल्ले जानवरकु समूह ते मंतांग। अवे वेने ते सामूहिक मेहनत कींतांग।”


बरेल मर्मा- “हिल्ले, समूह ते मंदाना जानवरकु सामूहिक मेहनत वेने कींतांगे इंजी आयो। कोड्राल, माव, सांभर लेक्कटा जानवरकु गोहड़ी ने मंतांग मति अविना गतिविधिं ना आपस ते विशेष तालमेल मन्नो आंता। समूह ते मंदाना पिट्टेग ना वेने आपस ते इद्रम ता बदे तालमेल मन्नो आंता। सिर्फ उर्वे वीसिंग, पेटेंग लेक्कटा जानवर कुना लोप्पा ने काम ता बंटवारा आंता। समूह ते मंदाना कोड्राल लेक्कटा जानवर समूह ते मंजी वेल्ले सुरक्षित मंदिंतांग, लेवेके अविना पूरा पिस्वल अलग मंदिंता।”

रवि- “पेरके बाताल आत्ता?”

बरेल मर्मा- “वनमानुष सामूहिक मेहनत कियाना शुरू कितोर अस्के ओना शरीर ता बनावट प्रभावित आत्ता। ताना लोप्पा मूंड मुख्य अंग मत्तांग-कै, गुडंगा ओसो दिमाग।

अलग-अलग रकम ता कार्वाईंग लोप्पा शामिल आयला काजे मीवगा बारीक काम ओसो बेहरा काम कियाला काजे उंदी कै मंदाना जरूरी मंता। नेंड मानेय बचोन रकम ता काम कींतोर, उचुन आल्सा! बंडा ओहना, बोजा तेहना, रासना, पुस्तक ता पन्ना पलटे कियाना, सिलाई, बुनाई, कढाई, पेंटिंग, कसीदाकारी.....। वरोर सुडला पेका बाता काम किया परितोर? नेटा अतिविकसित मूज बाता काम किया परितंग?

मानेय लगातार अभ्यास कीसोरे इव सब्बे करियतोर। निम्मा इव सब्बे करियाला बचोनो लाख साल लागता इंजी पुंजी आश्चर्य आयकिन। नेटा




मानेय,

मना पूरखानोर वनमानुष ना कैदे बचोन अंतर मत्ता इंजी पुंदाला काजे डेढ़ साल लेवेके रेंडु साल ता केसमुल पिल्ला बदे वस्तु तुन बद्रम पोयंता अनि अदिन निम्मा बद्रम पोयंतिनो हूइसी पुंदाला कोशिश कीमू। नेंडु पोयना तरीका मानेय ना पिस्वल ते उचुक महीनांग लोप्पा वांता मति असल ते इद लाखों साल ता मेहनत ता फास्ट फॉरवर्ड आंदू।

दूसरा बदलाव वनमानुष ना गुइंगा ते वाया मंता। ओरु अलग-अलग रकम ता काम कियाना शुरू कितोर अनि ओरा कार्रवाईंग बेरसतांग अस्के हर मानेय निगा वरोर दूसरोर किन वेहाला काजे पोल्लोंग मंदानवु।”

रवि- “मति इद सब्बे जीव ता जरूरत मंदिता। हर जीव दूसरोर किन वेहचोर मंदियर।”

बेरेल मर्रा- “नीवा पोल्लो उचुन बेसे मंता। लगभग सब्बे विकसित जीव बचोनो रकम ता विचार तोहिंता, इत्तेके होंग कियाना, जीवा कियाना, यायाना जीवा कियाना। इदिना काजे उचुन शारीरिक हावभाव ओसो उचुन लेंग संगे इव जानवर कुना काम ताकिंता। मुसुर कालम ते निम्मा पन्ने तुन टर्-टर् कियानास्के केंजसी मंदाकिरे। कोयल बंसत ओसो एही कालम तेने पाटा पारिता। इद्रम अवु मादा (पुरुष) पन्ने ओसो मादा (पुरुष) कोयल तुन केयला काजे कींतांग। टाली तन्ना पेय्या काजे उंदी खास रकम ता लेंग केयंता। तन्ना दुश्मन तुन हूइसी जानवर होंग ते केयंता। हुर्वे वीसी तुन बेगाने पुंगार ता गबू वात्तास्के अदु अदे दिशा ते परियंता अद्रमासी सब्बे हुर्वे वीसिंग किन वेने हक्के पुंगार मंतांग इंजी संदेश दोरकिंता। मति मानेय ना पुरकानोर इविनकु अलग ओसो गुणात्मक रूप ते इदिनकु बेसता उंदी पूना माध्यम विकसित कियाला सफलता दोरकी कितोर। मुन्ने दायना मुन्ने नावा उंदी



सवाल ता जवाब हीमु। निम्मा बस्केने बदे इकतारा लेवेके कीकेर नेकिह कियानास्के हूइतिना?”

रवि- “इंगो नावा लोन हेरे मंदिर लोप्पा वरोर साधुबाबाल मंदानोर। ओरु वेल्ले बेस कीकेर नेकिह कियानोर।”

बेरेल- “निम्मा सारंगी लोप्पा इचोन बेस-बेसता लेंग बद्रम पेसिंतांग इंजी बस्केने आल्सतिना?”

रवि- “इदिना बारे ते तो नन्ना बस्केने आल्सोन।”

बेरेल मर्मा- “मावा गुडंगा वेने उंदी कीकेर लेक्का ने मंता ताना लोप्पो रेंडु तारकु मंतांग। माटु नेस्किंतोम, रोमींतोम अनि वडिय इव तार कुन सांगी कींता। इद्रम सांगसी अलग-अलग रकम ता लेंग पेसिंतांग।”

रवि बदे परि तल कहानी केंजसोर मत्ता लेक्का आल्सा मंतोर। ओरु इदिना बारे ते बस्केने आल्सवा मत्तोर। ओरु “तीना लोप्पा सामूहुक मेहनत ता भूमिका बेगाडल वात्ता?”

बेरेल मर्मा- “मानेय ना गुडंगा तुन कीकेर लेक्का बने कियाला बचोनो लाख साल लागतांग। सामूहिक मेहनत ता इदिना लोप्पा निर्णायक भूमिका मत्ता। उचुन आल्सा, निम्मा ओसो नीवा गोती तोर पोडद मेंड संगे मत्तेके मीवगा वरोर-दूसरोन किन वेहतला काजे उचुक पोल्लोंग मंदिंतांग मति मीटु

अलग-अलग मत्तेके ओसो अलग-अलग लोकर किन कलियतेके मीवगा वरोर-दूसरोर किन वेहाला काजे बचोनो पोल्लोंग मंदितांग।

मानेय ना पूरखा नोरा संगे वेने इद्रमे आत्ता। सामूहिक श्रम कियाना प्रक्रिया ते पूरा समूह ता काम बंटेमाता। उंदी बेहरा काम तुन समूह पूरा कीसोर मंदानास्के हर मानेय तन्ना हिस्सा ता सुडला काम कींतोर। इदु हर मानेय ना अनुभव दूसरोर किनकु उचुन अलग मत्ता अनि हर मानेय अद अनुभव तुन दूसरो रा संगे तूसना जरूरत तुन पुट्टी कित्ता। इद काम काजे विकसित जानवरकु इस्तेमाल कियाना लेंग, शारीरिक हावभाव कम आतांग।”

रवि- “बेरेल, इद पोल्लो उचुन कठीन आत्ता। उचुन हल्को किसी समजेकीमू।”

बेरेल मर्ग- “इंगो। नन्ना कोशिश कींतान। उंदी उदाहरण संगे समजेमायकाल। नावा संगे हत्ता कालम ता यात्रा ते दयु, लगभग 10 लाख साल मुन्ने.....

अद हूड़ा! मना पुरकानोरा उंदी समूह शिकार काजे दाया मंतोर। हूड़ा मंतिना, ओरकिन हूडसी लज्जा आयमा। ओरगा गेत्तेंग हिल्लेंग, ओरु गेत्तेंग केरताद हिल्ले। मानेय किन गेत्ते ना ज्ञान वेल्ले पेरके दोरकता। हूड़ा, बद्रम सतर्कता ते ताका मंतोर। इंजे उचुन हजार साल मुन्ने ने ओरु पूरा सीधा आत्तोर। कैदल संगे ताकना काम ओरु उचुन लाख साल मुन्ने ने विडसतोर। ओरा कैदे बदे आकार हिल्ला बंडांग मंतांग। इंजे ओरु बंडांग कुन आकार हीसी ओरा हथियार बने कियाला करियताद हिल्ले।


श.....श.....श.....ध्यान ते केंजा, सबसे मुन्ने ताकनोर बातालो वेहा मंतोर। ओरु उंदी अस्पष्ट शब्द बार-बार वडका मंतोर। पेरके ताकानोरो इंजे उचुन उंदी बगिल आसी ताका मंतोर। दयु, बाताल आया मंतायो अगा हंजी हूड़ाकाल।

..... अरे, इगा तो चिकला मंता। इत्तेके मुन्ने दायनोर पेरके ताकानोर किन बदे चेतावनी हीसोर मत्तोर। इदिन समजेमासी पेरके ताकानोर उंदी बगिल दायना शुरु कितोर।”

रवि- “इंगो, निज्जमे।”

बेरेल मर्ग- “इद भाषा ता शुरुआत आंदू। शुरु-शुरु ते दसियों, सैकड़ों, हजारों पूना-पूना शब्द इस्तेमाल आयना शुरु आत्ता। निम्मा अविन ध्वनि लेवेके लेंगे वेने इंदा परिंतिन, विकसित आयना शुरु आतांग। मति इद विविधता मानेय निगा वड़कला काजे उंदी विकसित अंग मत्तास्केने संभव आंता। इद अंग गुड़ंगा ते विकसित आसोर मत्ता। जरूरत आत्तास्के गुड़ंगा तुन विकसित आयला काजे आधार दोरकता अनि मेहनत अदिन निज्जमे विकसित कीसिता।

कै ओसो गुड़ंगा संगे-संगे गुणात्मक रूप ते उंदी अंग इत्तेके दिमाग विकसित आसोर मत्ता। निम्मा बदे जानवर ता पिस्वल तुन सही तरीका ते ताकी कियाला काजे दिमाग कमांडर ओसो हेडक्वार्टर ता काम कींता इंजी



पुत्तिना। दिमाग काम कियाना रोमतेके अद जानवर डोलिंता। मानेय ना दिमाग अति विकसित जानवर जीव कुना दिमाग तुकू वेल्ले विकसित आंता। मानेय ना दिमाग ता इद विकास कै, गुड़ंगा ता विकास संगे तालमेल कीसोर आत्ता। कै ओसो गुड़ंगा ता विकास दिमाग ता विकास काजे हरीं बने कित्ता, दिमाग ता विकास कै, गुड़ंगा ता विकास तुन हल्को ओसो तेज कित्ता।

इद्रम कै, गुड़ंगा दिमाग इव मूंडिना विकास पेरकेटा रेंडु कालकुना पोरो नितला करियता वनमानुष प्रजाति तुन मानव, आधुनिक प्राणी मानेय लेक्का बदले कित्ता अनि निम्मा हूइसोर मत्ता लेक्का, ताना लोप्पा सबसे बेहरा भूमिका सामूहिक श्रम ता मत्ता।”

रवि- “बेरल, निम्मा बचोन बेसतोनिन मंतिन। हर चीज बचोन बेस समजे कीतिन। काश मावगा सब्बे गुरूजीर नीवा लेक्का मत्तेके बचोन बेस आयवर। इंजे नन्ना लोन दायकान लेवेके नाकिन पोल्लोंग केंजा लागियर। नाड़ी स्कूल ता छुट्टी आत्तास्के वेंडे वायकान, ताना पेरके निम्मा नाकिन पेरकेटा पीटो वेहाकिन।

बेरल मर्रा तन्ना ऊंगसोर मत्ता टोंडांग संगे ओना केलकुन ऊड़ता अनि रवि बेरेल मर्रा ता बारे ते आल्ससोर लोन हत्तोर।

आदिम समाज

छुट्टी आत्ता तुरंत रवि बेरेल मर्रा ता ऊंगसोर मत्ता टोंडांग संगे ऊकाइ ऊंगसोर मत्तोरा। बेरेल मर्रा सवाल कित्ता- “रवि निम्मा बस्के नीवा दादो ना दादो ना परदादो ना परदादो वेने गेड़ा ते वेलियानोर-बंडांग ना हथियार पोयवा लेवा गेत्तेंग हिल्वा?”

रवि किन बेरेल मर्रा ता पोल्लोंग केंजसी लज्जा वात्ता अनि बेरेल मर्रा ओना पुरकानोरा बारे ते इद्रम बद्रम इंदा परिंता इंजी ओनकिन उचुन होंग वेने वात्ता।

बेरेल मर्रा किन रवि बाताल आल्सा मंतोरो समजेमाता अनि वेल्ले जोर ते कव्वता। अद्रमासी ताना पोरो उदसी मत्ता सब्बे पिट्टेंग मोयोल पोरो परियतांग। बेरेल मर्रा ता कव्वना रोमतास्के रवि ना होंग ओसो बेरसता। ओरु बातालो वड़कला आल्सतोर मति अस्केने बेरेल मर्रा तम्मा कव्वना रोमी कीसी “सिर्फ निम्माए आयो, भारत ता सबसे अमीर मानेय, भारत ता राष्ट्रपति, प्रधानमंत्री, दुनिया ता सब्बे देश कुना बेहरा-बेहरा पूंजीपति, अमेरिका इंग्लैंड ता राष्ट्रपति-प्रधानमंत्री, इत्तेके दुनिया लोप्पा पुटता हर मानेय ना पुरका नोर बस्केनाई इंजे नन्ना वेहचोर मत्तान, अदे आदिम समाज तले वात्तोरा।”

बेरेल मर्रा ता पोल्लोंग केंजसोर मत्ता रवि ना होंग वेल्ले आश्चर्य ते बदलेमाता। “इद्रम बद्रम आया परिंता?” रवि किन उचुन दिख्यंग मुन्ने डिस्कवरी चैनल ते आदिवासीरा बारे ते तोहचोर मत्ता उंदी कार्यक्रम सुरता वात्ता। ताना लोप्पा कैदे अलग रकम ता ढोल पोयसी मत्ता आदिवासिरा उंदी समूह गोल-गोल तिरियसोर अलग तरीका ते एंदसोर मत्तोरा। इंजे बेरेल मर्रा ता पोल्लोंग केंजसी ओरु वेने अद समूह ते शामलि आत्ता लेक्का आल्सा

मंतोर। सिर्फ ओरे आयवा ओना सब्बे गोती तोर, सग्गा नोर अद समूह लोप्पा शामिल आत्तोर अनि अलग तरीका ते एंदना-पाटा पारना शुरू कितोर।


“बाता आल्सा मंतिन?” बेरेल मर्रा ता पोल्लोंग केंजसी रवि वर्तमान ते मलसी वात्तोर।

“बेरेल मर्रा, निम्मा ओरा बारे ते बातले पुत्तिना?” रवि इंजे तन्ना पुरकानोरा बारे ते पुंदाला वेल्ले गिर्दा आत्तोर।

“इंगो, बारांकु पुन्नोन” गुडंगा कक्कारे कीसोरे बेरेल मर्रा रवि किन ओरा बारे ते वेहाला तैयार आत्ता।

“वनमानुष तल मानेय बने मायना प्रक्रिया लगभग 10 लाख साल मुन्ने पूरा आत्ता। निम्मा मानेय ना जन्म लगभग 10 लाख साल मुन्ने आत्ता इन्दा परिंतिन। ओर मानेय नेटा मानेय लेक्का हिल्वा मत्तोर, इदिनकु उचुन अलग मत्तोर। नन्ना मुन्ने ने वनमानुष तल मानेय बद्रम पुटतोर इंजी वेहता लेक्का। दुनिया ता अलग-अलग हिस्सा ने मानेय ना बचोनो प्रजातिंग अस्तित्व ते मत्तांग। आधुनिक मानेय ना जन्म नेटल सिर्फ 1,50,000 साल मुन्ने आत्ता। अस्केटल 5000-6000 साल मुन्ने एवनल पूरा भूम पोरो बेगा वेने मानेय मत्तोर अदु आदिम कबिलाई समाज मत्ता। इदिन माटु आदिम साम्यवादी समाज वेने इंतोम। नन्ना मुन्ने ने वेहतान इद समाज लेवेके इद युग लगभग 1,45,000 साल ताकता। इदिना शुरूआत आधुनिक मानेय ना जन्म संगे आत्ता ओसो इदिना अंत मानव समाज ता गुलाम प्रथा ते बदलेमायना संगे आत्ता।

इद युग ता शुरूआत ता वेल्ले टाईम तुन माटु पाषण युग ता पोरोल ते पुंतोम। पाषाण युग (stone age) इत्तेके बंडाना युग, इत्तेके मानेय निगा बंडांग ना हथियार, बंडांग ना हथियार ता युग मत्ता। पाषाण युग ता शुरूआत ते मानेय बंडांग ना प्राकृतिक रूप ते ने इस्तेमाल कितोर। अस्के बंडांग ना इस्तेमाल जानवर कुना शिकार कियाना, भूम कातसी मड्वांग (हीरकु) तेंडला लेवेके बोट्वांग कोहकसी ताना लोप्पाटल नेंजे तेंडला काजे इस्तेमाल आयनदू। इदे आयवा गेड़ा जानवर कुनल आत्मरक्षा कियाला काजे ओसो रेंडु कबिलांग ना आपसी लड़ाईंग लोप्पा वेने इविना इस्तेमाल आयनदू।”



इंजे मानेय किस्स पोत्ती कियाला करियतोर। अस्के मानेय ना मुख्य गतिविधि तिंदना-उंडना चीज जमा कियाना मत्ता। ओरु शिकार कियानोर, गेड़ा ते पंडिंग-कायांग, मार्टिंग कारला इस्तेमाल कियानोर। इंजे अन्नम पंडिह कियाला करियताद हिल्ले। ओरु घूमन्तू पिस्वल पिसिंतोर, बदे इलाका लोप्पा शिकार ता कमी मत्तेके लेवेके तिंदना-उंडना कमी आतेके ओरु इद इलाका विइसानोर।

ओरु सुडला-सुडला समूह ते मंदानोर। 100 तुकू ज्यादा लोकुरा समूह मन्नो आयनदू। पिल्ला-पेकोर, सेड़ो-मुयतोर, आस्कु-कोयतोर सब्बे कलियसी 50-60 तुकू ज्यादा मत्तेके उंदी गोड़ी ते मंजी तिंदना-उंडना जमा कियाना वेल्ले मुश्किल काम मत्ता। निम्मा विल-काड़ी लेवेके बंदूक लेवा सिर्फ बंदांग ना बेइगांग-लाटिंग संगे शिकार ता बचोन गारंटी कियमूडांता? निम्मा उचुन आल्सा। अस्के मानेय ना अस्तित्व काजे वेल्ले मुश्किल मत्ता। गाटो ता कमी, डुव्वल-नीराल, हुंड्राल-करेंगल-एइजल लेक्कटा खतरनाक जानवर कुना खतरा, प्राकृतिक आपदांग (पिरि वायवा मंदाना, बाढ़, भूकंप, गेड़ा ते किस्स पोत्तना) लेक्कटविना कारण ते अस्के सुडला-सुडला मानव समूह कुन लगातार बचेमायना जरूरत आत्ता। वेल्ले सुडला पिल्ला-पेकोर गेड़ा जानवर कुना शिकार बनेमायनोर। गाटो दोरकना गारंटी इनपड़े हिल्ला मत्ता। नेटा लेक्का गोहकु लेवेके वंजिंग पुट्टी कियाना ओसो जमा कीसी तासना इंजे मानेय करियताद हिल्ला मत्ता।

इव सब्बे परिस्थितिंग अस्केटा मानेय लोप्पा सामूहिकता ता जबरदस्त विचार पुटता। सब्बे लोकुर कलियसी सामूहिक रूप ते बेहरा जानवर कुना शिकार कियानोर। सामूहिकता लोप्पाने ओरा पिस्वल ता सुरक्षा ता गारंटी आंता। बोनकिने ओरा समूह तल अलग कीतेके ओरा पक्का हामूर आयनदू। वरोर तन्ना काजे अन्नम जमा किया परवोर आयनोर अनि तन्ना सुरक्षा वेने किया परवोर आयनोर। अद्रमासी समूह तल अलग आयना अद युग ता सबसे बेहरा सजा आयनदू।

इद सामूहिकता ता विचार ता कारण ते ओरा पिस्वल लोप्पा स्वार्थ लेवेके निजी सम्पत्ति तुकू बदे जागा मन्नो आयनदू। बाताल मत्तायो अदु सब्बे तोरादे मत्ता, सब्बे तोरा समान अधिकार मत्ता। अद समाज लोप्पा उचुन मुल ता पोटा निंडसी मत्तेके बाकी तोर करविने मंदाना संभव मन्नो आयनदू। अद समाज लोप्पा उचुन मुल राज कियाना अनि बाकी लोकुर ओरा काजे मेहनत कियाना संभव हिल्ले। सब्बे तोर मेहनत किया लागनदू, अद्रमासी वेल्ले मुश्किल ते समूह ता सब्बे लोकुरा पोटामेंड अन्नम जमा आयनदू। अद समाज लोप्पा बोरे अमीर-गरीब, बोरे राजा-प्रजा, बोरे जमींदार-किसान, बोरे पूंजीपति-मजदूर हिल्ला मत्तोरा। अदिन काजे वर्तमान ते मत्ता लेक्का अस्के मानेय मानेय ना शोषण वेने आयो आयनदू। अदिन काजे अद समाज तुन आदिम साम्यवादी समाज वेने इंतोम। साम्यवादी समाज इत्तेके बेगा सब्बे तोर किन बराबर मौका मंदिता। बदे भेदभाव मन्नो आंता।

रवि- “इत्तेके इद समाज वेल्ले बेसता समाज मंता। सतयुग वेने इदिने इंतोरा?”

बरेल मर्ग- “असल ते अदु वेल्ले पेरके अरता समाज मत्ता। टाईम ता कमिए-कमी मत्ता। मानेय ना ज्ञान लगभग शून्य(जीरो) मत्ता। अदिन खेती कियाला वायवा मत्ता, ओसो अदु पशु-पालन वेने करियवा मत्ता। निम्मा नेता बुनियादी जरूरत कुन वड़किंतिन (गाटो, गेत्तेंग, लोन, पढ़ाई, स्वास्थ्य) इविना लोप्पाटल उंदी वेने ओरगा हिल्ला मत्ता। नेंडु सबसे ज्यादा गरीब लोकुरगा वेने अस्केटा मानेय ना तुलना ते उचुन ज्यादा सुविधांग मंतांग।

दूसरा पोल्लो, अद समाज बर्बर समाज वेने मत्ता। परिस्थितिंग बेगा उंदी कबीला लोप्पा जबरदस्त सामूहिकता ता विचार पुटिह कींता, अवे

परिस्थितिंग ओरकिन बाकी कबीलांग ना लोकर किन हौकला वेने मजबूर कींतांग। निम्मा इदिन केंजसी आश्चर्य आयकिन मति इद्रम कियाना अस्केटा समाज ता मजबूरी मत्ता।

बस्के-बस्के रेंडु कबीलांग उंदी इलाका ते एविंतांग अस्के रेंडासी किन उंदी कठीन परिस्थिति तल वेंडा लागिंता। गाटो मुन्ने ने कम मंदिंता। मुन्नेटले उंदी कबीला मुश्किल ते पोट्टा निहचोर मत्ता सीमित इलाका लोप्पा इंजे दूसरा कबीला एवता। इद्रम ता परिस्थिति ते उंदी कबीला अगाटल गुच्चना जरूरी मंदिंता। बस्केने इद्रम कीवेके रेंडासी कबीलांग नड़मा लड़ाई आंता अनि हारेमायना कबीला ता सब्बे आस्कु-कोयतोर, पिल्ला-पेकोर कुन हौकानोर।”

इद पोल्लो केंजसी रवि ना पीनि गज्जिंग पेस्तांग। ओरु अद युग ते पुट्वाद् बेस आत्ता।

बरेल मर्मा- वड़कसोर हत्ता “असल ते इद अस्केटा मानेय ना मजबूरी मत्ता। 20वी सदी ते अमेरिका लेक्कटा देशकु इराक ओसो अफगानिस्तान लोप्पा कित्ता लेक्का नेंडु मानेय पुंजी-पुंजी लड़ाई कीवोर अनि लाखो कसूर हिल्वा लोकर किन तम्मा फायदा काजे हौकोर आयनोर। वर्तमान ते अमेरिका लेक्कटा देशकु लड़ेमासोर मत्ता युद्ध कुना उद्देश्य दूसरा देशकुना जनता तुन लूटे कियाना मंता मति अस्के मानेय खुद किन जिंदा तासला काजे दूसरा कबीला ता लोकरा संगे लड़ेमाया लागनद् अनि ओरकिन हौका वेने लागिंता।”

रवि किन इव सब्बे समजेमासोर हिल्लेंग। अदिन काजे ओरु पूछेमातोर, “ओरकिन लड़ाई लड़ेमायना मजबूरी बारांकु मत्ता। अनि हारेमायना कबीला ता सब्बे लोकर किन इत्तेके सुडला पिल्ला-पेकोर किन वेने हौकसिंतोर। इदिन केंजसी बद्रमो आंता?”

बरेले मर्मा-“निम्मा आल्सा, गाटो वेल्ले कम मत्तांकु रेंडासी कबीलांग उंदे इलाका लोप्पा मत्तेके रेंडासी कबीला ना लोकर करविने डोलिंतोर। अदिन काजे मुन्नेटले पुंजी मत्ता कबीला तल बदे उंदी कबीला अद जागा तुन विड़चसी दांता। मति पुनवा मत्ता कबीला लेवेके पाइना दुश्मनी मत्ता परिस्थिति ते बदे वेने कबीला अद जागा तुन विड़सला तैयार हिल्वेके रेंडासी

कबीलांग काजे तम्मा-तम्मा अस्तित्व तुन बचे कियाना संकट वांता अनि रेंडासी कबीलांग आपस ते भीड़ेमांतांग। लड़ाईंग लोप्पा सब्बे लोकर हिस्सा एतानोर। बोरे अलग से उंदी फौज मन्नोर आंतोर। युद्ध ता समाप्त हारेमायना कबीला ता सब्बे सदस्य लोरकिन हौकतास्के आंता, बारांकु इत्तेके ओरकिन पिस्वल हियाना इत्तेके मुन्नेटले कम गाटो लोप्पा हिस्सेदारी बने कियाना आंता। अदिन काजे दूसरा कबीला ता लोकर किन पिस्वल हियाना इत्तेके इद कबीला काजे बोजा बेरसी कियाना आंता। अद्रमासी हारेमायना सब्बे लोकर किन हौकसियानोर।”

रवि- “अद्रम इत्तेके माटु गाटो कमी आतेके तम्मा कबीला ता उचुन लोकर किन वेने हौकसियानोर इंजी आल्सा परितोम?”

बरेल मर्मा- “आयो, इद्रम हिल्वा मत्ता। उल्टा तम्मा कबीला ता लोकरा संख्या तुन सुरक्षित जोड़ेकीसी तासनोर। कम संख्या इत्तेके अद कबीला बस्के वेने खत्म आया परित्ता। अदिन काजे तम्मा कबीला ता लोकरा रक्षा कियाना अस्केटा समाज ता सबसे बेहरा नैतिक जिम्मेदारी मंदानदु। बोरे बाहरी मानेय तन्ना कबीला ता लोकरा हामुर ता बदला एतना सबसे मुख्य ओसो पवित्र काम मंदानादू। इद्रमे तम्मा कबीला ता लोकर किन हौकना सबसे बेहरा पाप आयनदू। इद विचार “रक्त संबंध ता महानता” ता कारण ते पुटता।”

नेत्तुर संबंध ता महानता इत्तेके उंदे यायोना नेत्तुर मत्ता सब्बे तोरा आपसी संबंध सबसे पोरो मंदानादु। निम्मा अद समाज लोप्पा सग्गा वर्तमान समाज लेक्का हिल्वा मत्ता। इंजे अगा विभिन्न सग्गा-संबंधकु शुरू आयानाद मत्ता। अविना लोप्पा सिर्फ आस्कु ओसो कोयतोरा संबंध मत्ता। अदिन काजे हर मानेय तन्ना यायल बदु इंजी पुंजी मत्तोर मति बाबाल बोरो इंजी बोरे वेने पुनवा मत्तोर।

इद विशिष्टता ता कारम ते कबीला लोप्पा यायो ना सम्मान सबसे ज्यादा मत्ता। अदु पूरा समूह यायोना पोरोल ते पुंदानोर। अदिन काजे माटु अद समाज तुन मातृ प्रधान समाज वेने इंतोर। उंदी यायोना सब्बे पिल्ला-पेकोर उंदे नेत्तुर संबंध तोर मंदितोर, इद उंदी साधारण पोल्लो आंदू। इदे नेत्तुर संबंध ओरकिन आपसते पूरा घनिष्ठता ते जोड़े कीसी तासिंता। पेरके



चीनेमायला काजे उंदी नेतुर संबंध वाले लो कुर तम्मा पोरोल संगे तम्मा समूह ता पोरोल वेने जोड़े कियाना शुरू आत्ता, इदु बदे जानवर, मर्रा लेवेके पिट्टे ना पोरोल ते मत्ता। इद गोत्र परंपरा ता शुरुआत वेने मत्ता। इंजे बेगाने इरवुर मानेय कलियतास्के ओरा पाड़ी उंदे मंता इत्तेके ओरु इरवुरासी उंदे यायोना वंश आंदुर इंजी पुंदा वांता।

उंदी गोत्र वाले लोकुरा संख्या ज्यादा आतेके उंदी गोत्र तुन रेंडु रकम ते विभाजित कियमूझायनदू। जन संख्या ओसो ज्यादा बेरसतास्के रेंडु गोत्र ओसो उंदी बेरा 3-4 लेवेक 5 गोत्र लोप्पा विभाजित आयनदू। इव सब्बे गोत्र सजातीय गोत्र इंदानोर ओसो इव सब्बे गोत्र कुन काल्पसी मत्ता समूह तुन कबीला इंदानोर।

अद कालम ते समाज इव गोत्र, कबीला लेक्का विभाजित मत्तांग। गोत्र समूह ओसो कबीला ओरा सब्बे रकम ता कार्यवाहिंग ना लोप्पा सीमित कींतोर। ओरा सांस्कृतिक कार्यवाहिंग, आर्थिक कार्यवाहिंग, राजनीतिक कार्यवाहिंग इवे गोत्र, कबीला लोप्पा मंदितांग।

निम्मे नेंडु वेने बचोनो जागा ने अदे हजारो लाखो साल पाइना नेतुर ता पवित्रता संबंध हूड़ा परिंतिन, गोत्र संबंध कुना समझदारी नेंडु वेने मना समाज लोप्पा दिसिंता। मना देश ता ज्यादातर जाति समूह लोप्पा गोत्र व्यवस्था मंता। उंदे गोत्र ता आस्कु-कोयतोर किन हेलो-तम्मोर समजेमायमूझांता, इदिना लोप्पा वेने अदे पाइना विचार काम कींता।

रवि ना ध्यान दूसरा बगिल मत्ता। ओरु “उंदी पोल्लो वेहकान, अस्के पिल्ला-पेकोर इत्तेके वेल्ले बेस मंदानूर बहे एय्यो। ओरकिन स्कूल वेने दाया लागो आयनदू, मना महेंद्र गुरुजी ना लेक्का छड़ी ता देब्बा वेने तिंदा लागो आयनदू बहे एय्यो।”

बेरल मर्ग- “हिल्ले रा, असल इत्तेके अस्के पिल्ला-पेकोरा पिस्वल सबसे ज्यादा तिप्पलतादे मंदानदू। पूरा समूह गाटो-जावा परहकला काजे पोड़दमेंड वेलियानदू, मति पोट्टा निंडनल गाटो-जावा दोरकिता या दोरको इंजी गारंटी किया परवोर आयनोर। इरंगम काल ते उचुन महीनांग विड़चसी जानवर कुना हव्विंग उंदी दिय्या तुकू ज्यादा तासा परवोर आयनोर। हमेशा करविने मंदाना परिस्थिति वायनदू। पिल्ला-पेकोरा परिस्थिति ओसो वेने खराब मंदानादू। एद्दी-इरंगम-मुसूर तल बचेमायला काजे बदे कारगर तरीका हिल्ला मत्ता। इदे आयवा गेड़ा जानवर वेने मुन्ने पिल्ला-पेकोर कुने निशाना वाटनवु।”

रवि ना तोड़ी तल सिर्फ “ओह” इंदाना लेंग पेस्ता।

बेरल मर्ग वड़कसोर हत्ता, “पाषाण युग शुरआत तल मानेय तीरम-तीरम विकास कियाना जारी तासतोर। किस्सा पोती कियाना तरीका ओरु परहकसी मत्तोर, इंजे ओरु बंडा तुन आकार हियाला वेने करियतोर। आकार हीसोर, कोय्ये कीसोरे बंडा संगेस शिकार कियाला सुविधा वेने मत्ता अनि जानवर कुना तोला ओसो हव्वी एस्कना (कोय्यदना) वेने हल्को आत्ता। हजारों लाखोल साल ता अनुभव ओरकिन तम्मा वात्तावरण तुन समजेमायला मदद दोरकता। बद पोरका ओसो बद जानवर ओरा काजे फायदा तव मंतांग, बद नुकसान कींता इंजी अस्के एवनल जानकारी दोरकसी मत्ता। परिस्थिति संगे लड़ेमायला करियसी मत्तोर। ओरा गाटो-जावा लोप्पा पूना-पूना वस्तुंग शामिल आसोर हत्तांग। किस्स ते बोड़सता हव्वी तित्तांकू ओरा शरीर वेने तूलनात्मक रूप ते ज्यादा मजबूत आत्ता। आकार हीता बंडांग ना औजार ओरकिन मुन्ने तुकू ज्यादा बेसता शिकारी बने किता।

अस्केने मानेय एंदना ओसो पाटा पारना करियतोर। ओरु नेटा लेक्का वरोरे लेवेके जोड़ी संगे एंदना लेवेके, इद्रम ता पाटांग पारोर आयनोर। ओरा

पिस्वल सामूहिक मत्ता अदिनके ओरा विचार वेने सामूहिक मत्ता। इदे सामूहिकता ओरा पाटांग, डाकांग, पंडुम लोप्पा दोरकिंता। ओरा इव सब्बे कला ता रूप वेने सामूहिक मंदानदु। ओरु समूह संगे एंदानोर, सब्बे कलियसी पाटा पारानोर।”

रवि- “इंगो, नन्ना डिस्कवरी चैनल ते इद्रम ता कार्यक्रम हूइतान। बेरेल मर्फा, अस्के वेने मानेय निगा ओरा फोटो पिङ्गला कैमरा मत्ता या?”

बेरेल मर्फा ता दाङ्गिं जोर ते होलेमातांग। हा.....हा.....हा.....ही.....ही.....ही....., अरे हिल्ले अस्के मानेय निगा कैमराए आयवा ओरगा लोहा-तांबा लेक्कटा बदे वेने धातू हिल्ला मत्ता। कैमरा बनेमायना प्लास्टिक ता बारे ते इत्तेके मानेय हत्ता सदी तेने पुंदा परतोर। ओरु फोटो बचोनो हजार साल लेवेके बचोनो लाख साल पाइना हिल्ले। अव फोटोंग इंजेटा जमाना तावु आंदुंग। नेंडु दुनिया मेंड बचोनो आदिवासी समूह मंतांग अविना नइमा हंजी डिस्कवरी चैनल वालेर फिल्म बने कींतोर अनि ओरा फोटो पिङ्गितोर।”

इद पोल्लो रवि किन ओसो ज्यादा आश्चर्य किता। ओरु ओना हेरे-गरे मत्ता दुनिया ता लेक्का ने पूरा भूम पोरो वेने मंता इंजी आल्सानोर।

बेरेल मर्फा- “इंजे वेने दुनिया ता विभिन्न हिस्सा ने इद्रम ता आदिवासी समूह मंतांग अविन पूना दुनिया ता ज्ञान हिल्ले। ओरा औजारकु इंजे वेने बंडानवे मंतांग, ओरकिन गेत्तेंग करदना ज्ञान वेने हिल्ले। तम्मा भारत ता निकोबार द्वीप समूह ते वेने इद्रमताए मानेय ना समूह मंता।”

रवि ना तोड्डी तल आश्चर्य ते “अद्रमा” इंजी पेस्ता।

बेरेल मर्फा वड़कसोर हत्ता, “भारत लोप्पा लगभग 9 करोड़ आदिवासीर मंतोर। मति सब्बे निकोबार ता आदिवासी समूह लेक्का पाषाण युग ता पेरके अरता परस्थिति ते हिल्ले। ओरु विकास ता अलग-अलग मंजिल ते मंतोर। उचुन विकसित आसोरे मीवा समाज ताचोन विकसित आयाना गरे एवतोर। उचुन तम्मा पिस्वल लोप्पा बस्केने बस, कार वेने हूइताद हिल्ले।”

रवि तल्ला ताइकतोर। बेरेल मर्फा पूछेमाता, “बाताल आत्ता? समजेमासोर हिल्ले या?”

रवि- “निम्मा वेहता पोल्लो समजेमाता मति उंदी सवाल नाकिन लेस्कि किया मंता। वीर आदिवासिर इद्रम बारांकु मंतोर? उचुन पेरके अरसी मंतोर? उचुन उंदी स्तर एवनल विकसित आत्तोर!! उचुन ज्यादा विकसित आत्तोर!!!”

बेरल मर्ग- “असल ते इद सिर्फ आदिवासिराए आयवा पूरा मानव समाज ता कहानी आंदू। बस्केने दुनिया ता बदे इलाका विकसित आंता अनि बस्केने बदे दूसरा इलाका। नीवा इतिहास-भूगोल ता पुस्तक तेंडसू दुनिया ता नक्शा हूड़ा। ताना लोप्पा इथोपिया पोरोल ता देश परहका। वेल्ले मुश्किल ते परहका लागिंय, ज्यादा तर लोकर इद देश ता पोरोल वेने केंजाद हिल्ले। अफ्रीका महाद्वीप ता वेल्ले गरीब देश आंदू। मति मानव सभ्यता ता इतिहास लोप्पा इद देश ता पोरोल सबसे मुन्ने वांता। बारांकु इत्तेके लगभग 1.5 लाख साल मुन्ने आधुनिक मानेय ना जन्म इगाने आत्ता। नेंडू पूरा दुनिया लोप्पा ओरे मानेय ना वंश वेलिया मंतोर। इथोपिया ते पुटता आधुनिक मानेय सात समुद्र वेंडसी दुनिया ता कोंटा-कोंटा ते एवसी उदतोर। निम्मा वेने ओराए वंशज आंदिन। पांडरी, कमकाल, भूरियाल, कारियाल तोला वासे सब्बे मानेय इथोपिया तले पुटता मानेय आंदुरं।”

नेटा गरीब अफ्रीका देश इथोपिया ता भूम पोरो पुटता पेरके 10000 साल मुन्ने एवनल मानेय दुनिया ता विभिन्न देश कुना लोप्पा घूमंतू पिस्वल पिस्सानोर। सिर्फ 10,000 साल मुन्ने ओरु पहली बेरा स्थाई पिस्वल पिस्सना शुरू कितोर। सिर्फ 6000 साल मुन्ने ओरु सभ्य मानेय लेक्का पिस्वल पिस्सना शुरू कितोर। ओसो उंदी बेरा निम्मा दुनिया ता नक्शा तेंडा। तीना लोप्पा मिस्र ता नील डोड्डा, इराक ता दजला-फैरात, पाकिस्तान लोप्पा सिंध ओसो चीन लोप्पा पीली डोड्डा परहकना कोशिश कीमू।

इव नालुंग मुख्य महत्वपूर्ण जागांग लोप्पा मानव सभ्यता विकसित आत्ता। निम्मा मानेय पुटता जागा ते सभ्यता विकास आयवा लेवा अदिनकु हजारों किलोमीटर जेक ता जागा ने विकसित आत्तादु हूड़ा परिंतिन।

उचुन सौ साल पेरके इव सभ्यतांग वेने नष्ट आतांग। लगभग 2500 साल मुन्ने भारत ओसो चीन मानव सभ्यता विकास ता प्रमुख देशकु बनेमातांग। इदु 400-500 साल मुन्ने एवनल ताकता। निम्मा ईस्ट इंडिया

कंपनी भारत ते वात्तास्के हर चीज सोना-चाँदी हीसी अस्सा लागनदू इंजी पुंजी आश्चर्य आयकिन, बारांकु इत्तेके अस्के यूरोप वालेरिगा इविन विड़चसी भारत तुन हियाला बाताले हिल्वा मत्ता।

परिस्थिति बदलेमाता। यूरोप विकसित आत्ता। इंग्लैंड पूरा दुनिया ता बादशाह बनेमाता। नक्शा लोप्पा इंग्लैंड तुन हूड़ाटू। वेल्ले सुडला देश मंता। मति उंदी कालम ते दुनिया ता वेल्ले इलाकांग पोरो इंग्लैंडवासिरा राज मत्ता। भारत ओसो चीन पेरके अरतांग अनि दुनिया ता सबसे गरीब ओसो पेरके अरता देश कुना लेक्का गिनती आंता।

इंग्लैंड ता राज वेने ज्यादा जोम ताका परवो आत्ता। दूसरा विश्व युद्ध पेरके इंग्लैंड ता प्रभाव वेने खत्म आत्ता। अमेरिका ओसो सोवियत संघ दुनिया ता रेंडु महाशक्तिंग बनेमासी मुन्ने वातांग। अनि सोवियत संघ वेने खत्म आत्ता। सिर्फ उंदी अमेरिकाए महाशक्ति लेक्का दुनिया पोरो राज किया मंता। वर्तमान कालम ते अमेरिका ता तिलिस्म वेने देगा मंता। उचुन साल पेरके अमेरिका वेने महाशक्ति लेक्का मन्त्रो आयार अनि बदे दूसरा देश, समाज प्रमुखता ते मुन्ने वायर इंदाना पोल्लो बदे आश्चर्य ताद हिल्ले।

रवि- “इंगों, इद्रम इत्तेके नन्ना मुन्ने बस्केने आल्सताद हिल्ले। मति नावा सवाल इंजे वेने अदे मंता, इद्रम बारांकु आंता?”

अस्केने जेक तल उचुन लोकरा लेंग केंजा वात्ता। बचोनो लोकर रवि ना पोरोल केय्या मंतोर। “अरे बाप रे.... वेल्ले बेरा आत्ता”, रवि आल्सतोर। बेरेल मर्रा ता पोल्लोंग रवि वेल्ले रम्मेमासी केंजसोर मत्तांकु बस्के जुल-जुल आत्ता अनि हीकाट आत्तायो पुंदा वायो आत्ता। लेंज वेहच ओनकिन इंजे हीकाट आत्ता इंजी वेहा मंता। ओरु जल्दिए बेरेल मर्रा तुन नाइ वेंडे वायकान इंजी वेहची लेंग केंजा वासोर मत्ता लोकरा बगिल मिरितोर।

उत्पादन शक्तिंग

रवि बचोनो दिव्यांग पेरके बेरेल मर्रा तिगा वात्तोर। बेरेल मर्रा ओना काजे हर्री हूइसोरे मत्ता। रवि किन अद दिव्या वेल्ले पोल्लोंग केंजा लागता। ओरु गेड़ा ते अचोन जोम बाता कीसोर मत्तोरो बोनकिन समजेमासोर हिल्ला मत्ता। ओना बाबाल इत्तेके उंदी बेरा वरोर गूनियाल किन केयला तैयार आत्तोर बारांकु इत्तेके ओरु रवि ना पोरो बदे जादू टोना (डीट अरता) आत्ता इंजी आल्ससोर मत्तोर। उंदी बेरा ओरु बेरेल मर्रा ता बारे ते वेहाना इंजी आल्सतोर मति पेरके केमेक आत्तोर बारांकु इत्तेके लोकुर अस्के एवनल ओना पोरो जादू टोना आत्ता इंजी आल्सतोर। मति नेंडु बदे चिंता हिल्ला मत्ता। नेंडु स्कूल ता अचानक छुट्टी आत्ता अनि क्रिकेट करसना बहाना कीसी ओरु अगा हत्तोर।

बेरेल मर्रा रवि किन जीवा कीसी कुत्तुल कोरा ने उदी कित्ता। बेरेल मर्रा हत्ता रेंडु दिव्या नल जेक देश तल पिट्टेंग वासी अदिना कांदांग पोरो डेरा वाटसी मंतांग अनि दुनियामेटा पोल्लोंग केंजी किया मंतांग। बेरेल मर्रा अदिन पूना पोल्लोंग वेहाला आल्सता मति रवि ता विचार ते अद दिव्या ता सवालकु हिरकसी मत्तांग। अदिन काजे तन्ना सवाल ओसो उंदी बेरा पूछेमातोर।

बेरेल मर्रा कव्वसोर इत्ता, “निम्मा इंजे अव सब्बे पोल्लोंग मरंगताद हिल्ले, वेल्ले बेस।” ओरु कक्कारे कीसी तन्ना गुडंगा साफ कित्ता, इदिन हूइसी वेल्ले बेहरा पोल्लोंग वेहाना शुरू कित्तापु दिस्सा मंता।


“नीवा सवाल ता जवाब लोप्पा पूरा दुनिया ता इतिहास ता सार मकसी मंता, बद दिव्या तल मानेय भूम पोरो पुटतोर अद दिव्या तल नेंडु एवनल मानेय ना पूरा विकास क्रम उंदी बुनियादी मानेय ना रुझान पोरो टिकेमासी मंता। इद रुझान-मानेय ना हर काम जल्दी कियाना, बेस

कियाना, ज्यादा रिजल्ट दोरकी कियाना ओसो काम तुन हल्को कियाला आल्सनादु मंता।

इद रुझान तुन समजेमायला वेल्ले जेक दायना जरूरत हिल्ले। निम्मा खुद वेहा, निम्मा होमवर्क उंदी घंटा ते आयवा आधा घंटा ते किया परतेके वेने निम्मा उंदी घंटा तेने होमवर्क कीतिना? निम्मा नीवा काम बेस, ज्यादा बेस आयना इंजी आल्सविना?”

मानेय पहली बेरा बंडांग कुना आकार हीसी कोय्ये कितोर। अदु सिर्फ अदिना संगे जानवर कुना शिकार कियाना हल्को आयना इंजी, मार्टिंग कारसी तिंदला हल्को आयना, ओरु काम कियाल हल्को आयना, मेहनत कम लागना इंजिए कितोर। मानेय बंडांग ना हथियारकुना जागा ते तांबा ओसो कांसा ता हथियार कुना इस्तेमाल शुरू कितोर अस्के ओरा विचार ते काम जल्दी ओसो ज्यादा आयना, कम मेहनत लागना ओसो काम वेने बेस आयना इंजीए मत्ता।

तीरम-तीरम मानेय पशुपालन कियाना करियतोर। असल ते गेड़ा ते मंजोरे ओरु उचुन जानवर हमेशा वेल्ले जेक मंदितांग मति उचुक मानेय ना गरे वायना शुरू कित्तादू, ओरा संगे कलिमलियी मंदानदु हूड़तोर। अनि गरे वासी कलियसी मंदाना जानवर कुन मानेय सबसे मुन्ने पालतू बने कितोर। इद्रम ता जानवर कुना लोप्पा नेय्यु, टाली, बिल्लाई लेक्कटवु मंतांग। इद्रम ता जानवर कुन पालतू बने कीतांकु ओरा काम वेल्ले हल्को आत्ता। इंजे शिकार कियाला काजे ओरकिन गेड़ा ते वेलियना जरूरत मन्नो आयनदू। संगे ने टालता पाल वेने ओरा पोट्टा निहहतना चीज लोप्पा शामिल आत्ता।



इद्रमे माटु खेती ता बारे ते वेने वड़का परितोम। हजारो साल ता अनुभव मानेय किन खेती कियाला करिहता। पशु पालन लेक्का ने खेती वेने मानेय ना प्रकृति पोरो आधार आसी मंदाना तुन कम कीसिता।

खेती ओसो पशु पालन मानेय कुन अन्न डग्गी कियाना प्राणई तल अन्न पुट्टी कियाना प्राणी लेक्का बने कित्ता। इंजे ओरकिन अन्न डग्गी कियाला काजे गेड़ा ते हंजी आकवियार तल आचला लागो आंता। खेती, पशु ता रूप ते ओरगा अन्न मंता। इद्रम खेती, पशु पालन ता खोज अस्केटा महान क्रांतिकारी खोज मत्ता। मति ओसो उंदी खोज ता बारे ते वेहवा लेवा मानव सभ्यता ता अद कालम ता खोज ता पोल्लो आधाए मंदिता।

रवि- “अद बद खोज मत्ता?”

बरेल मर्रा- “कच्ची ता खोज। कच्ची ता खोज मानव सभ्यता तुन विकसित कियला जबरदस्त भूमिका निभे कित्ता।”

रवि- “अद्रमा!! कच्ची ता खोज बोर कितोर?”

बरेल मर्रा- “बोरे मानेय ना पोरोल एतना संभव हिल्ले। बारांकु इत्तेके इदिना काजे मानेय मुन्नेटले कोशिश कीसोर मत्ता चीज आयो। इद खोज अचानके आत्ता। गाटो परहकला मानेय हिक्के-हक्के वेलियसोर मत्तोर। अस्केने ओरू पूना-पूना वस्तु ना बारे ते पुत्तोर। इद्रमे ओरकिन इद कच्ची वेने दोरकसी मंदियर। शुरू ते ओरू कच्ची ता इस्तेमाल कियानदू पुनवा मत्तोर, मति बस्केने उंदी पूना जानकारी ओरू कच्ची ता बारे ते वेने पुंजी मंदानूर। निम्मा कच्ची वेल्ले सख्त मंता इंजी पुत्तिने, इदिन बद्रमताई आकार हियाना हल्को हिल्ले, इदिन हथौड़ा, चाकू लेवेके बदे वेने दूसरा रूप हल्कोए हियमूड़ांता। कच्ची ता खोज मानव सभ्यता ता इतिहास तुन गुणात्मक रूप ते बदले कित्ता। बंडांग ना औजार संगे गेड़ा नड़कसी साफ कियाना संभव हिल्ले। अदिन काजे खेती लायक भूम सिर्फ उचुने डोडुंग ओदा उस्का पोरोने दोरकिता। सिंधु घाटी, नील डोडु, दजला फैरात, पीली डोडु ओदा ना भूम दुनिया ता पहली सभ्यतांग ना हादना-पूयना पेस्केटा मुख्य कारण मत्तांग। मति कच्ची ता खोज इंजेटा परिस्थिति तुन बदले कीसिता। गुप्प गेड़ा वाले उर्वरक भूम पोरो वेने खेती कियाना संभव आत्ता। कच्ची ता मस्कुना संगे मानेय गेड़ा नड़कना, कच्ची ता नांगेल संगे भूम पूहतना काम कितोर।

अद्रमासी सिर्फ पूना-पूना इलाकांग लोप्पा खेती कियानाए आयवा खेती लोप्पा उत्पादन वेने बेरसता। इद्रम कच्ची ता खोज संगे खेती जबर्दस्त विकास आत्ता।

इव मूंड महान खोज कुना (पशु पालन, खेती ओसो कच्ची) कारण ते समाज उंदी डाका मुन्ने डेयता अनि मानव समाज आदिम कबिलाई समाज (आदिम साम्यवाद वेने इंतोम) तल दूसरा सामाजिक कालम ते, गुलाम प्रथा लोप्पा हत्ता।

रवि इंजे वेने गेड़ा लोप्पा आदिवासी समूह कुना संगेने वेलिया मंतोर। ओरु ओना कोंडा मुन्ने बचोनो लाख साल पाड़ना मानव समाज सजीव आसी नित्तता लेक्का आल्ससोर मत्तोर। ओरु “ओरा रीति-रिवाज, सोच-विचार बाताल मत्तांग? इंजी पूछेमातोर। ओरु तम्मा नालुंग बगिल ता दुनिया ता बारे ते बद्रम आल्सानोर?

बेरल मर्ग “निम्मा वेल्ले बेसता सवाल कीतिन। निम्मा, विचार बेगाडल पुट्टितांग इंजी पुत्तिना? इद सवाल ता जवाब हियाना मुन्ने नन्ना उंदी दूसरा सवाल पूछेमांतान।

निम्मा बस्केने असल पिस्वल ते हूड़वा मत्ता, केंजवा मत्ता लेवेके बेगाने पड़ेमायवा मत्तादिना बारे ते नीवा कंजकड़ ते हूड़तिना?”

रवि आल्साड़ ते अरतोर। ओरु वेल्ले बेरा कंजकतोर मति हमेशा ओना कंजकड़ ते इतिहास ता महेंद्र गुरुजी किने हूड़ानोर। बस्के ने ओरु तन्ना कंजकड़ ते महेंद्र गुरुजी किन पिटाई कियानोर अनि बस्के ने ओनकिन महेंद्र गुरुजी तन्ना कंजकड़ ते गायब आत्तादू दिस्सानोर। ओनकिन वेलियाना वेल्ले गिर्दा मंदानदू। तन्ना कंजकड़ ते वेने ओरु वेलियसोरे मंदानोर(मेट्टा पोरो, समुद्र ओदा, झील लोप्पा ओडा ते उदसी खुश आसोरे ओरु (असल पिस्वल ते हिल्ला बदे वस्तु हूड़तोर बहे इंजी सुरता किया मंतोर मति ओनकिन बदे वस्तु सुरता वासोर हिल्ला मत्ता। ओनकिन अचानक सुरता वात्ता, “इंगो, हत्ता हप्ता तेने नन्ना कंजकतान ताना लोप्पा वेल्ले बेहरा कस्सा ते नन्ना वेलियसोर मत्तान अनि नाकिन उंदी वेल्ले सोबा ता जलपरी दिसता। अदु नाकिन कस्सा ते जेक-जेक एवनल वेलिहता वेने। नन्ना असल ते बस्केने जलपरी हूड़ोन मति अदु नावा कंजकड़ ते बारांकु दिसता?”

बेरेल मर्रा- कव्वसोर “निम्मा जरूर जलपरी ता कहानी पढ़ेमासी मंदाकिन लेवेके नीआजी नीकिन जलपरी ता कहानी केंजी कीसी मंदियर इत्ता।”

रवि किन ओरु 6 महीनांग मुन्ने तन्ना जलपरी कहानी वाले पुस्तक पढ़ेमातादु सुरता वात्ता। ओरु “बेरेल मर्रा तुन जलपरिंग बंगा मंतांग? इंजी पूछेमातोर।”

बेरेल मर्रा- “असल इत्तेके जलपरिंग हिल्लेंगे। अवु मानेय ना दिमाग ता उंदी सोबा ता कल्पना आंदू। मावा विचार, मावा कल्पनांग मावा नालुंग बगिल ता समाज तल पुट्टिंतांग। मानेय डोड्डा, समुद्र ते नाडियसोर मत्ता कीकेंग हूइतोर, मानेय तम्मा समाज लोप्पा सोबा ता मोक्कम कु हूइतोर। ओरु तम्मा कल्पना ते कीकेंग ओसो पिल्ला तुन जोड़े कितोर (कीके ता मेंदुल ते उंदी बदे सोबा ता पिल्ला ता मुक्कम तुन जोड़े कीसी उंदी जलपरी लेक्का बने कीसितोर। नन्ना इद उदाहरण बारांकु हिया मंतान इत्तेके नीवा सवाल ता जवाब इगाडले शुरू आंता। आदिम समाज लोप्पा मत्ता मानेय तम्मा वात्तावरण तुक्क बाहर ता वस्तुंग ना बारे ते आल्सा वेने परवोर आयनोर। तम्मा अस्तित्व ता शुरूआत ता उचुन लाख साल एवनल ओरु सिर्फ ओना पोट्टा निहतना एवनले जुड़ेमासी मत्ता। बद्रम पिस्सना? पोट्टा बद्रम निहतना? शिकार बद्रम कियाना? खुद किन जंगली जानवर ता शिकार आयना तुक्क बद्रम बचे कियाना? पिर् कालम ते बद पंडी तिंदाना एही कालम ते बद पंडी तिंदना बद काया मार्टिंग दोरकिंतांग? इंदान लेक्कटवु।

गेड़ा ते वेलियसोरे ओरु विभिन्न प्राकृतिक घटनांग ना जानकारी दोरकी कियाना स्वाभाविक मत्ता। गेड़ा ते किस्स पोत्तना, डोड्डा ते ऊसा वायना, मुसूर वायना, वेत्तना, भूकंप वायना, ज्वालामुखी पोक्कना, तरस, मिच्चो, जहर पुडियकुना कस्कना लेक्कटा बचोनो घटनांग ओरा पिस्वल ते आंतांग ओरकिन प्रभावित कींतांग। उचुक घटनांग ओरकिन नुकसान कींतांग अनि उचुक ओरकिन फायदा कींतांग। अद्रमासी ओरा वात्तावरण तुन समजेमायला मदद दोरकिंता। निम्मा ओरा शुरूआत ता पेनकु प्राकृतिक चीजकु इत्तेके किस्स, वड़िय, एर, भूम, मर्रा, तरस, मेट्टा, डोड्डांग लेक्काटवु मंतांग इंजी पुंजी आश्चर्य आया। ओरकिन इव सब्बे ना जरूरत वेने मत्ता

मति ओरु इविनकु वेरियानोर वेने। एर हिल्वा पिस्वल हिल्ले मति इदे एर ऊसा लेक्का वासी तबाही वेने कींता। किस्स गेड़ा जानवर कुनल रक्षा कींता, ओरकिन इरंगम तल बचे कींता, ओरकिन बोड़सता हव्विंग तिंदला दोरकिंता मति इदे किस्स ओरकिन पोत्ती किया वेने परिंता। अदिन काजे ओरु इदिनकु वेरियंतोर, ओरु तन्ना अनुसार इव प्राकृतिक ताकतकु खुश मंदाना इंजी सब्बे कोशिश कीसोर मंदिंतोर। इद प्रक्रिया लोप्पा बचोनो कर्मकांड ता जन्म आत्ता।”

रवि- “इव कर्मकांड बाताल आंदुंग?”

बरगद मर्रा- “हवन यज्ञ कियाना, मंत्र तंत्र ता इस्तेमाल, बली हियाना, अलग-अलग रकम ता धार्मिक क्रियांग कियाना विभिन्न कर्मकांड आंदुंग। इदे धर्म ता शुरूआती रूप वेने मत्ता।

आदिम कबिलाई समाज समूह ते मत्तांकु, समूह लोप्पा मंदानाए ओरा सुरक्षा मत्ता, ओरा अस्तित्व पिसिस मत्ता, अदिन काजे ओरा पिस्वल ता हर वस्तु सामूहिक मत्ता। ओरु समूह तेने पाटांग पारानोर, समूह तेने एंदानोर, बोरे वरोर करविने ने मत्तेके सब्बे तोर करविने मंदानोर, बोरे वरोना पोट्टा निंडतेके सब्बेतोरा पोट्टा निंदिता। बोरे वेने पूरा गाटो हड़पे कियाला लेवेके खुद मेहनत कियानायो ओसो बाकी लोकुर ओरा काजे मेहनत कियाना इंजी आल्सा वेने परवोर। ओरु आपस ते लड़ाई वेने सामूहिक रूप तेने उदसी हल कियानोर। ओरा लोप्पा बोरे राजाल लेवेके जमींदार, प्रधानमंत्री हिल्लेर ओसो बोरे गुलाम लेवेके नौकर, मजदूर वेने हिल्लेर। समूह ता उंदी वरिष्ठ महिला समूह ता प्रधान मंदानदू। सब्बे तोर अदिन तम्मा मुखियाल मानेमायनोर अनि अदिना नेतृत्व ते शिकार कियानोर, आपस ता झगड़ांग हल कियानोर, बस्के-बस्के आयना बाकी कबीला संगे लड़ाईंग लड़ेमायनोर।

ओरा पूरा पिस्वल परिस्थितिंग संगे जुड़ेमासी मंता। ओरा विचारकु वेने पूरा प्रकृति संगे, पदार्थ संगे, वस्तु संगे जुड़ेमासी मंता। इंजे ओरु हामुर पेरके बाताल आंता? भूम-पोड़द-लेंज-उक्कांग बेगाडल वातांग? स्वर्ग नर्क बाताल? भगवान (पेनकु) लेवेके सर्वशक्तिमान ताकत अस्तित्व ते मंताए

हिल्ले? मानेय बेगाडल वात्तोर इंदाना लेक्कटा विषय कुना पोरो आल्सना शुरू कित्ताद हिल्ले।

मानेय ना जनम पेरेकेटल बचोनो लाख साल एवनल मानव सभ्यता इद्रमताए पिस्वल पिसता। बचोनो लाख साल एवनल ताकता इद्रम ता मानव समाज तुन माटु आदिम साम्यवादी समाज इंतोम।”

रवि- “वाह बेरेल! निम्मा तो हर पोल्लो वेल्ले बेस समजे कीतिन। इंजे निम्मा नाकिन इद समाज बदरम बदलेमाता इंजी समजे कीमु। लाखों साल एवनल सामाजिक ढांचा आदिम साम्यवादी बने मासी मत्तेके ताना लोप्पा बदलाव बारांकु आत्ता? इद बदलाव बोरे तत्तोर?”

बेरेल मर्रा- “इद बदलाव बोरे वरोर मानेय आयवा समाज लोप्पा उत्पादन ता परिस्थिति बदलेमातांकु वात्ता.....”

रवि- “इद उत्पादन ता परिस्थितिं बातांग आंदुंग?”

बेरेल मर्रा- “अरे, वेहितान। अचोन बारांकु कंदरेमाया मंतिन? नन्ना नीकिन मुन्ने वेहता लेक्का शुरुआत ते मानेय अन्न पुट्टी कियवा लेवा अन्न जमा कियानोर। अस्के गाटो दोरकिंताए इंजी बदे गारंटी मन्नो आयानदू। अन्न दोरकतास्के पोटरुमेंड तिंदानोर अनि दोरकवास्के ओरु करविने मंदानोर। मति अन्न उत्पादन कियाला करियतास्के इद तिप्पल वेल्ले कम आत्ता। इद्रम मानेय अन्न डग्गी कियाना तल अन्न उत्पादन कियानोर बनेमातोर। मुन्ने वेने नन्ना काम ज्यादा आयना, बेस आयना, कम मेहनत संगे आयना, जल्दी आयना रुझान मुन्नेटले मत्ता इंजी वेहतान। अन्न उत्पादन तल वेने इद्रमे आत्ता। अन्न वेल्ले आयना शुरू आत्ता, मेहनत कम लागता, टाईम ते अन्न दोरकना शुरू आत्ता। इद्रम आतांकु मानेय करिवने डोलनादू रोमता।

खेती, पशु पालन संगे मानेय अन्न डग्गी कियाना तल अन्न उत्पादन कियानोर बनेमातोर। कच्ची ता खोज इद प्रक्रिया तुन बचोनो गुणा तेज कित्ता। अन्न उत्पादन ता प्रक्रिया लोप्पा मेहनत कियाना मानेय कुन औजार ता जरूरत मंदित्ता। इव मुन्ने बंडा ना औजारकु मत्तांग अनि पेरेके कांस ता ओसो ताना पेरेके कच्ची ताव मत्तांग। इविन माटु उत्पादन शक्तिंग इंजी पुंतोम। उत्पादन शक्तिंग इत्तेके मेहनत कियानोर ओसो औजार कुना मदद ते उत्पादम आंता।

उत्पादन प्रक्रिया सम्पन्न आयना भूम-नेली तुन उत्पादन साधन इंतोम।

उत्पादन प्रक्रिया लोप्पा विभिन्न लोकुरा नइमा मंदाना आपसी संबंध तुन उत्पादन संबंध इंतोम। इत्तेके उत्पादन साधन कुना मालिकाना बोनिगा मंता इंजी तय कियाना, उत्पादन बोर कियाला वेहितोर, उत्पाद पोरो बोना अधिकार मंता ओसो वितरण ता अधिकार बोना कैदे मंता इंदानवु।

मानव सभ्यता ता विज्ञान उत्पादन शक्तिंग लोप्पा लगातार विकास आसोर दांता इंजी वेहिंता। इद विकास बदे बेहरा बदलाव तुन सुरता तासिसी आयना उत्पादन ज्यादा आयना, कम मेहनत संगे आयना, बेस आयना, जल्दी आयना इंजी आंता।

मति इदे विकास उंदी टाईम पेरके बेहरा आमूल चूल बदलाव तुन जन्म हींता अनि समाज ता पूरा ढांचा बदलेमांता।”

रवि- “बेरेल मर्रा, पोल्लो नाकिन समजेमायो। उचुन स्पष्ट वेहा।”

बेरेल मर्रा- “इंगो, माटु मना इतिहास लोप्प मुन्ने दांतोम। नन्ना मुन्ने वेहता पोल्लो तुन व्यवहार ते लागू आसोर मत्तादू हूड़ाकल।”



अतिरिक्त उत्पादन ओसो गुलाम प्रथा

आदिम साम्यवादी समाज ता जागा बद समाज एतितायो
अदिन माटु गुलाम मालिक-गुलाम युग लेवेके गुलाम प्रथा
ता युग इंतोम। दुनिया मेंड सबसे मुन्ने मानव सभ्यतांग
आदिम कबिलाई समाज तल पेसिसी नागरिक समाज लोप्पा नेंगता जागा
ने गुलाम प्रथा समाज ता स्थापना आत्ता। इद वेल्ले पाड़ना पोल्लो आयो।
आदिम साम्यवादी समाज बचोनो लाख साल एवनले ताकता। गुलाम प्रथा
ता युग सिर्फ 6000-6500 साल मुन्ने शुरू आत्ता अनि इद 2000 साल
मुन्ने एवनल ताकसोर मत्ता।

गुलाम प्रथा रेंडु वर्ग लेक्का विभाजित आसी मत्ता। उंदी बगिल मुद्रामेंड
गुलाम मालिक मत्तोर, दूसरा बगिल समाज ता बहुसंख्यक लोकुर गुलाम
बनेमातोर। गुलाम मालिक बदे मेहनत कीवोर, ओरा काम गुलाम लोर पुट्टी
कित्ता वस्तुंग ना इस्तेमाल कियाना। गुलाम लोकुर नरका-पियल मेहनत
कींतोर। ओरगा बदे अधिकार मन्नो आंता। गुलाम मालिक ओरकिन हौका
परितोर ओरकिन करविने तासा परितोर, ओरकिन कोड़ा संग्ता पिट्टहा
परितोर लेवेके ओरा कै-काल उर्रहा परितोर। गुलाम लोरा मंडी वाटा परितोर,
नेटा हाटुम लोप्पा हंजी अल्लू-उल्ली अस्सना लेक्का लेवेके कोर्कु अस्सना
लेक्का अद कालम ते गुलाम लोरकिन अस्सना-वम्पना आयनदू। नेंडु निम्मा
हाटुम तल कोर् अस्सिस तत्तेके अदिन एस्कसी तिंतोर मति बोरे नीकिन
इद्रम बारांकु कीतिन इंजी पूछेमायोर। अद्रमे गुलाम प्रथा वाले समाज लोप्पा

गुलाम लोरा संगे वेने आयनदू। अस्केटा उंदी हट्टो मत्ता “उंदी घोड़ा दस गुलाम लोरा बराबर मंता।” बारांकु इत्तेके उंदी घोड़ा ता देखभाल कियाला काजे दस गुलाम लोरा जरूरत मंदानदू।

गुलाम लोर किन तम्मा परिवार तासना अधिकार मन्त्रो आयनदू बारांकु इत्तेके गुलाम लोरा लेक्का ओरा पिल्ला-पेकोरवेने मालिन लोरा सम्पत्ति मंदानोर अदिन काजे ओरकिन मालिक लोर विचार वात्तास्के मंडिंग लोप्पा वम्मसियानोर। कुल मिले कीसी गुलाम लोरा संगे जानवर तुकू वेने हब्बर ता व्यवहार कियानोर।



इव सब्बे केंजसी रवि ना पीनी गज्जिंग पेस्तांग। संगेने ओनकिन आश्चर्य वेने आत्ता। उचुन जोम मुन्नेने बेरेल मर्रा लाखों साल एवनल भूम पोरो मत्ता मानव समाज लोप्पा अमीर-गरीब, मालिक-नौकर हिल्ला मत्ता इत्ता अनि इंजे अदु समाज गुलाम प्रथा वाले समाज लेक्का बदलेमाता, ताना लोप्पा ज्यादा लोकरा संगे जानवर लेक्का व्यवहार आया मंता इंजी इंदा मंता। इद्रम बद्रम आया परिता? जरूर बोरे कूर, अत्याचारी, निर्दयी लोकरे इद पूना व्यवस्था तुन निल्पी कीसी मंदानूर। ओरु तम्मा डावुट बेरेल मर्रा तुन वेहतोर।

बेरेल मर्रा- “आयो रा, इव सब्बे बोरे कूर, अत्याचारी लेवेके निर्दयी लोकरा कारण ते आयवा उत्पादन शक्ति ना विकास इत्तेके खेती, पशुपालन ता शुरुआत, कच्ची ता खोज ता कारण ते आत्ता।”

रवि ना आश्चर्य ता बदे हंदी हिल्वा मत्ता। खेती ता कारण ते लेवेके पशु पालन संगे समाज इचोन निर्दयी बद्रम बनेमाया परिंता। कच्ची ता खोज लेक्कटा बेसता काम समाज तुन इचोन बद्रम कड़ियी कींता? ओनकिन इद पोल्लो समजेमासोर हिल्वा मत्ता।

रवि- “बरेल मर्रा, निम्मा तो नाकिन लेस्की कियाना लेक्कटा पोल्लोग किया मंतिन, खेती, पशुपालन लेवेके कच्ची ता खोज ता इद्रम ता क्रूरता संगे बाता संबंध मंता?”

बरेले मर्रा- “नन्ना विस्तार ते वेहिंतान। मानेय अन्न डग्गी कीसोर मत्तास्के मुश्किल ते पोटा निंदना लेक्का डग्गी कियानोर। अदिना काजे सब्बे तोर किन मेहनत किया लागनदू।

मति खेती ओसो पशु पालन शुरू आत्ता पेरके परिस्थिति बदलेमासोर हत्ता। इंजे वरोर मानेय लेवेके उचुन मुल खेती कीसी, पशु पालन कीसी सिर्फ तम्मा पोटा निह्हतनाचोन अन्न पुट्टी किया परितोर अनि दूसरोरा जरूरत कुन पूरा कियाला वेने अन्न उत्पादन किया परितोर। इदिन माटु ‘अतिरिक्त’ उत्पादन कियाना इंतोम। इत्तेके इंजे उत्पादन पद्धति मानेय ना जरूरत तुकू ज्यादा (अतिरिक्त) पुट्टी कियाना शुरू कितोर।

कच्ची ता खोज इद प्रक्रिया तुन ओसो ज्यादा तेज कित्ता बारांकु इत्तेके खेती लायक भूम ता बदे कमी हिल्वा मत्ता। बदे वेने गेड़ा तुन नड़कसी अगा खेती कियाना शुरू आया परनादू।

‘अतिरिक्त’ पुट्टी कियाना शुरू आत्तास्के इद अतिरिक्त तुन हड़पे कियाना विचार वेने पुटता। इदे अतिरिक्त तुन हड़पे कियाना विचार ओसो अदिन असल ते लागू कीतेके समाज गुलाम प्रथा लेक्का बनेमाता।

नन्ना नीकिन मुन्ने वेहता लेक्का आदिम समाज लोप्पा रेंडु कबीलांग नड़मा लड़ाई आत्तास्के हारेमायना कबीला ता सब्बे लोकर किन हौकमूड़ांदू। इद्रम ओरु क्रूरता ता कारण ते आयवा अस्केटा समाज ता परिस्थितिंग ना कारण ते मजबूरी ते कियानोर।

मति खेती, पशु पालन ता शुरुआत, कच्ची ता खोज पेरके परिस्थिति पूराए बदलेमाता। इंजे हारेमायाना कबीला ता लोकर किन बंदी बने कीसी ओरकिन बेहरा स्तर ते गेड़ा नड़किह कियाना, खेती कियहाना, पशु पालन

कियाना लेक्का काम हियानोर। इंजे ओरु मुन्ने लेक्का जीड़ता कबीला पोरो बोझा आयोर आंतोर बारांकु इत्तेके पोरो वेहता काम कीसी ओरु सिर्फ तम्मा पिस्वल पिस्सना लेक्का अन्न पैदा कियानाए आयवा जीड़ता कबीला ता लोकुरा जरूरत कुना वेने अन्न पैदा किया परनोर। अदिन काजे इंजे हारमायना कबीला तालोकुर किन हौकना रोमी कीसी ओरकिन जिंदा पोयसी जबरदस्ती काम कियहानोर। ओरु इनकार कीतेके ओरकिन पिटाई कियानोर। साधारण रूप ते ओरु बेहरा 'अपराध' कित्तास्केने हौकानोर। इद्रम गुलाम प्रथा ता नींव अरता।

गुलाम संख्या वेल्ले मत्ता कबीलांग ज्यादा साधन सम्पन्न आतांग। बारांकु इत्तेके अवु इंजे वेल्ले बेहरा स्तर ते खेती किया परिंतांग, ज्यादा संख्या ते पशु तासा परिंतांग। दूसरा बगिल गुलाम लोर हिल्ला मत्ता कबीलांग लेवेके गुलाम लोर किन विचार कियवा कबीलांग 'वेल्ले पेरके' अरसी मत्तांग। उचुन मुल ता मेहनत ते गुप्प गेड़ा नड़कमूझायो।

अद्रमासी समाज तल उंदी पूना प्रक्रिया शुरू आता। मुन्ने युद्ध बस्के-बस्केने आयनदू, इंजे गुलाम लोर किन ऊंदला काजे युद्ध आयना शुरू आता। उचुन कबीलांग तम्मा गुलाम लोरो संख्या परताचोन बेरसी कियाला काजे पुंजी-पुंजी दूसरा कबीलांग पोरो युद्ध शुरू कीतांग। युद्ध लोप्पा निपुण आयला काजे युद्ध विद्या ता विस्तार आता। युद्ध ता विशेष ट्रेनिंग आयना शुरू ता। बदे कबीला तुन युद्ध विचार वांताए वायो इंदानदू हूड़वा लेक्का मंदाना परिस्थिति वात्ता। मीटु खुद बोनाए पोरो हमला कीवेके, मीवा पोरो वेने बोरे दूसरोर हमला कीवोर आयनूर इंजी गांरटी हिल्ला मत्ता। मीटु बोनकिने गुलाम बने कियवीर इत्तेके मीकिन वेने बोरे गुलाम बने कीवोर इंजी आयो। बचोनो जागा ने जीड़ता कबीलांग (सैकड़ों गुलाम जीड़सी दोरकी कित्ता) वेने बदे दूसरा कबीला संगे युद्ध हारेमासी अदिना गुलाम बनेमातादू मंता।

इव सब्बे ना कारण ते हर कबीला काजे स्पेशल सेना तासना जरूरी आता। इंजे पाइन तरीका संगे जरूरत आता जागा ते सब्बे आस्कु-कोयतोर लड़ाई लड़ेमासी काम ताकी कियाना संभव हिल्ले। इद्रम निम्मा मानव समाज गुलाम प्रथा लेक्का बदलेमायना लोप्पा बोरे मानेय विशेष कारण



बनेमायवा लेवा उत्पादन शक्ति ना विकास ता कारण ते आत्ता। बेगा-बेगा इव उत्पादन शक्तिंग ना विकास आत्ताद हिल्ले ओसो मानेय समूह तल अलग-थलग मत्तोर अगा इंजे वेने अदे पाइना आदिम साम्यवादी समाजे मंता।”

रवि- “इंगो, इंजे नाकिन गुलाम प्रथा ता शुरुआत परिस्थितिंग लोप्पा बदलाव ता कारण ते आत्ता बोरे क्रूर, निर्दयी, अत्याचारी मानेय ना कारण ते आयो इंजी समजेमाता।”

बेरेल मर्रा- “सिर्फ इदे आयवा, समाज ता पूरा ताना-बाना बदेमाता। मानेय ना पूरा सोच बदेमाता। पाइना समाज लोप्पा गैर बराबरी हिल्ला मत्ता, मेहनत कियानोर ओसो मेहनत कियवानोरा लोप्पा अंतर हिल्ला मत्ता। पूरा समूह ता पिस्वल स्तर उंदी लेक्काने मत्ता। मति पूना समूह लोप्पा रेंडु रकम ता वर्ग मत्तांग। उंदी गुलाम मालिक लोरा वर्ग, इदु सब्बे अधिकार कुना संगे सम्पन्न मत्ता। दूसरा बगिल गुलाम वर्ग इदिनगा सिर्फ पोरोल तुक वेने अधिकार हिल्ला मत्तांग। इव रेंडासी वर्ग इंजे उंदे समाज ता हिस्सा मत्तांग मति इव रेंडासी ना आपसी संबंध शोषक-शोषित लेक्का मत्ता। गुलाम मालिक लोरा निजी सम्पत्ती मंदिता। गुलाम लोर किन मालिक लोरा काजे

नरका-पियल मेहनत किया लागिंता। ताना बदला ते मालिक ओरकिन कर हायनाचोने तिंदला हींतोर। काम मारता पेरके ओरकिन कोंदांग एरमिंग कुन कोड़काने होड़िहता लेक्का, कोड़काने होड़िहचियानोर। बीमार आतेके गुलाम लोर किन तिंदला हियाना बंद कियानोर बारांकु इत्तेके मालिक लोर बीमार मानेय इत्तेके डोल्लोनूरे अदिनके अन्न पोरो आयना खर्च हीसी बारांकु बर्बाद कियाना इंजी आल्सानोर।

इव रेंजु वर्ग कु मत्तांकू इंजे समाज पाड़ना तरीका ते ताका परवो। अदिन काजे इंजे मुन्ने लेक्का सामूहिक रूप ते उदसी तम्मा झगड़ हल कियाना परंपरा खत्म आत्ता। गुलाम ओसो मालिक लोर जमा आसी उदना संभव हिल्ले।...

रवि- “गुलाम लोर इचोन अत्याचार बद्रम सहेमातोर? ओरु इचोन अत्याचारी मालिक लोरिन बारांकु हौकोर आतोर?”

बेरेल मर्ग- “निम्मा निन्ने एवनल आजाद वेलियसोर मत्ता लोकुर हल्कोए गुलामी तुन स्वीकार कितोर इंजी आल्सा मंतिना? मालिक लोर किन गुलाम लोरा पोरो नियंत्रण तासला काजे वेल्ले मेहनत किया लागता। मालिक लोर हर धोखा-चालाकी-षड़यंत्र कुना सहारा एतितोर। साधारण रूप ते गुलाम लोर किन जेल लेक्कटा कोड़का ने बंद तासानोर। काम कियानास्के ओरकिन साकरी ने दोहचियानोर। नरका-पियल ओरा पोरो कोंडा तासानोर। वित्तला कोशिश कियाना दोस लोर किन बाकी गुलाम लोरा मुन्ने भयंकर यातनांग हीसी पिस्ता गुलाम लोरा वित्तना हिम्मत तुन देहचियानोर। वित्तनास्के दोरकता गुलाम लोर किन हौकसियानोर लेवेके ओना गुड़ंगा ते कच्ची ता पट्टा करपी कियानोर।

मालिक लोर तम्मा मनोरंजन काजे गुलाम लोर किन आपस ते वाहची कियानोर, नाहकुना लोप्पा कोर्कु वाहची कायना लेक्का। इव लड़ाईंग और इरवुर गुलाम लोरा लोप्पटल वरोर डोलतास्केने रोमनवु।

मति सब्बे कड़ी कार्रवाइंग मत्तेकाई गुलाम लोरा विरोध-प्रतिरोध जारी मत्ता। गुलाम लोरा इद प्रक्रिया तुन रोमी कियाल काजे धर्म मालिक लोरा वेल्ले मदद किता।”

रवि आश्चर्य आतोर। धर्म इत्तेके बेसताद आंदू, अदु बद्रम शोषक लोरा मदद किया परिंता! इंजी बेरेल मर्रा तुन पूछेमातोर।

बेरेल मर्रा- “नन्ना नीकिन मुन्नेने धर्म ता शुरुआती स्वरूप आदिम कबिलाई समाज लोप्पा पुटसी मत्ता इंजी वेहतान। मर्रा, भूम, बंडांग, मेट्टांग, डोड्डांग, किस्स, एर, वड़िय, तरस लेक्कटवु सब्बे आदिवासिरा पेनकु मत्तांग। इव पेनकु अनि गुलाम प्रथा युग ता पेनकुना लोप्पा उंदी बुनियादी अंतर मत्ता। मुन्नेटा चरण ता पेनकु मानेय ना भौतिक जरूरत कुना संगे सीधा जुड़ेमासी मत्तांग। इव सब्बे ना मानेय ना पिस्वल लोप्पा असल ते सीधा संबंध मत्ता। निम्मा भूम अन्नम हींता, मर्रा शुद्ध वड़िय, पंडिंग, पुंगार ओसो बाकी तिंदना जरूरत ता सामान हींता, एर हिल्ला पिस्वले हिल्ले इंजी हूडा परिंतिन। किस्स ता बारे ते वेहतादे मंता। डोड्डा एर ओसो कीके ता महत्व पूर्ण स्त्रोत मत्ता लेक्काटवु मत्तांग। अस्के स्वर्ग-नरक, मोक्ष लेक्कटविना जन्म आत्ताद हिल्ला मत्ता। मति गुलाम प्रथा लोप्पा धर्म ता पूना रूप मुन्ने वात्ता। इद पूना रूप तुन पुट्टी कियाला शोषक वर्ग ता बुद्धिजीविरा महत्वपूर्ण भूमिका मत्ता।

ओरु शोषक, शोषित लोरा सामाजिक-आर्थिक स्तर तुन किस्मत लेवेके भाग्य संगे जोड़े कितोर। ओरु पुनर्जन्म ता धारण पुट्टी कितोर। ओरु गुलाम लोरा जन्म मालिक लोरा सेवा कियाला काजे आत्ता इंजी वेहतोर। गुलाम लोर मुन्नेटा जन्म ते गलत काम कितोर अदिनेक ओरु गुलाम मंतोर अनि मालिक लोर मुन्नेट जन्म ते बेसता काम कितोर अदिनके मालिक लोर बेसता पिस्वल दोरकता इत्तोर। गुलाम लोरा भाग्य ते दुःख भोगेमायनदु मंता अदिनके ओरु दुःखी मंतोर अनि मालिक लोर बेसता किस्मत तोर आंदुर इत्तोर।

शोषक वर्ग ता इद्रम ता बुद्धिजीविर किन अस्के ऋषि-मुनि लेवेके संत इंदानोर, ओरु गुलाम लोर किन तम्मा दुःख-तिप्पल कुना काजे मालिक लोर किन दोष हियवा लेवा बेसता काम कियाला वेहतोर। बेसता काम कीतेके डोलता पेरेके स्वर्ग दोरकियर लेवेके इदे पिस्वल ते वेने वेल्ले भयंकर नरक ओरा हरीं हूडसोर मंदियर इंजी वेहिंतोर।

गुलाम लोर किन इद्रम ता उपदेश लगातार हियानोर। तीरम-तीरम गुलाम लोर वेने इदिने निज्जम आल्सना शरू कितोर। ओरु तम्मा परिस्थिति

तुन तम्मा किस्मत खराब मत्तांकु ओरा संगे इद्रम आया मंता इंजी उचुन स्वीकार कितोर। वेल्ले गुलाम लोर तम्मा खिलाफ आयना अत्याचार कुना विरोध कियाना विड़चसी इंजे मंदिर-मस्जिद लेवेके चर्च लोप्पा भगवान ता मूर्तिंग लेवेके पूजा कियाना जागा ने किलसोर-गिड़गड़मासोर तम्मा अपराध कुना माफी तालकसोर, बेसता पिस्वल काजे प्रार्थना किया मंतोर। इद्रम कीसी ओरु उचुन मानसिक शांति दोरकी कितोर अनि मालिक लोर कियाना जुल्म काजे खुत किन तैयार कियानोर।

निम्मा गुलाम लोर किन तम्मा गुलामी तुन स्वीकार कियाला काजे मानसिक रूप ते तैयार कियाला धर्म शोषक वर्ग ता मदद कित्ता इंजी समजेमाया परिंतिन।”

रवि ना तोड़ी तल ‘ओह’ इंजी पेस्ता।

“गुलाम प्रथा शुरू आत्ता पेरके वेल्ले वस्तुंग बदलेमातांग। पाड़ना समाज तुन आंतरिक व्यवस्था लेक्का तासला काजे बदे पुलिस तंत्र ओसो कानून व्यवस्था ता जरूरत हिल्वा मत्ता। झगड़ आतेके सामूहिक रूप ते उदसी हल कियानादु मंदू मति पूना व्यवस्था लोप्पा समाज लोप्पा व्यवस्था बिगड़े कियवा लेवा तासला काजे पुलिस तंत्र ता जरूरत आत्ता। नन्ना मुन्ने वेहता लेक्का गुलाम लोर किन लगातार नियंत्रण ते तासना जरूरत मत्ता, संगे ने इंजे न्याय पालिका पोरोल ता तंत्र वेने पुटता इदु मालिक लोरा रक्षा कींता अनि गुलाम लोर किन सुडला अपराध काजे वेने सजा हींता। न्याय ता

पूना विधान तैयार आत्ता इदु गुलाम प्रथा तुन पूराए सही मानेमांता अनि निजी सम्पत्ति ता रक्षा कींता।

निम्मा राजसत्ता शब्द जरूर केंजसी मंदाकिन। राजसत्ता ता जन्म इदे कालम ते आत्ता। राजसत्ता मालिक वर्ग कैदे उंदी तंत्र लेक्का मत्ता इदिना मदद ते ओरु बहुसंख्यक गुलाम लोरा पोरो नियंत्रण तासनोर। राजसत्ता ता मूंड



अंग मंतांग सैन्य अंग इत्तेके सेना, पुलिस इदिना काम बाहरी ओसो लोप्पटा विरोधीर किन सशस्त्र आसी नियंत्रित कियाना मत्ता। बाहरी ताकतकु इत्तेके गुलाम प्रथा ता युग लोप्पा दूसरा कबीला ओसो दूसरा राज्य मंतांग इविना संगे हमेशा गुलाम लोरा काजे संघर्ष आयनदु। लोप्पटा ताकतकु इत्तेके समाज लोप्पा मंदाना गुलाम लोर, वीरु हमेशा मालिक लोरा खिलाफ प्रतिरोध कियाला तैयार मंदानोर।

राजसत्ता ता दूसरा अंग न्याय पालिका मंता। शोषक वर्ग खिलाफ काम कियानोर किन न्यायपालिका सजा हींता। न्यायपालिका बस्केने गुलाम प्रथा गलत मंता लेवेके मानेय मानेय ना शोषण गलत मंता लेवेके सब्बे मानेय बराबर मंतोर इंजे इन्ने। न्यायपालिका ता काम पुलिस, फौज लेक्काने गुलाम प्रथा तुन मजबूत कियाना मंता। राजसत्ता ता तीसार अंग कार्यपालिका मंता। कार्यपालिका इत्तेके नीतिंग बने कियाना ओसो अविन लागू कियाना काम कियाना। गुलाम प्रथा युग लोप्पा कार्यपालिका हमेशा मालिक लोर किन फायदा आयना लेक्कटा नीतिंग बने कियानदू। गुलाम लोरा लोप्पा बदे नीति बने कियाना सवाले पुट्टो.....”

रवि- “नेटा कालम ते इद्रम हिल्ले। इंजे आम लोकुरा काजे सरकार बचोनो काम कींता।”

बरेल मर्ग- “हल्को कव्वसोर, इदिना पोरो माटु पेरके वड़ककाल, मुन्ने अद कालम ता पोल्लोंग कियाकाल।

इंगो, नन्ना शोषक वर्ग इत्तेके गुलाम मालिक लोर राजसत्ता पोरोल ता मशीनरी तुन निल्पी कित्ता इंदा मंतान। इद मशीनरी ओरकिन पूराए सुरक्षित कित्ता। बाहरी ओसो लोप्पटा विद्रोह, बगावत ता इंजे ओरगा कारगर इलाज मत्ता।”

रवि- “निम्मा वेहता पोल्लो नाकिन समजेमाता मति इद तो वेल्ले गलत आत्ता। समाज पाड़ना कबिलाई समाज लोप्पाने मत्तेके बेस आयो या। कम से कम मानेय ना संगे जानवर लेक्का व्यवहार तो आयो आसी मनवड़।”

बरेल मर्ग- “हिल्ले रवि, इद्रम आल्सना गलत आयार। गुलाम प्रथा आदिम कबिलाई समाज तल विकसित समाज मत्ता। खेती, पशुपालन, कच्ची ता खोज- इव सब्बे मानेय ना सुवुधा काजे ओरा पिस्वल तुन सुधरे

कियाला काजे मत्तांग। उचुन आल्सा, कच्ची ता खोज आयवेके नेंडु दिस्सना बदे वेने मशीन मन्नो आसी मनवड़। निम्मा दोरकी कित्ता समाज नेंडु वेने गाटो, दवाई, शिक्षा, लोन, गेत्तेंग लेक्कटा मौलिक सुविधा तल जेक कींता।

शोषण ता बारे ते हूड़तेके निज्जमे समाज शोषण विहीन समाज तल शोषण मत्ता समाज लोप्पा नेंगता। मानेय मानेय ना शोषण वेल्ले गलत मंता। इद्रम कियाना तुक्कू बदरमाई अनुमति हिल्ले। मति शोष ता समाप्त कियाना नन्ना लेवेके निम्मा आल्सतेके आया परवो इंदानद वेने निज्जमे। उचुन खास परिस्थितिंग पुट्टी कीसी शोषण ता शुरुआत आत्ता, अद्रमे उचुन खास परिस्थिति वात्तास्के शोषण समाप्त वेने आया। इद बोरे आल्सतांकु पुटवा मत्ता ओसो बोरे आल्सतांकु टिकेमासी मन्नो आया अनि बोरे आल्सतांकु इदु खत्म वेने आयो आया।”

रवि- “अद्रमा, मानेय मानेय ना शोषण खत्म आयना परिस्थितिंग बवु मंदिंतांग?”

बेरेल मर्रा कवसोर इत्ता- “वेल्ले जल्दी पुंदाला आल्स मंतिन। मति इचोन जल्दी बदरम समजेमाया परिंतिन? पेका, नीकिन उचुन रोमा लागियर। मुन्ने नीवा इतिहास तुन समजेमायमू, ताना गति, ताना विकास ता नियम कुन समजेमायमू, अस्केने निम्मा नीवा वायना कालम तुन वेने बेस समजेमाया परकिना।”

रवि सहमत आसोरे तल्ला होले कितोर।

गुलाम प्रथा:

मानव विकास ता उन्नति ता हरी

मर्रा वड़कसोर हत्ता, “मानेय मानेय ना निर्मम शोषण गुलाम प्रथा युग लोप्पा उंदी कैता पोल्लो कितोर मति इद युग मानव सभ्यता ता विकास ता हरी तेरियतादु वेने निज्जमे। पाड़ना समाज लोप्पा मानेय ना पूरा पिस्वल गाटो दोरकी कियाना संघर्ष लोप्पाने मारता। इदिन विड़चसी ओरु बदे काम किया परवोर। अतिरिक्त पुट्टना शुरू आत्तास्के पहली बेरा उचुन मुल इंजे शारीरिक श्रम ता काम तल मुक्त आयना परिस्थिति पुटता। उचुन मुल इत्तेके इंजे वेने शारीरिक श्रम तल मुक्त आत्ता लोकुरा जरूरत कुन इंजे वेने पूरा किया परना लेक्का मंदानोर। शारीरिक श्रम तल मुक्त आत्ता लोकुर इंजे दूसरा रकम ता कामकाज किया मंतोर। उचुन मुल सिर्फ चिंतन किया मंतोर, ओरु राजनीतिक शास्त्र, दर्शन शास्त्र लेक्कटविना लो प्पा पूना-पूना विचार मानवता तुन हीतोर। अरस्तू, प्लेटो,




सुकरात लेक्कटोर यूरोप ते ओसो कपिल, वात्सायन, बुद्ध, महावीर जैन लेक्कटोर भारत ते इद्रम ताए लोकुर मत्तोर। उचुन मुल कला लोप्पा काम कितोर। संगीत, चित्रकारी, डाका, पाटा पारना लेक्कटा कला लोप्पा जबरदस्त विकास आत्ता। भारत लोप्पा शास्त्रीय संगीत ओसो डाका ता जन्म इदे कालम ते आत्ता।

उचुन मुल विज्ञान लोप्पा काम कितोर। नक्षत्र विज्ञान, गणित, धातु विज्ञान, चिकित्सा विज्ञान लेक्कटविना लोप्पा वेल्ले महत्वपूर्ण काम आत्ता।

अतिरिक्त पैदावार विनिमय काजे वेने हर्ष तेरियता। तीरम-तीरम विनिमय वेल्ले विस्तृत आत्ता। ग्रामीण इलाकांग ना लोकुर आपसी व्यापार कियाना शुरू कितोर। इद व्यापार सिर्फ पैदावार तुन बेरसी कियालाए आयवा अलग-अलग इलाकांग लोप्पा अलग-थलग मंदाना लोकुर किन वेने वरोर-दूसरोना गरे तत्ताना काम कित्ता अनि ओरकिन वरोर-दूसरो निगडल करियला दोरकता। चीन, भारत, अरब, यूरोप वासिर आपसी ज्ञान आदान-प्रदान कितोर।

मानव सभ्यता ता विकास लोप्पा इद उंदी गुणात्मक बदलाव मत्ता, इदु पाइना आदिम समाज लोप्पा संभव हिल्वा मत्ता। पाइना कबिलाई समाज मंदाना इलाकांग विकसित आयवा पेक्के अरसी मंतांग। दूसरा बगिल गुलाम प्रथा वाले समाज सभ्यता तुन बेहरा स्तर ते एवसी कित्ता। मिस्र ता पिरामिड, सिंधू घाटी ता हड़प्पा ओसो मोहनजोदड़ो लेक्का योजनाबद्ध तरीका ते बने कित्ता शहर कु इदे समाज तावु आंदुंग, अवु तम्मा सुंदरता ओसो विशालता ओसो योजना काजे माकिन आश्चर्य कींतांग।



दुनिया ता शुरुआत ता सभ्यतांग बेगा विकसित आतांग अगा गुलाम प्रथा मत्ता। मिस्र ते नील डोड्डा ओदा, भारत ते सिंधू डोड्डा ओदा, मैसोपोटामिया (इराक) लोप्पा दजला-फैरात डोड्डा ओदा मत्ता सभ्यता, चीन ता पीली डोड्डा सभ्यता इद्रमताए गुलाम प्रथा वाले समाज मत्तांग। पेरके यूरोप लोप्पा समाज कबिलाई समाज तल मुन्ने वेंडतास्के रोम (इटली) ओसो एथेंस (युनान) गुलाम प्रथा ता महत्वपूर्ण केंद्र बनेमातांग।”

रवि- “नीवा अनुसार गुलाम प्रथा मानव सभ्यता ता विकास काजे जरूरी मत्ता, इद हिल्ला मानेय बस्केने दाया परवोर आसी मन्नेर?”

बेरल मर्ग- “पाड़ना आदिम साम्यवादी समाज लोप्पा वेने मानेय वेल्ले महत्वपूर्ण खोड मत्तांग। खेती, पशु पालन ओसो कच्ची खोज ता बारे ते नन्ना मुन्ने ने वेहतान। इदिन विड़चसी वेने इद्रम ता बचोनो महत्वपूर्ण खोज मत्तांग, इव आयवेके सभ्यता ता विकास आयो आसी मनवड़। नेंडु मीकिन अव खोज कुन आश्चर्य कीवोंग मति अद कालम ते हर खोज काजे मीवा नेटा नोबल प्राइज हियमूडांता। मानेय गंजिंग-दड़ियांग बने कियाला करियतोर, किस्स पोत्ती कियाला करियतोर, चक्का ना आविष्कार, विल-काड़ी बने कितोर, हव्विंग वत्ति कीसी तासला करियतोर, गेत्तेंग बने कियाना लेक्कटा बचोनो तकनीक कुना विकास अद कालम ते आसी मत्ता। मति उंदी कालम पेरके इदे समाज उत्पादन शक्तिंग ना विकास लोप्पा बाधा वाटा मंता। अतिरिक्त पैदावार कियाना पाड़ना समाज करियसी मत्ता मति अद समाज पाड़ना पिस्वल शैली ओसो पाड़ना उपभोग तरीका तले खुश मत्ता। अद समाज तुन ओसो अतिरिक्त पैदावार कियाना जरूरत मत्ता लेक्का हिल्ले। अदु तम्मा पेरके अरता पिस्वल ते ने खुश मत्ता। कच्ची ता मर्स, नांगेल ता मदद ते बेहरा इलाकांग लोप्पा खेती ता संभावना मंदिता, मति अद समाज ता कर्ता-धर्ता लोरकिन इदिना जरूरत मत्ता लेक्का आयो। निम्मा कच्ची ता मर्स ओसो कच्ची ता नांगेल बनेमाता मति अविना इस्तेमाल आसोर हिल्ले। खेती कियाल करियतोर मति खेती कियाला काजे लोक्क हिल्ले। इदे परिस्थिति पशुपालन ता मत्ता।

अदिन काजे अद समाज लोप्पा उंदी वेल्ले बेहरा अंतरविरोध वात्ता। उत्पादन शक्तिंग विकसित आयला काजे कंदरेमाया मंतांग मति सम्पत्ति

संबंध इंजे वेने पाड़ना रकम ता सामाजिक संबंधि कुन मत्ता लेक्काने तासना कोशिश किया मंतांग। कच्ची ता मर्स ओसो नांगेल वेल्ले श्रमिक लोर मांग किया मंतोर मति सामाजिक ढांचा बद्रमाई काम हिया परवा मत्ता बारांकु इत्तेके स्वतंत्र मानेय कुन तम्मा काम कियाला काजे मजबूर किया परमूझायो।

इद संघर्ष लोप्पा उत्पादन संबंध उत्पादन शक्तिंग कुन पेरेके दोब्बसिया मंतांग। उत्पादन शक्तिंग मुन्ने दायाला कंदरेमाया मंतांग मति पाड़ना उत्पादन संबंध तल मुक्त आयला आल्सा मंतांग। उत्पादन संबंध ओसो उत्पादन शक्तिंग नड़मा ता अंतरविरोध लोप्पा मुन्ने दायना शक्तिंग ना जीत आत्ता। पूरा दुनिया लोप्पा इद्रमे आत्ता। आदिम कबिलाई समाज देगता। अदिना जागा ते उंदी पूना समाज स्थापित आत्ता। इद पूना समाज ता सामाजिक-आर्थिक ताना-बाना उत्पादना ता पूना शक्तिंग ना जरूरत अनुसार मत्ता। अविन वेल्ले श्रम ता जरूरत मत्ता। गुलाम प्रथा अद श्रम अविनकिन हीता। मति हर समाज गुलाम प्रथा ता उंदी लेक्का मंदाना जरूरी हिल्ले। इदिना लोप्पा विविधता मंदिता। खुद भारतीय समाज इदिना उंदी बेसता उदाहरण मंता। इगा गुलाम प्रथा नन्ना वेहता लेक्का हिल्ला उंदी दूसरा रूप मति अचोने क्रूर रूप ते इदा विकास आत्ता। इदिन माटु जाति व्यवस्था ता पोरोल ते पुंतोम।”

रवि- “जाति प्रथा इत्तेके मावा समाज अलग-अलग जातिंग लेक्का ब्राह्मण, क्षत्रिय, वैश्य, शूद्र पोरोल ते मंता। नन्ना बोरे वरोर मनु महाराज मत्तोर, ओरु समाज तुन अलग-अलग जातिंग ने तूस्तोर, हर जाति तुन अलग-अलग काम सौपे कितोर इंजी केंजतान।”

बेरेल मर्ग- “कव्वसोर इंगो, आम लोकुर इद्रमे आल्सिंतोर। जाति प्रथा भगवान बने कित्ता व्यवस्था मत्ता लेक्काने अदु प्राकृतिक मंता मर्गक-पोरकांग मत्ता लेक्का, जीव-जंतु लेक्का इंजी मति निज्जम इदिनकु विपरीत मंता। मति इदिना बारे ते नन्ना नीकिन पेरेके वेहाकान। इंजे नन्ना वेल्ले दोगतान। हूड़ा, दुपार आत्ता। इंजे नाकिन अव पिट्टेंग ना पोल्लोंग वेने केंजनाद मंता, अवु निन्ने ने नावगा वासी रोमतांग।”

रवि ओसो उंदी बेरा तल्ला तेहची हूडतोर। निज्जमे पोडद पश्चिम तल
दाया मंता। मर्रा पोरो उदिता पिट्टेंग परियाना-डेयना कोल्हार कीसी इंजे
दोगसी मत्तांग अनि रवि किने हूडसोर मत्तांग, बेरेल मर्रा सिर्फ नीवाए आयो
ताना पोरो मावा वेने उचुन हक मंता इंजोर मत्ता लेक्का।

रवि बेरेल तुन जोहार कितोर। मर्रा पोरो उदसी मत्ता पिट्टेंग कुन टाटा
कीसी लोन हत्तोर।



मना देश 5000 साल मुन्ने

बद्रम मत्ता?

रवि वेल्ले खुश मत्तोर। हत्ता उंदी हप्ता तल ओनकिन इतिहास ता महेंद्र गुरुजी ना पोल्लोंग केंजा लागताद हिल्ले, मार वेने तित्तद हिल्ले। इंजे रवि किन इतिहास तल वेर्ी वेस्सनद कम आत्ता। इतिहास ता तारीख ओनकिन इंजे वेने परिशान कींता मति परिस्थिति मुन्ने मत्ताचोन खराब हिल्ला मत्ता। इद समाचार ओरु बेरेल मर्रा तुन वेहतोर।

केंजसी बेरेल मर्रा कव्वता ओसो अनि तन्ना टोंडांग होले मासोर रवि ना मोरकुल ते कै वाटता लेक्का कीतांग।

रवि- “इंगो, निम्मा नीवा पोल्लो शुरू कीमु। अद दिव्या निम्मा भारत लोप्पा गुलाम प्रथा ता विकास निम्मा वेहता लेक्का आयवा लेवा अदिनकु अलग जाति व्यवस्था लेक्का आत्ता इंदा मंतिना। मति इद्रम बारांकु आत्ता?”


बेरेल मर्रा- “वर्तमान पाकिस्तान लोप्पा पोंगना सिंधू डोड्डा ओदा 5000 साल मुन्ने उंदी सभ्यता पिस्ससोर मत्ता अदिन माटु सिंधू घाटी ता सभ्यता ता पोरोल ते पुंतोम। इदिना रेंडु शहरकुना पोरोल ते वेने पुंतोम उंदी

हड़प्पा ओसो मोहनजोदड़ो सभ्यता, बारांकु इत्तेके इव रेंडु शहर कुन सबसे मुन्ने कारताद मंता। पेरके इद सभ्यता ता 1000 सुडला बेहरा जागांग तरवतांकु मना इद सभ्यता ता वेल्ले पहलु ना बारे ते जानकारी दोरकता। इद सभ्यता वर्तमान पंजाब, हरियाणा, राजस्थान ओसो गुजरात ता बेहरा इलाकांग एवनल फैलेमाताद मंता। मति इंजे एवनल माटु ओरा भाषा तुन पढ़ेमाया परताद हिल्ले अदिन काजे ओरा बारे ते मना जानकारी इंजे पूरा हिल्ले।

इद्रम मत्तेकाई माटु अद सभ्यता ता बारे ते बचोन पुत्ताद मंतायो अदिना पोरो आधार आसी अस्के एवनल कच्ची ता जानकारी ओरकिन हिल्ला मत्ता इंदा परितोम। ओरु खेती कियाना लोकर मत्तोर। सिंधू सहायक डोडुंग ना उस्का तोड़ियो ता सुडला-बेहरा बाँध बने कीसी सिंचाई कियानोर। उस्का तोड़ियो कातना गंगा-यमुना मैदान ता मिरकता तोड़ियो ता तूलना ते वेल्ले हल्को मत्ता। सिंचाई मंदाना इद उपजाऊ भूम पोरो वेल्ले बेस फसल वांता। सिंधू घाटी सभ्यता ता विकास ता मुख्य आधार इदे मत्ता।

इद सभ्यता ता वेल्ले शहर कुन कारताद मंता अविना लोप्पा रेंडु रकम ता लोहकुना अवशेषकु दोरकतांग। उंदी रकम ता लोहकु वेल्ले बेहरा ओसो वेल्ले मोटा गूडी वाले, एर दा व्यवस्था बेस मंता। दूसरा रकम ता लोहकु वेल्ले सुडला ओसो पतला गूडी वालेंग मंतांग इविना लोप्पा एर दा कमी मंता। इव रेंडासी रकम ता लोहकुन अगा रेंडु वर्ग ता लोकर मंतोर इंजी साबित आंता।

दुनिया ता तत्कालीन व्यवस्थांग लोप्पा गुलाम प्रथा ता स्पष्ट प्रमाण दोरकिंतांग अद्रमे माटु सिंधू घाटी सभ्यता लोप्पा वेने गुलाम प्रथा विकसित आसी मत्ता लेवेके विकसित आया मंता।



इद सभ्यता लगभग 5500 साल मुन्ने शुरू आत्ता कारण कुना पोरो विचार कियाना वेल्ले जरूरी मंता। असल ते इद विषय पोरो विद्वान लोकुरा लोप्पा वेने मतभेद मंता। उचुन मुल आर्य लोकुर वातांकु इद नष्ट आत्ता इंतोर अनि उचुन मुल भूकंप, वेत्तितांकु, ऊसा लेक्कटवु परिस्थिति इद सभ्यता तुन नष्ट कियाना मुख्य कारण लेक्का हूड़ितोर।

असल ते मुन्ने माटु आंतरिक कारण कुन हूड़ा लागियर। बाहरी कारण परिस्थितिंग पोरो प्रभाव वाटिंतांग मति अवु निर्णायक मन्त्रोंग आंतांग। आर्य लोरा आक्रमण सबसे महत्वपूर्ण बाहरी कारण मत्ता, अदु इद सभ्यता तुन नष्ट कित्ता। आर्य मध्य एशिया ता आदिम साम्यवादी समाज लोप्पा मंदाना पशु पालक लोर घूमंतू कबीला मत्ता अदु गाटो, बेसता रोंडा परहकला लेवेके जरूरी वस्तुंग ना विनिमय काजे सिंधू घाटी लोप्पा वासी मत्तोर। सिंधू घाटी ता लोकुरा संगे वीरा टकराव शुरू आत्ता मति मुन्ने ज्यादा महत्वपूर्ण आंतरिक कारण कुना पोरो चर्चा कियाना जरूरी मंता।

माटु मुन्ने वड़कता लेक्का सिंधू घाटी सभ्यता वर्गीय समाज मत्ता। गुलाम लोरकिन वेल्ले मेहनता कियहानोर। ओरु पुट्टी कियाना अतिरिक्त मालिक लोरा इस्तेमाल ता जरूरत कुन पूरा कियाना काम वायनदू। मालिक लोर मैसोपोटामिया तल सोना ओसो चाँदी अस्सानोर। मालिक लोर तम्मा काजे बेहरा-बेहरा महल, मंदिर, स्नानागार (एर तुंगना लोहकु) बने कियानोर। इव सब्बे ना पोरो आयना खर्चा गुलाम लोर पुट्टी कित्ता अतिरिक्त संगे पूरा आयनदू। तीरम-तीरम इद पीरसी-पीरसी तेंडता अतिरिक्त ता मात्र उंदी हंदी तुकू मुन्ने हत्ता अस्के गुलाम लोर विद्रोह शुरू कितोर। प्रतिरोध ता उंदी दूसरा तरीका गुलाम लोरा उत्पादन प्रक्रिया पोरो निराश आयनदु मत्ता। इत्तेके गुलाम लोरा उत्पाद लोप्पा रूचि खत्म आंता, ओरु औजार कुन सांबरे कीसी तासा परवोर, ओरा तोड़-फोड़ बेरसिंता, खेती लोप्पा आयना विभिन्न कार्रवाहिंग सही टाईम, सही तरीका तल आतेके खेती ता उत्पादन कम आंता। सिंधू घाटी सभ्यता ता लोकुरा पिस्वल लोप्पा बाँध कुना महत्व वेल्ले मत्ता। बारांकु इत्तेके इदु सिंचाई व्यवस्था तुन बेस तासला महत्वपूर्ण मंता। इव बांद कुन देखरेख काजे वेल्ले श्रमिक लोरा जरूरत मंदानदु, इदिन

गुलाम लोरा संगे पूरा कियमूझायनदू। इद काम लोप्पा उचुन लापरवाही वेने बेहरा स्तर ते खेती तुन बर्बाद कींता।

गुलाम लोरा लगातार ताकसोर मत्ता विद्रोह माकिन हर गुलाम समाज लोप्प दिसिंता। सिंधू घाटी सभ्यता ता लीपी तुन पढ़ेमाया परवांकु माकिन इविना रासिस मत्ता इतिहास दोरकताद हिल्ले मति समाज शास्त्र ता सामान्य नियम कुना इस्तेमाल कीसोरे माटु इगा वेने बेहरा स्तर ते गुलाम लोरा होंग बेरसी किया लागियर इंदा परितोम। सिंधू घाटी सभ्यता विकसित आसी मंदियर गुलाम लोर पुट्टी कित्ता अतिरिक्त तुन लूटे कियाना मात्र वेने बेरसिस मंदियर अद्रमे गुलाम लोरा विद्रोह वेने बेरसिस मंदानुंग। इद आंतरिक वर्ग संघर्ष अद व्यवस्था तुन वेल्ले कमजोर कीसितांकु बाहरी देब्बा तुन सहन किया परवो आत्ता लगभग 3500-4000 साल मुन्ने आर्य आक्रमण शुरू आत्तास्के सिंधू घाटी ता लोकर ओरा मुकाबला किया परवोर आत्तोर, अद्रमासी इद सभ्यता नष्ट आत्ता।

वायना लगभग 1000-1500 साल एवनल भारत लोप्पा बदे पूना सभ्यता लेवेके राज्य पुट्टा परवो आत्ता। आर्य सिंधू घाट सभ्यता ता लोकर किनकु विकास क्रम ते पेरके अरसी मत्तोर। भारत लोप्पा नेंगता ओसो इगाटा सभ्यता तुन हारे कित्ता पेरके ओरु भारत लोप्पा फैले मायना शुरू आत्तोर। ओरा पिस्वल लोप्पा उंदी बेहरा बदलाव वासी ओरु तम्मा घूमंतू पिस्वल विइसतोर अनि उंदी जागा ते मंदाना शुरू कित्तोर। मति सिंधू घाटी ता लोकरा लेक्का ओरु शहरी पिस्वल शुरू कियवा लेवा ओरा पिस्वल शैली ग्रामीण मत्ता। सिंधू घाटी ता लोकरिगडल खेती कियाला करियतोर। पंजाब तल बंगाल बगिल हंजोरे ओरु अलग-अलग जागा ने तम्मा नाहकु बने कीसी खेजी, पशुपालन कीसोर मंदाना शुरू कित्तोर।”



जाति व्यवस्था ता जन्म ओसो आधा आबादी गुलाम बनेमाता

आर्य जन भारत ते वायना मुन्ने आदिम कबिलाई समाज व्यवस्था लोप्पा मत्ता अनि नन्ना नीकिन मुन्ने ने वेहतान, अदु व्यवस्था लोप्पा वरोर मानेय दूसरो ना शोषण कियाना विचार तुक्क बदे जागा हिल्वा मत्ता। सिंधू घाटी सभ्यता लोप्पा ओरु गुलाम प्रथा हूइतेके ओरकिन इदिना पोरो स्वाभाविक रूप ते होंग वात्ता अनि जीइता पेरके ओरु गुलाम प्रथा तुन विइसतोर।

मति लोकुर किन हारे कित्ता आर्य लोरा संगे ओरु तम्मा लोकुरा लेक्का व्यवहार वेने किया परवोर आतोर। अस्केटा समाज वेने रेंडु रकम ता लोकुर संगे बनेमासी मत्ता। मुन्नेटा रकम ता लोकुर आर्य जन मत्तोर वीरु जीइता लोकुर मत्तोर, पांडरी तोला, कोय्ये लेक्कटा मोस्सोर वालेर मत्तोर। ओरा लोप्पा आपसी संबंध इंजे वेने बराबरी तादे मत्ता, काम पोरो आधार आसी ओरकिन मूंड श्रेणिंग ने तूसमूडांता। पुरोहित काम कियाना लोकुर विभिन्न रकम ता धार्मिक कर्मकांड कियानोर, ओरकिन ब्राह्मण इंतोर। युद्ध लोप्पा, विभिन्न अभियान लोप्पा कबीला ना नेतृत्व कियानोर किन क्षत्रिय इंतोर। बाकी खेती कियानोर, दूसरा काम कियानोर किन साधारण लोकुर लेवेके विष इंतोर।

दूसरा रकम ता लोकुर स्थानीय मत्तोर, वीरकिन आर्य लोर हारे कीसी मत्तोर। वीरु कारियल, वंगसी मंदना लेवेके सुडला मोस्सोर वाले लोकुर मत्तोर। स्थानीय लोकुर आर्य लोरा संगे आत्ता युद्ध लोप्पा डोलतोर लेवेके गेड़ा ते वित्तितोर अनि आर्य लोरा नियंत्रण ते वात्तोर।

इद्रम आर्य लोर हर नाटे रेंडु वर्ग लेवेके रेंडु वर्ण ता लोकुर मंदानोर (आर्य ओसो अनार्य)। अनार्य लोर किन दस्यु लेवेके दानव वेने इंतोम।

आर्य गुलाम प्रथा पोरो स्वाभाविक रूप ते होंग कींतोर अदिन काजे अनार्य लोर किन हारे कित्ता पेरके आर्य लोर तम्मा व्यक्तिगत गुलाम बने कीवोर आत्तोर। इदिना उल्टा माटु मिस्र, यूनान, रोम लोप्पा इद्रम हारेमाता लोकुर उंदी समूह लोप्पा पूरा जीत दोरकी कित्ता आर्य समूह ता नौकर लेक्का मत्तादू हूइंतोम। गुलाम लोरा लेक्का वीरा पिस्वल पोरो आर्य लोरा अधिकार हिल्ला मत्ता मति आर्य लोकुर वीरकिन वेल्ले मेहनत ता काम किया वेहानोर, साफ-सफाई ता काम कियहानोर, वीर किन आर्य लोरकिनकु बाहर अलग नाहकु ने मंदा लागनदू। वीरगा बदे अधिकार मन्नो आयनदू।

आर्य-अनार्य लोरा इद भेदभाव जाति प्रथा ता शुरुआत मत्ता। अनार्य जन पेरके अछूत बनेमातोर अनि आर्य समूह ब्राह्मण-क्षत्रीय, विष पेरके ब्राह्मण, क्षत्रीय, वैश्य, शूद्र लेक्का 4 वर्ण (रंग) समूह ते विभाजित आत्तोर। इद व्यवस्था लोप्पा वायना कालम ते बाता-बाता बदलाव आत्ता अदिना पोरो



इंजे चर्चा कियाना जल्दबाजी आया। अदिन काजे इद विषय पोरो इंजे इचोने: इंजोरे बेरेल मर्रा कमेक आत्ता।”

रवि इतिहास ता पन्नांग लोप्पटला बाहर पेसिस वात्ता लेक्का “माटु इंजे एवनल सबसे मुन्ने इचोन बेसता सभ्यता बने कित्ता भारत ता मना पूरखा नोरा भाषा पुनवा मंदानदु वेल्ले आश्चर्य ता पोल्लो मंता। इदिनगले नावा दिमाग ते मानेय रासना बस्के शुरू कीसी मंदानूर? सवाल वाया मंता।”

बेरेल मर्रा- “निम्मा नेंडु पुत्ता रासा परना भाषा समाज लोप्पा वर्ग पुटतास्के अस्तित्व हिल्ला मत्ता। पाड़ना आदिम समाज लोप्पा रास्ता भाषा जरूरत हिल्ला मत्ता। ओरा काम सिर्फ वड़कना संगे ने ताकसोर मत्ता। मति वर्ग पुटता पेरेके रासना भाषा ता जरूरत आयना शुरू आत्ता। गुलाम लोर पुट्टी कित्ता अतिरिक्त ता हिसाब किताब तासना तल पोयसी धर्म ओसो कानून ता विवेचना लिखित रूप ते तासना जरूरत आत्ता। अद्रमासी लिखित भाषा ता विकास आत्ता। भारत लोप्पा संस्कृत भाषा ता व्याकरण ता सिद्धांत पाणिनी पोरोल ता दार्शनिक बने कितोर।

मति वर्णाक्षर वर्ग समाज पुटता पेरेके आत्ता इंजी आल्समा। निम्मा वर्णाक्षर हिंदी ता अ, आ, इ, ई ओसो अंग्रेजी ता ए, बी, सी, डी लेक्काने मंता इंजी आल्सितिन। पूना खोज अनुसार सबसे मुन्ने वर्णाक्षर लगभग 35000 साल पाड़ना मंता। पांजा ना गूडी पोरो अद कालम ता मानेय कित्ता चित्रकारी लेक्का दिसिंता।

भाषा ता विकास वर्ग समाज ता विकास संगे घनिष्ठ रूप ते जुड़ेमासी मंता, अदिन काजे मानव सभ्यता ता लिखित इतिहास वर्ग संघर्ष ता इतिहास आंदू इनमूड़ांता।”

बेरेल मर्रा ता पोल्लोंग वेल्ले गिर्दा वेसन लेक्कटवु, बचोन सरल ओसो स्पष्ट समजेमायना लेक्का मंतांग। रवि बेरेल मर्रा तल केंजता पोल्लोंग पूरा दिमाग ते वाटा मंतांग। बेरेल मर्रा वड़कसोर हत्ता।

“बदे वेने समाज ता चित्र महिला लोरा परिस्थिति तुन समजे कियवा लेवा पूरा आयो। नेटा नीवा समाज महिला लोर किन दोयम दर्जा ता नागरिक समजेमांता। हर साल लाखों पेडी पिल्ला पुट्टना मुन्ने ने हौकसिंतोर। पेकाल पुट्टी कियाला लोकर बचोनो तरीकांग परहकिंतोर। नेटा समाज लोप्पा

पेकाल वंश ताकी कींतोर इंतोर। उंदी कालम ते वंश पेकाल आयवा पेडी पिल्लाए ताकी कियानदू।”

रवि ना काजे इद पोल्लो दुनिया ता 8वी आश्चर्य पोल्लो तुक्क कम हिल्ला मत्ता, “बाताल?? इद बदरम आत्ता?.....”, मुन्ने वड़कसोर-वड़कसोर केमेक आत्तोर। परिशान कियाना सब्बे पोल्लोंग बेरेल मर्रा तुन वेहता लेक्का, इद वेने जरूरी आसी मंदार इंजी आल्सतोर। अदिनके बेरेल मर्रा इद्रम वेहा मंता। अदिन काजे रवि तन्ना सवाल बदले कितोर अनि “बेरेल मर्रा, नन्ना इदिना बारे ते बाताले पुन्नोन, निम्मा उचुन विस्तार ते समजे कीमू इत्तोर।”

बेरेल मर्रा- “दयु, ओसो उंदी बेरा अदे आदिम साम्यवादी समाज लोप्पा मलसी दायकाल। नन्ना नीकिन मुन्ने ने वेहता लेक्का आदिम साम्यवादी समाज लोप्पा परिवार नेटा परिवार लेक्का हिल्ला मत्ता। आस्कु-कोयतोर। संबंध पोरो विभिन्न पाबंदिंग पेरके अरतांग। शुरू ते समूह ता सब्बे कोयतोर, सब्बे आस्कुना मुज्जोर मंदानोर अनि सब्बे आस्कु सब्बे कोयतोर। मुत्तेस्कु मंदानवु। तीरम-तीर गर्रे ता संबंधी लोरा नड़मा मर्मिग आयना बंद आत्ता अनि पेरके गोत्र व्यवस्था ता जन्म आत्ता पेरके मर्मिग आयना लोप्पा मुश्किलकु वातांग।

इद पूरा प्रक्रिया लोप्पा हर मानेय तम्मा यायना बारे ते पुंदानोर मति बाबल बोर आंदुर, इंदानदू बोरे पुन्नोर। अद्रमासी यायो ना दर्जा बचोनो बेहरा बनेमांता। इदिना कारण ते कबीला लोप्पा यायल इत्तेके आइ प्रमुख मंदानादू। अद समाज तुन माटु मातृ प्रधान समाज इंतोम। मातृ प्रधान समाज नेटा पितृसत्तात्मक समाज ता उल्टा हिल्ला मत्ता। नेटा पितृसत्तात्मक लोप्पा बाबल इत्तेके कोयतोर। सत्ता सब्बे जागा ताकिंता अदु परिवार लोप्पा आई, समुदाय लोप्पा आई लेवेके देश लोप्पा आई। अस्केटा समाज तुन माटु मातृसत्तात्मक इन्नोम बारांकु इत्तेके कोयतोर आस्कुना दोड़(अधीन) हिल्ला मत्तोर। मातृ प्रधान इत्तेके वंश आस्कु ना पोरोल ते ताकनदू। यायो ना पेरके मिय्याइ समूह ता प्रमुख कार्यभार एतनदू। मर्मिग पेरके कोयतोर दूसरा गोत्र ते दायनोर आइ आयो। समूह ते मत्ता बदे वेने सम्पत्ती पोरो यायो ना अधिकार

मंदानदू अनि यायोना पेरके तन्ना मिय्याइ ता। मिय्याइ हिल्वेके ताना मौसी ना अधिकार आयनदू।

इद्रम अद समाज लोप्पा आस्कु कुन समाज लोप्पा बराबरी ता अधिकार मंदानदू। बोरे वेने शारीरिक लेवेके मानसिक रूप ते कमजोर मंता इंदा परवोर आयनोर। अबु हर आर्थिक-सामाजिक-सैन्य कार्रवाइंग लोप्प शामिल आयनवु अनि इव कार्रवाइंग ना नेतृत्व कियानवु। इद व्यवस्था वर्ग समाज पुट्टनाजोन तासकोर मत्ता।

वर्ग समाज पुटता पेरके परिस्थिति बदलेमाता। इद बद्रम आत्ता, इदिन समजेमायना जरूरी मंता। असल ते बस्के एवनल मानेय घूमंतू पिस्वल पिस्ससोर मत्तोर अस्के एवनल आस्कु-कोयतोरा काम लोप्पा प्राकृतिक विभाजन तुन विइचसी दूसरा बदे रकम ता विभाजन हिल्वा मत्ता। प्राकृतिक विभाजन इत्तेके निम्मा पुंजीए मंदाकिन! आस्कु ना लोप्पा पिल्ला-पेकोर पुट्टी कियाना ओसो पाल ऊहतना क्षमता मंता, कोयतोरा लोप्पा हिल्ले। वंश मुन्ने ओयला काजे मानेय ना अस्तित्व तुकू वेल्ले जरूरी मत्ता मति घूमंतु पिस्वल गर्भवती आस्कु ना स्वास्थ्य तुकू सही हिल्वा मत्ता। विशेष रूप ते पिल्ला-पेकोर पुट्टी कियाना उचुक महीनांग मुन्नेटल पिल्ला पुट्टता पेरकेटा उचुक महीनांग पेरके एवनल यायल ओसो केस्मुल पिल्ला काजे वेल्ले नाजुक टाईम मंदिता। घूमंतू पिस्वल गर्भवती आइ, ताना केस्मुल पिल्ला काजे वेल्ले मुश्किल मत्ता। अदिन काजे पशुपालन लेवेके कृषि संगे मानेय उंदी जागा मंदाना शुरू आत्तोर अस्के तिंदना-उंडना सुविधा मुन्ने तुकू बेस आयनाए आयवा पोरो वेहता कारण कुना कारण ते जन संख्या बेरसना वेल्ले तेज आत्ता।

पूना परिस्थिति लोप्पा काम वेने रेंडु रकम ता आयनदू। शिकार बाहर ता कार्रवाई मत्ता अनि पशुपालन, कृषि लोन मंजी कियाना कार्रवाई मत्ता। शुरुआत ते नांगेल ता इस्तेमाल कियवा ओसो भूम पूहवा लेवा खेती आस्कु कियानवु। लोन मंजी कियाना आर्थिक कार्रवाइंग आस्कु कियानवु अनि बाहर ता आर्थिक कार्रवाईंग कोयतोर कियानोर। इद कार्य विभाजन तल यायल बनेमायना आस्कु वेल्ले बेस तम्मा पिल्ला-पेकोर किन पोसे किया परनवु। अदिन काजे इद्रम कार्य विभाजन स्वाभाविक वेने मत्ता। इंजे एवनल



वेने आस्कु-कोयतोर संबंध बराबरी ता मत्ता। मति वंश आस्कु ना पोरोल ते ताकनदू। इद्रम ता कबीला मीकिन इंजे वेने भारत ता पूर्वोत्तर राज्य कुना लोप्पा (मेघायालय) ओसो केरल ता उचुन समुदाय कुना लोप्पा दोरकिंता। मर्मिंग आत्ता पेरके कोयतोर गोत्र बदलेमांता अनि ओरु तन्ना मुत्ते ना गोत्र समूह ते शामिल आंतोर।

उचुन अतिरिक्त आयना शुरू आत्ता अनि ओरु अतिरिक्त संपत्ति ता रूप ते गोत्र ता सामूहिक संपत्ति इंदानोर। कोयतोर मर्मि आत्ता पेरके दूसरा गोत्र ता सदस्य बनेमायनोर अदिन काजे तन्ना गोत्र ता संपत्ति पोरो ओना अधिकार मन्नो आयनदू। यायोनो पेरके मिय्यड़ ओसो यायोना हेलो(मौसी) अद संपत्ति ता इस्तेमाल किया परनदू।

शुरू ते इद व्यवस्था लोप्पा वेने समस्या हिल्ला मत्ता। मति उत्पादन शक्तिंग ना ओसो ज्यादा विकास आत्ता पेरके पूना परिस्थितिंग पुटतांग। खेती नांगेल संगे आयना शुरू आत्ता, गुप्प गेड़ा तुन नड़कसी अगाटा मिरकता भूम तुन बोजा मत्ता नांगेल ता इस्तेमाल आयना शुरू आत्तास्के खेती काम आस्कु ना कैदल कोयतोर कैदे हत्ता। पशुपालन वेल्ले मुन्ने ने कोयतोर कैदे हंजी मत्ता बारांकु इत्तेके पशु संख्या बेरसतास्के अविना काजे चारो डग्गी कियाना मुश्किल आसोर मत्ता।

इद्रम ता महत्वपूर्ण पोल्लो इगा मीकिन खेती ओसो पशु पालन आस्कु कींतांग इंजी दिसियर मति उचुन जोम पेरके कोयतोर कार्रवाई बनेमाता।

पशुपालन, कृषि मुख्य आर्थिक कार्रवाई मत्ता, इदे अतिरिक्त पुट्टी कियाना साधन वेने आंदू। कोयतोर, ओरा पेकोर खेती काम कियानोर अनि अतिरिक्त पुट्टी कियानोर। इंजे इगा निम्मा उंदी अंतरविरोध दिसियर।

कोयतोर लेवेके ओरा पेकोर अतिरिक्त पुट्टी किया मंतांग अनि अद अतिरिक्त पोरो ओरा बदे अधिकार मन्नो आयनदू। कोयतोर खुद दूसरा गोत्र ता सदस्य मंदानोर। बारांकु इत्तेके ओरु मर्मिग कीसी दूसरा गोत्र ते वात्तोर। ओना पेकोर वेने मर्मिग आत्ता पेरके दूसरा गोत्र ते दायनूर। इद्रम खेती लोप्पा सुधार कियाना ओसो पशु सुरक्षा लोप्पा कित्ता मेहनत ओरकिन दोरको आयनदू।

इद अंतरविरोध ता समाधान वंश परंपरा, आस्कु-कोयतोर संबंध पलटे कीतांकु आत्ता। पूरा आधा आबादी दूसरा आधा आबादी ता गुलाम बने माता। संपत्ति संबंध बदलेमातांग। समाज मातृप्रधान तल पुरुष प्रधान ओसो पितृसत्तात्मक आत्ता। समाज लोप्पा यायो ना जागा ते कोयतोर(बाबल) वात्तोर। इंजे वंश कोयतोर ताकी कींतोर। संपत्ति यायल-मिय्यइ ता जागा ते बाबल-पेका ना कैदे हत्ता। उचुन जोम मुन्ने चर्चा कित्ता अंतरविरोध हल आत्ता मति आस्कु कुन अदिना बेहरा कुर्बानी हिया लागता।



इंजे आस्कु पूराए परिवार, लोन लोप्पा ने सीमित आसी मत्तांग। राजनीतिक-सामरिक-आर्थिक कामकाज लोप्पा अविना भूमिका कम आत्ता। इंजे अविना भूमिका सिर्फ कोयतोर किन खुश कियाना ओसो मनोरंजन कियाना वस्तु लेक्का बनेमाता। अविना काम कोयतोर किन ओरा वारिस पुट्टी कीसी हियाना(संपत्ति हस्तांतरण काजे) मत्ता। आस्कुना विरुद्ध मर्मि तुकू हब्बर संबंध बने कियाला जबरदस्त पाबंदी आत्ता अनि कोयतोर काजे बदे पाबंदी हिल्ला मत्ता। इदिना कारण स्पष्ट मत्ता। आस्कु मर्मि तुकू हब्बर हंजी संबंध बने कियाना अनुमति मत्तेके कोयतोर किन तन्ना पेकाल ओनोर आंदुर इंजी गारंटी किया परवोर आयनोर। इदिना बारे ते मीकिन मीवा नालुंग बगिल ओसो हल्कोए दिसियर। कोयतोर बचोन चरित्रहीन मत्तेकाई

ओनकिन बातले इनवा लेवा आस्कुना हट्टा पोरो पूरा खानदान ता इज्जत ता बोजा तासमूडांता।”

रवि- “आस्कु अद कालम ते इद बदलाव ता विरोध कित्ताद हिल्ले या?”

बेरेल मर्ग- “आस्कु इद बदलाव ता विरोध कीतद हिल्ले इंजी आयो। अविना कैदल संपत्ति, सत्ता, अधिकार सब्बे हत्तांग मति माटु अद संघर्ष ता बारे ते बाताले पुन्नोमा। माटु अद संघर्ष हिंसक मत्ताए हिल्ले इंजी पुन्नोमा। कार्ल मार्क्स ना दोस्त फ्रेडरिक एंगेल्स इद उंदी अहिंसक बदलाव मत्ता इंजी रास्तोर ताना लोप्पा आधा आबादी दूसरा आधा आबादी ता गुलाम बने कित्ताद मत्ता। इद्रम निम्मा निजी संपत्ति परिवार ता पूना परिभाष तुन बद्रम जनम हीता अनि बद्रम आस्कु ना परिस्थिति तुन बदले किसीता इंजी हूडा परिंतिन।”

रवि- “माटु इव सब्बे बद्रम पुत्तोम?”

बेरेल मर्ग- “दुनिया मेंड नेंडु वेने वेल्ले आदिवासी समुदाय मंता अदु पाषाण युग ता पाइना परिस्थिति तेने मंता। वीरा पिस्वल ता हत्ता 200 साल कुना लोप्पा बचोनो वैज्ञानिक लोर अध्ययन कितोर। अगा ओरकिन मातृप्रधान समाज दिसता। अदिना निशानी पेरके मातृदेवी ता पूजा ता रूप ते कारतास्के दोरकता वस्तुंग ओसो अस्केटा साहित्य लोप्पा वेने दोरकतांग। मुन्ने पशु पालक बनेमाता अगा इद बदलवा जल्दी आत्ता अनि कृषि कियाना जागा ते इद बदलाव तूलनात्मक रूप ते उचुन लेट आत्ता। निम्मा पशुपालक आर्य लोकर पेन पूजा कियानोर, देवी पूजा आयो मति सिंधू घाटी सभ्यता लोप्पा पशुपति संगे संगे मातृदेवी ता पूजा ता परंपरा वेने मत्ता। कालम गड़ससोरे कृषि, पशुपालन रेंडासी रकम ता समाज पुरुष प्रधान-पितृसत्तात्मक समाज बनेमाता। कोयतोर परिवार ता मुखियाल बनेमातोर। परिवार ता कामकाज कायतोर नियंत्रण ते वात्ता।”

रवि- “बेरेल मर्ग, ओसो उंदी बेरा आदिम साम्यवादी समाज लोप्पा वर्ग बद्रम पुटता इंजी समजे कीमू, निम्मा मुन्ने समजे कीतिन मति उचुन स्पष्ट आत्ताद हिल्ले। असल ते संपत्ति सामूहिक तल निजी संपत्ति बद्रम बनेमाता? इंजी समजेमाया परवोन।”

बेरेल मर्ग- “इंगो, नन्ना ओसो उंदी बेरा कोशिश कीतान। निम्मा पशुपालन ओसो कृषि पेरके मानेय अतिरिक्त उत्पाद कियाना शुरू कितोर इंजी तो समजेमातिने। बस्के एवनल अतिरिक्त उत्पाद आयो, अतिरिक्त तुन लूटे कियाना विचार वेने वायो आत्ता। मति अतिरिक्त उत्पाद आत्ता पेरके इद अतिरिक्त तुन लूटे कियाना विचारवेने पुटता। इद प्रक्रिया दिख्यंग-महीनांग लेवेके उचुक साल कुना लोप्पा पूरा आयवा उंदी दीर्घकालीन बदलाव लोप्पा आत्ता।

शुरुआत ते पुटता अतिरिक्त पूरा समूह ता संपत्ति मंदानादू। अद्रमासी समग्र रूप ते पूरा समूह ता परिस्थिति मुन्ने तुकू बेस मत्ता अनि तीरम-तीरम अतिरिक्त ता मात्रा ओसो बेरसता। लोहा ता खोज विशेष रूप ते अतिरिक्त ता मात्र तुन बेरसी कियमूडाता। इद अतिरिक्त तुन लूटे कियाला काजे दूसरा कबीला विरुद्ध हमला कियाना, ओरा पशु, अनाज लेक्कटवु कल्लना शुरू आत्ता। लूटे कित्ता माल शुरुआत ते सामूहिक रूप ते इस्तेमाल आयनदू मति तीरम-तीरम इद परंपरा लोप्पा बदलाव वासोर हत्ता। बाकी कबीलांग कुन लूटे कियाला काजे शुरू कित्ता अभियान कुना नेतृत्व कियानोरा भूमिका चीनेमासोर हत्तास्के नेतृत्वकारी भूमिका ता महत्व बेरससोर हत्ता अनि लूट ता बेहरा हिस्सा वीर इरवुरिगा दायाना शुरू आत्ता। युद्ध संगे-संगे युद्ध जीइनोरा उद्देश्य ते धार्मिक कर्मकांड ता महत्व वेने बेरसता। अद्रमासी पुरोहित वेने लूट ता बेहरा हिस्सा ता अधिकारी बनेमातोर। इद्रम संपत्ति ता स्वरूप सामूहिक तल निजी आयना शुरू आत्ता। युद्ध ता महत्व लगातार बेरससोर हत्ता, लूट ता मात्रा वेने बेरससोर हत्ता, सेनापति, पुरोहित ना महत्व वेने अदिना अनुसार बेरससोर हत्ता। लूट ता बेहरा हिस्सा ओरगा मंदानदु अदिन काजे वीरु उच्च वर्ग अनि बाकी लोकुर साधारण जन लेवेके निम्न वर्ग बने मातोर।

उचुन जागा ने मैसोपोटामिया लोप्पा वस्तु दूसरा तरीका ते बदलेमाता। कृषि उत्पादक समाज लोप्पा अतिरिक्त ता हिस्सा भंडार लेक्का तासानोर। इद भंडारण वेल्ले जरूरी मत्ता बारांकु इत्तेके अकाल, मुसुर वायवास्के, ऊसा वात्तास्के करवु तल बचेमायमूडाता। इद भंडार ओसो इद भंडार ता देखरेख कियानोर वेल्ले महत्वपूर्ण मंदानोर। अनाज ता कमी वाले साल ते

वीरु भंडार तल लोकर किन अनाज वितरण कियानोर। भंडार गृह, इविना देखरेख कियानोर तीरम-तीरम समाज ता राजनीतिक सामाजिक कामकाज ता धुरी बनेमातोर अनि उच्च वर्ग बनेमातोर।

समाज लोप्पा वर्ग विभाजन उंदे गोत्र कबीला ता लोकर किन रेंडु अलग वर्ग समूह ते विभाजित आतोर मति निम्न वर्ग ता लोकर अस्केने गुलाम बनेमायवा मत्तोर। तम्मा गोत्र ता निम्न वर्ग ता लोकरिगा राजनीतिक सामाजिक आर्थिक विषय कुना पोरो बाताले इंदाना लेवेके बाताले कियाना क्षमता हिल्ला मत्ता अदिनके ओरु शुरू ते गुलाम हिल्ला मत्तोर। पेरके गुलाम प्रथा वेल्ले व्यापक रूप एतितेके गोत्र व्यवस्था कमजोर आत्ता। बचोनो जागा ने इद छिन्न-भिन्न आत्ता। उचुन पीढ़ी मुन्ने उंदी गोत्र ते मंदाना लोकर वेने गुलाम बनेमायना शुरू आत्ता। इद्रम बचोनो रकम ते आत्ता। प्राकृतिक मुश्किल कुना कारण ते उचुन साल पेरके करवु लेक्कटा परिस्थिति वात्तास्के स्वतंत्र किसान लोर किन वेने कर्ज एता लागनदू अनि कर्ज निह्हा परवेके ओरकिन गुलाम बने कियमूझायनदू। विभिन्न अपराध कुना काजे वेने स्वतंत्र लोकर किन गुलाम बने कियमूझायनदू।”

रवि- “इद पोल्लो नाकिन समजेमाता। निम्मा गुलाम प्रथा ता कारण ते समाज मुन्ने हत्ता इत्तिन। इदिन उचुन विस्तार ते वेहा। गुलाम प्रथा ता विरोध बारांकु आत्ता, इद्रम आतांकु समाज तुन बाता फायदा आत्ता? इद वेने नाकिन समजेमासोर हिल्ले।”

बेरेल मर्ग- “नीकिन उत्पादन शक्तिंग, उत्पादन संबंध कुना बारे ते वेहता पोल्लोंग सुरता मंदानुंगे। उत्पादन शक्तिंग इत्तेके उत्पादन कियाना लोकर ओसो उत्पादन कियाना औजारकु। उत्पादन संबंध इत्तेके उत्पादन ओसो वितरण कियानास्के विभिन्न मानव समूह नड़मा बनेमायना संबंध। इत्तेके उत्पादन साधन कुना पोरो बोना अधिकार मंता, उत्पादन पोरो बोना अधिकार मंता, वितरण बोर किय मंतोर इंदानवु।

उत्पादन शक्तिंग ओसो उत्पादन संबंध नड़मा आपसी तालमेल मंदिता। उत्पादन शक्तिंग विकसित आंतांग अस्के पाइना उत्पादन संबंध तल तालमेल देगिता। पाइना उत्पादन संबंध अस्के उत्पादन शक्तिंग ना विकास लोप्पा बाधा वाटतांग। निम्मा मुन्ने कच्ची, खेती, पशुपालन आदिम साम्यवादी

समाज लोप्पा खोज कितादू हूइतिन मति ताना पेरके इविन ओसो ज्यादा विकसित कियाला इदे पाइना आदिम साम्यवादी संबंध बाधा आसोर मत्तांग।

इद्रम ता परिस्थिति वात्तास्के उत्पादन संबंध, उत्पादन शक्तिंग लोप्पा टकराव वात्ता। पाइना व्यवस्था ता शासक उत्पादन संबंध कुना प्रतिनिधित्व कींतोर इत्तेके पाइना व्यवस्था ता शोषक वर्ग प्रतिनिधि मंदिंतोर। पूना उत्पादन शक्तिंग पूना व्यवस्था ता प्रतिनिधित्व कींतांग। इद टकराव लोप्पा जीत बोना आंता? फौरी रूप ते रेंडासी ना लोप्पा बदे वेने जीड़ा परित्ता मति आखरी जीत उत्पादन शक्तिंग ना आंता, पूना उत्पादन शक्तिंग ना प्रतिनिधिरा आंता अनि इदु तन्ना काजे पूनाए व्यवस्था पुट्टी कींता।”

रवि- “पूना व्यवस्था इत्तेके?”

बेरेल मर्रा- “उत्पादन शक्तिंग ओसो उत्पादन संबंध रेंडासी कलियसी समाज ता अर्थ व्यवस्था बने कींतांग। अर्थ व्यवस्था तन्ना अनुसार राजनीतिक व्यवस्था, शिक्षा व्यवस्था, नैतिकता, धर्म लेक्कटवु तय कींता।”

रवि- “बेरेल मर्रा, निम्मा वेल्ले मुश्किल पोल्लोंग किया मंतिन। उचुन हल्को कीसी समजे कीतेके, उचुन समजेमायर” तल्ला ताइकसोरे रवि इत्तोर।

बेरेल मर्रा- “इंगो। कोशिश कींतान। निम्मा बस्केने लोन बने कियानदू हूइतिना?”

रवि- “इंगो, नावा मुन्ने बचोनो लोहकु बनेमातांग। मुन्ने अदिना नींव तरविंतोर। अनि नींव वाटिंतोर। अद नींव पोरो गूडी निल्पी कींतोर।”

बेरेल मर्रा- “गूडी नींव पोरो निल्पी कियवा लेवा ताना ओदा निल्पी कीतेके बाताल आयार?”

इंजे रवि कव्वा मंतोर। ओरु बेरले मर्रा बचोन बुद्धि हिल्ला लेक्का वड़का मंता आल्सतोर अनि “हा....हा...हा..., इद्रम बद्रम आया परित्ता?”

बेरेल मर्रा रवि ना दिमाग ते बाता ताका मंतायो अंदाजा वाटता। मति बाताले इनवा लेवा “अल्ले वेहा, गूडी निल्पी कियवा लेवा, नींव तुन अद्रमे विइसतेके बाताल आयार? इंजी पूछेमातोर।”

रवि- “उचुन जोम पेरके नींव लोप्पा एर निंडियर लेवके नींव कमजोर आयर। अदिना इट्टांग पेसनुंग”, रवि किन बेरेल मर्रा अदिना परीक्षा एता मंताए लेवेक अदिन निज्जमे इदिना बारे ते बदे जानकारी हिल्ले इंजी समजेमासोर हिल्ला मत्ता।

बेरेल मर्रा- “मना समाज लोप्पा वेने इद्रमे आंता। अर्थव्यवस्था मना समाज ता नींव आंदू। अदिन काजे अर्थव्यवस्था तुन आधार वेने इंदो परितोम। इद नींव पोरो पोरोटा ढांचा नित्तिता। राजनीति ता, धर्म ता, शिक्षा ता, नैतिकता ता। बद्रम ता नींव मंता अद्रम ताए बिल्डिंग मंदिता। राजनीति, धर्म, शिक्षा, नैतिकता संगे सब्बे विचार कुना लोप्पा मंतांग। इव विचार कु ठोस आर्थिक आधार-उत्पादन शक्तिंग, उत्पादन संबंध-उत्पादन कियानोर, तम्मा औजार ओसो आपसी संबंध कुना संगे निर्धारित आंतांग। अर्थव्यवस्था-आर्थिक आधार तुन मजबूत कियाना विचार कुन इद व्यवस्था ता विचार बनेमातांग। उदाहरण तुक् सामूहिकता, सामूहिक सम्पत्ति, मातृप्रधानता लेक्कटा आदिम साम्यवादी समाज ता विचार मत्तांग। इव विचार कुना संगे अद समाज मजबूत आत्ता। इव विचारकु अद समाज लोप्पा विकास प्रक्रिया तुन मुन्ने ओता। विचार हिल्ला आदिम साम्यवादी समाज ता पिस्वल मन्ने।

मति अर्थव्यवस्था ता अनुकूल हिल्ला विचारकु अदिन कमजोर कींतांग अदिनके अविन स्वीकार कियमूडायो आंता। अविन गलत लेवेके पाइना विचारकु बनेमांतांग। गुलाम प्रथा ता शुरूआत पेरके सामूहिकता, सामूहिक सम्पत्ति, मातृप्रधानता ता विचार कुन स्वीकार किताद हिल्ला मत्ता। इविना जागा पूना विचारकु एतितांग। इंजे निजी सम्पत्ति, निजी परिवार, पितृसत्ता विचारकु हावी आंतांग। सामूहिक सम्पत्ति, सामूहिकता ता विचार गुलाम प्रथा वाले युग ता अर्थव्यवस्था ता अनुकूल हिल्ला मत्तांग। इद्रम निम्मा बदे विचार स्थाई मनवा मत्तादू हूडा परितिन। हर विचार ता बदे खास कालम ते जरूरत मंदिता। कालम हत्ता पेरके अद विचार ता जरूरत खत्तम आंता।

विचार बदे समाज काजे वेल्ले महत्वपूर्ण मंदिता। अतु तम्मा आर्थिक आधार तुन मजबूत बने कींतांग। पोरोटा ढांचा तन्ना नींव तुन मजबूत कींता।

प्लूटो पोरोल ता दार्शनिक(विचार हीतोर) उचुन मुल जन्म आत्तास्केटले गुलाम मंतोर ओसो उचुन मुल पुटतास्केटले मालिक मंदितोर इंजी वेहतोर। इद विचार गुलाम प्रथा अनुकूल मत्ता। इदु गुलाम प्रथा तुन मजबूत कित्ता। शोषक वर्ग विचार कुना लोप्पा वेल्ले काम कित्ता। तन्ना अनुकूल विचार पुट्टी कियाला काजे अदु पूना-पूना संस्थांग पुट्टी कींता। उदाहरण तुकू विभिन्न राजनीतिक संस्थांग, शैक्षणिक संस्थांग, धार्मिक संस्थांग लेक्कटवु। तम्मा अनुकूल विचार हियाना संस्थांग कुन शोषक वर्ग संरक्षण हींता। इव संस्थांग ना प्रमुख लोर किन धन दौलत, सुख-सुविधांग हींतांग।

मति इव सब्बे संस्थांग ओसो अविना हीता विचार उत्पादन शक्तिंग ना विकास तुन रोमी किया परित्तांग। उंदी कालम पेरके परिस्थिति ओसो उंदी बेरा टकराव काजे तैयार आंतांग।

इव सब्बे निम्मा समजेमातेके मना सवाल ता जवाब वेने दोरकियर। गुलाम प्रथा ता शुरुआत आत्तास्के उत्पादन शक्तिंग कुन मुक्त कित्ता, इदु पाड़ना उत्पादन संबंध कुना पासा ते हिरकसी मंदित्ता। इदु पूरा समाज तुन विकास हर्दे वाटित्ता। गुलाम प्रथा गुलाम मालिक लोर किन वेल्ले बेहरा स्तर ते श्रम हीता। इद श्रम ता इस्तेमाल कीसी वेल्ले बेहरा स्तर ते गेड़ा नड़कसी खेती कित्ताद मत्ता। पशुपालन वेने बेहरा स्तर ते शुरू आत्ता। इंजे श्रम तल पूराए मुक्त आत्ता मालिक वर्ग विज्ञान, कला, राजनीतिक, दर्शन, शिक्षा लोप्पा काम कित्ता। मालिक लोर लगातार बेरससोर मत्ता जरूरत, सुख-सुविधांग कुशल श्रम ओसो व्यापार तुन जन्म हीता। सुंदर दड़ियांग, कांच ता सामान, कीमती मोतिंग ना सामान, बेसता डिजाईन वाले कलात्मक गेत्तेंग, कालीन, बेहरा-बेहरा महल इव सब्बे पाड़ना आदिम साम्यवादी समाज लोप्पा संभव हिल्ले, बारांकु इत्तेके इदिना काजे बेहरा संख्या ते श्रमिक लोरा जरूरत मत्ता। श्रमिक लोरा जरूरत ओरकिन अन्न उत्पादन काम तल मुक्त कित्तास्के ओसो बोरे दूसरोरे ओरा काजे अन्न पुट्टी कित्तास्केने पूरा कियमूड़ांता।

व्यापार समुद्र हर्ही तेरियता। गणित लेवा व्यापार संभव हिल्ले। इद्रम ता समुद्र यात्रांग कुन नक्षत्र विज्ञान ता जानकारी हिल्ला ताकी कियाना संभव हिल्ला मत्ता। मानेय गणित वेने करियतोर अनि नक्षत्र विज्ञान वेने।

धातु कर्म काम लोप्पा वेने ओरु निपुणता दोरकी कितोर। कच्ची, सोना, चाँदी, तांबा, टिन, पारा, जस्ता लेक्कटा धातुंग इस्तेमाल शुरू आत्ता। कला लोप्पा चित्रकारी, नृत्य, पाटा पारना, रंगमंच, शिला कला, मूर्ति निर्माण, भवन निर्माण लेक्कटवु विकसित आतांग। गुलाम प्रथा लोप्पा मिस्र ता पिरामिड नेंडु वेने दुनिया ता सात सबसे बेहरा आश्चर्य लोप्पटल उंदी मंता। संगीत लोप्पा विभिन्न वाद्य यंत्र कुना विकास आत्ता।

गुलाम प्रथा लोप्पा चिंतन कियाना पूना-पूना विचार कुन हियाना दार्शनिक वेने पुटतोर। पिस्वल-हामूर, हामूर पेरके पिस्वल, ब्रह्मांड ता उत्पत्ति लेक्कटा गंभीर सवाल कुना पोरो पूना-पूना विचार कु पुटना शुरू आतांग।

इद पूरा विकास गुलाम लोरा मेहनत संगे ने आत्ता। इद पूरा विकास काजे प्रत्यक्ष लेवेके अप्रत्यक्ष रूप ते गुलाम लोरा भूमिका प्रमुख मत्ता। कृषि, पशु पालन ओसो बाकी कठीन ओसो अकुशल रकम ता श्रम गुलाम लोर कियानोर। अतिरिक्त पुट्टी कीसोर गुलाम लोर उचुन मुल किन अन्न उत्पादन तल मुक्त कीसी कुशल श्रम ओसो मानसिक श्रम कियाला परिस्थितिंग तैयार कितोर। मति इद्रम ताए गुलाम लोरा निर्मम शोषण आयनदू।”



मिस्र ता पीरामिड

समाज ओसो बदलेमाता

मालिक शोषक वर्ग ज्यादा से ज्यादा ऐशो आराम ओसो सुख-सुविधांग लोप्पा मुइंदसोर हत्ता, अद्रम-अद्रम गुलाम लोरा संख्या बेरससोर हत्ता। निन्ने एवनल स्वतंत्र किसान लेवेके कारीगर वेने गुलाम लेक्का बदलेमातोर। व्यवस्था पोरो आर्थिक बोजा लगातार बेरससोर हत्ता।

इद सब्बे उत्पादन शक्तिंग ना विकास तुन रोमी कियाना शुरू कित्ता। गुलाम लोर मालिक लोरा विरुद्ध संघर्ष दिव्य-दिव्य तुकू शुरू आत्ता। इद संघर्ष मालिक लोरा विरुद्ध हिंसात्मक कार्रवाइंग लेक्का वेने मत्तांग अनि मालिक लोरा सम्पत्ति तुन नुकसान कीसोर, पुंजी-पुंजी लापरवाही कियाना लेक्का वेने मत्तांग। गुलाम लोरा उत्पादन प्रक्रिया लोप्पा रूचि हिल्वा मत्ता। फसल आतेकाई आयवेकाई, एर्मिग-कोंदांग स्वस्थ मत्तेकाई, बीमार आतेकाई गुलाम लोर किन बाताले आयो। ओरु मशीनी तरीका ते गुलाम मालिक लोरा आदेश ता पालन कियानोर। औजार कुना सही देखबाल कीसोरे ओरा बदे व्यक्तिगत रूचि हिल्वा मत्ता। निर्मम ओसो कूर शोषण ओरकिन जानवर लेक्कटा परिस्थिति ते वाटता। अदिन काजे खेती ओसो पशु पालन लोप्पा उत्पादन मंदी बेरससोर हत्ता। दूसरा बगिल गुलाम मालिक लोरा हंदी हिल्वा खर्च ओसो सुख-सुविधांग ना बेरससोर मत्ता जरूरत कुन पूरा कियाला काजे उत्पादन ता बेहरा हिस्सा खर्च आयनदू। जेक-जेक तल बहूमूल्य सुख-सुविधा ना वस्तुंग अनाज लेवेके सोना-चाँदी हीसी अस्सानोर। अदिना कारण ते खाद्य पदार्थ ता भंडारण कम आत्ता। हमेशा ऊसा, मुसुर वायवा मंदाना लेक्कटा परिस्थितिंग समाज लोप्पा करवु ता परिस्थिति पुट्टी कींता, इदु गुलाम मालिक लोरा खिलाफ व्यापक होंग पुट्टी कींता।

इदे आयवा उंदी बेहरा पोल्लो कुशल श्रम (Skilled Labour) संबंधित मंता। समाज ता विकास आसोर हत्ता अद्रमे कुशल श्रम ता उपयोग बेरससोर हत्ता। बेस-बेसता गंजिंग-दड़ियांग, वेसता गेतेंग, बेसता गृह निर्माण कियाना कारिगर, दस्तकारीरा मांग बेरससोर हत्ता मति गुलाम प्रथा इद मांग तुन पूरा किया परवो। गुलाम लोर जोर-जबरदस्ती कीसोर अकुशल श्रम कियमूडांता मति कुशल श्रम किया परवोर। कुशल श्रम काजे मानसिक स्वतंत्रता, रचनात्मकता, मानसिक विचार मंदाना जरूरी मंदिता। गुलाम लोरगडल इव सब्बे ऊंदिताद मत्ता। अदिन काजे समाज ता बेरससोर मत्ता जरूरत तुन पूरा कियाला काजे ज्यादा बेहरा संख्या ते कुशल कारिगर, दस्तकारीरा जरूरत आत्तास्के गुलाम अर्थव्यवस्था ता तन्ना जरूरत कु ज्यादा संख्या ते स्वतंत्र लोकर किन वेने गुलाम बने कीसोर मत्ता। इद उंदी बेहरा अंतरविरोध अद समाज ते दिसना शुरू आत्ता।

कुल मिले कीसी गुलाम प्रथ लोप्पा माटु मूंड रकम ता सामाजिक अंतर विरोध दिसता।

पहली रकम ता अंतरविरोध गुलाम मालिक, गुलाम लोरा नड़मा मत्ता, दूसरा रकम ता अंतरविरोध गुलाम मालिक ओसो स्वतंत्र किसान, दस्तकार लोरा नड़मा मत्ता। स्वतंत्र किसान ओसो दस्तकारीरा मजबूरी ता फायदा एतसी ओरकिन कर्ज ता जाली ते हिरकी कियाना अनि ओरकिन गुलाम बने कियाना प्रक्रिया समाज लोप्पा ताकसोर मत्ता। इदिना खिलाफ किसान लोर गुलाम मालिक लोरा खिलाफ बचोनो साल संघर्ष ताकतांग। तीसरा रकम ता अंतरविरोध गुलाम मालिक लोरा पूना ओसो पाड़ना रकम ताविना नड़मा मत्ता। पारंपारिक रूप ते गुलाम लोरा पोरो संसाधन कुना पोरो पाड़ना गुलाम मालिक लोर अधिकार तासनोर अनि अव संसाधन कुना पोरो पूना रकम ता मालिक लोर खुद तम्मा अधिकार तासना कोशिश किया मंतोर।

इव सब्बे अंतरविरोध अलग-अलग टाईम ते सशस्त्र संघर्ष लेक्का बदलेमातांग। संघर्ष कियाना रेंडु रकम ता शक्तिंग लोप्पटल बदे उंदी लोप्पा समाज तुकू बदे पूना वस्तु हियाला हिल्वेके इद्रम ता संघर्ष रेंडु रकम ता वर्ग नष्ट आयना संगे ने नष्ट आता। पहली सभ्यतांग विकसित आत्ता नील डोड्डा घाटी, सिंधू घाटी, मैसोपोटामिया लोप्पा इद्रम आत्ताद हिल्ले। शोषित वर्ग

शोषक शासक लोरा खिलाफ नितिता मति अदिनगा समाज तुन मुन्ने ओयना क्षमता हिल्वा मत्ता अदिन काजे अवु सभ्यतांग नष्ट आतांग। अगा शहरी पिस्वल, दस्तकारी, व्यापार, बाकी तकनीक नष्ट आतांग। अव समाज कु ओसो उंदी बेरा ग्रामीण खेतिहर समाज लोप्पा बदलेमाता।

अदिन काजे वर्ग संघर्ष कीसोर मत्ता प्रगतिशील ताकत इत्तेके प्रगतिशील उत्पादन शक्तिंग अद समाज तुन मुन्ने आया परना लेक्का मंदाना जरूरी आत्ता।

इद क्षमता गुलाम प्रथा खत्म आयनास्के पुटता। उदाहारण तुकू रोम ता गुलाम प्रथा ता आखरी चरण ते गुलाम लोरकिन वेल्ले बेहरा कुर्बानी हिया लागता। इदिना रेंडु कारण मत्तांग। यूरोप ओसो अफ्रीका ता गुलाम लोरकिन मुन्ने ने जीड़ताद मत्ता अदिन काजे इंजे पूना गुलाम लोरा बरपाई बंद आत्ता। किसान लोरा संघर्ष कारण ते कर्ज ता जागा ते किसान लोर किन गुलाम बने कियाना प्रक्रिया तुन वेने रोमी कित्ताद मत्ता।

गुलाम लोरा रेट बेरसतांकु गुलाम लोर पुट्टी कियाना अतिरिक्त इंजे कम आत्ता। गुलाम मालिक लोर गुलाम लोरा मर्मिग कियाना, परिवार तासिसी पिल्ला-पेकोर पुट्टी कियाना अधिकार हीसी इदिना समाधान कियाना कोशिश कितोर। मति इद्रम कीतेकाई इद समस्या हल आत्ताद हिल्ले बारांकु इत्तेके गुलाम परिवार ता पालन-पोषण ता खर्च बेरसता।

अद्रमासी बचोनो गुलाम मालिक लोर तम्मा भूम गुलाम लोर किन वेल्ले लगान एतसी किराया ते हियाना शुरू कितोर। अद्रमासी गुलाम मालिक लोर तम्मा गुलाम लोरा देखरेख ते आयना खर्च तल मुक्ति दोरकता। इद्रम ता गुलाम लोर किन भू-गुलाम इंदाना शुरू आत्ता बारांकु इत्तेके ओरकिन भूम संगे दोहचियमूझाता, ताना पेरके ओरकिन अनिवार्य रूप ते खेती किया लागनदू। ओरु अद भूम तुन विड़सा परवोर। घाटा आतेके वेने ओरकिन खेती कियाना जरूरी मंदिता।

बचोनो जागा ने गुलाम लोरा विद्रोह कीसी गुलाम मालिक लोर किन खत्म कीसी भूम पोरो खेती कियाना शुरू कितोर। अद्रमे बचोनो जागा ने गुलाम मालिक लोर किन सत्ता तल बेदखल कितोर। ओरा जागा ते पूना



Tod des Spartacus. Zeichnung von Hermann Vogel.

लोकुर सत्ता ते वात्तोर ओरु गुलाम लोर किन जमीग हीसी ओरगडल लगान वसूल कियाना शुरू कितोर।

इद प्रक्रिया लोप्पा गुलाम प्रथा सामंतवादी समाज लेक्का बदलेमाता। इद्रम निम्मा स्पष्ट रूप ते उंदी कालम ते उत्पादन शक्ति ना विकास लोप्पा महत्वपूर्ण भूमिका निभे कित्ता उत्पादन संबंध, इंजे उत्पादन शक्ति ना विकास तुन रोमी कित्ता। ओसो उंदी बेरा उत्पादन शक्तिंग, उत्पादन संबंध कुना लोप्पा टकराव आत्ता। इदिन माटु वर्ग संघर्ष इंतोम।

उत्पादन शक्तिंग जीडिंतांग लेवेके उत्पादन संबंध जीडिंतांग?

फौरी जीत बोनाए वेने आया परिंता, मति आखरी ओसो निर्णायक जीत प्रगतिशील ताकत ताए आंता। उत्पाद शक्तिंग मुन्ने दायला काजे कंदेरमाया मंतांग अनि उत्पादन संबंध अविन साकरी संगे दोहची मंदिंतांग अदिन काजे उत्पादन शक्तिंग ना जीत जरूर आंता।

उत्पादन शक्तिंग मुन्ने दाया मंतांग अनि पेरके अरता उत्पादन संबंध कुन देहता अनि पूना उत्पादन संबंध वातांग। इद्रम उंदी पूना अर्थव्यवस्था-

उंदी पूना आधार समाज लोप्पा स्थापित आत्ता अदिन माटु सामंतवादी पोरोल ते पुंतोम।

रवि- “बरेल मर्रा, निम्मा उचुन मुश्किल पोल्लोंग किया मंतिन मति वेल्ले समजे वेने मातांग। निम्मा उंदी-रेंडु उदाहरण हीसी उत्पादन संबंध उंदी कालम पेरके उत्पादन शक्तिंग ना विकास तुन बद्रम रोमी कीतांग इंजी समजे कीमू।”

बरेले मर्रा- “उंदी वेल्ले बेसता उदाहरण वेहिंतांन। रोम लोप्पा गुलाम प्रथा पूरा कोड्डी ते एवतास्के, पर-चक्की ता आविष्कार आसी मत्ता। मति रोम ते पन-चक्की तुन बेहरा स्तर ते स्वीकार किताद हिल्ला मत्ता। बारांकु इत्तेके गुलाम लोर ताकी किता चक्की पोरो खर्च कम मत्ता। गुलाम लोरा पोरो पोरोल तुकू खर्च किया लागनदू मति पन-चक्की वाटतास्के कम से कम उचुन खर्च किया लगसी मंदियर। पन-चक्की ता इस्तेमाल गुलाम प्रथा खत्म आत्ता पेरके सही तरीका ते आत्ता।”

रवि- “बरेल मर्रा, गुलाम लोरा विद्रोह ते ओरा नेताल बोर मत्तोर?”

बरेल मर्रा- कव्वसोरे इत्ता। “अरे, बदे उंदी विद्रोह आतेके बदे उंदी पोरोल वेहाकान अय्यो सैकड़ों-हजारों गुलाम विद्रोह आतांग। उचुन गुलाम विद्रोह ते सिर्फ इरवुर-मुव्वुर गुलाम लोर तम्मा-तम्मा मालिक लोरा खिलाफ कीसी मत्ताद वेने मंता। उचुन विद्रोह बेहरा स्तर ते देशमेंड फैलेमासी मत्तांग। निम्मा माटु बद कालम ते पोल्लोंग कीसोर मंतोम अद कालम ते कहानिंग, उपन्यास कुना नायक वेल्ले लोकर मंदानोर। गरीब, साधारण लोकर लेवेके गुलाम लोर आयो। गुलाम लोरा नेतृत्व कियानोर वेल्ले होंग वेस्सना लेक्काटोर मंतोर इंजी पुंजी मंदाकिन। अदिन काजे माटु ज्यादातर गुलाम विद्रोह ता बारे ते, अविना नेतृत्व बोर कितोर बद्रम कितोर, तम्मा संघर्ष लोप्पा ओरु बद्रम ता मुश्किल कुना सामना कितोर इंजी पुन्नोम। इद्रम आतेकाई उचुन गुलाम विद्रोह इतिहासकार लोर किन विचार हिल्लेकाई अविना बारे ते रासला काजे मजबूर किता। इद्रम ता उंदी महान गुलाम विद्रोह रोम ते स्पार्टाकस ना नेतृत्व ते आत्ता। स्पार्टाकस वरोर ग्लैडियेटर मत्तोर। ग्लैडियेटर इत्तेके गुलाम मालिक लोरा मनोरंजन काजे लड़ेमायनोर। इद विद्रोह ता (74 ग्लैडियेटर स्पार्टाकस ना नेतृत्व ते वित्तितास्के) शुरुआत 73 ई.पू. ते आत्ता।

ओरा विद्रोह ता खबर गेडा ता किस्स लेक्का फैलेमाता। जल्दीए स्पार्टाकस निगा 70,000 तुकू ज्यादा गुलाम लोर डग्गी पोयतोर। जागा-जागा ते गुलाम लोर स्पार्टाकस ना नेतृत्व ते मालिक लोरा विरुद्ध बगावत कितोर। रोम ता सुसज्जित, सुप्रशिक्षित सेना वेने ओरा मुकाबला किया परवा मत्ता। बचोनो लड़ाईग जीइसोरे स्पार्टाकस ना फौज इटली ता दक्षिणी समुद्र ओदा एवता, अगाटल इटली विड़चसी दूसरा जागा ते हंजी बेसता पिस्वल पिस्सला आल्सतोर। मति समुद्र जहाज हियाला काजे तैयार आत्ता मानेय ओरकिन धोखा हीतोर। समुद्र जहाज एव्वा परवो आत्ता।

अस्केने रोमन सेना ओसो उंदी बेरा संगठित आसी अगा एवता अनि स्पार्टाकस ना सेना तुन हारे कित्ता। इद गुलाम विद्रोह लोप्पा 1,00,000 गुलाम लोर शहीद आत्तोर। स्पार्टाकस वेने शहीद आत्तोर। मति रोम ओना लाश बस्केने दोरकी कित्ताद हिल्ले। पोयता 6,000 गुलाम लोर किन रोम ता मुख्य राजमार्ग पोरो फांसी हीतोर।

इद विद्रोह रोमन सत्ता तुन खत्म कित्ता मति इद विद्रोह रोम ता गुलाम मालिक लोर किन सांगी कित्ता। स्पार्टाकस हमेशा काजे उत्पीड़ित जनता तुकू प्रेरणा ता स्रोत बनेमातोर। कार्ल मार्क्स स्पार्टाकस काजे विद्रोही शब्द ता इस्तेमाल कितोर। बारांकु इत्तेके ओरु पहली (पुत्ता) विद्रोही मत्तोर।”

रवि- “बेरेल मर्फ, निम्मा निज्जमे वेल्ले पुत्तिन। निज्जमे इतिहास लोप्पा वेल्ले पोल्लोंग मकसी मंतांग। निम्मा नाकिन वेहवेके इचोन बेसता विषय ता ज्ञान दोरको आसी मनवड़। इंजे पेसिंतान वेल्ले बेरा आत्ता। पेरके बस्केने वायकान अस्के नावा दोस्त लोर किन तत्ता परिंताना? नाकिन वेहता सब्बे पोल्लोंग ओरकिन वेहतान अस्के ओरु आश्चर्य आत्तोर। ओरु नाकिन इव पोल्लोंग बोर वेहतोर? इंजी पूछेमातोर। नन्ना ओरकिन जादू तल पुत्तान इत्तान!”

बेरेल मर्फ- “अरे इदिना लोप्पा पूछेमायना लेक्का बाता मंता? निम्मा नीवा बचोनो दोस्त लोर किन तत्ता परिंतान।”

रवि खुश आत्तोर अनि पाटा मुरंगसोर लोन दायला पेस्तोर।

सामंतवादः बहादूर राजकुमार ओसो सुंदर राजकुमारी वाले व्यवस्था आयो

मर्रा ता गुप्प दड़मी ते वेल्ले कोल्हार मत्ता। रवि, ओनगा 5 दोस्त लोर किन पोइसि अगा वात्तोर। रवि किन इव सब्बे पोल्लोंग बेरेल मर्रा वेहता इंजी ओरा दोस्त लोर किन मुन्ने विश्वास वायो आत्ता मति बेरेल मर्रा ओरा संगे वड़कना शुरू कित्ता स्केने ओरकिन विश्वास वात्ता।

बेरेल मर्रा- “पेकोर, नन्ना मीकिन हूइसी वेल्ले खुश आत्तान। मति उचुन दुक्कम वेने आत्ता। नन्ना मुयता बेरेल मर्रा, मीकिन मीवा गुरूजीर स्कूल ते वेहाना पोल्लोंग किन वेहा मंतान। देश ता सब्बे पिल्ला-पेकोर इव सब्बे स्कूल ते वेहतेके बेस आयवर। इव सब्बे विइसाटू, इद्रम कियाला इंजे वेल्ले टाईम लागियर। नन्ना नावा पोल्लोंग शुरू कींतान।”

सब्बे पेकोर ध्यान हीसी केंजला तैयार आत्तोर।

“आदिम साम्यवादी समाज इद भूम पोरो बचोनो लाख साल एवनल मत्ता। मति गुलाम प्रथा 3000-3500 साल एवनल ताकता। ताना पेरके सामंतवाद समाज वात्ता। भारत, यूरोप रेंडासी जागा ने सामंतवाद ता शुरूआत लगभग 400 ई. हेरे आत्ता।

उत्पादन शक्तिंग विकसित आतांकु ओसो उत्पादन ता गुलाम प्रथा संबंधकु अद विकास लोप्पा बाधा वाटता कारण ते शुरू आत्ता संघर्ष ता कारण ते गुलाम प्रथा सामंतवाद लेक्का बदलेमाता इंजी नन्ना मुन्ने वेहताद मंता।”

सब्बे पेकोर ओरकिन रवि मुन्ने वेहतोर इंजी तल्ला होले कीसोर वेहतोर।

बेरेल मर्ग: “वेल्ले बेस! अद्रम इत्तेके मुन्ने दायकाल। समाज गुलाम प्रथा तल सामंतवाद लेक्का बदलेमायना इत्तेके गुलाम प्रथा ता आर्थिक आधार बदलेमायना, पूना सामंती आर्थिक आधार नित्तना आंता।

पूना सामंती आधार सिर्फ पाड़ना आधार तुन नष्ट कियानाए आयवा ओरा अदिना संगे-संगे अद आधार पोरो नितसी मत्ता ढांचा तुन इत्तेके गुलाम प्रथा ता राजनीति, नैतिकता, शिक्षा, धार्मिक विश्वास, संस्कृति तुन वेने नष्ट कित्ता। पूना राजनीतिक ढांचांग नित्तितांग, पूना नैतिक मूल्य तय आत्ता, संस्कृति, धर्म, शिक्षा लोप्पा वेने पूना विचारकु पुटतांग। इव पूना विचारकु गुलाम प्रथा विरुद्ध मत्ता अनि पूना सामंती व्यवस्था तुन मजबूत कियानवु मत्तांग।

नावा इव पोल्लोंग मीकिन उचुन वेने समजेमायवापु मत्ता। मति निम्माटु वेरियमाटु, नन्ना ओसो विस्तार ते वेहाना कोशिशि कींतान।

मुन्ने सामंतवादी व्यवस्था बातल मत्ता इंजी समजेमायकाल। भारत ता सामंती व्यवस्था ओसो यूरोप ता सामंती व्यवस्था लोप्पा वेने उचुन अंतर मत्ता।

यूरोप ते गुलाम प्रथा ता आखरी कालम लोप्पा धनी वर्ग तुन तीरम-तीरम गुलाम लोरा संगे काम ताकसोर हिल्ले इंजी समजेमाता। दूसरा मुख्य पहलु सत्ता ता केंद्र कमजोर आत्ता। इंजे रोम लेवेके एथेंस ते उदसी मत्ता शासक लोर काजे तम्मा बेहरा साम्राज्य पोरो नियंत्रण तासना मुश्किल आया मत्ता।

पोरो वेहता कारण कुनल उचुन महत्वपूर्ण बदलाव आतांग।

अर्थव्यवस्था लोप्पा गुलाम लोरा जरूरत कम आसोर हत्ता। इंजे गुलाम लोरा जागा ते भू-गुलाम लोर वात्तोर। दूसरा बदलाव सत्ता एकल साम्राज्य ता जागा ते सुडला-सुडला रियासतकु वात्तांग। हर रियासत बोरे वरोर युद्ध सरदार लेवेके सामंत ना नियंत्रण ते मत्ता। इद्रम ता सामंत लोर तम्मा रियासत लोप्पा प्रशासन ता काम हूड़ानोर, न्याय कियानोर, तम्मा उंदी फौज तासनोर अनि अदिना इस्तेमाल लूटे कियाला काजे आयना युद्ध लोप्पा आयनादु। खेंती पोरो बचोन लगान एतना, व्यापार पोरो बचोन टैक्स हिया लागियर इंजी सामंत लोरे तय कियानोर। यूरोपीय सामंतवाद शुरूआत ते

हर नाटे ना जमीन रेंडु हिस्सा ने तूसिस मत्ता। भूम ता बेहरा हिस्सा सामंत-जमींदार लोरा मंदानादू अनि बाकी हिस्सा सुडला-सुडला भूम लेक्का तूसिस मत्ता। इद भूम पोरो भू-गुलाम तम्मा काजे खेती कियानोर। भू-गुलाम लोरा काजे ओरु सामंत लेवेके जमींदार लोरा भूम पोरो काम कित्ता पेरकेने तम्मा खेती ते काम कियाना जरूरी मत्ता।

नाटेना सबसे उपजाऊ भूम सामंत लोरा मंदानदू। मुसुर कालम ते सबसे मुन्ने सामंत लोरा भूम पोरो काम कियानोर। अन्न पंडतास्के सबसे मुन्ने सामंत लोरा फसल कोयनोर। सिंचाई सीमित साधन सामंत लोरा खेती ते सिंचाई कियानोर भू-गुलाम लोरा भूम ते हमेशा पेरके टाईम दोरकानदू।

इद्रम आतेकाई इद्रम ता परिस्थिति लोप्पा वेने भू-गुलाम लोर मुन्ने तुकू बेसता परिस्थिति ते मत्तोर। सबसे महत्वपूर्ण ओसो बेहरा अंतर इंजे भू-गुलाम मालिक ना निजी सम्पत्ति हिल्वा मंदानदू वात्ता। ओरो पिस्वल पोरो इंजे मालिक लोरा अधिकार हिल्ले। ओरा पिस्वल इंजे ओरा तम्मादे मत्ता। ओरकिन मर्मिंग कीसी, परिवार तासना, परिवार बेरसी कियाना अनुमति मत्ता। पहली बेरा ओरु खुद वेने मानेय मत्ता लेक्का आल्सतोर। मति ओरा दर्जा सामंत तुकू वेल्ले दोड़ मत्ता।

ओरु जमीन संगे दोहची मत्तांकु ओरु सामंत लोरा खेती ते मुन्ने पूहना-वीतना काम कियाना जरूरी मत्ता। इद्रम मत्तेकाई ओरु तन्ना खेती काजे दोरकता सुडला भूम पोरो ओरु ओसो उचुन मेहनत कीतेके ओनकिन वेल्ले फसल दोरकिंता इंजी वेने आशा मंदानदू। ओरु अद भूम पोरो पुट्टी कित्ता पूर फसल पोरो सिर्फ ओना अधिकार मंदिंता। ओरु उत्पादन तरीकांग लोप्पा पूना-पूना बदलाव कियाना इंदाना पोल्लो भू-गुलाम लोर किन प्रेरित कित्ता।

इद्रम गुलाम प्रथा तल सामंतवाद लोप्पा बदलेमाता पेरके कृषि उत्पादन लोप्पा वात्ता ठहराव खत्म आत्ता अनि ताना लोप्पा वृद्धि आयना शुरू आत्ता।

इंजे माटु दस्तकारी ता पोल्लोग कियाकाल। गुलाम प्रथा मारनास्के दस्तकारी लोप्पा बाधा वायना शुरू आत्ता। सिर्फ शासक लोरा जरूरत ओसो ऐशों आराम ता सामान पुट्टी कियाना दस्तकार लोरे अस्तित्व ते मंदा परतोर। व्यापार ता बेरसना जरूरत कुने आयवा वेल्ले बुनियादी जरूरत कुना वेने

उत्पादन आसोर हिल्ले। बारांकु इत्तेके दस्तकार वेने कर्ज ता जाली ते हिरकतांकु गुलाम बनेमाया मंतोर। गुलाम लोरा संगे सब्बे सम्पत्ति मालिक लोरा मत्तांकु, गुलाम ओसो औजार कुना सही देखरेख लोप्पा बदे रूची हिल्ला मत्ता अदिन काजे उत्पादन प्रक्रिया लोप्पा टूट-फूट अनि बर्बादी वेल्ले आत्ता अनि उत्पादन कम।

तीसरा पोल्लो गुलाम पुट्टी कित्ता अतिरिक्त उत्पादन पूरा मालिक लोरा सम्पत्ति मत्ता। अदिन काजे गुलाम लोर दस्तकारी लोरा माल उत्पादन ता बदे मांग पूरा किया परवोर आयनोर। गुलाम मालिक गुलाम लोरा देखरेख काजे सिर्फ पोरोल तुके खर्च कियानोर।

पोरो वेहता कारण कुना संगे-संगे अव्यवस्था ओसो अराजकता ता परिस्थिति खेती लेवेके दस्तकारी उत्पादन ता अनुकूल हिल्ला मत्ता। हमेशा युद्ध, विद्रोह लेवेके शासकीय दमन परिस्थितिंग दस्तकार, किसान लोर किन उत्पादन गतिविधिं लोप्पा रम्मे मायना लेक्कटा परिस्थिति पैदा कीवोंग आयनवु।

मति समाज सामंतवाद युग ते हत्तास्के पोरो वेहता बाधांग जेक आतांग अनि दस्तकारी उत्पादन लोप्पा वेने वृद्धि आत्ता। दस्तकार लोरा स्वतंत्र मत्तांकु इंजे ओरु तम्मा औजार कुना मालिक खुद मंतोर। ओरा उत्पादन तम्माए मंदानदु। सिर्फ औजार कुना टूट-फूट कम आयवा लेवा उत्पादन प्रक्रिया लोप्पा नुकसान आयना वेने कम आत्ता। दस्तकार तम्मा माल ता मालिक मंतोर अनि उत्पादन बेरसतांकु सीधा दस्तकार लोर किने फायदा आत्ता अनि उत्पादन ता औजार कुना लोप्पा सुधार आयनाद वेने बेरसता। गुलाम प्रथा तल सामंतवाद लोप्पा हत्ता पेरके कुशल श्रमिक लोर किन विकास ता जबरदस्त मौका दोरकता। कुशल श्रमिक लोर बने कित्ता माल सिर्फ स्थानीय लोकुरे आयवा जेक-जेक ता इलाकाना लोकुर वेने वम्मना शुरू कितोर।

संगेने गुलाम लोर इंजे किसान लेक्का बदलेमातोर। ओरकिन परिवार तासना अनुमति दोरकता अदिन काजे लोन बने कियाना, परिवार ता जरूरत कुना काजे गेटेंग, खेती काजे औजार लेक्कटिना लेक्का समाज ता उंदी

बेहरा हिस्सा ता पूना जरूरत कु अस्तित्व ते वातांग अवु दस्तकारी तुन इत्तेके खासकर वेल्ले सस्ता सामान बने कियाला प्रेरित कीतांग।

अद्रमासी सामंतवाद ता उदय संगे कुम्माल, कोल्से, जुलाहा, मोची, चर्मकार लेक्कटा दस्तकारी लोप्पा वेल्ले वृद्धि आत्ता। वीर सब्बे मुख्य रूप ते नाहकुना लोकुरा जरूरत कु पूरा कियानोर, ओरु गुलाम प्रथा ता शहर लोप्पा केंद्रित मत्ता उत्पादन तल नाहकुना लोप्पा केंद्रित आत्ता। हर नाटे तम्मा जरूरत ता गेत्तेंग, दड़ियांग, बूटकु, कच्ची ता सामान लेक्कटवु पुट्टी कियाना शुरू आत्ता।

उत्पादन आयवा गुलाम प्रथा तन्ना आखरी कालम ते विचार कुना विकास लोप्पा वेने बाधा वाटना शुरू कित्ता। रोम शहर तुन लोकुर कला, रंगमंच काजे पुंतोर, मति रोम ता दस सभ्यता दुनिया तुन वैज्ञानिक रूप ते बदे पूना वस्तु हीताद हिल्ले। शासक लोर गुलाम प्रथा ता आखरी कालम एवनल गुलाम प्रथा अनुकूल हिल्ला विचार ता खिलाफ आत्तोर। उदाहरण तुकू किसान लोर किन भूम हियाना विचार देशद्रोह लेक्का मंदिता। पवन चक्की ता आविष्कार वेल्ले मुन्ने आसी मत्ता मति अदिना इस्तेमाल आसोर हिल्ला मत्ता। गुलाम लोरा श्रम संगे बदे काम आसोर हिल्लेके मशीन ता इस्तेमाल ता बाता जरूरत मत्ता। अद्रमासी मीटु गुलाम प्रथा विज्ञान ता विकास लोप्पा बाधा वाटना शुरू कित्ता।

अद्रमासी पूना विचार कुना काजे बदे जागा हिल्ले, पूना विचार कुन पुट्टना मुन्ने ने अविन खतरनाक विचार कुना लेक्का हूडूमूडांता अनि राजसत्ता तन्ना पूरा ताकत वाटसी अविन ओसो अविना प्रतिनिधिर किन खत्म कियाना कोशिस कीतांग।

अद्रमासी मुन्ने बस्केने समाज तुन मुन्ने ओयला मदद कित्ता विचारकु इंजे अविना विकास लोप्पा बाधा बनेमातांग। उत्पादन ता पूना ताकत कु तम्मा काजे पूना विचार कुन पुट्टी कीतांग, पूना ढांचा तैयार कीतांग। पूना नैतिकता, पूना शिक्षा, पूना रकम ता राजनीति, पूना संस्कृति पुटता। समाज ओसो उंदी बेरा मुन्ने डेयता।

इद पूना ढांचा बद रकम ता मत्ता, इदिन माटु उचुक उदाहरण कुना संगे समजेमायकाल।

राजा इत्तेके सामंति व्यवस्था ता सर्वोच्च मानेय, भगवान ता प्रतिनिधि लेक्का स्थापित आत्तोर। भगवान ता सत्ता, राज्य ता सत्ता आपस ते जुड़ेमासी मत्ता। राजा ना सत्ता तुन चुनौती हियाणा इत्तेके भगवान सत्ता तुन चुनौती हियाणा लेक्का आयनदू। इदे विचार मुख्य रूप ते शिक्षा, नैतिक मूल्य लेक्का पेश आत्ता।

गुलाम प्रथा ओसो अदिना दोड़ मत्ता सामंती लोरा राज्य एतिता। निम्मा युनान ता गुलाम मालिक तम्मा गुलाम व्यवस्था तुन डैमोक्रेसी (लोकतंत्र) इंदानोर इंजी पुंजी आश्चर्य आयकिन। इदिना परिभाषा नेंड मत्ता लेक्का मत्ता, मति ओरा लोप्पा गुलाम, गरीब, आस्कून शामिल कीवोर आयनोर। ओरा लोकतंत्र गुलाम मालिक लोरा लोकतंत्र मत्ता।



सामंतवाद लोप्पा राजाल सब्बे निर्णय एतना अधिकार तासनोर। बाकी सब्बे लोकुर ओना दोड़ मत्तोर। राजाल लेवेके सामंत राज्य ता सब्बे संपत्ति ता मालिक मत्तोर। मति पाड़ना गुलाम मालिक लोरा लेक्का इंजे गुलाम लोरा पिस्वल पोरो अधिकार हिल्वा मत्ता। इदिना जागा ते इंजे गुलाम लोरा पिस्वल ता जिम्मेदारी वेने हिल्वा मत्ता।

किसान, दस्तकार लोर किन इंजे जमीन ता इस्तेमाल कियाना जागा ते लेवेके दस्तकारी काम कियाना अनुमति दोरकना जागा ते राजा, सामंत लोर किन लगान हिया लागनदु। नन्ना मुन्ने वेहता लेक्का सामंतवाद शुरू ते

इद लगान श्रम रूप ते इत्तेके भू-गुलाम लोर किन सामंत लोरा जमीन पोरो बेगार किया लागनदू।

मति किसान इद प्रथा ता विरोध कियानोर। सामंत लोरा भूम पोरो काम कियाला पेरके-मुन्ने आंतोर। अनि पेरके इद प्रथा ता जागा ते वस्तु रूप ते लगान एतिता। किसान तम्माए भूम पोरो काम कियानोर मति फसल ता उंदी हिस्सा ओरु लगान ता रूप ते हिया लागनदू। इद हिस्सा एक चौथाई, एक तिहाई, आधा लेवके आधा तुकू ज्यादा वेने मंदानदु। इदिना मात्रा लोप्पा सामंत, राजा खुद तय कियानोर। सामंतवाद ता अंतिम चरण लोप्पा वस्तु रूप ते लगान ता जागा मुद्रा एतिता। किसान तम्मा जिंस वम्मसी नकदी दोरकी कियानोर अनि लगान हियानोर।

इद्रमे दस्तकार, व्यापारि किन वेने लगान लेवेके टैक्स हिया लागिंता। इद्रम डग्गी कित्ता लगान तल सामंत, राजा बेहरा-बेहरा महल बने कीसी वेल्ले ऐशो-आराम ते मंतोर। खेती तल दोरकता लगान राज्य-आय ता मुख्य स्रोत मत्ता अदिन काजे उपजाऊ भूम वाले इलाकांग कुन कब्जा कियाला काजे हमेशा सामंत ओसो राजा लोरा नड़मा युद्ध आयनादु।”

रवि: “बरेल मर्ग, गुलाम ओसो भू-गुलाम लोप्पा बाता अंतर मंताष पूरा समजे माताद हिल्ले।”

बरेल मर्ग: “गुलाम तम्मा मालिक ना निजी सम्पत्ति मंदितोर नेंडु कोरु, हेरें, टाली, एरमिंग लेक्का, इविन मीटु पोसे कीतिर अनि इव मीवा सम्पत्ति मंदिंतांग। भू-गुलाम सामंत लोरा निजी सम्पत्ति मन्त्रोर आंतोर मति ओरु भूम संगे दोहची मंदिंतोर। भू-गुलाम इत्तेके भूम ता गुलाम। भू-गुलाम भूमत विड़चसी दाया परवोर आंतोर। ओरकिन सामंत लोर हीता भूम पोरो खेती कियाना अनि सामंत लोर तय कित्ता लगान हियाना जरूरी आयनदू। बस्के-बस्केने लगान निहत्ता पेरके ओरगा ओरा काजे उंदी पेड़म वेने पिस्सो आयनदू मति ओरकिन खेती किया लागनदू। हमेशा प्राकृतिक मुश्किल वात्तास्के इत्तेके भूम वत्तितास्के, ऊसा वात्तास्के, बीमारी वात्तास्के बचोनो भू-गुलाम लोर वित्तना कोशिश कियानोर। इद्रम ता भू-गुलाम लोर किन पोयसी सख्ता सज़ा हियानोर। बचोनो भू-गुलाम लोर किन हौकना सज़ा वेने हियानोर।”

रवि ओसो ओना गोती तोर केंजसी आश्चर्य आतोर। ओरु “इद्रम बारांकु आयनदु? इंजी बेरेल मर्रा तुन पूछेमातोर।”

बेरेल मर्रा: “राजाल लेवेके सामंत लोरा बेहरा-बेहरा महल, बेहरा फौज, साजो-सामान, ऐशो-आराम पोरो आयना खर्च बेगाडल वांता? इद्रमताए भू-गुलाम लोर पुट्टी कित्ता उत्पादन तल वांता अय्यो। भू-गुलाम लोर किन पोट्टामेंड तिंदला दोरवेकाई ओरु सामंत लोरा जरूरत कुन जरूर पूरा किया लागनदू। अदिना काजे भू-गुलाम लोरा खेती काम कीसी लगान हियाना जरूरी मंदानादू। इद्रम कियवा मंदाना भू-गुलाम लोर किन पेस्के बेस्के ने इद्रम कियानायो इंजी कठोर सजा हियानोर। संगे ने बाकी भू-गुलाम लोर किन वेने सबक दोरकानदू।

राजा लोर तम्मा संगे कर्मकांड कियाना पुरोहित तासानोर, वीरु राजा लोरा काजे रक-रकम ता कर्मकांड कियानोर। निम्मा प्रांचीन भारत लोप्पा राजसूय यज्ञ, अश्वमेध यज्ञ कीसी बचोनो राजा लोर बेहरा इलाकांग लोप्पा तम्मा कब्जा कितोर इंजी केंजसी मंदाकिने। असल ते इद्रमताए कर्मकांड प्रजा ओसो पड़ोसी राज्य पोरो उंदी मनोवैज्ञानिक प्रभाव पुट्टी कियानवु अनि ओरु प्रतिरोध कियवा लेवा राजा ना कब्जा स्वीकार कियहानवु। संगेने इदिना संगे राजाल बचोनो दैवीय शक्तिंग दोरकी कितोर इंजी प्रचार कियानोर।

हर समाज ता बुद्धिजीवीर वेने मंतोर। सामंती कालम ते बुद्धिजीवीर राजा किन दैवीय शक्तिंग दोरकतांग इंजोर वेहतोर। राजा ना अधिकार कुन प्राकृतिक अधिकार इंजी वेहतोर।

इद्रम सामंतवाद ता मोदोल मजबूत आसोर हत्ता। इद्र सामंतवाद लगभग 1200-1300 साल एवनल ताकता।”

रवि: उंदी बेरा सामंती शोषण बाताल इंजी समजे कियाला बेरेल मर्रा तुन पूछेमातोर। नन्ना सामंती व्यवस्था लोप्पा आम लोकुरा पोरो आयना शोषण तुन सामंती शोषण इंदानोर इंजी समजेमाताने मति इदिन उचुन उदाहरण हीसी समजे कीतेके बेस आयार।

बेरेल मर्रा: इंगो,इंगो। सामंती लगान ओसो सामंती टैक्स शोषण ता प्रधान रूप मत्ता। किसान लोर किन भूम पोरो खेती कियाना अधिकार ता

जागा ते फसल ता उंदी हिस्सा लगान लेक्का हिया लागनगू। इदे आयवा बचोनो रकम ता टैक्स मंदानदू, उदाहरण तुकू बदे विशेष पंडुम आत्तास्के, राजाल-सामंती रा लोहकु ना पिल्ला-पेकोर पुटतेके लोकुर वेल्ले उपहार(गिफ्ट) राजा लोरा काजे ओयना जरूरी आयनदू। बोरे किसान डोलता पेरके भूम पोरो खेती कियाना अधिकार ओना पेकान किन दोरकनदू अस्के वेने लगान हिया लागनदू। लगान ओसो टैक्स लोप्पाने फसल ता बेहरा हिस्सा किसान लोरा कैदल दायनदू। इदे आयवा जनता तुन बेगार किया लागनदू- बेगार इत्तेके उंदी रकम ता श्रम इदिना जागा बदे दिहाड़ी-मजदूरी दोरको आंता लेवेके पोरोल तुके सामान लेक्कटा इत्तेके पोइदमेड काम कित्तास्के उंदी-रेंडु किलो अनाज हियाना लेक्कटवु। जमींदार-सामंती लोरा लोहकु, कचहरिंग लोप्पा सैकड़ों काम जनता बेगार काम कींता। बेगार कियहाना पुश्तैनी अधिकार समजेमांतोर। बोर बेगार कियाला इनकार कींतोर ओनकिन सख्त सजा हींतोर।

किसान ओसो दस्तकार किन समाज लोप्पा सबसे ज्यादा दोड़ ता दर्जा हींतोर। भारतीय उपमहाद्वीप लोप्पा जाति व्यवस्था मत्तांकु शारिरीक श्रम कियाना सब्बे तोर किन शूद्र ओसो अछूत घोषित कींतोर। भारत लोप्पा जाति प्रथा ता विकास ता बारे ते अलग ते विस्तारपूर्वक वेहा लागियर। ओरा संगे गैर बराबरी ता व्यवहार आयानदू। गुलाम प्रथा लेक्काने मेहनतकश जनता ना जीवा पोरो मालिक लोकुरा अधिकार मन्नो आयनदू। मति किसान ओसो दस्तकार इंजे स्वतंत्र वेने आयवा मत्तोर। बचोनो सामंत वेल्ले लंपट ओसो क्रूर मत्तांकु ओना आदेश अनुसार ओरा इलाका ते मर्मि कीसी वात्ता पूना दुल्ही पेडिन सबसे मुन्ने सामंती ना हवेली ते हंजी उंदी नरका ओना संगे हुंजा लागनदू।

रवि ओसो ओना गोती तोर: छी....छी...! ओरु इचोन लब्बड़ ता काम वेने कियानोरा? माटु हमेशा वेल्ले बहादुर राजकुमार ओसो सुंदर राजकुमारिंग ना बारे ते ने केंजतोम।

बरेल मर्ग: सुडला-सुडला गलतिंग पोरो कोड़ांग वाटना, यातनांग हियाना, कै-कालकु उर्राहाना लेवेके हौकना सजा हियाना ओरा काजे आम

मत्ता। सामंती ओसो राजा लोरा आदेश तुने कानून मानेमायनोर। और उचुन नाराज मत्तेक वेने बचोनो हामुरकु आयनावु।

सामंती समाज लोप्पा आस्कुना परिस्थिति वेने वेल्ले खराब मत्ता। अविना पोरो बचोनो रकम ता बंधनकु मत्तांग। अवु तम्मा मर्जी ते बेगाने दायना-वायना किया परवोंग आयनवु। अविन पढ़ेमायना अधिकार हिल्ला मत्ता। अविन सम्पत्ति तासना अधिकार हिल्ला मत्ता। मर्मिग कियानास्के अविना बदे राय एतमूझायो आयनदू। मना समाज लोप्पा आस्कुना परिस्थिति ता बारे ते वेहाला काजे उंदी श्लोक वेने मंता “मर्मि मुन्ने पिल्ला बाबोना कै दोड़ मंता, मर्मि पेरके मुज्जो ना कै दोड़ अनि सेड़ो आत्तास्के मर्री ना कै दोड़”। कुल मिलेकीसी आस्कु ना पिस्वल दोयम दर्जा लोप्पा मारिंता, समजेमातिना?

रवि: इंगो, इंजे नन्ना समजेमातान।

मुकेश: “निम्मा शुरू ते भारत, यूरोप ता सामंती युग लोप्पा उचुन अंतर मत्ता इंजी वेहतिन। अद बद्रम ता अंतर मत्ता?”

बरेल मर्रा: “हूं..... नीकिन अद पोल्लो सुरता मंता एय्य! यूरोप ता राजा ना भूमिका वेल्ले महत्वपूर्ण हिल्ला मत्ता। सामंती लोरे मुख्य मंदानोर। साधारण रूप ते राजा किन लूटे कियाला काजे ताकी कियाना युद्ध लोप्पा सामंती लोरा सेना ता जरूरत मंदानदू। बदे विशेष इलाका लोप्पा सामंती लोरे सब्बे शक्तिंग ना मालिक मंदानोर। अद विशेष इलाका ता भूम मालिक वेने ओरे मंदानोर। किसान लेवेके भू-गुलाम ओनडगल भूम पोयसी खेती कियानोर।

तीरम-तीरम चर्च नेंगसोर हत्ता अनि सामंतवाद ता आखरी कालम एवनल चर्च यूरोप ता सबसे बेहरा सामंती बनेमाता। पूरा यूरोप ता कुल कृषि कियाना लेक्का मत्ता भूम ता एक तिहाई भूम चर्च कैदे हत्ता।

भारत लोप्पा सामंतवाद रेंडु रकम ता मत्ता। चौथी शताब्दी तल 12 वी शताब्दी एवनल सामंतवाद इंतोम। भूम निजी स्वामीत्व ते हिल्ला मत्ता, इदिना पोरो सामूहिक स्वामीत्वए मत्ता। ग्राम समुदाय नाहकुना भूम ता सामूहिक स्वामी मंदानदू। अवु सामूहिक रूप ते राजा किन लगान हियानवु। ग्राम समुदाय नाहकुना स्तर ते सब्बे निर्णय एतानवु। भारत लोप्पा उंदी

केंद्रीय सत्ता राजा ना कैदे केंद्रित मंदानदू। ताना दोड़ बचोनो विभाग कुना प्रतिनिधिर मंदानोर ओरु राजा ना काजे लगाना जमा कियानोर। सब्बे अधिकार राजा ना कैद मंदानदू अनि ओना बचोनो स्थानीय प्रतिनिधि न्याय व्यवस्था तासना, राजनिगा एवनल सूचना हियाना, स्थानीय विद्रोह तुन खत्म कियाना काम कियानोर। इद्रम सब्बे तोर राजा ना कर्मचारिर मंदानोर ओरु जनता ओसो राजा ना नड़मा कड़ी लेक्का काम कियानोर, तम्मा स्तर ते स्वतंत्र मंदानोर।

12वीं सदी पेरके ग्राम समुदाय ता अस्तित्व खत्म आत्ता। नाहकुना लोप्पा उंदी सामंती वर्ग ता जन्म आत्ता अनि किसान, दस्तकार लोरगडल लगान वसूल कियानदू। इद कालम ते भूम राजा नाए सम्पत्ति मंदानदू। वेल्ले ब्राह्मण, वीर योद्धा लोर ओसो विशिष्ट लोकुर किन भूम दान हीताद मत्ता, इद भूम पोरो लगान एतना अधिकार ओसो बाकी प्रशानिक अधिकार वेने वीरकिने हीताद मत्ता।

नाहकु खुद तम्मा जरूरत ता लगभग सब्बे वस्तु पुट्टी किया परना लेक्कटा उंदी संपूर्ण इकाई बनेमांतांग अनि इदे सामंतवाद ता उंदी विशिष्टता बने मांता। कच्ची, होव्वोर लेक्कटा रेंडु वस्तुंग साधारण रूप ते बाहर तल तत्ताला लागिता लेवेके हर वस्तु नाहकुना लोप्पा तैयार आंता। सैकड़ों साल एवनल ताकता इद व्यवस्था व्यापक लोकुरा विचार तुन वेने सीमित कित्ता। ओरा विचार ता दायरा सीमित आत्ता।


तम्मा भारत ता नाहकुना लोप्पा उंदी हट्टो मंता-“बोरे राजाल बने मातेके वेने माकिन बाता नुकासान आंता?” इत्तेके राजाल बोरे बनेमातेकाई माकिल बाताल आयो। किसान-दस्तकार लोर किन लगान हिया लागनदू। हर राजा लगान वसूल कियानोर। नाहकुना लोकुरा दुनिया नाहकु एवनले सीमित मत्ता। मर्मिंग-पंडुम लोप्पाने ओरु हेरे-हेरे ता नाहकु एवनल दायानोर। अदिन काजे बोरे राजल, बोरे हिल्लेर इंदाना तुकू बोरेकिन बदे काम मन्नो आयनदू। मना पीटोंग-वेसूड कुना लेक्काने उदार राजाल हिल्वा मंदानोर उल्टा हर राजा ना उंदे उद्देश्य मंदानदू-अदु परताचोन लगान वसूल कियानदू मंदू। आम जनता राष्ट्रीय राजनीति पोरो निराशा ते मंदानदू। असल इत्तेके अस्के राष्ट्रीय राजनीति पोरोल ता बदे वस्तु हिल्वा मत्ता इंदाना बेस आयार।”

रवि: “निम्मा भारत लोप्पा सामंतवाद ता शुरूआत 300-400 ई. ता हेरे-हेरे आत्ता इत्तिन। अनि हड़प्पा सभ्यता वेल्ले मुन्ने खत्म आसी मत्ता, इदिनकु लगभग 1500 साल मुन्ने खत्म आत्ता। इद दीर्घाकालीन टाईम तुन बाताल इंतोम?”

बेरेल मर्ग: “वेल्ले बेसता सवाल कीतिन। रवि उचुन गर्व ते तल्ला पोरो तेहची आल्सतोर, नन्ना इद सवाल महेंद्र गुरुजी किन कीसी मत्तेके ओरु नाकिन जरूर उंदी झापड़ वाटसी मन्नेर)। हड़प्पा मोहनजोदड़ो संस्कृति लेवेके सिंधू घाटी संस्कृति 1500 ई.पू. एवनल नष्ट आसी मत्ता। माटु अस्के वेने सिंदू घाटी आयवा बचोनो जागा ने मानव आदिम साम्यवादी चरण ते मंजोर मत्तोर इंजी मरंगनायो।

सिंधू घाटी सभ्यता नष्ट आत्ता पेरके आर्य लोकर पश्चिम, उत्तर भारत लोप्पा फैलेमासोर हत्तोर। वीरु बचोनो स्थानीय कबीलांग ना वेने आर्यकरण कितोर। तीरम-तीरम ओरु तम्मा किन मजबूत कीसोर हत्तोर। 1000 ईसा पूर्व भारत ते (वर्तमान बिहार) कच्ची ता खोज आत्ता अदु ओरा विकास तुन तेज कित्ता। लगभग 500 ईसा पूर्व मगध लोप्पा (नेंडु अदिन पटना ता पोरोल ते पुंतिर) ओसो उंदी बेरा राजसत्ता स्थापना आत्ता। मौर्यवंश भारत ता पहली महान साम्राज्य मत्ता। इदिना इरवुर प्रमुख शासक लोर वरोर चंद्रगुप्त मौर्य ओसो अशोक ना पोरोल इत्तेक मीटु जरूर केंजसी मंदाकिर।

मौर्य साम्राज्य पतन पेरके भारत बचोनो सुडला-बेहरा शासक लोरा कैदे हत्ता। अनि चौथी सदी ते ओसो उंदी बेरा गुप्त कालम ते संगठित आत्ता। गुप्त कालम तुकू मुन्ने एवनल माटु पूर्व सामंती कालम इंतोम बारांकु इत्तेके इव 700-800 साल कुना लोप्पा सामंती व्यवस्था ता स्थापना आयवा मत्ता। निम्मा इद कालम ते भारत लोप्पा सामंती व्यवस्था ता स्थापना ता आधार तैयार आसोर मत्ता इंदा परिंतिर।”



सामंतवाद समाज

विकास लोप्पा बाधा बनेमातास्के


सामंती काल लोप्पा उत्पादन शक्तिंग ना वेल्ले विकास आतास्के ओसो उंदी बेरा विकसित आसोर मत्ता उत्पादन शक्तिंग सामंती उत्पादन संबंध कुना संगे टकराव ता परिस्थिति शुरू आत्ता। माटु पहली रेंडु रकम ता व्यवस्थांग लोप्पा इविन हूडतादे मंता, ओसो उंदी बेरा उत्पादन संबंध (इदिना लोप्पा सामंती) उत्पादन शक्तिंग ना विकास तुन रोमी कियाना परिस्थिति वात्ता।

इद बदरम आत्तायो, माटु इदिन पुंदाला आल्सा मंतोम।

सामंती कालम ते दस्तकारी काम वेल्ले विकसित आत्ता इंजी मीटु समजेमातिरे। सामंतवाद ता आखरी चरण ते दुनिया ता लगभग सब्बे देशकु आपस ते व्यापारिक संबंध संगे दोहची मत्तांग। व्यापार बचोनो वस्तु ना निर्माण काजे बचोनो संभावनांग पुट्टी कित्ता। इदे आयवा बेरससोर मत्ता आबादी ता बेरससोर मत्ता जरूरत कुन वेने मत्तांग।

मति सामंती शासक लोरिन इव सब्बे कामकाज कुना लोप्पा बदे विशेष रूची हिल्वा मत्ता। किसान ओसो दस्तकार लोरगडल वसूली कित्ता लगान टैक्स ओरा भोग विलास काजे हालनाचोन मत्ता। बोरे सामंत व्यापार

कियाला हीतेके अगा व्यापारिक गतिविधिं शुरू आसी मनवड़। ओरु अनुमति हियवेके व्यापारिक गतिविधिं ठप्प आयनवु।



सामंती लोकर दस्तकारी माल पोरो बचोन टैक्स वाटना इंजी आल्सनोर। साधारण रूप ते किसान, दस्तकार लोरा पोरो लगान, टैक्स ता बोजा वेल्ले मत्तांकु ओरगा पोरोल तुके अतिरिक्त पिस्सनादू।

दस्तकार तम्मा औजार कुन हर दिय्या वेल्ले बेस बने कियाना कोशिश कियानोर। ओरा उत्पादकता लोप्पा जबरदस्त वृद्धि आसोर मत्ता। मति हाटुम ता कमी मत्तांकु ओरा मेहनत अंगड़म आयनदू। मीटु खुद वेहाटू, वरोर जुलाहाल हर दिय्या 10 मीटर कपड़ा आयवा 100 मीटर कपड़ा बने कियाना शुरू कीतेके अदिन वम्मला काजे हाटुम ता जरूरत मंदिताए हिल्ले। इद 100 मीटर कपड़ा तुन वम्मवा मत्तेके दूसरा दिय्या जुलाहाल कपड़ा बारांकु हरहानूर?

100 मीटर कपड़ा वम्मता पेरके ताना पोरो टैक्स पहना माल, औजार कुना पोरो आयना खर्च तेंडता पेरके टैक्स हियाना ओसो उचुन अतिरिक्त (मुनाफा) वेने बचेमायना लेक्का मंदांना। हर दिय्या 100 मीटर कपड़ा ता

मांग मंता णति टैक्स वेल्ले मत्तांकु जुलाह लोरा खर्च पूरा आया परवास्के ओरु कपड़ा हर्रहा परवोर आंतोर।

इदे आयवा ओसो दूसरा महत्वपूर्ण मुद्दा मत्ता। सामंती शासक लोर रोज ता आपसी युद्ध दस्तकारी, व्यापार काजे वेल्ले नुकसानदायक मत्ता। युद्ध ओसो अव्यवस्था कालम ते पहना मास ओसो तैयार माल सुरक्षित मंदा परवो। ओरा औजार नष्ट आयनवु। ओरा सुडला-बेहरा फैक्ट्रिंग लूटे कियानोर। अदिन काजे इद पूना निर्माता, व्यापारी वर्ग इद्रम ता युद्ध आयवा लेवा शांतिपूर्वक मुनाफा कमई कियाला हियाना इंजी आल्सनदू। इदे आयवा बचोनो सुडला महत्वपूर्ण समस्यांग वेने मत्तांग। उदाहरण तुकू नापतोल कियाना ढांचांग (अलग-अलग सामंती शासक लोरा इलाकांग लोप्पा अलग-अलगे मंदानवु)। बोरे बाहरी इलाका ता व्यापारी ना काजे स्थानीय नापतोल ता ढांचा अनुसार तन्ना माल ता कीमत तय कियाना वेल्ले मुश्किल काम मन्नो आयनदू। इद्रमे भाषा ता समस्या मत्ता। व्यापार विभिन्न इलाकांग ना लोकुरा लोप्पा उंदी संवाद कींता मति अलग-अलग भाषांग ना कारण ते संवाद लोप्पा बाधा वायनदू।

इव सब्बे बाधांग दस्तकारी गुणात्मक रूप ते विकसित आयला कंदरेमासोर मत्ता। दस्तकार, व्यापारिरा खुद ता कोशिश कुना कारण ते माल ता मांग बेरसता अनि व्यापार लोप्पा वेल्ले वृद्धि आत्ता। इदिना कारण ते व्यक्तिगत रूप ते अलग-अलग काम कियाना दस्तकार शिल्पी संघ लोप्पा संगठित आयना शुरू आत्तोर। शिल्पी संघ (गिल्ड) इत्तेके बदे उंदी जागा ते वेल्ले दस्तकार कलियसी तम्म-तम्मा औजार कुना संगे काम कियानोर। इद व्यवस्था ता बचोनो फायदा मत्ता। उदाहरण तुकू 10 दस्तकार 10 जागा ने तम्मा-तम्मा वर्कशॉप बने कियाना जागा ते 10 दस्तकार लोर उंदे बेहरा वर्कशॉप बने कीतेके ओरा खर्च कम आंता। अलग-अलग काम कियाना आयवा उंदी जागा काम कीतेके स्पीड़ बेरसिंता। अद्रमे बेहरा मांग ता आर्डर पूरा कियाला वेने सुविधा आंता। वरोर-दूसरोना अनुभव तल करियसी निपुणता, कुशलता वेने बेरसता।


इद्रम व्यक्तिगत दस्तकारी ता जागा ते शिल्पी संघ वात्ता। शिल्पी संघ लोप्पा काम कियाना दस्तकार लोरगा बचोनो नौजवान दस्तकार करियला

काजे वायना शुरू आत्ता। बेसता दस्तकार लोरगा वेल्ले करियानोर मंदानूर
अनि अंगडम दस्तकार लोरगा वरोर वेने करियानोर हिल्लेर इंदाना पोल्लो
तुन समजेमायना वेल्ले मुश्किल हिल्ले।

अस्के करियाला वायानोर नेटा स्कूल-कॉलेज लेक्का फीस हीवोर
आयनोर। ओरु तम्मा गुरु ना संगे मंदानोर, ओना हर रकम ता काम लोप्पा
मदद कियानोर अनि प्रशिक्षण पूरा कित्ता पेरके उंदी टाईम एवनल गुरु ना
काजे काम कियानोर। अदिना बदला ते ओरु वेतन एतोर आयानोर।

इंजे वरोर दस्तकार निगा 10 पूना करियानोर तन्ना प्रशिक्षण पूरा कित्ता
पेरके ओना काजे काम कीसोर मंतोर। इत्तेके वीर दस्तकार ना आर्थिक
परिस्थिति पिस्ता(कम पूना करियानोर मंदाना) दस्तकार लोरा तुलना ते बेस
आसोर दायार। ओरगा औजार वेने ज्यादा मंदिता, माल ज्यादा बनेमांता अनि
ओरु मुनाफा वेने वेल्ले कमई किया परितोर।

इद्रम तीरम-तीरम शिल्पी संघ लोप्पा वर्ग बनेमासोर दांता। शिल्पी
संघ पेरके विनिर्माण ढांचांग वातांग। विनिर्माण ढांचांग ओसो शिल्पी संघ
लोप्पा बुनियादी अंतर कार्य विभाजन ता मंता। शिल्पी संघ लोप्पा हर मानेय
बदे वस्तु ता विनिर्माण ता हर चरण तुन खुद वेंडितोर। उदाहरण तुकू पिन
बने कियाना प्रक्रिया लोप्पा तार कटाई तल पोयसी पिन कुन पैक कियाना



पूरा काम वरोरे मानेय कींतोर। मति विनिर्माण ढांचा लोप्पा कार्य विभाजन आंता। वरोर मानेय ना काम तार कटाई कियाना, दूसरा मानेय ना काम पिन ता टोपी तैयार कियाना, तीसरा मानेय ना काम पिन ता कोय्ये तैयार कियाना, चौथा मानेय ना काम अदिन पैक कियानाद मंदिता।

इद कार्य विभाजन ता बचोनो फायदा मंदितांग। पहली, इद्रम कीतेके काम लोप्पा कुशलता बेरसता। पूरा वस्तु ता निर्माण आयवा उंदी हिस्सा तुन बने कियाला हर मानेय तन्ना काम कियाला वेल्ले कुशल आतोर। दूसरा, इद्रम कीतांकु उत्पादन ता बचोनो गुणा बेरसता। अलग-अलग औजार कुन तेहना ओसो तासना लोप्पा लागना टाईम खत्म आत्ता अनि उंदे औजार संगे लागना टाईम वेने कम आत्ता।

विनिर्माण ढांचांग ना गठन वेने सामंती कालम लोप्पाने आसी मत्ता। मति इविना विस्तार उंदी बेहरा समस्या मत्ता। इव ढांचांग लोप्पा बेहरा स्तर ते श्रमिक लोरा जरूरत मत्ता। मति श्रमिक लोर बेगा मत्तोर? वीरा काजे बेहरा-बेहरा हाटुम ता जरूरत मत्ता मति हाटुम बेगा मत्तांग?

श्रमिक लोर भूम संगे दोहची मत्तोर। भूम विड़चसी बेगाने दाया परवोर। ओरु भूम विड़चसी हत्तेके सामंतीर किन दोरकना लगान लोप्पा कमी वांता। सामंत लोर इद्रम बदमाई आयला हीवोर। दस्तकारीर इंजे फैक्टरी व्यवस्था बगिल दाया मंता मति सामंती उत्पादन संबंध कुना प्रतिनिधि मत्ता सामंत लोर इदिना खिलाफ मत्तोर। इत्तेके ओरु उत्पादन शक्तिंग काजे इंजे बाधा बनेमाया मंतोर।

सामंत लोरा हाटुम तुन बेरसी कियाला तैयार हिल्लेर।

औजार कुना विकास तुन वैज्ञानिक विकास वेल्ले बेरसी कित्ता। विज्ञान ता विकास लोकरा लोप्पा वैज्ञानिक चेतना पुट्टी कित्ता। निन्ने एवनल बद वस्तु, संस्थांग ओसो व्यवस्था पोरो बदे सवाल किया परवा मत्तोर, इंजे अद हर वस्तु पोरो सवाल चिन्ह वाटना शुरू आत्ता। चर्च ता सत्ता पोरो वेने प्रश्नचिन्ह अर्ग मंता। बचोनो लोकर धर्म ओसो भगवान ता अस्तित्व पोरो वेने डावुट कियाना शुरू कितोर। सामंती ताकतकु वेल्ले क्रूरता ते इविना दमन शुरू आत्ता।

रवि ओसो ओना गोती तोर उंदे बेरा वड़कतोर, “बद्रम?”

बेरेल मर्रा: “बोरु चर्च लेवेके भगवान पोरो सवाल तेहतोर ओनकिन जिंदा पोत्ती कियानोर। ओरु बाइबल मानेमाता विचार कुन गलत साबित कित्ता ओसो सामंती ताकत कुना विरोध कित्ता वैज्ञानिक लोरकिन चर्च बगिल तल प्रताड़ित कियाना, ईशा ना निंदा कियाना आरोप ते गिरफ्तार कियानोर।

इद्रम ता आरोप कुना सजा लेक्का शहर ते केंद्रीय चौक नडमा जिंदा पोत्ती कियाना अस्केटा सबसे आम सजा मत्ता। हजारों लोकुर इद प्रक्रिया ते डोलतोर। बाकी हजारों लोकुर किन जेल ते वाटसी क्रूर यातनांग हीतोर। लाखों लोकुर देश तल बाहर तेंडसितोर।

इदे आयवा चर्च पूना वैज्ञानिक खोज ता, वैज्ञानिक चिंतन प्रक्रिया तार्किक तरीका ना पुरजोर विरोध कितोर। अदिना पूरा जोर बदरम मंता अद्रमे तासनादु मत्ता। वैज्ञानिक विचार तुन ओरु शैतानी विचार ओसो नरक ता हरीं वेहची लोकुर किन सीधा भ्रम ते वाटानादु।

मति इव सब्बे आतेकाई विज्ञान ता विकास रोमो ओसो दस्तकारी वेने रोमो आत्ता। उत्पादन ता पूना शक्तिंग पाइना उत्पादन संबंध कुना संगे टकरेमातांग। सामंतवी व्यवस्था तन्ना पिस्वल पिस्ता अनि इंजे इदिना हामुर वायानदू मत्ता। निम्मा मुन्ने सामंती व्यवस्था पाइना गुलाम प्रथा तुन गुच्ची कीसी ताना जागा ते वात्तादू हूइतिने। मति इंजे उत्पादन शक्तिंग ना ओसो वेल्ले विकसित आतांकु खुद सामंती व्यवस्था अदिना हरीं ते बाधा बनेमाता।

किसान सामंती व्यवस्था लोप्पा सबसे उत्पीड़ित समूह मत्ता। सामंत लोरा भोग विलास, आपसी युद्ध ता खर्च लगातार बेरससोर मत्ता। इव खर्च कुन पूरा कियाला सामंतीरगा उंदे साधन मत्ता- अदु किसान लोरगडल परताचोम लगान वसूल कियानादु। अद्रमासी किसान लोर वेल्ले मुश्किल परिस्थिति ते मंदानोर। आम साल कुना लोप्पा बदरमाई ओरु पिस्सानोर मति भूम वत्तितेके, ऊसा लेवेके फसल बीमार आतेके परिस्थिति तुन सामरे कियाना मुश्किल आयनदू। लगान ता रकम वेने बचोनो बेरा ब्याज ता पैसा संगे निहहा लागनदू। किसान खुद करवु ता शिकार आयनोर। किसान लोर सूदखोर ना पंजा ते अरसोर दायनोर। वेल्ले किसान लोरा भूम जंमींदार, सामंत लेवेके सूदखोर लोरा कैदे दायनदू अनि किसान तम्मा भूम पोरो खेती

कियाना मजदूर बनेमायानोर। किसान अन्न पुट्टी कियानोर मति ओना पिल्ला-पेकोर तम्मा कोंडा मुन्ने करविने पदिहकसोर डोलानोर।

सामंती-सूदखोर लोरा अत्याचार, शोषण विरुद्ध दुनियामेटा देश कुना लोप्पा हजारों संघर्ष ताकतांग। उचुन सुडला, उचुन व्यापक स्तर ता इव संघर्षकु किसान युद्ध पोरोल ते इतिहास लोप्पा दर्ज आतांग। इव किसान युद्धकु बचोनो साम्राज्य, राजा लोरा तख्ता पलट कीतांग। बचोनो पूना राजा लोर अस्तित्व ते वात्तोर मति पूना उत्पादन शक्तिंग, पूना विचार कुना कमी मत्तांकु सब्बे किसान युद्ध तुन पाड़ना व्यवस्था मुन्ने हारेमाया लागता।

दस्तकारी विकास आसोर-आसोर विनिर्माण ढांचांग एवनल एवतांग, व्यापार दुनिया मेटा देश कुन आपस ते जोड़े कियाना हरीं तेरियता अनि उंदी पूना वर्ग पुटता अदिन माटु पूंजीपति वर्ग ता पोरोल ते पुंतोम। पूंजीपति हाटुम काजे, मुनाफा कमई कियाला उत्पादन कियहिंतोर। ओनकिन वेल्ले मुनाफा कमई कियाला काजे बेहरा हाटुम ता जरूरत मंदिता। ओरकिन बेरोक-टोक तम्मा सुविधानुसार उत्पादन कियाना अनि वम्मना परिस्थिति लागिता। ओरकिन बेहरा संख्या ते ओना फैक्टरी लोप्पा हेपुर पोहतना स्वतंत्र मजदूर लोरा जरूरत मंदिता।

दूसरा बगिल नाहकुना लोप्पा किसान लोर भरपूर शोषण ता शिकार आयानोर। इदिना बारे ते मुन्ने ने नन्ना मीकिन वेहतान। ओरु सामंत-जमींदार, सूदखोर लोरा पोरो होंग ते मंतोर।

पूंजीपति वर्ग ता नेतृत्व ते किसान लोरा बेहरा संख्या सामंती व्यवस्था तुन पलटे कितोर। इदिना जागा ते वात्ता पूना व्यवस्था तुन माटू पूंजीवाद इंतोम।”

बेरेल मर्रा इद्रम इंजी केमेक आत्तास्के वेल्ले ध्यान हीसी सब्बे पोल्लोग केंजसोर मत्ता रवि ओसो ओना गोती तोर हूड़ा मंतोर। बेरेल मर्रा तुन केमेक हूड़सी रवि “निम्मा केमेक बारांकु आतिन। माकिन सब्बे समजेमाया मंता। नाकिन इत्तेके बदे फिल्म हूड़सोर मत्ता लेक्का आया मंता, इद्रम आसोर हिल्ले या?” इंजी तम्मा गोती तोरा बगिल हूड़सोर इत्तोर।

बाकी तोर: “इंगो, इंगो, रवि निम्मा निज्जमे वेहा मंतिन।”

बेरेल मर्ऱा: “असल इत्तेके माटु इतिहास लेक्का पढेमायनदू इतिहास आयो। अदिन मीटु राजा-महाराजा लोरा कहानिंग इंदा परिंतिर। राजा “क” ना आयवा राजा “ख” गद्वारी कीतेके ओनकिन आम लोकुरा पिस्वल ते बाताले बदलाव वांता या? सिर्फ वंशावलीए बदले मांता। लोकुरा पिस्वल पोरो ओसो इद्रम ता लोकुरा इतिहास पोरो बदे विशेष कालम ते उत्पादन तरीकांग ना कारण ते बदलाव वासोर हत्ता। उदाहरण तुकू लोकुर बद्रम उत्पादन किया मंतोर? ओरा तरीकांग लोप्पा बाता बदलाव वाया मंता? उत्पादन पद्धति लोप्पा गुणात्मक बदलाव वातेके लोकुरा विचार, पिस्वल शैली, राजनीति लेक्कटा हर वस्तु लोप्पा बदलाव वांता। इद बदलाव निम्मा आदिम साम्यवाद तल गुलाम प्रथा ओसो गुलाम प्रथा तल सामंतवाद ता बदलाव प्रक्रिया लोप्पा हूइतिरे। इदे बदलाव इंजे सामंतवाद तल पूंजीवाद लोप्पा बदलाव आयनास्के वेने दिसिंता।”



पूँजीवादी क्रांति ता उंदी प्रमुख नारा मत्ता - अदु बराबरी, मुक्ति ओसो भाईचारा। इद नारा उंदू जादूर्ई नारा मत्ता, इदु व्यापक जनता तुन आंदोलन लोप्पा तत्तिंता। नेंडु निम्मा इद्रम ता विचार कुन समजेमाया परवा लेक्का मंतिन, बारांकु इत्तेके नीवा पालन-पोषण, नीवा विचार वेल्ले अलग परिस्थिति ते आत्ता।

बराबरी ता पोल्ल्लोंग कींतोम। नेंडु निम्मा हर जागा ते सब्बेतोर बराबर
इंजी केंजसोर मंदाकिन। अदिन काजे निम्मा इदिना लोप्पा बाता खास मंता
इंजी आल्सिंतिन। मति सामंती कालम ते इद्रम इंदानोरा तल्ला कोयसी
वाटसियानोर। सामंती कालम ता शिक्षा ओसो धर्म राजाल भगवान ता अंश
आंदुर, किसान लोरा काम ओना सेवा कियानाद मंता इंजी करहिंता।
किसाना लोरा काजे राजा ना संगे बराबरी ता पोल्ल्लोंग आल्सना वेने पाप
कियाना लेक्का मत्ता। उचुन साल मुन्ने एवनल मना पड़ोसी देश नेपाल लोप्पा
राजशाही व्यवस्था मत्ता, अगाटा राजा किन विष्णु ना अंश समजेमायनोर।

सामंती कालन लोप्पा शक्ति, प्रभाव लोप्पा राजा ना मुकाबला बोरे वेने किया परवोर अदिन काजे बराबरी ता विचार वेने संभव मन्नो आयानदू। राजा ना मुकाबला कियानोर खुद वरोर राजाल बनेमासी दूसरोरा पोरो राज कियानोर। मति पूंजीपति वर्ग ता उदय पेरेके इद परिस्थिति बदलेमाता।

शक्ति, प्रभाव स्थापना कियाना वेल्ले कारगर तरीका पूंजीपति लोरगा मत्ता मत्ति पूंजीपतिरा सामाजिक रूपबा इंजे वेने कुलीन वर्ग ता दोड़े मत्ता। अदिन काजे पूंजीपतिर किन पूना रूतबा-राजा-शासक वर्ग ता बराबरी ता जरूरत मत्ता, दूसरा बगिल ओरु किसान जनता काजे राजा किन जनता ना हिसाब ते ताकना जनता तुन राजा लोरा अनुसार आयो इंदाना विचार वेल्ले क्रांतिकारी मत्ता। इद विचार सामंतवाद पोरो होंग ते मत्ता जनता लोप्पा पूना क्रांतिकारी ताकत पुट्टी कित्ता।

मुक्ति ता पोल्लो वेने बराबरी ता लेक्काने ताकत पुट्टी कियानदू। किसान जनता सामंती शोषण ता जुआ ते सैकड़ों साल तल दोहची मत्ता। अदु धर्म, कर्मकांड ता सहारा ते सामंती वर्ग ओना पोरो शासन कीसोर मंता, अदिन लूटे किया मंता इंजी समजेमासी मत्ता। किसान लोर किन सामंती बंधन कुनल ओसो सामंती लूट तल मुक्त आयना जरूरत मंता।

भाईचारा कियवा लेवा बराबरी संभव हिल्ला मत्ता अनि मुक्ति हिल्ला मत्ता। पूंजीपति वर्ग, दस्तकार, किसान, स्थानीय नौकर सब्बे भाईचारा कियवा लेवा बराबरी ओसो मुक्ति ता संघर्ष-सामंतवाद खिलाफ संघर्ष जीड़ा परवोर।

अदिन काजे बराबरी-मुक्ति-भाईचारा सामंतवाद खिलाफ संघर्ष ता मुख्य नारा बनेमासी मुन्ने वात्ता। सबसे मुन्ने सुडला देश हॉलैंड ते इद संघर्ष तुन सफलता दोरकता। लोकुरा राज्य, लोकुरा काजे लोकुर इत्तेके लोकतंत्र ता स्थापना आत्ता। इद लोकतंत्र मालिक लोर किने लोकुरा लोप्पा शामिल कियाना पाड़ना युनान ता लोकतंत्र लेक्का हिल्ला मत्ता। इद लोकतंत्र लोप्पा किसान-मजदूर लोरा एकता मत्ता।

हॉलैंड ते वात्ता इद बदलाव दुनिया तुन वेल्ले प्रभावित कीवो। मति 1688 ते इंग्लैंड ते पूंजीवादी क्रांति आत्तास्के अदिना प्रभाव विश्वव्यापी आत्ता।

सामंती संस्थांग ओसो सामंती अधिकार कुन खत्म कित्ता। चर्च तुन दोरकता सब्बे सामंती अधिकार खत्म आतांग। सामंत, जमींदार लोर किन लगान वसूल कियाना अधिकार हिल्ले। किसान लोरगा इंजे बेगाने वेने स्वतंत्र रूप ते हंजी काम कियाना अधिकार मत्ता। नाहकुनल वेल्ले बेहरा

संख्या ते किसान लोर खुद लेवेके बदे दूसरा कारण ते शहर बगिल हत्तोर। अगा बेहरा-बेहरा फैक्ट्रिंग ओरा मेहनत ता दोहन कियालना तैयार आसोर मत्तांग।

मति इव सब्बे अद्रमे आयवा मत्तांग।

मेनुफैक्चरिंग ढांचांग ना स्थापना आत्ता पेरके उत्पादन गतिविधिं ग वेल्ले बेरसतांग मति अविना अनुसार परिस्थितिं ग बदलेमायोंग आतांग इत्तेके उत्पादन कियाला काजे श्रम ओसो तैयार माल तुन वम्मला काजे बदे परिस्थिति हिल्वा मत्ता।

उत्पादन ता पूना शक्तिंग इव परिस्थितिं ग नल मुक्त आयला काजे कंदरेमासोर मत्तांग। परिस्थितिं ग बोर तय कियानोर?

रवि: “अस्के टा शासक वर्ग!”

बेरेल मर्ग: “निज्जमे! सामंत, जमींदार, राजा लेक्काटोर अस्केटा शासक वर्ग लोप्पा शामिल मत्तोर। ओरु किसान लोर भूम विड़चसी फैक्ट्रिंग लोप्पा काम कियानायो इंजी आल्सानोर। ओरु इद्रम आतेके ओरकिन दोरकना राजस्व कम आयार इंजी आल्सानोर। ओरु व्यापारी-दस्तकार, मैनुफेक्चरर्स (विनिर्माण ढांचांग ना मालिक) लोरा पोरो डावुट कियानोर।

अद्रमासी उंदी बगिल किसान लोरो ओसो सामंती, जमींदार लोरा नड़मा अंतरविरोध बेरससोर हत्ता अनि दूसरा बगिल मैनुफेक्चर्स ओसो सामंती, जमींदार लोरा नड़मा अंतरविरोध बेरससोर हत्ता। ग्रामीण इलाकांग लोप्पा किसान लोरा विद्रोह तेज आतांग। हर जागा ते सामंती शोषण तल परिशान आसी किसान लोर सामंती ओसो जमींदार लोर खिलाफ बगावत कितोर।

माटु सब्बे तोर पूंजीपति वर्ग ता पोरोल ते पुंजोर मत्ता पूना उत्पादन साधन कुना मालिक लोरा नेतृत्व ते ओसो किसान लोरा बेहरा संख्या ता ताकत संगे जनवादी लेवेके पूंजीवादी क्रांतिंग सिर्फ यूरोप तेने आया परतांग। मुन्ने हॉलैंड ते अनि ताना पेरके इंग्लैंड, फ्रांस, जर्मनी लेक्कटा देश कुना लोप्पा पूंजीवादी ताकतकु सामंती ताकत कुन पूराए लेवेके निर्णायक रूप ते हारे कीतांग अनि खुद सत्ता ते वातांग।

इंजे पूना शासक वर्ग “पूजीपति” मत्ता। अनि मजदूर, किसान, दस्तकार लेक्कटा पूना शोषित वर्ग लोप्पा शामिल मत्तांग। पूजीवादी युग लोप्पा उंदी महत्वपूर्ण विकास आत्ता। नेंडु दुनिया ता नक्शा पोरो मीटु हूइसोर मत्ता देश कुना निर्माण पूजीवाद ता उदय संगेने आत्ता।

रवि: मुन्ने दुनिया ता नक्शा पोरो इव देश कु हिल्वा मत्तादू निज्जमा?”

बेरेल मर्रा: हिल्ले, देश कुना निर्माण पूजीवाद पेरेके ने आत्ता। अदिनकु मुन्ने विभिन्न राजा लोरा कब्जा ते राज्य मंदानवु अविना आकार बेरससोर-घटेमासोर मंदानदु। लोकुरा लोप्पा वेने देश शब्द पोरो अचोन आकर्षण हिल्वा मत्ता। सामंतवाद लोप्पा लोकुरा पूरा पिस्वल तम्मा नाहकु लेवेके तम्मा हेरे-हेरे ता 5-7 नाहकुना एरिया लोप्पा ने मंदानदू। इद एरिया तल बाहर ओरु बस्के-बस्के ने दायानोर, उदाहरण तुकू गंगा-स्नान काजे पेसानोर लेवेके ओरा पूरा आर्थिक-सामाजिक-सांस्कृतिक गतिविधिं ग नाहकुना हंदी एवनले सीमित मंदानदू।

बदे विशेष इलाका ता लोकुर किन भाषा ता एकता जोड़े कींता। उंदी भाषा ता जरूरत व्यापारी लोर किन वेने आत्ता। सिर्फ भाषाए आयवा उंदी रकम ता नाप-तोल ता बाट, उंदी रकम ता संस्कृति, उंदी रकम ता आदत, उंदी रकम ता व्यवहार मत्तांकु माल पुट्टी कियाला ओसो वम्मला सुविधा मंदिंता। इव सब्बे अद विशेष इलाका बदे राजनीतिक सत्ता अधिकार लोप्पा वेल्ले जोम मत्तास्के ने संभव मंदिंता बारांकु इत्तेके भाषा-संस्कृति-रीति रिवा लेक्कटा रेंडु-मूंड सालो लोप्पा आयवा वेल्ले टाईम ते तन्ना जागा दोरकी कींतांग।

सामंती ताकत कुन हारे किता पेरेके पूजीपतिर यूरोप तुन बचोनो देश कुने तूस्तोर, अगा सब्बे सामंती अधिकार कुन खत्म कितोर, उंदी भाषा ता विकास कितोर। उंदी विशेष संस्कृति, रिति-रिवाज लेक्कटविन प्रोत्साहति कितोर, वरोर दूसरो ना हंदी ता उल्लंघन तुन गलत मानेमायना शुरू आत्ता। इद्रम यूरोप लोप्पा हॉलैंड, फ्रांस, ग्रेट-ब्रिटेन, जर्मनी, स्पेन, पुर्तगाल, बेल्जियम लेक्कटा देशकु पुटतांग।

मंदीप: “भारत देश वेने मुन्नेटल हिल्वा मत्ता या?”

बेरेल मर्गः आयो रा पेकोर! अंग्रेज लोर वायना मुत्रे भारत सैकड़ों सुडला-बेहरा रियासत कुना लेक्का मत्ता। सम्राट अशोक, चंद्रगुप्त मौर्य ओसो अकबर वीर मुव्वुर बेहरा राजा लोरा शासन काल ते भारत ता बेहरा हिस्सा वीराए नियंत्रण ते मत्ता। पूरा भारत पोरो नियंत्रण वीरा लोप्पटल बोनाए वेने हिल्वा मत्ता। बचोनो इलाकांग पोरो बस्केने बोरे राजा ना शासन हिल्वा मत्ता। अगा आदिवासी समूह मंदानदु अदु तन्ना स्वतंत्र आदिम कबीलाई आर्थिक-सामाजिक-राजनीतिक ढांचा तासनदू। अंग्रेज भारत विड़चसी हत्तोर, अस्के वेने देश लोप्पा 560 रियासतकु मत्तांग अवु खुद किन आजाद इंदानवुद।

सब्बे तोर “अद्रमा” इत्तोर। बेरेल मर्ग बचोन बद्रम-बद्रमता पोल्लोग किया मंता। रवि बेरेल मर्ग ता पोल्लोग लोप्पा बाधा वात्ता लेक्का आत्ता।

अदिनके ओरु इत्तोरः बेरेल, निम्मा नीवा अवे पोल्लो जारी तासा। सामंत लोर किन पूंजीपतिर हारे कितोर अस्के बाताल आत्ता?

बेरेल मर्ग हत्ता कालम ते मायता बदे वस्तु परहकसोर मत्ता लेक्का आताः इव घटनांग नावा कालम तवे आंदुंग। नाकिन फ्रांस ते आत्ता 1789 ता क्रांति सुरता मंता। उत्तर दिशा तल वायना पिट्टेग नाकिन वेहता पोल्लोग वेल्ले गिर्दा वायना लेक्का मंता। फ्रांस लोप्पा सब्बे उथल-पुथल आसी मत्ता। किसान लोर राजा ना बदे अधिकार तुन माने मायला इनकार कितोर। अनि शाही परिवार तुन खत्म कितोर। उंदी दीर्घकालीन हीकट पेरके हर मानेय तेदता लेक्का आसी मत्ता। हर मानेय इत्तेके ओरु नाटेना किसान आई लेवेके शहर ता दस्तकार, मजदूर आई; हत्ता सैकड़ों साल तल तम्मा किस्मत ते वात्ता इंजी स्वीकार कीसोर मत्ता राजा ना सत्ता पोरो सवाल कियाना शुरू कितोर। राजाल ओसो पूरा कुलीन तंत्र वेरियता। ओरु हमेशा काजे मंदिता इंजी समजेमासोर मत्ता सत्ता ओरा कैदल दाया मंता। ओरा सब्बे षड़यंत्रकरी, धोखेबाजी तरीकांग असफल आतांग, सब्बे क्रूरतापूर्ण कार्रवाइंग ना बदे प्रभाव अरवो आत्ता। सामंती लोरा सब्बे अधिकार खत्म आतांग अनि उंदी पूना व्यवस्था ता उदय आत्ता। इद पूना व्यवस्था पूंजीवादी व्यवस्था मत्ता। सामंती व्यवस्था संगे-संगे सामंती व्यवस्था ता राजनीति, नैतिकता, शिक्षा,



धर्म संबंधित धारणांग वेने खत्म आतांग अनि पूंजीवादी व्यवस्था ता पूना राजनीति, पूना नैतिकता, पूना शिक्षा, तूलनात्मक रूप ते उदार धर्म पुटता।

सामंती बंधन कुन मुक्त आयला कंदरेमासोर मत्ता उत्पादन शक्तिंग इंजे मुक्त आसी मत्तांग। भूम संगे दोहची मत्ता किसान लोरा बेहरा संख्या भूम तल मुक्त आत्तोर। इंजे ओरु बेगाने वेने हंजी काम कियाला स्वतंत्र मत्तोर। सत्ता सामंती ताकत कुना कैदल पूंजीपति वर्ग ता प्रतिनिधि लोरगा वात्ता। पूंजीपति वर्ग फैक्टरी उत्पादन व्यवस्था काजे बाधा मत्ता सब्बे वस्तुंग कुन गुच्चिह कित्ता अनि उंदी मुक्त अर्थव्यवस्था निलपी कित्ता। फैक्टरी उत्पादन ओसो उत्पादन आत्ता माल तुन प्रोत्साहित कित्ता। पाइना सामंती कर ओसो टैक्स तुन खत्म कित्ता। नाप-तौल ता स्तर तुन पूरा देश लोप्पा उंदी लेक्का बने कित्ता। पूरा देश लोप्पा उंदी भाष ता विकास कित्ता। सड़क सुधार कीसी अविन हर कालम ते इस्तेमाल कियाला लेक्का बने कित्ता। विज्ञान ओसो तकनीक ता विकास काजे पूना स्कूल, कालेज शुरू कित्ता। सरकार बगिल तल अदिना काजे वेल्ले पैसा, सुविधांग हियाना शुरू आत्ता।

इव सब्बे ना कारण ते माल उत्पादन लोप्पा वेल्ले वृद्धि आत्ता। पूना-पूना फैक्टरींग खुलेमातांग। पूना खदान कु मुन्ने तुक्कू बचोनो ज्यादा अयस्क भूम पोर्टाल पेसलाता। दायना-वायना साधन कुना लोप्पा जबर्दस्त वृद्धि आत्ता। इदिन माटु औद्योगिक क्रांति इंतोम।

मनोजः इंगो, नन्ना औद्योगिक क्रांति ता बारे केंजताने। इद 19वी सदी ता शुरुआती दशक ते आत्ता, इदिना लोप्पा भाप ता इंजन ता बेहरा भूमिका मत्ता।

बेरेल मर्रा: इंगो, निज्जमे। निम्मा वेल्ले समझदार मंतिन। भाप ता इंजन ता आविष्कार 1776 ते आत्ता। तीरम-तीरम इदिन फैक्टरिंग-कारखानांग लोप्पा उत्पादन प्रक्रिया लोप्पा इस्तेमाल कितोर। भाप ता इंजन - अलादीन ना जिन किन मानेय तन्ना कब्जा ते कित्ता लेक्का मत्ता। इद काम बचोनो सौ बलशाली लोकुर पोड़दमेटे किया पराना काम तुन भाप ता इंजन उचे घंटांग लोप्पा पूरा कियाना ताकत तासनदू। भाप ता इंजन दोगवा लेवा नरका-पियल काम किया परनदू। भाप ता इंजन, बाकी तकनीकी आविष्कार कु उत्पादन तुन वेल्ले बेरसी कीतांग अनि अविना मात्रा वेल्ले बेरसतांकु सिर्फ उंदी सौ साल मुन्ने इदिना बारे ते आल्सा वेने परमूडायो।

मनोज: “अद्रम इत्तेके सब्बे मजदूर ओसो किसान लोरा पिस्वल सुधरे मासी मंदियर, एय्यो।”

बेरेल मर्रा: “बराबरी, मुक्ति ओसो भाईचारा ता नारा हर देश लोप्पा सिर्फ नाराए मत्ता असल ते लागू आत्ताद हिल्ले। मजदूरो ओसो किसान लोर किन बराबरी ओसो शोषण तल मुक्ति दोरकताद हिल्ले। बेहरा संख्या ते इंग्लैंड ते किसान लोर किन भूम तल बेदखल कितोर। बारांकु इत्तेके पूना शोषक लोर भूम पोरो खेती कियाना जागा ते इंजे वेटाड़ बने कितोर अनि अगा बेड़ांग पोसे कियाना शुरू कितोर। इद्रम कीसी ओरु फैक्टरिंग काजे पहना माल इत्तेके ऊन पुट्टी कियानोर। इंदे अव भूमिंग पोरो काम कियाना किसान लोरा जरूरत ग्रामीण शोषक लोर किन हिल्ला मत्ता। भूम तल बेदखल कित्ता किसान लोर बदे साधन हिल्ला शहर ते वात्तोर अगा फैक्टरिंग लोप्पा ओरकिन 14-16 घंटा काम किया लागनदू। इचोन जोम काम कियाना मजदूर लोरा मजबूरी मत्ता इद्रम कीवेके ओरु करविने डोलसी मन्नेर। वीर मजदूर लोरगा बेसता तिंदना, बेसता गेत्तेंग ओसो मंदाला लोन वेने हिल्ला मंदानदू।”

रवि: इद्रम बद्रम आया परिंता? उत्पादन इचोन बेरसिस मत्तास्के करवु बद्रम मत्ता? लोकुरिगा केर्ला काजे गेत्तेंग ओसो मंदाला काजे लोन बद्रम हिल्ला मत्ता?



नव साक्षर मजदूर लोरा सवाल

बेरेल मर्ग: “उत्पादन लोप्पा वृद्धि आत्तादु निज्जम मत्ता लेक्काने सब्बे तोर किन पोटा मेंड तिंदला दोरक्का मत्तादु, मेंदुल मुच्चला काजे गेत्ते ओसो मंढाला काजे लोन दोरक्का मत्तादू वेने निज्जमें। उत्पादन बेरसता मति अदिना फायदा सिर्फ मुट्टामेंड लोकुर किने आत्ता।

निन्ने एवनल नरका-पियल खेती कियाना, सामंती जुल्म ता शिकार आसोर मत्ता लोकुर इंजे उजरती मजदूर लोरा लेक्का बदलेमातोर। उजरती मजदूर इत्तेके दिहाड़ी ता जागा मेहनत कीसी पोटा निहहतना लोकुर आंदूर। नन्ना मीकिन सामंती समाज लोप्पा बेहरा जनसंख्या भूम संगे दोहची मत्ता अनि ओरकिन जमींदार लेवेके राजा लोर किन लगान हिया लागनदू इंजी वेहताद मंता। इद बेहरा जनसंख्या पूंजीवादी व्यवस्था लोप्पा खेती तल आजाद आत्ता। मति वीर सब्बे तोर किन ओसो ओरा परिवार तुन मुफ्त गाटो बोर हिया परितोर। शहर इद्रम ता लोकुरा हरीं हूड़ा मंता, बारांकु इत्तेके अदिन उंदी बेहरा संख्या ते मजदूर लोरा जरूरत मत्ता। स्वतंत्र आत्ता भू-गुलाम ओसो भूम तल बेदखल कित्ता किसान फैक्ट्रिंग-कारखानांग लोप्पा मजदूर लोर लेक्का काम कियाना शुरू कितोर। ओरु इंजे बदे खास पूंजीपति ना नियंत्रण ते हिल्वा मत्तोर। अद्रमासी ओरु स्वतंत्र मत्तोर मति बदे वेने शहर लेवेके बदे फैक्टरी लोप्पा काम किया परवोर आयनोर। नेंडु ओरु वरोर पूंजीपति ना फैक्टरी लोप्पा लेवेके नाड़ी बोरे दूसरा फैक्टरी लोप्पा काम

किया परितोर। फैक्टरी लोप्पा काम खत्म कित्ता पेरके पिस्ता टाईम ओरादे मंदानदू। ओरकिन इंजे बेगार किया लागो आयनदू। ओरु कियाना काम ता बदला ते दिहाड़ी एतना ओरा अधिकार मत्ता। बोरे पूंजीपति ओरकिन मुफ्त कियहा परवोर आयनोर।

मति इव सब्बे आसोर मत्तास्के ओरा पिस्वल सुधरेमाता इंजी आयो। ओरकिन फैक्टरींग लोप्पा 12-13 घंटांग लेवेके 15 घंटांग एवनल वेने काम किया लागनदू।

रवि: बाताल? 15 घंटांग?? सरकार ता नियम तो 8 घंटांग काम कियाना मंता। ताना पेरके ओवरटाइम दोरकिंता। नावा काकल फैक्टरी लोप्पा काम कींतोर ओरु खुद नाकिन इद पोल्लो वेहतोर।

बेरेले मर्रा: नीवा काकल नीकिन सही वेहतोर। मति 8 घंटांग काम कियानादू हत्ता 125 साल तल आत्ता। 8 घंटांग काम कियला काजे मजदूर लोर बचोनो संघर्ष कितोर। दर्जनो मजदूर लोर शहादत हीता पेरके पूंजीपति वर्ग 8 घंटांग कियाना मांग तुन स्वीकार कित्ता। शुरु ते उंदीबेरा मजदूर लोर फैक्टरी लोपा वात्तोर इत्तेके मालिक लोर विचार वात्ता लेक्का काम कियहानोर। मजदूर दोगसी कावनोर, ओरा ताकत पूरा पीरसियानोर, सिर्फ अस्केने मालिक लोर ओरकिन छुट्टी हियानोर। वेल्ले मजदूर लोर अदे मशीन हेरे हुंजनोर अनि नस्कुमे काम ते लागानोर। ओरकिन मजदूरी वेने पोरोल तुके दोरकनदू। 15-15 घंटांग मेहनत कीसी वेने ओरकिन मुश्किल पिस्वल पिस्सा लागनदू। मजदूर लोरा बदे अधिकार हिल्वा मत्ता। फैक्टरी लोप्पा काम कियानास्के नोमुर आतेके ओरकिन बाहर पेसी कियानोर। वेल्ले काम पिल्ला-पेकोर ओसो आस्कुन कियाला वेहानोर। पेकोर ओसो आस्कुना दिहाड़ी ओसो वेने कम मंदानदू। फैक्टरी ते हमेशा गर्दी मंदाना सुडला जागा ने मंदानदू, वेल्ले कम जागा ते मालिक वेल्ले मशीन तासना कोशिश कियानोर। अद्रमासी सिर्फ दुर्घटनांग ना खतरा ओसो ज्यादा आयवा स्वास्थ्य रूप ते वेने वेल्ले नुकसानदायक मंदानदू। मजदूर हमेशा दुर्घटनांग ना शिकार आयनोर, टीबी, दमा लेवेके न्यूमोनिया लेक्कटा खतरनाक बीमारिंग आयानवु, मुन्नेने हामुर आयानदू। मति पूंजीपतिर इदिना बदे परवाह कीवोर

आयानोर बारांकु इत्तेके फैक्टरी तल बाहर हमेशा बेरोजगार लोकुरा गर्दी मंदानदू अदु पाइना मजदूर लोरा जागा वायला तैयार मंदानदू।

बदे उंदी फैक्टरी लोप्पा मुश्किल परिस्थितिंग वात्तास्के मजदूर लोर बोरे वरोर पूंजीपति ना फैक्टरी विइचसी दूसरा जागा ते हत्तेकाई परिस्थिति लोप्पा बदे बदलाव वायो आयनदू बारांकु इत्तेके हर जागा परिस्थिति उंदी लेक्काने मंदानदू। अदिन काजे मजदूर वरोर शोषक (पूंजीपति) निगडल मुक्त आत्तोर, मति ओरु पूरा पूंजीपति वर्ग ता उजरती गुलाम बनेमातोर। ओरिन वरोर लेवेके दूसरा पूंजीपतिरगा काम किया लागनदू। मजदूर लोरा संघर्ष ता कारण ते नेंडु बचोनो जागा ने परिस्थिति वेल्ले बेस मंता मति दुनिया ता ज्यादातर हिस्सा ने ओसो ज्यादातर फैक्टरींग लोप्पा नेंडु वेने मजदूर लोर किन इद्रम ता परिस्थिति ने काम कियाला ओसो पिस्सला लागिंता।

निम्मा नीवाए शहर ता परिस्थिति तुन हूड़ा। मजदूर लोरा नाहकु ओसो शहर कुना बाकी लोकुरा मंदाना जागा ना तूलना कीमुट। मीकिन स्पष्ट रूप ते अंतर दिसियर। मजदूर सुडला-सुडला लोहकुने सुडला-सुडला गली वाले इलाकांग लोप्पा मंतोर अगा उंडला काजे साफ एर मन्नी ओसो साफ-सफाई ता बदे व्यवस्था हिल्ले। विकास काजे वात्ता पूरा पैसा ओरा नाहक एवना मुन्नेने मारिंता। साधारण रूप ते मजदूर लोर किन झोपड़िंग शहर कुना चिकला एर संगे निंडसी मत्ता नालिंग हेरे मंदितांग अदा बदे दूसरा मानेय दायला वेने विचार कीवोर आंतोर।”

बेरेल मर्रा ता पोल्लोग केंजसी सब्बेतोरा कोंडा मुन्ने हीकट पोयता लेक्का आत्ता अनि वरोर दूसरोर किन सवाल कियाना लेक्का हूड़ा मंतोर। बेरेल मर्रा ओरकिन समजेमासोर पूछेमाता:- “बारांकु? उचुन वेने समजेमासोर हिल्ले, मीकिन विश्वास वासोर हिल्ले?”

रवि: “माटु उंदी पोल्लो समजेमासोर हिल्लेम। निम्मा आदिम साम्यवाद तल गुलाम प्रथा, सामंतवाद ओसो ताना पेरके पूंजीवाद वात्ता इंजी वेहतिन। निम्मा इद्रम उत्पादन शक्तिंग ना विकास ता कारण ते आत्ता इतिन मति गुलाम, भू-गुलाम ओसो मजदूर लोरा परिस्थिति ता बारे ते केंजसी कोंडा मुन्ने हीकट पोयता लेक्का आत्ता। मजदूर लोरा शोषण इंजे वेने

वेल्ले आसोर मंता। मजदूर लोरा शोषण गुलाम लेवेके भू-गुलाम लोरा तुलना ते कम आंता। इद पोल्लो तुन उचुन समजे कीमुट।”

बरेल मर्रा: “निम्मा वेल्ले बेसला सवाल कीतिन। गुलाम प्रथा, सामंतवाद ओसो पूंजीवाद इव मूंड व्यवस्थांग लोप्पा शोषण ता रूप बदलेमासोर हत्ता मति शोषण कम आत्ताद हिल्ले। माटु मजदूर लोरा शोषण गुलाम लोरा शोषण तुकू कम मत्ता लेवेके ज्यादा मत्ता इंदा परवोम। गुलाम प्रथा लोप्पा गुलाम लोरा निर्मम शोषण आयनदू अनि पूंजीवाज लोप्पा मजदूर लोरा निर्मम शोषण आया मंता।

इद्रम ता परिस्थिति ते नीवा सवाल मेहनत कियाना जनता उत्पादन शक्तिंग ना प्रतिनिधि मंता इंदानास्के अविना लोप्पा विकास ता पोल्लो माटु बद्रम किया परितोम?

असल ते उत्पादन शक्तिंग ना विकास शोषण ता मात्रा हूडमूडायो। औजार कुना लोप्पा इद तकनीकी कुशलता ते ओसो मानेय ना लोप्पा अदिना चेतना संगे नापे कियमूडंता। तकनीकी कुशलकता ता पहलू तुन मीटु हल्कोए समजेमाया परितिरं। नन्ना इदिना सिर्फ उंदी उदाहरण हियाकान। आदिम साम्यवाद लोप्पा कै संगे बुने(हरहाना) कित्ता गेतेंग केरमूडायनदू। गुलाम प्रथा लोप्पो तकुए ता आविष्कार आसी मत्ता अनि अदिना मदद ते गेतेंग तैयार आयनवु, इंजे वेने लोहकुने लोकुर दरिंग लेवेके चादर तैयार कित्ता लेक्का। सामंतवाद लोप्पा हथकरघा वात्ता अनि पूंजीवाद लोप्पा मशीन वात्ता।

इंजे माटु मेहनतकश जनता ना चेतना ता विकास तुन समजेमायकाल। गुलाम प्रथा लोप्पा गुलाम लोरा परिस्थिति मालिक लोपा पालतू जानवर तुकू बेस हिल्ला मत्ता। सैकड़ों-हजारों साल ता गुलामी ता कारण ते गुलाम लोर खुद किन इदिनकु बेस समजेमायोर आयनोर। ओरकिन बेड़ांग-हेरेंग लेक्काने हाटुम-मंडिंग लोप्पा अस्सना-वम्मना कियानोर। गुलाम लोरा तम्मा पिस्वल पोरो वेने बदे अधिकार हिल्ला मत्ता। ओरा पिस्वल ओसो हामुर मालिक लोरा अधिकार ते मत्ता। मालिक लोरा मर्जी ते गुलाम लोरकिन करविने तासानोर, इंडाल तासानोर, कै-काल कोयसियानोर, हौकसियानोर। अस्केटा कानून मालिक लोर किन इद

अधिकार हियानदू। गुलाम लोरगा बदे अधिकार मन्नो आयनदू। ओरिन मालिक लोरा हर अत्याचार भगवान ता इच्छा इंजी सहन किया लागनदू।

सामंतवादी समाज लोप्पा इद परिस्थिति बदलेमाता। इंजे भू-गुलाम लोरा पिस्वल जमींदार लोरा अधिकार ते मंदानदू। ओनकिन उचुन मानव अधिकारकु दोरकी मत्तांग। इद समाज लोप्पा ओरु तन्ना परिवार तासा परानोर, तन्ना पिल्ला-पेकोर बोरे मालिक ना सम्पत्ति आयवा ओनाए पिल्ला-पेकोर मंदानोर। बोरे जमींदार लेवेके राजाल ओनिकिन अद्रमे हौका परवोर आयनोर। मति ओरु इंजे वेने भूम संगे दोहची मत्तोर, ओनकिन राजाल, सामंती लेवेके जमींदार किन लगान हिया लागिंदु मति ओरु तन्ना समुदाय लोप्पा मंदानोर, अगा ओरु तन्ना मर्जी ते काम कियानोर। तन्ना मर्जी ते पूना दस्तकारी करियानोर। ओनकिन उचुन अतिरिक्त पुट्टेके अदु ओरु तन्ना हिसाब ते इस्तेमाल किया परनोर। उंदी लेक्कटा भाषा, उंदी लेक्कटा संस्कृति, रहन-सहन ओसो तिंदना-उंडना मत्तांकु उंदी सामुदायिक विचार विकसित आत्ता, इद सामुदायिक विचार आदिम साम्यवाद लोप्पा मत्ता लेक्का हिल्ला मत्ता। इदिना कारण उत्पादन पद्धति लोप्पा मकसी मत्ता। हर किसान तन्ना-तन्ना खेत लोप्पा तन्ना औजार कुना मदद ते काम कियानोर। ओरु तन्ना पिस्वल काजे जरूरी गेत्तेंग अनि बाकी सामान वेने तन्ना पिरवा रता श्रम संगे खुद पुट्टी कियानोर। अदिन काजे उत्पादन मुख्य रूप ते व्यक्तिगत मत्ता। रीति-रिवाज, तिहार ओसो बाकी सांस्कृतिक कामकाज लोप्पा सामूहिकता मत्ता।

पूंजीवादी समाज मजदूर लोर किन उत्पादन साधन कुनल मुक्त कित्ता। निम्मा गुलाम प्रथा लोप्पा गुलाम वेने उत्पादन साधन ता मालिक हिल्ला मत्तोर इंदा परितिन। निज्जमे मति गुलाम लोरा लेक्का मजदूर मालिक लोरा सम्पत्ति हिल्ला मत्तोर, इदिना उल्टा ओरु स्वतंत्र नागरिक लेक्का ओरकिन आजादी दोरकता। समानता ता पोल्लोंग सामंतवाद लोप्पा आल्समूड वेने आयो। अद समाज लोप्पा उंदी पद हाजा लेक्का मत्ता। राजाल भगवान ता अंश मत्तेके किसान, दस्ताकार ओना काल दोड़ ता डुंडुल, मति पूंजीवादी समाज मानेय-मानेय लोप्पा समानता ता विचार पुट्टी कित्ता। मजदूर वेने प्रधानमंत्री बनेमाया परितोर। मजदूर वेने कोशिश कीतेके बेहरा

अफसर बनेमाया परितोर इत्ता। पूंजीवाद मजदूर लोर किन उंदी जागा जमा कियाना उंदी वेल्ले महत्वपूर्ण काम वेने कित्ता, इंदु अदिना मजबूरी वेने मत्ता। हजारो-हजार मजदूर वेल्ले बेहरा फैक्टरींग लोप्पा काम कियाना शुरू कितोर। फैक्टरी व्यवस्था उत्पादन ता व्यक्तिगत व्यवस्था तुन खत्म कित्ता। सुई तल पोयसी जहाज बने कियाना फैक्टरी लोप्पा उंदे बेरा बचोनो मजदूर काम कियानोर। इद पूना उत्पादन व्यवस्था मजदूर लोरा लोप्पा सुर्फ सामूहिकता, सामुदायिकता ता पूना ओसो उच्च स्तर ता विचार पुट्टी कियाना आयवा ओरिन पूना ताकत तुन वेने पुनिहता। उंदे जागा सैकड़ों, हजारों मजदूर जमा आसी मत्तेके मजदूर संगठन बनेमायना अनि पूंजीपतिरा खिलाफ संघर्ष कियाना हरीं बनेमाता। मजदूर संगठन ता उंदी आह्वान ते फैक्टरी लोप्पा उत्पादन रोमा परनादू। संगठन ता रूप ते मजदूर लोरा कैदे उंदी शक्तिशाली हथियार वासी मत्ता।

पूंजीवादी उत्पादन व्यवस्था उत्पादन लोप्पा व्यक्तिगत निर्भरता तुन खत्म कित्ता। खासकर खुद पूंजीपतिरा जरूरत हिल्वा लेक्का कित्ता बारांकु इत्तेके हर काम कुशल ओसो अकुश मजदूर कीसोर मत्तोर। अद्रमे मजदूर लोरा उंदी हिस्सा इंजे शिक्षित आसी गुलाम प्रथा ओसो सामंतवादी समाज लोप्पा कुलीन तंत्र तन्ना महानता साबित कियाना जटिल रहस्य कुन वेने समजेमासोर मत्ता।

अद्रमे निम्मा मजदूर इंजे मानसिक रूप ते वेल्ले सक्षम आसी हर जागा ते शासक वर्ग लेवेके कुलीन वर्ग ता मुकाबला किया परसोर मत्तादू हूडा परितिन। चेतना ता जबर्दस्त विकास ओरकिन गुलाम, भू-गुलाम तल गुणात्मक रूप ते बेहरा स्तर ते ओंता अनि समाज ता दूसरा मंजिल काजे तैयार कींता। ताना लोप्पा ओरु शासक वर्ग ता जागा एता परना लेक्का बनेमांतोर।”

बरेल मर्रा ता पोल्लोंग केंजसी सब्बे तोर सहमत आत्तोर। सब्बे तोरा तोड्डी तल सहमति ता लेंग “हुं” इंजी पेस्ता।

“पेरके बाताल आत्ता?” इंजी रवि पूछेमातोर।

बेरेल मर्मा कव्वसोरे इत्ता: “मीटु सब्बे तोर पोल्लो ना लालची मंतिरे। नन्ना मुय्यताद हूइसी नावा पोरो उचुन वेने जीवा नोय अय्य? नन्ना वड़कसी-वड़कसी दोगतान।”

मनोज: “इंगो निज्जमे, माटु ध्यान हीताद हिल्ले। निम्मा इचोन बेसता पोल्लोग केंजी किया मंतिन, बस्के दिय्या हत्तायो पुंदा वेने वासोर हिल्ले। मति इंजे माटु नीकिन विड़सोम। निम्मा वड़कमा, माटु नीवा जोतांग पोरो ऊकाड़ ऊंगिकोम।”

बेरेल मर्मा कव्वता- “हा..हा...हा..हा... इद्रम कीतेके नाकिन वेने वेल्ले बेस लागियर, वाटु पेकोर वाटू करसाटू, ऊंगाटू।”

पेकोर ओसो बाताल लागिंता। वेल्ले डेयना-करसना शुरू आत्ता इत्तेके हीकट आत्तास्के रोमतोर अनि सब्बे पेकोर बेरेल मर्मा तुन जोहार कीसी करससोरे, पारसोरे अगाडल हत्तोर।

उत्पादन ता जिन सक्रिय आत्ता

मति मजदूर लोर किन बाताले दोरको

पिल्ला-पेकोर वासी वेल्ले दिय्यंग आतांग। बेरेल मर्ग ओरा हर्ग हूइसोर मत्ता, अदिन पेकोर संगे लगाव आसी मत्ता। पोइदमेंड अलग-अलग पिट्टेंग ताना कांदा पोरो डेयसोर-परियसोर मत्तांग, अवु बेरेल मर्ग पोरो वेल्ले जीवा कीतांग मति बेरेल मर्ग पेकोर किने सुरता किया मंता। मति पेकोर इंजे एवनल वात्ताद हिल्ले।

इद्रमे उंदी दिय्या पेकोर बेरेल मर्ग तिगा वात्तोर। नरकुम-नरकुम बेरेले मर्ग तुन रवि, मनोज, सौरभ, संदीप, बलकार अनि विक्की कवसोर-पारसोर वायनदू दिसता। बेरेल मर्ग सब्बे तोर किन तन्ना जोतांग संगे पोयसी शिकायत कीसोर पूछेमाता-“मीटु नाकिन मरंगतिरा?”

रवि: “आयो, माटु बद्रम मरंगा परितोम? सौरभ ओसो संदीप गलती कितोर। तम्मा यायल-बाबना संगे वेलियला हत्तोर अनि माकिन मीवगा वायला हीवोर आत्तोर। वीरकिन विइचसी माटु वातेके ओरिन सब्बे पोल्लेंग केंजला दोरकी आसी मनवइ।”

बेरेल मर्ग: “बेगा-बेगा वेलियसी वातिर, पेकोर?”

संदीप: “नन्ना नावा यायाल-बाबना संगे भारत-भ्रमण कियाला हत्तोम। माटु वेल्ले वस्तुंग हूइतोम। माटु राजस्थान, गुजरात, मुम्बई, कर्नाटक, केरल लोप्पा बचोनो जागा ने हत्तोम। मुन्ने नाकिन म्यूजियम हूइ वेसो आयनदू मति इंजे नन्ना वेल्ले ध्यान हीसी हूइतान। ताना लोप्पा नन्ना निम्मा वेहता बचोनो पोल्लेंग ना सबूत हूइतान।”

सौरभ: “नन्ना उत्तर भारत भ्रमण ते हंजी मत्तान। माटु नेचुरल हिस्ट्री म्यूजियम हूइतोम, पुत्तना। अगा माटु डायनासोर ता जीवाश्म वेने हूइतोम।

बेहरा-बेहरा फोटो संगे ताना लोप्पा शुरुआत ते मानेय बद्रम मंदानोर इंजी तोहताद मत्ता। मुन्नेटले नन्ना वेल्ले पोल्लो ना बारे ते पुंजी मत्तान। वेल्ले बेस लागता।”

बेरेल मर्रा ओरा पोल्लिंग केंजसी खुस आत्ता।

रवि: “बेरेल मर्रा इंजे निम्मा मुन्नेटा सभ्यतांग ना बारे ते वेहा।”

बेरेल मर्रा: “जरूर-जरूर,” कोकिल कीसोर अद वड़कना शुरू कित्ता। सब्बे पेकोर ध्यान हीसी केंजलातोर।

“नन्ना मुन्ने वेहता लेक्का युरोप ते पूंजीवादी व्यवस्था वात्ता पेरके उत्पादन व्यापक स्तर ते आयना शुरू आत्ता। शुरुआत ते इद तैयार माल तुन यूरोप ता देश कुना तम्मा मंडिंग लोप्पा खपे कियानोर मति जल्दिए अगा



पूंजीपति किन बचोन जल्दी मान उत्पादन लोप्पा वृद्धि आया मंता, अचोने तेज स्थानीय हाटुम कुना विस्तार संभव हिल्ले इंजी समजेमाता। मुनाफा ओरा आदत बनेमासी मत्तांकु ओरु बचोन ज्यादा माल पैदा कियानूर ओरा मुनाफा अचोने ज्यादा आसोर दायार इंजी समजेमासी मत्तोर। मति माल तुन वम्मला काजे मंडिंग बेगा मत्तांग?

पूना मंडिंग ना तलाश शुरू आत्ता। अदिना काजे दुनिया ता नक्शाए बदलेमाता। इंग्लैंड, फ्रांस, पुर्तगाल, स्पेन, हॉलैंड ता पूंजीपति दुनिया ता विभिन्न इलाकांग कुन कब्जा कियाना कोशिश ते लागतोर। अगा ओरु तम्मा देश लोप्पा पुटता माल तुन ते पुटता माल तुन वमसी मुनाफ कमई कियाला आल्सतोर।”

मनोज: “अदिनके अंग्रेज तोर वातोरा?”

बेरेल मर्रा: “असल ते भारत ओसो यूरोप नइमा व्यापार वेल्ले पाइना कालम तल ताका मंता। यूरोप ता लोकुर भारत ता सामान तुन मीटु नेंडु अमेरिका लेवेके जापानी सामान तुन विचार कित्ता लेक्काने विचार कियानोर।”

सब्बे पेकोरा तोड़ी टक्काह आत्ता, “निज्जमा?”

बेरेल मर्रा: “इंगो, निज्जमे! भारत ता गरम मसाला, सूती प्रिंटीड गेत्तेंग, रेशमी गेत्तेंग, तोला ता सामान, कांच ता सामान, हीरा-मोती, जेवर ओसो कालीन तुना यूरोप ता हाटुम लोप्पा हंदी हिल्वा मांगा आसोर मत्ता। वेल्ले यूरोपीय व्यापारी इद धंधा लोप्पा वेल्ले जबर्दस्त मुनाफा कमई कितोर। मीटु अस्केटा यूरोप देशकु भारत लोप्पा वम्मना लेक्का बाताले पुट्टी किया परवा मंदानदु केंजसी मीकिन आश्चर्य आयर। अदिन काजे ओरकिन पूरा सामान सोना ओसो चाँदी हीसी अस्सा लागनदू।”

इद केंजसी सब्बे पेकोर गर्व संगे आश्चर्य वेने आत्तोर।

बेरेल मर्रा वड़कना जारी तासता: “भारत ओसो यूरोप नइमा व्यापार भूम हरि ते आयनदू। भारत तल अफगानिस्तान, इरान, टर्की तल यूरोप एवनादु। 1453ई. ते अरब शासक लोरा टर्की पोरो कब्जा आत्ता अनि यूरोपीय व्यापारिगल बेहरा मात्रा ते टैक्स वसूल कियानोर। अद्रमासी यूरोपीय व्यापारिगल मुनाफा कम आत्ता। अदिना कारण ते ओरु भारत काजे समुद्री हरी ता खोज शुरू कितोर।

सन 1492 ते कोलम्बस पोरोल ता स्पेनी मानेय समुद्र जाहज ते वेलियानोर भारत ता समुद्री हरी ता खोज कियाला पेस्तोर मति ओरु अमेरिका ते पोस्तोर। अस्के एवनल अमेरिका महाद्वीप ता बारे ते बाकी दुनिया ता लोकुर किन बदे जानकारी हिल्वा मत्ता। कोलम्बस भारत एवतोर इंजी आल्सतोर। अदिन काजे अगा टा स्थानीय लोकुर किन इंडियन इंजी केयतोर। अमेरिका ता स्थानीय नागरिक लोर किन नेंडु वेने इंडियन शब्द संगेने पुनमूड़ान्ता। भारत ता समुद्री हरी ता खोज इदिना 6 साल पेरके 1498 ते वरोर पुर्तगाली समुद्री जहाज ते वेलियानोर वास्को-डी-गामा पोरोल तोर कितोर।

अमेरिका ता खोज यूरोप काजे हरीं तेरियता। कोलम्बस ना पेरके बचोनो लोकुर अमेरिका ता यात्रा कितोर। शुरूआत ते ओरा उद्देश्य अमेरिका महाद्वीप ते मत्ता सोना-चाँदी ता भंडार पोरो कब्जा कियाना मत्ता। अमेरिका महाद्वीप लोप्पा सोना-चाँदी ता बेहरा भंडार मत्ता। अस्के एवनल अमेरिका निवासी कच्ची ता बारे ते पुनवा मत्तोर। ओरु उन्नत पाषाण युग सभ्यता लोप्पा पिस्ससोर मत्तोर। सोना-चाँदी ता इस्तेमाल **आभूषण** बने कियाला ओसो धार्मिक कर्मकांड लोप्पा कियानोर।




इव स्थानीय नागरिक लोरा बेहरा जन संख्या तुन युद्ध लोप्पा कुसिर काया कोयता लेक्का कोयला काजे उचुन सौ यूरोपीय घुइसवार योद्धा लोरे हालनोर। निम्मा खुद अंदाजा वाटा परितिन। बंडांग ओसो पेइकांग संगे बने माता हथियार लोहा ता तलवार ओसो बंदूक कुन सामना बद्रम किया परनोर। लाखों संख्या ते स्थानीय नागरिक युद्ध लोप्पा डोलतोर अनि बाकी पिस्ता लोकुर तम्मा भूम तल सोना ओसो चाँदी ता खदान लोप्पा अमानवीय परिस्थितिंग लोप्पा सख्त मेहनत कियाला काजे मजबूर आत्तोर। यूरोपीय लोरा काजे स्थानीय लोकुरा पिस्वल ता कीमत हिल्वा मत्ता। बचोनो लाख लोकुर अव खदान कुना लोप्पा काम कीसोरे श्रम वेल्ले श्रम कीतांकु डोलतोर। निम्मा ओरा दुख-तिप्पल कुन यायोस्कु खुद तम्मा पिल्ला-पेकोर

किन जहर हीसी हौकनाद हूइसी अंदाजा वाटा परिंतिन। इद्रम कीसी अउ तम्मा पिल्ला-पेकोर तिप्पल ते आयना हामुर तल बचेमायनूर इंजी आल्सिंतांग। इदे आयवा बचोनो लाख लोकुर न्यूमोनिया, सिफलिस गोनोरिया, टीबी, इन्फ्लुएंजा लेक्कटा बीमारिंग संगे डोलतोर। इव बीमारिंग यूरोपीय नागरिक तम्मा संगे तच्ची मत्तोर। इव मूंड कारण कुनल अमेरिका स्थानीय नागरिक लोरा आबादी 16वीं सदी ता शुरू ते 2.5 करोड़ मत्ता अनि 16वीं सदी ता आखरी एवनल 50 लाखे पिस्ता। मति इवे 100 साल कुना लोप्पा बचोन हजार टन चाँदी ओसो बचोनो हजार टन सोना अमेरिका महाद्वीप तल यूरोप ते तत्ताद मत्ता।

इदे नइमा यूरोपीय लोकुर अमेरिका भूमा ते ऊष (गन्ना) अनि उचुन नकदी फसल ता खेती कियाना वेने शुरू आत्ता। अगाटा उपजाऊ भूम तल फसल बेस दोरकनदू। 17वीं सदी ते ओसो 18वीं सदी ते यूरोप लोप्पा पूंजीवाद वात्तास्के यूरोप लोप्पा कच्चा माल ते वेल्ले जरूरत आत्तास्के, अदिन पूरा कियाला काजे अमेरिका लोप्पा वेने बेहरा स्तर ते कियाना जरूरत आत्ता। मति ओरा आबादी तुन हूइतेके मेहनत कियाना लेक्कटा अमेरिका स्थानीय निवासिर किन लगभग खत्म कियमूड़ाता। तम्मा लूट जारी तासला काजे यूरोपीय शासक लोर ओसो उंदी लब्बड़ काम कियाना शुरू कितोर। इद काम गुलाम व्यापार कियानाद मत्ता।

गुलाम व्यापार काजे ओरु अफ्रीकी महाद्वीप तुन चुने कितोर। अफ्रीकी महाद्वीप 17 वीं सदी एवनल मुख्य रूप ते कबीलांग लोप्पा मत्ता। अफ्रीकी भूम पोरो बचोनो सुडला-बेहरा कबीलांग तम्मा-2 स्वतंत्र पिस्वल पिस्ससोर मत्तांग। अगा वेने अमेरिका लेक्काने पूना उन्नत पाषाण युग ता सभ्यतांग ना उदय आसी मत्ता। यूरोपीय शासक लोर उचुन स्थानीय कबीलांग ना मुखिया लोरा मदद ते स्थानीय लोकुर किन बंदी बने कीसी अमेरिका लोहना शुरू कितोर, अगा ओरकिन गुलाम लोरा लेक्का वम्मसियानोर। प्राचीन काल ता गुलान लोरा लेक्काने वीरकिन वेने बदे अधिकार हिल्ले। वायना 2 सौ साल लोप्पा बचोनो लाख अफ्रीकी आस्कु-कोयतोर किन गुलाम बने कीसी अमेरिकी भूम ते लोहचियानोर। जानवर



ON BOARD A SLAVE-SHIP.

लेक्का लोकर किन समुद्री जहाज ते निहची वाटसियानोर। बचोनो हप्तांग समुद्री यात्रा कीसी सैकड़ों लोकर करविने ओसो बीमारी संगे डोलानोर। इद्रम समुद्री यात्रा नइमा डोलना अफ्रीकी निवासिरा संख्या लाखों मंता।

अफ्रीकी गुलाम लोरा मेहनत ते अमेरिका भूम पोरो यूरोपीय पूंजीपतिर हजारों-हजार हैक्टेयर भूम साफ कीसी खेती शुरू कितोर। यूरोपीय पूंजीपति कम खर्च संगे गन्ना (ऊष), कपास, कॉफी लेक्कटा नकदी फसल पंडिह कीसी वेल्ले मुनाफा एतितोर।”

संदीप: “बेरेल मर्रा, नाकिन उंदी पोल्लो वेल्ले आश्चर्य किया मंता। निम्मा पूंजीवादी क्रांति यूरोप ते बराबरी, मुक्ति ओसो भाईचारा ता नारा हीता इंजी वेहतिन। मति इंजे निम्मा पूंजीवाद ता शुरूआत पेरके यूरोपीय लोर अफ्रीकी लोर किन गुलाम बने कीसी अमेरिका लोहना शुरू कितोर इंदा मंतिन। इव रेंडासी पोल्लोंग उंदे बेरा बद्रम आया परितंग?”

बेरेल मर्रा नेस्कसोरे इत्ता: “नीवा पोल्लो उचुन सही मंता। इद्रम आयना बेस हिल्ले मति इतिहास लोप्पा इद्रमे आत्तादू निज्जमे। उंदी बेरा आयवा बचोनो बेरा इद्रम आत्ता। खुद भारत लोप्पा अंग्रेज शासक लोर तम्मा देश तुन खत्म कित्ता सामंती व्यवस्था तुन लागू कित्ता। इदिना पोरो विस्तार ते नन्ना पेरके वेहाकान इंजे अफ्रीका ता बारे ते वेहाकान। असल ते शोषक

शासक वर्ग ता चरित्र ओसो स्वभाव मेहनतकश जनता तुन लूटे कियानादे मंदिता। अदिना काजे ओरु बातालाई किया परितोर। ओरु यीरोप लोप्पा बराबरी, मुक्ति, भाईचारा ता नारा हीसोर मत्तोर अस्के ओरु निज्जमे मानेय ना बराबरी ता पोल्लोंग कियावा लेवा सामंती शोषक लोर आयवा ओरु खुद मेहनतकश जनता तुन लूटे किया परना इंजी ओरु सामंती शोषण व्यवस्था तुन पूंजीवादी व्यवस्था लोप्पा बदले कीसोर मत्तोर। इदिन पेरकेटा घटनांग साबित वेने कीतांग।

अफ्रीका ते ओरकिन अगाटा मेहनतकश जनता तुन लूटे कियाला काजे इद्र ता नारा ना जरूरत मंदिता। अफ्रीकी नागरिक लोर गुलान बने कीसी अमेरिका ते रोमवा लेवा श्रम किइहची परताचोन मुनाफा कमई किया परनोर। अदिन काजे ओरु अफ्रीका लोप्पा यूरोप तल अलग नीति पोयतोर। शोषक शासक लोर पोयता बदे सिद्धांत हिल्ला मत्ता। मुनाफा ओसो लूट तुने ओरु तम्मा सिद्धांत समजेमायनोर।

सब्बे पिल्ला-पेकोरा मुक्कम दुक्कम ते निंडसी मत्ता।

बेरेले मर्ग: “एशिया देश कुना लोप्पा यूरोपीय शासक लोर अलग नीति लागू कियानोर। एशिया लोप्पा भारत, चीन, ओटोमन साम्राज्य (वर्तमान अरब देश) लेक्कटा शक्तिशाली सत्ता ता केंद्र मत्ता। इगा यूरोपीय लोकुर अमेरिका महाद्वीप ता संसाधन कुन लूटे कियाना तरिका लागू किया परवोर आयनोर अनि अफ्रीका तुन गुलाम बने कियाना तरीका वेने पोया परवोर आयनोर। उचुन साल मुन्ने एवनल यूरोप मत्ता युग एवनले एशिया देश कुना मानव सभ्यता वेने विकसित आसी मत्ता। भारत लोप्पा पूंजीवाद बगिल विकास ता लक्षण दिससोर मत्तांग। ईस्ट इंडिया कम्पनी भारत पोरो कब्जा कीवेके भारत जरूर उंदी विकसित पूंजीवादी देश लेक्का बदलेमासी मनवड़।

एशिया लोप्पा यूरोपीय लोकुर व्यापार पोरोल ते नेंगतोर। तम्मा व्यापारिक हित कुना रक्षा काजे फौज तासना शुरू कितोर अनि ताना पेरके स्थानीय सामंती शासक लोरा आपसी फूट ता फायदा एतसी “फूट डालो राज करो” नीति पोयसी तीरम-तीरम वेल्ले देश कुन तम्मा उपनिवेश बने कितोर।

इद्रम निम्मा पूंजीवाद ता स्थापन पेरके यूरोपीय देशकु अमेरिका महाद्वीप, अफ्रीका ओसो एशिया देश कुन अलग-अलग रकम ते लूटे कियाना शुरू कीतांग इंजी पुंदा परिंतिन। इद लूट ता कारण ते हंदी हिल्वा सम्पत्ति यूरोप बगिल वात्ता। इद सम्पत्ति ता मदद ते इंग्लैंड, फ्रांस, पुर्तगाल, स्पेन, हॉलैंड, जर्मनी लेक्कटा देशकु तम्मगा मजबूत पूंजीवादी ढांचा विकसित कितोर। बेहरा-बेहरा फैक्ट्रिंग बने कितोर, हजारों किलोमीटर लाटी सड़क निर्माण आत्ता, रेलवे लाइन वाटतोर, टैलीफोन तार वाटतोर। वैज्ञानिक शोध पोरो हिसाब हिल्वा धन खर्च कितोर, अद्रमासी तकनीक विकास तुन मदद दोरकता। यूरोप तल एशिया, अमेरिका ता यात्रा ते लागना टाईम कम आत्ता अनि माल उत्पादन वेल्ले सस्ता आत्ता।

इव सब्बे ना कारण ते उंदी बगिल पोरो वेहता यूरोपीय देश कुना लोप्पा समृद्धि आत्ता अनि दूसरा बगिल अमेरिका महाद्वीप ता देश, एशियाई, अफ्रीकी देश कंगाल आसोर हत्तांग। निन्ने एवनल यूरोप तुन बचोनो रकम ता तैयार माल लोहचोर मत्ता भारत इंजे सिर्फ पहना माल हियाना केंद्र बनेमासी मंता। ब्रिटिश शासक लोर भारत ता बेरससोर मत्ता उद्योग कुन तबाह कित्ता। सूती, रेशम गेत्ते ना बचोनो महत्वपूर्ण केंद्र लेक्कटा ढाका, बनारस लेक्कटा ब्रिटिश नीतिंग कारण ते सैकड़ों जुलाह लोर आत्महत्या कितोर।

ब्रिटिश गेत्ते भारत लोप्पा वम्मला काजे स्थानीय गेत्ते ना उत्पादन तुन खत्म कियाना जरूरी मत्ता। अंग्रेज तोर इगा बनेमायना गेत्ते पोरो टैक्स बेरसी कितोर। स्थानीय कारीगरी किन पहना मा दोरकना मुश्किल आयना लेक्कटा नीतिंग लागू कितोर। इद्रम स्थानीय कारीगरी लोरा गुमिया पोरो इंग्लैंड ता गेत्ते उद्योग ता बिल्डिंग निल्पी कितोर।”


सौरभ: “यूरोप ता शासक लोर मूंड-मूंड बेहरा महाद्वीप ता जनता तुन लूटे कितोर अनि तम्मा देश लोप्पा लोकुरा पिस्वल स्तर समृद्ध कितोर। इद पोल्लो निज्जमा?”

बेरेल मर्ग: “बदे वने दूसरा शोषक शासक वर्ग लेक्काने पूंजीपतिर वेने परताचोन संसाधन, सम्पत्ति खुद हड़पे कियाला आल्सिंतोर। इदिना लोप्पा ओरु बोनकिने हिस्सेदारी हीवोर आंतोर। यूरोप लोप्पा निल्पी कित्ता

पूँजीपतिरा आधारभूत ढांचा ता उद्देश्य अगाटा आम लोकुरा पिस्वल स्तर तुन तेहना आयवा उत्पादन प्रक्रिया लोप्पा आयना तम्मा खर्च लोप्पा कटौती कियाना मत्ता। दूसरा यूरोप लोप्पा वेने पूँजीपतिर मजदूर लोरा निर्मम ओसो कूर शोषण कितोर इदिना बारे ते नन्ना मुन्ने वेहतान। इद निर्मम शोषण खिलाफ मजदूर लोर संगठित, यूनियन बने कीसी संघर्ष कियाना शुरू कितोर अनि पूँजीपति परताचोन मजदूर संघर्ष कुन खत्म कियाला कोशिश कीतेके वेने विफल आत्तोर अद्रमासी मजदूर लोर किन छूट दोरकना शुरू आत्ता। निम्मा हर साल 1 मई मजदूर दिवस लेक्का मानेमायनदू केंजसी मंदाकिन।”

रवि: “इंगो, नन्ना पुत्ताने। नावा काकल नाकिन इद मई दिवस अमेरिका ता बदे शहर लोप्पा मजदूर लोर 8 घंटांग काम ता मांग तुन पोयसी वेल्ले बेहरा प्रदर्शन कीसी मत्तोर इंजी वेहतोर। ताना पेरके अगा फैक्टरिंग लोप्पा 8 घंटांग काम दिवस ता कानून लागू आत्ता।”

बेरल मर्रा तन्ना जोतांग संगे रवि ना केल्लुकु बोयसोर इत्ता: “निज्जम इंदा मंतिन निम्मा। इद घटना अमेरिका ता शिकागो शहर ता आंदू, इदु 1 मई सन 1886 ते आत्ता। 8 घंटांग काम दिवस मजदूर लोरा काजे वेल्ले आराम हीता लेक्का मत्ता। बाकी पिस्ता टाईम ते ओरु तम्मा परिवार संगे मंदानोर, उचुन पढ़ाई किया परनोर, मनोरंजन किया परनोर।



सिर्फ इंदे आयवा मजदूर लोर किन हर सुडला-बेहरा आराम काजे कठीन संघर्ष किया लागता। पूंजीपति वर्ग ओसो मजदूर वर्ग नडमा इद संघर्ष लगातार जारी मत्ता। पूंजीपति वर्ग ता उद्देश्य परताचो मुनाफा कमई कियाना अनि मजदूर लोर किन कम वेतन हीसी मजदूरी कियहाना मत्ता। दूसरा बगिल मजदूर वर्ग ता उद्देश्य तन्ना काजे बेस काम कियाना लेक्का परिस्थितिग बने कियाना मत्ता। इदु सिर्फ पूंजीपति ना मुनाफा कम कीसीए दोरका परिंता। इद्रम पूंजीपति वर्ग ओसो मजदूर वर्ग नडमा आपसी विरोधी मंतोर।”

रवि: “इदिना हल बद्रम आंता?”

बरेल मर्ग: “हल पुंदाना मुन्ने माटु पूंजीवादी व्यवस्था ता बारे ते उचुन पोल्लोंग पुंदाना जरूरी मंता। सबसे मुन्ने ओसो महत्वपूर्ण पोल्लो पूंजीवादी व्यवस्था मानव सभ्यता ता विकास तुन गति हीता। हर सुडला-बेहरा काम मशीन ता मदद ता आया मंता। गेत्तेंग ना कारखानांग उंदी दिया ते लाखों मीटर गेत्तेंग तैयार किया परिंतांग। खेती लोप्पा उन्नत विज्ञा ओसो सिंचाई साधन आत्तास्के उत्पादन बेरसता अनि पूरा दुयना ता आबादी ता जरूरत ता उन्न पैदा आया मंता। सिर्फ गाटो, ओसो गेत्तेंग आयवा हर वस्तु (बस, रेलगाड़ी, दवाइ, जरूरत ता बाकी सामान) बेहरा स्तर ते पुट्टी कियाना संभव आत्ता।

पूंजीवाद तुकू मुन्ने मानेय प्रकृतिक रूप ते पिस्सनोर। भूम वत्तितास्के, ऊसा लेवेके महामारी वात्तास्के ओरगा बदे उपाय मन्नो आयानदू। ओरा उत्पादन क्षमता सीमित मत्ता। नन्ना मुन्न वेहता लेक्का ऊसा, वत्तितास्के, महामारी वात्तास्के लाखों-हजार लोकुर अकाल हामुर ता शिकार आयानोर। उत्पादन बस्केने सब्बे तोरा जरूरत पूरा आयनाचोन आयो आयनदू। मति पूंजीवाद इद परिस्थिति तुन बदले कीसिता। पूंजीवाद विज्ञान ओसो तकनीक ता विकास ता मदद सिर्फ प्रकृति पोरो नियंत्रण कियालाए आयवा भूम पोरो हर मानेय ना बुनियादी जरूरतकु पूरा कियानाचोन उत्पादन बेरसी कियाना संभावनांग वेने बेरसी कित्ता। इंजे दुनिया ता बदे वेने कोंटा ते अकाल, वत्तितेके पूरा दुनिया तल अगा अनाज लोहमूडांता। चक्रवर्ती तूफान ता भविष्यवाणी कीसी जीवा ओसो माल नुकसान तुन कम कियमूडांता।

डोड्डांग पोरो बाँध दोहची, नहर तेंडसी ऊसा वायना, मुसुर वायवा मंदाना समस्या तुन हल कियमूडांता। मानेय बचोनो खतरनाक बीमारिंग खिला प्रतिरोधक टीका विकसित कीसी अद्रम ता बीमारी तल लाखों लोकुरी जीवा पिसी कितोर। वेल्ले एद्दी लेवेके वेल्ले हिरंगम मंदाना जागा ते कूलर ओसो एसी लेवेके हीटर संगे पिस्वल पिस्सना आरामदायक वस्तुंग बने कितोर। मानव सभ्यता ता इद्रम ता बचोनो सफलतांग पूंजीवादी व्यवस्था लोप्पा दोरकतांग।

इव सब्बे सफलतांग मत्तेकाई पूंजीवादी व्यवस्था शोषणकारी व्यवस्थाए मंता। इद व्यवस्था संभावनांग पुट्टी कित्ता मति अव संभावनांग कुन निज्जम कीवो आता। उदाहारण तुकू नेंडु दुनिया लोप्पा सब्बे तोरा पोट्टा निह्हतनाचोन अनाज पुट्टा मंता, मति आधा दुनिया करविने हुंजला मजबूर आंता। नेंडु दुनिया लोप्पा बदे वेने पिल्ला-पेकोर पोट्टा पुट्टना लेवेके पोरसना, न्यूमोनिया संगे हामुर मंदाना परिस्थिति मंता मति सिर्फ उंदी भारत लोप्पा हर साल 10 लाख पिल्ला-पेकोर इव बीमारिंग ना शिकार आंतोर। लोन हिल्वा पिस्वल पिस्सना कंगाल लोरा संख्या करोड़ों मंता। असल इत्तेके नेंडु वीर सब्बे तोरा जरूरत मत्ता लोन, गेत्ते तैयार कियाना मुश्किल काम हिल्ले।

करविने, बीमारी ओसो कंगाली लेक्कटा पाड़ना समस्यांग मत्तांगे, मति पूंजीवादी व्यवस्था उचुन पूना समस्यांग वेने पुट्टी कित्ता अवु इदिनकु मुन्ने बदे समाज लोप्पा हिल्वा मत्तांग। इविना लोप्पा रेंडु मुख्य समस्यांग मत्तांग अवु बेरोजगार ओसो लोन हिल्वा लोकुरा समस्या मंता।”

रवि: “निम्मा पूंजीवादी समाज तुकू मुन्ने बेरोजगार हिल्वा मत्तोर, सब्बे तोरगा मंदाला काजे लोन मत्ता इंदा मंतिना? इंजी पूछेमातोर।”

बेरेल मर्रा: “इंगो, इद्रमे इंदा मंतान। सामंतवाद लोप्पा हर मानेय निगा बेगार कियना लेक्कटाई मति काम इत्तेके मंदानदे। बेरोजगार लोरा समस्या पूंजीवादी समाज ता समस्या मत्ता। पूंजीपति हमेशा बेरोजगार लोरा फौज निल्पी कीसी तासला आल्सितोर। इद्रम कीतेके ओरकिन रेंडु रकम ता फायदा दोरकिंता। पहली मजदूर लोर तम्मा मजदूरी काजे मोल भाव कियाना क्षमता खत्म आंता। पूंजीपति ओरा काम ता दाम तय कींतोर अदिने ओरु बदे सवाल कियवा स्वीकार किया लागिंता। मजदूर बदे सवाल कीतेके

पूँजीपति ओनकिन जावा अरता वीसी तेंडसी वाटता लेक्का वाटसियानूर
इंजी पुंजी मंतोर, बारांकु इत्तेके अदिनकु वेने कम मजदूरी एतसी ओना जागा
ते वायला काजे फैक्टरी गेट ते मजदूर लोरा लाईन नितसी मंता।

पूँजीपति किन दूसरा फायदा, मांग ज्यादा आतेके मजदूर लोरा इद
रिजर्व फौज ता इस्तेमाल किया परितोर। अदिन तन्ना उद्यम तुन बेरसी कियाला
आत्ता मांग अनुसार तैयार किया परितोर। अदिन काजे नावा जीवा ता पेकोर,
बेरोजगारी पोरोल ता इद बीमाई पूँजीवाद व्यवस्थाए हीता। हर पूँजीवादी
देश लोप्पा कम लेवेके ज्यादा बेरोजगारी समस्या मंदिताए। उचुन पूँजीपितरा
फायदा काजे लाखों-करोड़ों नौजवान लोरा सपना तुन पोच्चांग कीसितोर।

इंजे माटु आवासीय समस्या तुन हूड़ाकाल। पूँजीवाद तुकू मुन्नेटा
व्यवस्थांग लोप्पा हर मानेय ना तल्ला पोरो दड़मी, ताना लोप्पटल बचोन
चिर-चिर एद्दी वायना लेक्का कमजोर मत्तेकाई ओरगा मंदानादू। भूम ता
कमी हिल्ला मत्ता अनि लोन बने कियाना काजे तोड़ियो ओसो हींदी-वासा
ना वेने कमी हिल्ला मत्ता। अदिन काजे बोनगाए पक्का लोन हिल्लेकाई उंदी
झोपड़ी इत्तेके जरूर मंदानादू। मति पूँजीवाद उंदी पूना रकम ता समस्या
पोयसी वात्ता। काम धंधा ता मुख्य केंद्र शहर बनेमाता। फैक्ट्रिंग व्यापारिक
केंद्र लेवेके मुख्य मार्ग लेवेक पहना माल ता केंद्र गरे ता जागा ने स्थापना
कियानोर। अदिन काजे बेहरा ग्रामीण इलाकांग लोप्पा लीकसी मत्ता
आबादी शहरी औद्योगिक केंद्र लोप्पा वायाना शुरू कित्ता। भूम ता दाम
मोय्योल पोरो एवता। किराया ते मंदाला काजे लोम बने कियाना धंधा शुरू
आत्ता। इद्रम आतेकाई लोकुर किन मंदाला लोन दोरको आयनदू। अद्रमासी
शहर लोप्पा झोपड़िंग बनेमायना शुरू आत्ता। सबसे गंदा इलाका, गंदा नाली
ओदा, शहर ता पोदिय गुमिया लेक्कटा जागांग, अगा उंदी मुसुर वात्ता इत्तेके
और डोबरा पोयनदू- इद्रम ता जागा ने झोपड़िंग बने मायना शुरू आत्ता।
वीसिंग ओसो नुस्मिंग लेक्कटवु निंडसी मंदानवु, इद्रम ता जागा असल इत्तेके
जानवर मंदाना लेक्का वेने मन्नोंग आंतांग, अगा मानेय मंदाला मजबूर
आंतोर। सुडला-सुडला कोटड़ लोप्पा 6-6 लेवेके 7-7 मजदूर हेरेंग-कोर्कु
लेक्का मंदानोर। ति वीर खुद किन वेल्ले किस्मत मत्तोर समजेमायनोर
बारांकु इत्तेके इव बेहरा शहर कुना लोप्पा लाखों इद्रम ता जागा दोरकवा

मत्ता किस्मत हिल्वा लोकुर वेने मंतोर। अद्रमासी ओरकिन मोय्योल दोड़ सड़क ओदा, पुलिया दोड़, एद्दी-हिरंग-मुसुर कालम ते पिस्सा लागिंता। रिक्शावाले, रेहड़ीवाले, सड़क ओदा सामान वम्मानोर, भिखारी, वैश्या, कानाल-कूटाल, बेरोजगार लोर वेल्ले मंतोर। शहर लोप्पा मंदाना मजबूरी मंदिंता, बारांकु इत्तेके काम धंधा दोरकना संभावना उचुन शहर लोप्पाने मंता। नाहकुना लोप्पा ओरु करविने डोलितोर।”

रवि: “बरेल मर्रा, नीवा पोल्लोंग केंजसी माकिन वेर्री वेस्सा मंता।”

बरेले मर्रा: “नाकिन माफ कीमुट पेकोर, मति नन्ना बाता कियाकान। मावा इतिहास ओसो वर्तमान ता सच्चाई इदे आंदू मति माटु इद सच्चाई तुन बदले कियाना इत्तेके इदिन जरूर पुंदा लागियर। नन्ना मीवा पीढ़ी इद सच्चाई तुन बदले कियार आशा कींतान।”

सब्बे पेकोर किन पिस्वल लोप्पा पहली बेहरा ओरा अतीत ओसो वर्तमान ओरा हट्टा पोरो उंदी जिम्मेदारी वाटसोर मत्ता लेक्का आत्ता।

बरेल मर्रा वड़कसोर हत्ता: “पूजीवादी व्यवस्था अमीर ओसो गरीब लोरा नड़मा ता कोहड़ा तुन मत्ता लेक्का तासनाए आयवा अदिन ओसो बेहरा कोहड़ा बने कीसोर दाया मंता। निम्मा भारत ता मुकेश अंबानी ना लोता बारेते केंजसी मंदाकिन। अदिना कीमत 5000 करोड़ रूपया तुकू ज्यादा मंता। दुनिया लोप्पा उंदी बगिल अरबपतिरा संख्या बेरसा मंता अनि वीर अरबपतिरगा कुल सम्पत्ति बेरससोर दांता अनि दूसरा बगिल कंगाल लोरा संख्या वेने बेरससोर दाया मंता। मजदूर, बाकी मेहनतकश लोकुरा दुनिया ता संसाधन लोप्पा हिस्सेदारी लगातार कम आसोर आंता। नेटा दुनिया तुन मीटु कंगाल लोप्पा बेहरा महासागर लोप्पा ऐश्वर्य ओसो भोगविलास ता उचुके टापू() मंतांग इंजी समजेमाया परितिर। नेटा अरबपतिर पाड़ना राजा-माहाराजा लोरा ऐशो-आराम तुन वेने पेरके अरहा मंतोर। दुनिया ता सबसे अमीर 350 लोकुरिगा बचोन सम्पत्ति मंता अचोन दुनिया ता सबसे गरीब 350 करोड़ लोकुरा सम्पत्ति काल्पसी वेने हिल्ले।”



माक्सवाद मजदूर लोरा कैदे मत्ता क्रांतिकारी हथियार आंदू

सब्बे पकोर केंजसी आश्चर्य आत्तोर। ओरु अमीर लोरा रकम केंजसी मत्तोर अनि ओरगा वेल्ले सम्पत्ति ता अमीरी ओसो गरीबी नड़मा मत्ता बेहरा कोहड़ा ता बारे ते नेंडु पहली बेरा केंजा मंतोम इंजी आल्सा मंतोर।

रवि: “बेरेल मर्रा, निम्मा मुट्टामेंड अरबपतिरगा जमा मत्ता सम्पत्ति करोड़ों गरीब लोकुर किन लूटे कीसी जमा किताद आंदू इंदा मंतिना?”

बेरेल मर्रा: “इंगो। बद्रम सुडला-सुडला डोडुंग-हिल्कांग ना पूरा एर समुद्र लोप्पा एविंता अद्रमे पूरा दुनिया ता मेहनतकश जनता ना कमाई मुट्टामेंड अरबपतिरा खजाना ते एविंता।”

रवि: “मति इद्रम बद्रम आंता?”

बेरेल मर्रा: “असल ते इदिना राज पूंजीवादी उत्पादन व्यवस्था लोप्पा मकसी मंता। पूंजीपति हाटुम काजे माल उत्पादन कींता। हाटुम इत्तेके मुनाफा, पूंजीपति बदे वेने वस्तु मुनाफा लेवा पुट्टी कीवो आंता। मति अदिना मुनाफा बेगाडल वांता। पूंजीपतिर अदु तन्ना मेहनत तल कम से कम खर्च कींता अनि उचुन ज्यादा दाम संगे हाटुम ते वमसी तन्ना काजे मुनाफा कमई कींतान इंतोर।

मति कार्ल मार्क्स 19वीं सदी ते पूंजीवादी व्यवस्था तुन पूराए एक्सपोज कीसोर अतिरिक्त मूल्य ता सिद्धांत हीतोर अनि असल ते पूंजीपतिर हाटुम ते माल वम्मसी आयवा उत्पादन प्रक्रिया लोप्पाने मुनाफा कमई कींतोर इंजी वेहतोर। मार्क्स मजदूर लोर किन फैक्टरी लोप्पा पोड़द मेंड काम कीसी दोरकता मजदूरी असल ते ओना उचुने घंटांग लोप्पा पुट्टी कित्ता मूल्य ता बराबर मंता इंजी वेहतोर। बाकी टाईम ते पुट्टी कियाना मूल्य मजदूर किन आयवा पूंजीपति किन मुनाफा ता रूप ते दोरकिंता। इद पोल्लो तुन माटु सुडला उदाहरण संगे समजेमायकाल। इदिना संगे नन्ना मीवा गणित बद्रम मंता इंजी वेने पुंदाकान।” सब्बे पेकोर तैयार आतोर।

बेरेल मर्ग: “उदाहरण तुकू वरोर मजदूर किन 8 घंटांग काम कियाना जागा ते 100 रूपय दिहाड़ी दोरकिंता। मालिक निगा काम ज्यादा वातांकु ओनकिन 8 घंटांग काम कित्ता पेरके अतिरिक्त 4 घंटांग ओसो दिहाड़ी किया लागिंता, इव 4 घंटांग काजे ओनकिन बचोन दिहाड़ी किया लागियर?”

सौरभ: “50 रूपया।”

रवि: “आयो, ओनकिन 100 रूपया दोरकना, ओवरटाईम कियाना मजदूर किन दोगुना दिहाड़ी दोरकना इंजी सरकारी कानून मंता। मति फैक्टरी मालिक फैक्टरी लोप्पा तम्मा कानून ताकी कींतोर अनि मजदूर लोर किन पूरा दिहाड़ी हीवोर आंतोर।”

बेरेल मर्ग: “रवि निज्जम वेहा मंतोर। सिर्फ बेहरा फैक्टरींग सरकार ता नियंत्रण वाले फैक्टरींगे मजदूर लोर किन दोगुणा दिहाड़ी हींतांग, मति इद कानून सब्बे तोरा काजे मंता। मना पूंजीपतिर वेल्ले बेस मंतोर, ओरु मजदूर लोर किन दोगुणा दिहाड़ी हीसी ओवरटाईम काम कियाला वेहितोर। मति ओरु इद घाटा तेहची ओवरटाईम कियहाना संभव मंता या?”

सब्बे पेकोर: “हिल्ले।”

बेरेल मर्ग: “बेसे, इंजे मुन्ने दटू। उदाहरण तुकू वरोर पूंजीपति 4 घंटांग ओवरटाईम लोप्पा दोगुणा पैसा हीसी वेने हर मजदूर 5 रूपया बचे कीतेके निम्मा रोज ता 8 घंटांग लोप्पा हर मजदूर बचोन रुपयांग बचे किया परिंतोर वेहा परिंतिना?”

सब्बे पेकोर भूम तुन कागज लेक्का ओसो बंडांग लेवेके कटिया तुन पेन लेक्का इस्तेमाल कीसी इद सवाल तुन हल कियाना शुरू कितोर। उचुन पेकोरा उत्तर 10 रुपया पेस्ता, उचुन मुल ता 20। मंदीप ओसो रवि ना उत्तर 110 रुपया मत्ता। बेरेल मर्रा मंदीप ओसो रवि किन सही उत्तर हियाला काजे शबाशी हीतोर। अदु वड़कना शुरू कित्ता, “ओवरटाईम 4 घंटांग ना 100 रुपया मजदूर किन हीसी वेने पूंजीपति किन 5 रुपया बचेमांता। मीटु रोज ता 8 घंटांग कुन रेंडु हिस्सा ने तूसना। मुन्नेटा 4 घंटांग अनि पेरेकेटा 4 घंटांग। इव रेंडासी हिस्सांग काजे मजदूर लोर किन 100-100 रुपया हीतेके पूंजीपति किन मुन्ने 4 घंटांग लोप्पा 5 रुपया ओसो दूसरा 4 घंटांग लोप्पा 5 रुपयांग-इद्रम 10 रुपा ना मुनाफा आंता। ति मालिक-पूंजीपति किन पूरा 8 घंटांग ना 100 रुपया हींतोर 200 आयो। इद्रम पूंजीपति ना हर मजदूर निगडल मुनाफा बचोन आंता? $10+100=110$ रुपया।”

इद समीकरण समजेमातास्के ओरु कोंडांग बटुह कीसी हूडतोर। अचानक ओरकिन दुनिया ता सबसे बेहरा रहस्य रा कोंडा मुन्ने वात्ता लेक्का आत्ता। सच्चाई ता सामना कीसोर मत्तोर, अद्रमासी आश्चर्य अनि परेशान वेने आत्तोर।

सौरभ: “पोइदमेंड काम कियाना मजदूर किन पूंजीपतिर 100 रुपया हींतोर अनि तन्ना कीसा ते 110 रुपया तासिंतोर। इद्रम बद्रम किया परिंतोर।”

बेरेल मर्रा: “उदाहरण तुकू उंदी फैक्टरी लोप्पा 1000 मजदूर मंतोर, इत्तेके मजदूर ओना काजे हर दिय्या 1 लाख 10 हजार रुपया मुनाफा किया परिंतोर। साल ते फैक्टरी 300 दिय्यांग ताकतेके उंदी फैक्टरी तल ओना मुनाफा 3 करोड़ तीस लाख रुपया मंता। इंजे ओरु इव 3.3 करोड़ रुपया तल पूना फैक्टरी वाटसी ताना लोप्पा 100-200 पूना मजदूर संगे काम ताकतेके, पाइना मजदूर लोरा लेक्का पूना मजदूर लोर वेने ओरा काजे अद्रमे मुनाफा कमई कींतोर।

3.3 करोड़ रुपयांग असल ते बोना मेहनत ते पुट्टता अनि बोर अविना पोरो हक तासिंतोर मीटु उचुन आल्साटू। असल ते पूरा दुनिया ता पूरा धन संपदा, फैक्ट्रिंग, खदान ओसो खेती लोप्पा मजदूर-कारिगर ओसो किसान

लोर पुट्टी कींतोर मति मुट्टामेंड पूंजीपतिर इव सब्बे संपदा ओराद आंदू इंतोर। मेहनत कियाना मजदूर, कारिगर लोर किन सिर्फ जीव पिसनाचोने दिहाड़ी लेवेके वेतन हींतोर बाकी पिस्ता पूरा मुनाफा पूंजीपतिर खुद जमा कींता। महंगाई, बेरोजगार, बीमारी, दुर्घटना लेक्कविना कारण ते मजदूर लोरा असल दिहाड़ी ओसो ज्यादा कम आंता। इदिना कारण ते अमीर ओसो ज्यादा अमीर आंतोर अनि गरीब ओसो ज्यादा कंगाल आसोर दांतोर।”

सब्बे पेकोर बेरेल मर्रा ता पोल्लिंग केंजसी बक्काहने आतोर। ओरा दिमाग ते लट्टू पोत्तिता लेक्का आत्ता अनि उंदी-उंदी वस्तु उचुन जोम मुन्ने उंदी रहस्य ओसो मुश्किल मत्ता लेक्का आयनदू इंजे अदु ओरा मुन्ने पूरा स्पष्ट आसी मत्ता।

बेरेल मर्रा तन्ना पोल्लिंग जारी तासता: “मुनाफा पूंजीपतिरा काजे सबसे बेस ओसो पवित्र शब्द मत्ता। मुनाफा पूंजीवादी व्यवस्था लोप्पा उत्पादन काजे मुख्य प्रेरक ताकत मत्ता। बदे वस्तु, बदे खतरनाक बीमारी ता दवा तुन वेल्ले सस्ता तैयार कियमूडांता अनि लाखोंग लोकुरा पिस्वल पिस्सी कियमूडांता मति पूंजीपति अद दवाई तुन बने कीवोर आंतोर, बारांकु इत्तेके ताना लोप्पा ओरा काजे मुनाफा मन्नी आंता। दूसरा बगिल भोग-विलास ता बदे वस्तु (इदिना जरूरत वेल्ले लोकुर किन मंदिंता, इद हिल्लेक वेने काम ताका परिंता) मति पूंजीपतिरा काजे अदिना लोप्पा मुनाफा कमई कियाना मौका ज्यादा मंता अदिनके ओरु दवाई ता जागा ते अद वस्तु ता निर्माण कियाला चुने कींतोर।

पूंजीवादी व्यवस्था लोकुरा जरूरत तुन पूरा कियाला काजे आयवा हाटुम ता जरूरत कुन पूरा कियाला काजे काम कींता।”

सौरभ: “मति हाटुम तल वेने तो लोकुरे अस्सिंतोर।”

बेरेल मर्रा: “हिल्ले, रेंडासी पोल्लिंग लोप्पा वेल्ले अंतर मंता। भारत लोप्पा 125 करोड़ लोकुर मंतोर। 125 करोड़ लोकुरा गाटो, गेटेंग, लोहकु, दवाइंग, शिक्षा लेक्कटा जरूरतकु मंतांग। मति आधा तुकू ज्यादा आबादी कैदे इविन अस्सला काजे पैसा हिल्ले। अदिन काजे वीरू हाटनो लोप्पा शामिल आयोर आंतोर। हाटुम इत्तेके, पैसा मत्ता लोकुर सामान अस्सा परिंतोर। गरीब, कंगाल लोकुर हाटुम ता गिनती ते वेने वायोर आंतोर।

माटु हाटुम ता जरूरत कुना पोल्लोंग कींतोम इत्तेके 125 करोड़ लोकुरा लोप्पाटल सिर्फ पैसा मत्ता लोकुर हाटुम ते वासी सामान अस्सा परितोरा।”

सौरभ: “ओह, इदिना बारेते तो नन्ना आल्सतादे हिल्ले।”

बेरल मर्ग: “मुनाफा व्यक्तिगत हित कुना काजे सार्वजनिक हित कुना खत्म कीसिंता। मीट सब्बे तोर नेंडु मानेय ना गतिविधिं ना कारण ते मावा पूरा पर्यावरण-इत्तेके मना वड़िय, एर, तोड़ियो पूरा प्रदूषित आतांग सिर्फ मानेय आयवा भूम पोरो टा सब्बे जीव-जंतु ना अस्तित्व खतरा ते अरता इंजी बेसे पुत्तिर। प्रदूषण ता कारण कुना लोप्पा मुनाफा प्रधान कारण आंदू। पूंजीपति फैक्टरी तल पेसना गंदा एर तुन साफ कियवा लेवा सीधा डोड्डा ते लेवेके हिल्का ते वाटसिंतोरा। इद्रम ओरु एर तुन साफ कियाला आयना खर्च बचे कीसी तम्मा मुनाफा बेरसी कियानोर मति डोड्डा तुन खराब कियानोर। अदिना लोप्पा मंदाना कीकेंग डोल्लानवु। एर उंडाला ओसो तुंगला काजे वेने काम वायो आयनदू, अद एर खेती ते हियाना संगे खतरनाक रसायन ओयनदू, अदु कुसिर-कायांग, अनाज संगे मीवा शरीर लोप्पा हंजी बचोनो खतरनाक बीमारिग पुट्टी कींता। अद्रमे मुट्टामेंड ठेकेदार लोरा तम्मा मुनाफा बेरसी कियाला काजे गेड़ा तुन अंधाधुंध नड़किंतोर अनि गेड़ा पोरो आधार आसी पिस्सना लाखों लोकुरा पिस्वल तुन प्रभावित कींतोर।

दवाइंग बने कियाना उचुने पूंजीपति पूरा शोध कियावा लेवा बचोनो दवाईंग हाटुम लोप्पा तत्तिंतोर, अद्रमासी हजारो लोकुर किन नुकसान तेहा लागिंता। हथियार बने कियाना पूंजीपति सब्बे देश कुन हथियार अस्सला उकसे कींतोर। इव देश कुना शासक लोर वेल्ले कमीशन एतसी करोड़ों-अरबों हथियार समझौता कींतोर। जनता ना कल्याण पोरो खर्च आयना पैसा तुन सुरक्षा पोरोल ते हथियार कुना पोरो खर्च कींतोर।

भारत लोप्पा कार बने कियाना ओसो रेंडु चक्का वाले गाड़िग पूंजीपतिर हमेशा सार्वजनिक परिवहन व्यवस्था तुन दूरुस्त कियाला ओसो निजी वाहन कुना इस्तेमाल लोप्पा बाधा वाटना तुन विरोध कितोर। अदिना कारण ते सिर्फ शहर ता वड़िय प्रदूषण आयवा सड़क ते जरूरत तुकू ज्यादा ट्रैफिक आतांकु दुर्घटनांग आया मंतांग। लोकुरा कीसा ते वेल्ले धन वात्ता।

निजी मुनाफा काजे सिर्फ जनता ना कीसा तल पैसा तेंडनाए आयवा अदिन पूना-पूना मुश्किल कुने वेने वाटसियाना उदाहरण हर इलाका लोप्पा हूड़ा परितोमा।”

रवि: “इंगो, इदु पोल्लो निज्जमे। इव सब्बे समस्यांग ना बारे ते मना पुस्तक वेने रासिंतांग मति अविना मोदोल बेगा मंता इंदानदू नेंडु पुत्तोम, धन्यवाद बेरेल मर्रा।”

बेरेल मर्रा: “धन्यवाद कियाना जरूरत हिल्ले। सच्चाई वेहाना नावा जिम्मेदारी मंता। मुनाफा इद्रमता गलत कुन एवनले सीमित मन्त्रो आंता। अदु पूरा समाज तुन सांगी कित्ता, उदाहरण तुकू मानेय ना संबंध हूड़ाटू। मुनाफा मना पिस्वल लोप्पा वेल्ले नेंगसी मंता, इदिन माटु हर वस्तुए आयवा मानेय ना संबंध तुन वेने मुनाफा संगे नापे कियानादू हूड़ितोम। यायल-बाबल, हेलो-तम्मोर, सग्गा-संबंधीर, गोतीतोर, बाकी सब्बे संबंध कुन मुनाफा पोरोल ता किटाणु प्रभावित कींता। विशेष रूप ते शहर कुना लोप्पा सामान्य रूप ते मुयतोर यायल-बाबल ना सेवा कियाला बोरे हिल्लेर। ओरु वरोरे मंदाला मजबूर आंतोर, लोन ओरकिन अंगड़म ता वस्तु लेक्काने हूड़ितोर। पेकोरा काजे ओरु बोजा बनेमांतोर। अदिना पेरेके वेने मुनाफा ता मानसिकता काम कींता। मुयतोर मानेय तम्मा उत्पादक पिस्वल पिस्तोर इंजे ओरु आर्थिक गतिविधि कियाना इत्तेके पैसा कमई कियाना लेक्का हिल्लेर अदिन काजे पूंजीवादी मानसिकता काजे ओरा बदे जरूरत मन्त्रो आंता। हर संबंध लोप्पा वेने इदे पोल्लो लागू आंता। संबंध संगे बोनकिने फायदा आयो, इद्रम कीतेके सब्बे संबंधकु तीरम-तीरम जेक आंतांग।

जीवा कियाना लेक्कटा उच्च विचार तुन वेने मुनाफा तुकू इस्तेमाल आंता। नौजवान लोकुर जीवा कियाना मुन्ने तम्मा जीवन साथी ना गुण तुकू ज्यादा ओना पैसा ओसो इज्जत तुन महत्व हींतोर। धनवान मत्तेके ने बचोनो दोष मर्किंतांग गरीबी ओसो कंगाली खुद सबसे बेहरा दोषी बनेमांता। ओर पेकान संगे मर्मिग कीसी बाता फायदा आयार, अद पिल्ला संगे मर्मि कीसी बाता फायदा आयार इंजी हूड़ना मानसिकता असल ते जीवा कियाना विचार तुन विकसित आयला हीवो आंता अनि स्वार्थ तुन मजबूत कींता। बचोनो लोकुर कि जीवा कियाना लेक्कटा असल विचार ता इस्तेमाल तम्मा पिस्वल

ता सीढ़ी लेक्का इस्तेमाल कीसोर मत्तादू हूड़ा परिंतिर। अदिन काजे समाज लोप्पा बस्के एवनल मुनाफा ता व्यवस्था मंता, असल ते जीवा कियाना विचार पुट्टना मुश्किल मंता।

इदिना कारण ते माटू हल्कोए मुनाफा बद्रम मानवता विरुद्ध काम कींता इंजी अंदाजा वाटा परिंतिर। मुनाफा ता तन्ना बदे नैतिक मूल्य मन्ने। इदिना काजे सिर्फ उंदे धर्म, उंदे सिद्धांत मंदिंता, अदु परताचोन मुनाफा कमई कियाना मंता। इदिना काजे पूंजीपतिर किन अनाज ता कमी तोहची लाखों लोकुर किन करविने तासा लागतेके, पूंजीपतिर इद्रम वेने किया परिंतोर बारांकु इत्तेके इद्रम ता परिस्थिति ते अनाज बचोनो गुणा दाम ते वम्मसी बेहरा मुनाफा कमई किया परिंतोर। बस्केने उल्ली ता कमी मत्तेके बस्केने ओवोर ता कमी लेक्कटवु पूंजीपतिरे कितोर।

मुनाफा भ्रष्टाचार, अपराध ओसो अनैतिकता तुन पुट्टी कींता। मीटु इदिना बचोनो उदाहरण खुद आल्सिंतिर इंजी आशा कींतान। इव सब्बे संगे-संगे मुनाफा ओसो उंदी खतरनाक काम कींता (तकनीक ओसो विज्ञान ता विकास तुन प्रभावित कित्ता) अदिना स्वतंत्र विकास लोप्पा बाधा वाटिंता।”

सब्बे पिल्ला-पेकोर उंदे बेरा: “इद्रम बद्रम आया परिंता?”

रवि: “मुन्ने निम्मा तकनीक विकास कीसी पूंजीपतिर तम्मा मुनाफा बेरसी कींतोर इत्तिन अनि इंजे निम्मा मुनाफा तकनीक विकास लोप्पा बाधा वाटिंता अदिन काजे ओरु तकनीक विकास तुन रोमी कींता इत्तिन!”

बेरेल मर्रा पेकोर किन शांत कीसोरे: “हा.. हा..ह.. मीटु नाकिन मुयतोर आतांकु बैय्यल लेक्का पोल्लोंग कियाना मंतान इंजी आल्सा मंतिर? आयो, असल ते समाज ओसो मना प्रकृति साधारण हिल्ले अदु वेल्ले जटिल मंता। टाईम ओसो परिस्थिति बदलेमास्के वस्तु ना अर्थ ओसो अविना आपसी संबंध वेने बदलेमांता। पूंजीपतिर तकनीक ता विकास कीसोरे तम्मा मुनाफ बेरसी कित्तादू निज्जमे इंजी नन्ना मुन्ने ने वेहतद मंता। इद प्रक्रिया लोप्पा नन्ना मीकिन पूना दुनिया ता धन-संपदा ओसो संसाधन मुट्टामेंड कैदे केंद्रित आत्ता इंजी वेने वेहतान। इदिन माटु एकाधिकार पोरोल ते पुंतोम। पूंजीपतिर तकनीक विकास कीसोर मत्तास्के अदु वेल्ले मुनाफा कमई कियाला काजेए कीसोर मत्ता बारांकु इत्तेके अदु इद्रम कीसी दूसरा पूंजीपति

ना संगे प्रतिद्वंद्विता() लोप्पा कम दाम ते तन्ना माल वमसी ज्यादा मुनाफा कमई किया परनदू मति एकाधिकार वात्तास्के ओसो एकाधिकार पूंजीपति किन टक्कर हियाला बोरे पिस्सोर आंतोर अस्के ओरु तकनीक ता विकास तुन रोमी कींतोर। उंदी उदाहरण संगे समजेमायकाल।

उदाहरण तुकू वरोर पूंजीपति वेल्ले पैसा खर्च कीसी कैसर खिलाफ उंदी दवाई बने कींतोर। इंजे एवनल निम्मा वीर पूंजीपतिर पूरा दुनिया तुन कैसर तल मुक्त कियाना बोजा कांजता दयालु, उदार ओसो मानवता ता पुजारी हिल्लेर इंजी तो समजेमासीए मंदाकिन। ओरु कैसर ता दवाई वमसी मुनाफा कमई कियाला आल्सिंतोर अद्रमे बोरे दूसरा पूंजीपति कार लेवेके इत्र बनेकीसी मुनाफा कमई कियाला आल्सिंतोर।”

पेकोर: “इंगो, इदिन माटु समजेमातोम।”

बरेल मर्रा: “इद पूंजीपति कैसर ता दवाई वेल्ले दाम वाटसी हाटुम ते तत्तिंता अनि वेल्ले मुनाफा कमई कींता। अस्केने अदिन बोरो दूसरा प्रयोगशाल ते उचुन वैज्ञानिक लोर उंदी पूना दवाई तैयार कितोर इंजी अदु ओना दवाई अचोन प्रभावशालीए आयवा वेल्ले सस्ता वेने मंता इंजी जानकारी दोरकिंता। इद सस्ता दवाई हाटुम ते वातेके वेल्ले लोकर कम कीमत ते फायदा एता परितोर अनि मुन्ने वेल्ले महंगा मत्तांकु अस्सा परवा मत्ता कैसर पीड़ित लोकर वेने इद दवाई अस्सा परितोर। इद पोल्लो पूंजीपतिरा काजे गिर्दा ताद आयवा दुक्कम ताद मंदानदू बारांकु इत्तेके इद्रमा आतेके ओरकिन हंदी हिल्ला दोरकना मुनाफा दोरकना संभावन खत्म आत्ता। अदिन काजे पूंजीपतिर दूसरा प्रयोगशालांग लोप्पा वैज्ञानिक लोरा शोध पूरा आयनायो इंजी पूरा कोशिश कींतोर। ओरु वैज्ञानिक लोर किन अस्सना कोशिश कींतोर, षडयंत्र कीसी ओरा प्रयोग कुन नष्ट कियाना कोशिश कींतोर। बचोनो रकम ता कानूनी-गैरकानीनी अइचन पुट्टी कींतोर अनि बचोनो बेरा ओरकिन हौकना लेक्कटा काम वेने कींतोर।

इद्रम ता सैकड़ों उदाहरण उत्पादन ता हर शाखा लोप्पा मंतांग। पेट्रोलियम उत्पादक कंपनिंग वैकल्पिक ऊर्जा साधन कुन विकसित आयला रोमी कींतांग। नेंडु बेहरा-बेहरा कंपनिंग वेल्ले मुनाफा कमई कियाला आल्सना लोप्पाने तकनीक विकास आया मंतांग। दूसरा हर रकम

ता शोध पैसा ता कमी, सरकार ता विचार शक्ति ता कमी ओसो प्रोत्साहन ता कमी कारण ते जीवा विइसा मंतांग। अलग-अलग पूना आविष्कार ओसो खोज कुना वेल्ले संभावनांग मंतांग अवु सस्ता, हल्कोए प्रचार आयना ओसो पर्यावरण अनुकूल मंतांग मति अविना कारण ते बेहरा कंपनिंग ना मुनाफा कम आंता। अदिन काजे इद्रम ता खोज, आविष्कार कुना पोरो ध्यान हन्नो आंता। नावा हिसाब ते इंजे मीटु पूंजीवादी व्यवस्था लेवेके मुनाफा विज्ञान, तकनीक विकास लोप्पा बद्रम बाधा वाटिंता इंजी समजेमासी मंदाकिर।”

पेकोर तल्ला होने कीसोर इत्तोर: “इंगो।”

बेरेल मर्ग: “पूंजीवाद तकनीक विकसित कीसोर उत्पादकता जरूर बेरसी कींता मति इद उत्पादन फैक्ट्रिंग लोप्पा मशीन संगे आत्ताचोन मन्नो आंता।”

रवि: “इत्तेके?”

बेरेल मर्ग: “पूंजीवादी उत्पादन कीसोर हाटुम ता जरूरत किन सुरता तासिंतोर। बदे गेत्ते ना फैक्टरी लोप्पा हर दिव्या 1000 मीटर गेत्ते बने किया परतेके, अगा हर दिव्या सिर्फ 1000 मीटर गेत्ते तैयार कियाना इंजी आयो। फैक्टरी ता मालिक हाटुम ते बचोन खरीदारी आंतायो अचोने गेत्ते बने कियानूर। 500 मीटर गेत्ते ता खरीदारी आयना संभावना मत्तेके ओरु 500 मीटर गेत्ते तैयार आयार। इद्रम कीसी वेल्ले गेत्ते तैयार कीसी ओरु घाटा तेहोर आयनूर। इत्तेके उचुन जोम एवनल मशीनकु खाली मंदिंतांग।

बचोनो बेरा मशीन ता उत्पादकता आधा तुकू वेने कम आंता अनि फैक्ट्रिंग वेने बंद आया परिंतांग। इद्रम कीसी पूंजीपति असल ते मानवता खिलाफ अपराध कींतोर। बारांकु इत्तेके तकनीक ता विकास सब्बे जरूरत कुन पूरा किया परिंतांग मति पूंजीपतिर तम्मा मुनाफा ता कारण ते बस्केने इद्रम कीवोर आंतोर।

इंजे नन्ना मीकिन पूंजीवाद ता ओसो उंदी इलाज हिल्वा बीमारी ता बारे ते वेहाकान, अदिना पोरोल आर्थिक संकट।”

संदीप: “हत्ता उचुक साल कुनल अखबार कुना लोप्पा इदिना बारे ते वेल्ले खबर छपेमाया मंता मति नाकिन बस्केने इद बाताल आंदू? इंजी समजेमाताद हिल्ले”

बेरेल मर्गः “नन्ना मीकिन इदिना बारे ते वेहाकान अस्के मीटु नाकिन बेय्यल आत्ता इंजी आल्सकिर।”

रविः “आयो, माटु अद्रम आल्सोम।”

बेरेल मर्गः “असल ते पोल्लो इद्रम मंता। पूंजीवादी व्यवस्था तुकू मुत्रे समाज ता अर्थव्यवस्था लोप्पा वात्ता संकट हमेशा वस्तुंग ना कमी तादे मंदानदू। युद्ध, ऊसा, मुसुर वायवा मंदाना, महामारी, पंटा पोरो बीमारी, टिड्डा दल कुना हमला लेक्कटविना कारण ते उत्पादन वेल्ले कम आत्ता लेवेके इनपड़े आयवा मंदानादू। इदिना कारण ते हजारों-लाखों लोकुर करवु ता शिकार आंतोर। मुसुर वायवा मत्तेके लेवेके ऊसा वायाना लेक्कटा परिस्थितिंग लोप्पा मानय निगा बदे काम मन्नो आंता।

मति पूंजीवादी व्यवस्था लोप्पा वात्ता आर्थिक संकट वस्तु ना कमी ता कारण ते आयवा अतिरिक्त उत्पादन ता कारण ते मंदितांग। हाटुम लोप्पा वस्तु मात्रा अस्सानोरा क्षमता तुकू ज्यादा आत्तास्के फैक्टरी तल माल ता मांग कम आयर। अद्रमासी फैक्टरींग लोप्पा उचुन मशीनकु बंद कियमूडांता। इदिना कारण ते बचोनो मजदूर लोर किन फैक्टरी तल तेंडमूडायनदू। इद्रम मजदूर लोर किन तेंडसितेके हाटुम ता मांग ओसो वेने कम आंता अनि फैक्टरी उत्पादन लोप्पा ओसो ज्यादा कमी आंता। इद्रम प्रक्रिया ताकसोरे मंदिता। बेरोजगार बेरसिंता। फैक्टरींग बंद आंतांग मति हाटुम माल संगे निंदिता। बेरोजगार लोरगा अस्सला काजे पैसा हिल्ले आंता अदिन काजे ओरु करवु, कंगाली, बेगारी, बीमारी ता शिकार आंतोर। पूंजीपतिर तम्मा माल तुन सस्ता कीसी उंदी संगे उंदी फ्री हीसी हाटुम ताकी कियाना कोशिश कींतोर मति ओरकिन इदिना लोप्पा सफलता दोरको आंता। इद प्रक्रिया लोप्पा मजदूर, कर्मचारी लेक्काटोरे आयवा सुडला पूंजीपतिर वेने प्रभावित आंतोर। इद संकट तल पेसला काजे पूंजीपतिरा तरिकांग संकट लेक्काने आल्सा परवा लेक्का मंतांग। पूंजीपतिर बेहरा स्तर ते उत्पादन नष्ट कींतोर। हजारों-लाखों टन अनाज, पाल, हव्विंग, बटर, शक्कर ओसो हजारो कार, बाकी घेरलु सामान समुद्र ते वाटसिंतोर।”

सब्बे पेकोर उंदे बेरा: “बाताल!! समुद्र ते वाटितोर? बारांकु? इदिन जरूरत मत्ता लोकर किन बारांकु हीवोर? समुद्र ते तेके ओरकिन बाताल फायदा आंता?”

बरेल मर्रा: “बोरे वेने मानवता तुन विचार कियाना मानेय मीटु आल्ससोर मत्ता लेक्काने आल्सितोर। मति पूंजीपतिर मानवता तुन आयवा मुनाफा तुन विचार कींतोर। ओरु मुनाफा ता कारण ते करोड़ों जरूरत मत्ता लोकर किन सामान हियाना जागा ते अदिन नष्ट कियाना बेस इंजी आल्सितोर बारांकु इत्तेके लोकर किन मुफ्त हीतेके ओरकिन इदिना आदत आयां इंजी आल्सितोर। दूसरा ओरु इद सामान लोकर किन तूस्तेके लोकुरा जरूरत कु पूरा आंतांग, मति अविन नष्ट कीतेक सिर्फ तम्मा स्टॉक ते मत्ता अतिरिक्त माल ता देखरेख ते आयना खर्च तल बचेमायनाए आयवा फैक्टरी चालू कियाला वेने हरीं दोरकिंता इंजी आल्सितोर। तीसरा, ओरु वस्तु ना कीमत वेने उंदी स्तर तल दोड़ तासितोर।”

सब्बे पेकोर आश्चर्य आसी वरोर-दूसरो ना मोक्कम हूड़ा मंतोर। ओरु मुनाफा काजे पूंजीपति वर्ग इद्रम वेने किया परिंता इंजी आल्सा वेन परवा मंतोर।

बरेल मर्रा: “आर्थिक संकट तल पेसला काजे पूंजीपति वर्ग विभिन्न देश कुना नड़मा युद्ध शुरू कींता। इद वेने वस्तु नष्ट कियाना उंदी हल्को तरीका आंदू। सिर्फ वस्तुए आयवा बिल्डिंग, पुलिया, सड़क, फैक्टरींग, लोहकु, सब्बे नष्ट आंता। लाखों लोकुर डोलितोर मति पूंजीपतिर इदिना परवाह कीवोर आंतोर बारांकु इत्तेके युद्ध ताकनास्के युद्ध ता सामान बने कियाना कारखानांग नरका-पियल काम कींतांग। हर देश हथियार कुना स्टॉक अस्सितंता। इद व्यापार लोप्पा पूंजीपति वेल्ले मुनाफा कमई कींतोर। पहली ओसो दूसरी विश्व युद्ध ताकनास्के हथियार कुना बिक्री कीसी मुनाफा कमई कीसीए अमेरिका दुनिया ता महाशक्ति बनेमाता। यूरोप ता सब्बे देश युद्ध लोप्पा तबाह आत्तास्के अमेरिका कंपनिंग यूरोप तुन ओसो उंदी बेरा निल्पी कियाला काजे पैसा खर्च कित्ता अनि ताना लोप्पा ओसो उंदी बेरा मुनाफा कमई कित्ता।”

सब्बे पेकोर केंजसी दंग आंतोर। उचुन जोम पूरा सिन्न आत्ता लेक्का आत्ता। ओरा गुंडे दुक्कम संगे निंडता। ओरु बाताले वड़का परवा लेक्का आत्तोर। बेरेल मर्रा ओरा परिस्थिति हूइसी तन्ना बेहरा टोंडांग संगे ओरा तला पोरो ऊइसोरे इत्ता: “पेकोर, शासक शोषक वर्ग ता इतिहास इद्रमे मत्ता। मिस्र, रोम ओसो युनान ता गुलाम लोरा परिस्थिति, भारत लोप्पा दलित लोरा परिस्थिति, दुनियामेटा मजदूर लोरा परिस्थिति शोषक वर्ग तन्ना लूट, तन्ना साम्राज्य तुन बदरमाई बचे किया परिता इंजी तोहिंता। इतिहास माकिन मिस्र, रोम ओसो यूनान ता गुलाम शासक लोर, यूरोप, भारत ओसो चीन ता सामंती शासक लोर खत्म आत्ता लेक्का ने वर्तमान दुनिया ता पूंजीपति शासक वेने हमेशा मन्नोर आंतोर इंजी वेहिंता। वीरा साम्राज्य वेने खत्म गरे एवता।”

सब्बे पेकोर: “निज्जमा? बस्के?”

बेरेल मर्रा: “तारीख लेवेके साल तय कियानाद नावा कैद हिल्ले। मति इद्रम निज्जमे आयार। इदिन बेस समजेमायला काजे पूंजीवाद ता ओसो उंदी विशेषता तुन माटु समजेमायकाल। पूंजीवादी उत्पादन पद्धति ता इतिहास समग्र रूप ते अराजकतावादी मंदिता अनि पूराए व्यक्तिगत मंता। इत्तेके माटु बोरे वरोर पूंजीपति किन तन्ना नियंत्रण ते मत्ता उंदी लेवेके बचोनो कारखानांग लोप्पा ओरु पूरा योजना संगे उत्पादन कीसोर मत्तादू हूइंतोम। उंदी पैसा वेने अंगड़म दायला हीवोर आंतोर। कच्चा माल ता हर तुकड़ा ता इस्तेमाल बेस कियाना कोशिश कींतोर। मति माटु देश लेवेके दुनिया स्तर ते सब्बे पूंजीपतिरा पोल्लोंग कीतेके उत्पादन लेवा बदे योजना ओसो नियंत्रण हिल्लाए उत्पादन आसोर मत्तादू हूइंतोम। अद्रमासी उत्पादन साधल कुना वेल्ले नुकसान आंता। इद्रम हर पूंजीपति परताचोन मुनाफा कमई कीसी तन्ना कीसा ते निहतना कोशिश कींतोर। हर पूंजीपति दूसरा पूंजीपति ना तूलना ते ज्यादा मुनाफा कमई कियाला आल्सिंतोर। इद्रम हाटुम ता बेहरा हिस्सा पोरो तन्ना नियंत्रण कीसीए संभव आंता।

मना देश ते उंदी साल लोप्पा उंदी करोड़ पूना टेलीवीजन ता जरूरत मंदिता। इद्रम ता आंकड़ांग जमा कियाला काजे बचोनो संस्थांग विभिन्न रकम ता सर्वे कींतांग। इव सर्वे ओसो इविना आंकड़ांग टीवी बने कियाना हर कंपनी कैदे मंतांग। उदाहरण तुकू टीवी बने कियाना 10 कंपनिंग मंतांग।

हर कंपनी 10 लाख टीवी बने कीतेके उंदी करोड़ टीवी बने कियमूझांताए लेवेके लोकुरा उंदी करोड़ टीवी ता मांग पूरा कियाला काजे इव 10 कंपनिंग ना मालिक लोर कलियसी बदे कंपनी बचोन टीवी बने कियाना इंजी तय कियाना। हर पूंजी पति इद उंदी करोड़ टीवी ता हाटुम ते बेहरा-बेहरा हिस्सा हथिये कियाला आल्सिंतोर अदिन काजे बदे योजना लेवेके नियंत्रण हिल्ला हर कंपमी 10 लाख आयवा 15 लाख लेवेक 20 लाख या अदिनकु वेने ज्यादा टीवी बने किया परिंता। ग्राहक लोर किन लालच हियाला काजे विज्ञापन कुना पोरो वेल्ले पैसा खर्च कींता अनि इविना संगे तम्मा सब्बे टीविंग वम्मना कोशिश कींता। इद्रम हाटुम लोप्पा उंदी करोड़ आयवा डेढ़ तल रेंडु करोड़ टीविंग आंतांग। अनि जरूरत सिर्फ उंदी करोड़ मत्तांकु बाकी सब्बे टीविंग बिक्री आयवा अद्रमे मंदिंतांग।

इद सिर्फ संसाधन कुना बर्बादीए आयवा पूना आर्थिक संकट ता शुरूआत ता कारण वेने बनेमांता। इद उदाहरण तुन माटु दूसरा रकम ते वेने हूड़ा परितोमा। बदे उंदी साल सब्बे पूंजीपतिर टीवी वम्मसी बदे फायदा हिल्ले इंजी टीवी ता उत्पादन कम कीतेके हाटुम लोप्पा उंदी करोड़ आयवा सिर्फ 75 लाख टीवी आयर। इद्रम आतेके लोकुरा लोप्पा टीवी अस्सला काजे हौकना-कोहकना आयर। 25 लाख लोकुर टीवी हिल्ला मंदानूर। साधारण रूप ते इद्रम ता हौकना-कोहकनादू अनाज, पाल, गैस लेक्कटा जरूरी वस्तुंग ना काजे लगभग माकिन रोज दिसिंता।

इद्रम पूरा देश ता जनता ना जरूरतकु ओसो ओरा अनुसार उत्पादन कियाना योजना पूंजीवादी व्यवस्था ता हिस्सा मन्नो आंता। बस्केने वेल्ले ज्यादा, बस्केने वेल्ले कम ता परिस्थिति ते पूंजीवादी उत्पादन आंता।

पोरो वेहता पूंजीवादी विशेषतांग ना कारण ते उत्पादन शक्तिंग, उत्पादन संबंध कुना नड़मा अंतरविरोध वेल्ले तीव्र आंता। बस्के-बस्के अदिन रोमी किया परवाचोन वेने तीव्र आंता। पूंजीपति प्रतिनिधित्व कीसोर मत्ता उत्पादन संबंध ओसो मजदूर प्रतिनिधित्व कीसोर मत्ता उत्पादन शक्तिंग किन मुन्ने दायला हियवा रोमी कियाला कोशिश कींतांग। पूंजीपति शासन ओसो लूट तुन जारी तासला काजे अवु तम्मा परिस्थिति मत्ता लेक्का

तासना कोशिश कींतांग। मति उत्पादन शक्तिंग मुन्ने दायला कोशिश कीसोर मंदिंतांग।”

रवि: “बेरेल मर्रा, उचुन लेस्कता लेक्का आत्ता। इव सब्बे माटु बद्रम पुंदा परितोम?”

बेरेल मर्रा: “सबसे मुन्ने उत्पादन लोप्पा सामूहिकता ता पोल्लोंग कियाकाल। आदिम साम्यवादी समाल लोप्प उत्पादन पद्धति सामूहिक मत्ता। ताना पेरके गुलाम प्रथा ओसो सामंतवाद लोप्पा उत्पादन मुख्य रूप ते व्यक्तिगत स्तर आयनदू। मति पूंजीवादी पद्धति ओसो उंदी बेरा उत्पादन कर्ता लोर किन सामूहिकता ते निल्पी कींता। हजारों मजदूर कलियसी सुडला-बेहरा हर रकम ता वस्तु निर्माण कींता। वरोरे मजदूर सुडला सुई ता निर्माण वेने किया परवोर। अद्रमासी मीटु उत्पादन क्रिया ओसो उत्पादन शक्तिंग सामूहिकता बगिल हंजोर मत्तादू हूड़ा परितिर, मति उत्पादन साधन कुना स्वामित्व इंजे वेने निजी कैदे ने मंदिंता। इत्तेके सामूहिकता ते आत्ता उत्पादन ता पूरा फायदा वरोर लेवेके मुट्टामेंड पूंजीपतिर एता परितोर। मानव इतिहास उत्पादन संबंध, उत्पादन शक्तिना अनुसार मंदाना इंजी वेहिंता। वेल्ले जोम एवनल रेंडासी नड़मा तीव्र अंतरविरोध ताका परवो। उत्पादन शक्तिंग मुन्ने दाया मंतांग अदिनके अविन पेरके पिङ्गमूझायो। अदिन काजे उत्पादन संबंध इत्तेके स्वामित्व ता अधिकार जरूर सामूहिकता बगिल दांता। इदु समाज दूसरा मंजिल मंदिंता अनि माटु इदिना कम्युनिज्म इंतोम।

दूसरा महत्वपूर्ण पोल्लो, इचोन बेहरा समाज ता सब्बे लोकुरा जरूरत कुन सही तरीका ते पूर कियाला काजे बस्के एवनल उंदी केंद्रीय योजना बनेमायो ओसो अदिना अनुसार काम आयो अस्के एवनल समाज ता सब्बे लोकुरा जरूरत कुन पूरा कियाना संभव हिल्ले। पूंजीवादी उत्पादन पद्धति सार रूप ते मुनाफा कमई कियाला काजे लागू आसोर मत्ता पद्धति आंदू, अदिन काजे उत्पादन शक्तिंग इत्तेके मजदूर-किसान, बाकी उत्पादन कर्ता लोरा संगे इद तीव्र अंतरविरोध पुट्टिंता।

तीसरा पोल्लो, मजदूर इंजे वेल्ले परिपक्व आतांकु ओरु प्रशासन, प्रबंधन ता हर काम खुद किया परितोर। मशीन कुना आटोमेशन शारीरिक बल ता जरूरत तुन न्यूनतम कीसिंतोर, उच्च उत्पादकता मानव समाज तुन

वेल्ले सक्षम बने कींतोर। उचुने घंटांग लोप्पा उत्पादन क्रिया संगे वेल्ले उत्पादन आतांकु पिस्टा टाईम ते मजदूर उच्च बौद्धिक स्तर दोरकी किया परितोर प्रबंधन ओसो प्रशासन काम करिया परितोर।

चौथा पोल्लो, पूरा मजदूर वर्ग सिर्फ तम्मा ताकत तुन बेस चीनेमांता। इदे आयवा अदिना मुन्ने पूंजीपति ओरकिन बद्रम इस्तेमाल कींतोर इंजी वेने पूरा समजेमांता। अदु उत्पादन, फैक्टरी प्रबंधन, प्रशासन लोप्पा पूंजीपतिरा बदे भूमिका मन्त्रो आंता।

पोरो वेहता कारण कुना कारण ते मजदूर इंजे तम्मा पूना क्रांतिकारी भूमिका निभे कियाला काजे वैचारिक-राजनीतिक-सांगठनिक रूप ते तैयार आंतोर। पूंजीपति तम्मा पाइना व्यवस्था तुन बचे कियाला काजे परताचोन राजसत्ता पोरोल ता मशीनरी पोरो आधार आंतोर। सरकारी दमन तेज आंता। मति सरकारी दमन उत्पादन शक्तिंग कुन मुन्ने दायला रोमी कीवो आंता, हत्ता 5 हजार साल लोप्पा समाज तुन मुन्ने दायला रोमी किया परवा लेक्का।

समाज ता दूसरा मंजिल शुरू आंता। पूंजीवाद पेरके कम्युनिज्म ता पोइद पैसा मंता। कम्युनिज्म ता बुनियाद सामूहिकता लोप्पा मंता। उत्पादन पद्धति सामूहिकता मंदिता अदिन काजे उत्पादन साधन कुना स्वामित्व वेने वरोर मानेय ना कैदे आयवा पूरा समाज उत्पादन साधन कुना सामूहिक रूप ते स्वामी मंदिता। स्वाभाविक रूप ते इद्रमता समाज लोप्पा बोरे वरोर मानेय दूसरा ना मुनाफा काजे काम कियवा लेवा सब्बे लोकुर समग्र रूप ते पूरा समाज काजे ओसो इद्रम हर मानेय ना काजे काम कींतोर।”

रवि: “इद, वेल्ले बेसता समाज मंता। इद्रम ता समाज बेगाने स्थापना आत्ता या?”

बेरेल मर्रा: “हिल्ले, नेंड एवनल दुनिया ता बदे देश लोप्पा कम्युनिज्म स्थापित आत्ताद हिल्ले मति कम्युनिज्म ता पहली चरण समाजवाद एक तिहाई दुनिया लोप्पा स्थापित आसी मत्ता। सबसे मुन्ने रूस ते 1917 ते मजदूर लोर पूंजीपति वर्ग ता तख्ता पलट कितोर अनि दुनिया लोप्पा पहली मजदूर राज्य निल्पी कितोर। दूसरा विश्व युद्ध पेरके पूर्वी यूरोप ता देश कुना लोप्पा मजदूर वर्ग पार्टिंग सत्ता ते वातांग। पेरके 1949 ते दुनिया ता सबसे ज्यादा आबादी वाले चीन देश लोप्पा शोषक वर्ग ता तख्ता पलट कीसी समाजवादी

देश बनेमाता। 1953 ते उत्तरी कोरिया, 1958 ते क्यूबा, 1975 ते वियतनाम, लाओस, कम्पूचिया समाजवादी ग्रूप लोप्पा शामिल आतांग।”

रवि: “इद समाजवाद बाताल आंदू?”

बरेल मर्रा: “समाजवादी व्यवस्था तुन बेस समजेमायला काजे कम्युनिज्म तुन समजेमायना जरूरी मंता। इंजे समाजवाद पूंजीवाद ओसो कम्युनिज्म नइमा ता उंदी संक्रमणकाल आंदू इदिना लोप्पा पूंजीपति वर्ग तल सत्ता मजदूर वर्ग कैदे वांता मति इंजे ओसो पूंजीपतिर इद सत्ता तुन ऊंदा परवोर इंजी गारंटी मन्नो आंतोर।

समाजवाद लोप्पा मजदूर पहली बेरा खुद तम्मा शासक बनेमांतोर। वर्ग समाज पुटतास्केटल मेहनतकश जनता पोरो शोषक वर्ग ता शासन गुलाम मालिक, सामंत, पूंजीपति लेक्कटा रक-रकम ता रूप ते मत्ता। मति समाजवाद लोप्प पहली बेरा अदु तम्मा राज, तम्मा शासन स्थापित कित्ता। समाजवादी उत्पादन मुनाफा काजे आयवा लोकुरा जरूरत कुन पूरा कियाला काजे आंता।

इंजे नन्ना मीकिन कम्युनिज्म ता बारे ते उचुन बुनियादी पोल्लोंग वेहाकान। मीटु पूंजीवाद लोप्पा उत्पाद पद्धति ता सामूहिक आयना तल सम्पत्ति संबंध वेने सामूहिक मंदाना परिस्थिति परिपक्व आंता इंजी पुतिरे। इद बदे कम्युनिस्ट समाज ता बुनियादी शर्त मंता। इद समाज बद्रम मंदिता? इदिना बारे ते उचुन आदिम साम्यवादी समाज तले समजेमाया परितोम बारांकु इत्तेके अद कालम ते सम्पत्ति संबंध निजी आयवा सामूहिक मत्ता।

सबसे महत्वपूर्ण पोल्लो, सम्पत्ति निजी हिल्वेके अदिन हड़पे कियाना वेने संभावना मन्नो आंता। अदिन काजे निजी सम्पत्ति ता सुरक्षा, लेवेके अदिन ओसो ज्यादा बेरसी कियाला काजे शोषक वर्ग, वर्ग समाज ता शुरुआत ते निल्पी कित्ता मशीनरी “**राजसत्ता**” ता जरूरत मन्नो आंता। विभिन्न शोषक लोरा नइमा आपसते युद्ध ताकना संभावना खत्म आंता। समाज लोप्पा वेने रेंदु विरोधी वर्ग हिल्वेके अपराध आयना संभावा कम आंता। अदिन काजे फौज, पुलिस, हथियार कुना जरूरते मन्नो आंता। अद्रमे अलग ते न्यायपालिका ओसो कार्यपालिका इत्तेके जज, नेता, कोर्ट-कचहरिंग, अफसरशाही लेक्काटा बेहरा फौज ता वेने जरूरत मन्नो आंता। इविना जागा

ता स्थानीय, क्षेत्रीय, राष्ट्रीय ओसो अंतरराष्ट्रीय स्तर ते मजदूर लोरा कौंसिलकु वांतांग, इवु उत्पादन, वितरण ता केंद्रीय योजना पोयसी काम कींतांग।

दूसरा सबसे महत्वपूर्ण पोल्लो, महिला लोरा गुलामी ता बारे ते मंता। निजी संपत्ति पुटता पेरके महिला लोरा परिस्थिति पुरुष ना भोगविलास() ता वस्तु ओसो ओरा काजे वारिस पुट्टी कियाना एवनले मंता। इद परिस्थिति इंजेटा लोकतंत्र लोप्पा वेने बदलेमाताद हिल्ले। माहिलांग ना गुलामी निजी संपत्ति तल शुरू आंता आदिन काजे निजी संपत्ति खत्म आत्तास्के महिला ना मुक्ति वेने संभव आंता।

तीसरा महत्वपूर्ण पोल्लो, समाज तल हर रकम ता आर्थिक शोषण खत्म आया, संगेने समाज हर मानेय तन्ना क्षमता अनुसार काम किया परना ओसो जरूत अनुसार संसाधन कुना इस्तेमाल कियाना परिस्थिति ते वांता(नेंडु मीटु मीवा परिवार लोप्पा बीमार मत्तोर ओसो पिल्ला-पेकोर किन ओरु कमई किया परवेकाई बेसता ओसो पौष्टिक आहार हियाना लेक्का)।

बुनियादी जरूरतकु गाटो, गेत्तेंग, लोन, शिक्षा, स्वास्थ्य लेक्कटाविन पूरा कियाना संगे-संगे ओरा मनोरंजन ता वेने ध्यान तासना संभव आंता। इद विज्ञान, तकनीक ता उच्च विकास कारण तेने आतांग। उत्पादकता दर वेल्ले बेरसतांकु हर मानेय ना पोरो वेहता जरूरत कुन पूरा कियाना संभव आंता।

हर रकम ता सामाजिक भेदभाव जाति, नस्ल, भाषा, इलाका लेक्कटा भेदभाव समाप्त आंतांग बारांकु इत्तेके इव भेदभाव कुना मोदल आर्थिक शोषण लोप्पा मंता। आर्थिक शोषण खत्म आत्ता पेरके इदिन विरोध ते संघर्ष कीसोर इविन इतिहास ता पोदिय गुमिया ते वाटसियाना संभव आंता। शहर ओसो नाहकुना नडमा अंतर खत्म आंता। पूंजीवाद तम्मा मुनाफा तुन बेरसी कियाला काजे ओसो बेरोजगार ता रिजर्व फौज तासला काजे शहरी इलाकांग लोप्पा झोपड़ पट्टी-गंदा नालिंग ओदा मत्ता टोलांग ना निर्माण कींता मति साम्यवाद लोप्पा ग्रामीण इलाकांग नल पलायन कीसी शहर बगिल दायना जरूरत मन्नो आंता। बारांकु इत्तेके शिक्षा, स्वास्थ्य, रोजगार, मनोरंजन सब्बे ग्रामीण इलाकांग लोप्पा दोरकनवु।

कम्युनिज्म लोप्पा असल ते मुद्रा ता जरूरत वेने हिल्ला मत्ता बारांकु इत्तेके पिस्वल ता हर सुविधा कम्यून लोप्पा दोरकनदु, अगा बदे मुद्रा ता जरूरत मन्नो आंता, हर मानेय अविना इस्तेमाल किया परितोर। कम्युनिज्म लोप्पा पूरा दुनिया उंदी परिवा बनेमांता। देश कुना नड़मा हंदी मारिंता अनि वासुदैव कुटुम्बकम स्थापित आंता।”

रवि: “बरेल मर्रा, इद सबसे सुंदर कल्पना कियाना लेक्का मंता, बदे उंदी वेल्ले बेसता कंजकड़ लेक्का मंता।”

बरेल मर्रा: “इद सिर्फ उंदी बेसता कल्पना आयो। इतिहास ता गति जरूरत इदे दिशा ते दाया मंता। माटु निज्जम कियाला काजे बचोन टाईम लागियर इंजी वेहा परवोम मति इद निज्जम जरूर आया इंदा परितोम। इद नावा लेवके बोरे दूसरोना विचार ते वातांकु आयवा उत्पादान शक्तिंग ना विकास वेहचोर मत्ता दिशा ते दाया। गुलाम, प्रथा, सामंतवाद ओसो पूंजीवाद बोरे आल्सतांकु वायो अनि बोरे आल्सतांकु रोमताद वेने हिल्ले। असल इत्तेके इद्रम ता व्यवस्थांग ना जन्म ओसो हामूर आर्थिक परिस्थिति ना कारण तेने आंता। मानेय ना कोशिश इद प्रक्रिया ता गति तुन तेज लेवेके तीरम कित्ता, बदे विशेष इलाका ता परिस्थिति अनुसार उचुन विशिष्टतांग हीता मति अदिन निर्णायक रूप ते बदले किया परवोर आत्तोर। अदिन काजे कम्युनिस्ट समाज ता निर्माण संभव मंता।

मति पूंजीवाद तल सीधा कम्युनिज्म लोप्पा नेंगा परमूझायो, इदिना सबसे बेहरा कारण हत्ता 5000 साल तल अल्पसंख्यक शोषक वर्ग राजसत्ता ता मदद ते बहुसंख्यक मेहनतकश जनता पोरो राज कीसोर वात्ता। इव 5000 साल ता अनुभव कुना कारण ते अदु इंजे एवनल उंदी रकम ता महानता दोरकी कित्ता अनि अदु हल्कोए तन्ना भोग-विलास ओसो ऐशो-आराम तुन तन्ना कौंडा मुन्ने डुंडुल काल्पा परिता अनि ओसो उंदी बेरा वापिस दोरकी कियाला काजे तोका-तल्ला उंदी कींता।”

सब्बे पेकोर: “इंगो, इद निज्जमे।”

बरेल मर्रा: “सत्ता तल बेदखल कीसी इद शोषक वर्ग तुन ओसो उंदी उत्पादन साधन पोरो कब्जा कियाना तुकू रोमी कियाला काजे मजदूर वर्ग उचुन जोम अस्थाई रूप ते सत्ता पोरो तन्ना नियंत्रण किया परवेके पूंजीपतिर

ओसो उंदी बेरा शासक बनेमायना कोशिश कियानूर अनि कम्युनिस्ट समाज खिलाफ बचोने षड़यंत्र कीसोर मंदितोर।

दूसरा महत्वपूर्ण पोल्लो शोषक वर्ग ता विचारधारा हत्ता 5000 साल तल समाज पोरो तन्ना दबाव तासिस मंता। ओरु उंदी रकम ता शोषक आई लेवेके दूसरा रकम ता शोषक आई ओरा सार उंदे मत्ता (बहुसंख्यक मेहनतकश जनता तुन लूटे कियाना, ओरा मेहनत ते दुनिया ता सब्बे भोग-विलास दोरकी कियाना)। शोषण ओसो उत्पीड़न ता विचार सिर्ष मुट्टामेंड शोषक लोराए विचार आयवा समाज लोप्पा फैलेमासोर दांता अनि पूरा समाज इव विचार कुना संगे प्रभावित आंता। उंदी पेरके उंदी पोरो मत्तोर दोड़तोर किन दबे कियाना कोशिश कींतोर। मजदूर वर्ग शोषक वर्ग कैदल सब्बे संसाधन ओसो सत्ता ऊंदितेके वेने समाज ता उंदी उल्लेखनीय हिस्सा इव पाड़ना विचार कुना प्रभाव ते खुद शोषक शासक लोरा लेक्का व्यवहार कियाना शुरू कींता। इव तत्व कुना पोरो नियंत्रण कीवेके वीरु सत्ता पोरो उदसी मजदूर वर्ग दोरकी कित्ता सफलतांग कुन नष्ट कियाना शुरू कींतांग। इदे आयवा मजदूर वर्ग वेने इव विचार कुना संगे प्रभावित आतांकु प्रशासकीय मशीनरी लोप्पा वात्ता मजदूर लोरा लोप्पाटल उचुन मजदूर वेने शोषक लोरा लेक्का व्यवहार कींतोर। अदिन काजे पूना समाज लोप्पा इव तत्व कुना पोरो ओसो शोषण कियाना विचारधारा पोरो नियंत्रण कियाना लेक्कटा मजदूर वर्ग सत्ता ता जरूरत मंदिंता।

तीसरा पोल्लो, शोषक वर्ग तन्ना पाड़ना अनुभव कुना पोरो आधार आसी अंतरराष्ट्रीय सम्पर्क तासिस मंदिंता। बदे उंदी देश लोप्पा मजदूर शोषक वर्ग कैदल सत्ता ऊंदितेके तुरंत ओरी मदद काजे अंतरराष्ट्रीय संपर्क धन-बल लोहिंता अनि अविना मुकाबला कियाला काजे मजदूर लोरा तम्मा सत्ता मंदाना जरूरी आंता।

अदिन काजे पूंजीवाद पेरके कम्युनिज्म ता स्थापना तुक्क मुन्ने मजदूर वर्ग तम्मा सत्ता स्थापित कींता इदिन माटु मजदूर वर्ग ता तानाशाही वेने इंतोम।”

मंदीपः “तानाशाही! मजदूर वर्ग तानाशाही!! मति तानाशाही बेसता व्यवस्था मन्नो आंता। माटु हिटलर ना बारे ते केंतोम वेल्ले बेहरा तानाशाह मत्तोर, ओना कारण ते लाखों निर्दोष लोकुरा हामूर आत्ता।”

बरेल मर्गः “मति मजदूर वर्ग तानाशाही वरोर मानेय ना तानाशाही मन्नो आंता। इद पूरा मजदूर वर्ग, इत्तेके समाज ता 90 प्रतिशत लोकुरा तानाशाही 10 प्रतिशत लोकुरा पोरो मंदिता। वीर 10 प्रतिशत लोकुर पूंजीपतिर लेवेके ओरा प्रतिनिधिर मंदिता। मजदूर वर्ग ता तानाशाही वीर 10 प्रतिशत लोकुर किन पूंजीपतिरा लेक्का व्यवहार कियाना अनुमति मन्नो आंता। ओरकिन समाज ता बाकी लोकुरा लेक्का पिस्सना सब्बे अधिकार मंदितांग मति पूंजीपतिरा लेक्का मंदाना अधिकार हिल्ले। मजदूर वर्ग तानाशाही इत्तेके इदे आंदू।

इद्रम कम्युनिज्म तुक्क मुन्नेटा संक्रमण कालम लोप्पा (सत्ता मंदिता) इत्तेके पुलिस, फौज, न्यायपालिका, कार्यपालिका लेक्कटा संस्थांग मंदितांग (इद सत्ता पोरो शोषक वर्ग ता आयवा मेहनतकश वर्ग ता नियंत्रण मंदिता)। इद संक्रमण काल तुन माटु समाजवाद इंतोम। इद कालम ते वर्ग संघर्ष- मजदूर वर्ग ओसो पूंजीपति वर्ग नड़मा ता संघर्ष लगातार जारी मंदिता। पूंजीपति सत्ता पलटे कीसी मत्तेकाई, अदु वापिस सत्ता कब्जा कियाला काजे रकम-रकम ता षडयंत्र पोयंतोर। शोषक वर्ग सीधा दिसना बंद आंता अनि अदिना षडयंत्र जारी मंदिता। अद्रमासी मजदूर वर्ग तुन ओसो ज्यादा सतर्क मंदाना, चौकस मंदाना जरूरी मंता।

समाजवाद लोप्पा विज्ञान, तकनीक कुन ओसो ज्यादा विकास बगिल ओंता। कम्युनिज्म मंजिल लोप्पा हर मानेय ना जरूरत कुन पूरा कियाना इंजी उत्पादकता लोप्पा वृद्धि कियमूझांता। मति समाजवाद लोप्पा उचुन पोल्लोंग लोप्पा सब्बे तोरा जरूरत कुन पूरा कियाना संभव मन्नो आंता। अदिन काजे समाजवादी समाज ता सामान्य सिद्धांत- *हर मानेय तन्ना क्षमता अनुसार काम किया परितोर अनि काम अनुसार वेतन दोरकी किया परितोर* इंजी मंता। समाजवाद लोप्पा मानसिक श्रम ओसो शारीरिक श्रम कियाना लोकुरा वेतन लोप्पा अंतर वेल्ले कम आंता। कम्युनिज्म लोप्पा इद अंतर पूरा खत्म आंता।”

सौरभ: “मति बेरेल मर्रा, सड़क ओदा बंडांग ओहतानोर ओसो बचोनो साल एवनल लगातार मेहनतक कीसी डॉक्टर लेवेके वैज्ञानिक बनेमायना लोकुर किन उंदी बराबर वेतन दोरकना वेल्ले आश्चर्य ओसो गलत मत्ता लेक्का मंता एय्यो।”

बेरेल मर्रा: “इव पोल्लोग मनाकिन नेटा कालम ते वेल्ले आश्चर्य मत्ता लेक्का मंतांग, बारांकु इत्तेके नेंडु मना विचार उंदी वर्गीय समाज ता विचार आंदु अदिन काजे बचोनो आश्चर्य आयना लेक्कटा पोल्लोग मनाकिन आश्चर्य कीवोंग आंतांग। अमीर-गरीब नड़मा ता बेहरा कोहड़ा माकिन आश्चर्य कीवो, उचुन मुल बदे मेहनत कियवा लेवा पिस्वल मेंड ऐशो-आराम ते मंदानाद वेने माकिन आश्चर्य कीवो आंता। पोदिय गुमिया ते तिंदला परहकसोर मत्ता पिल्ला-पेकोर किन हूइसी वेने माकिन आश्चर्य आयो आंता। बेहरा पूंजीपति, सूदखोर, बेहरा जमींदार पूरा पिस्वलमेंड बदे काम कीवोर, मति ओरगना बस्केने धन-दौलत ता कमी मन्नो आंता। दूसरा बगिल पिस्वल मेंड मेहनत कित्ता पेरके वेने वरोर मजदूर तन्ना मंदाला काजे लोन बने किया परवोर आंतोर, इद पोल्लो मनाकिन बस्केने आश्चर्य कीवो आंता। पेकोर, नन्ना मुन्ने वेहता लेक्का शासक वर्ग विचारधारा समाज लोप्पा हावी आंता अदिनके इद्रम मंता।

मति समाज ता काम डॉक्टर लेवेके वैज्ञानिक हिल्ला बद्रम ताका परवोयो अद्रमे मजदूर लेवेके किसान ना मेहनत हिल्ला वेने समाज ता काम ताका परवो। बोरे मानेय तन्ना प्रयोगशाला लोप्पा वेल्ले मेहनत कीसोर मंतोर लेवेके नरका-पियल उंदी कीसी पढ़ाई किया मंतोर, अस्केने दूसरा जागा ते बोरे मानेय इरंगम-एद्दी ताप रवा कियवा लेवा ओरा काजे अन्न पुट्टी कीसोर मंतोर, बोरे छापाखाना ते ओना काजे पुस्तकिंग छापे कीसोर मंदितोर, बदे फैक्टरी ते बोरे मजदूर वेल्ले मेहनत कीसोर ओना प्रयोगशाला ते इस्तेमाल आयना औजार बने कीसोर मंदितोर। सैकड़ों बाकी लोकुरा मेहनत हिल्ला बोरे वरोर मानेय इत्तेके ओरु बचोन बुद्धिमान मत्तेकाई, डॉक्टर लेवेके वैज्ञानिक बने माया परवोर आंतोर। अदिनके समाज ता संसाधन कुना पोरो हर मेहनतकश ना बराबर अधिकार मंदाना, अदु ओना मेहनत शारीरिक मत्तेकाई लेवेके मानसिक मत्तेकाई।”

सब्बे पेकोर: “हूं, इचोन तो माटु बस्केने आल्सा परताद हिल्ले।”

बेरेल मर्रा: “मति इद्रम ता व्यवस्था ता बारे ते पूंजीवाद लोप्पा वेने आल्समूडायो। समाजवाद लोप्पा मजदूर लोरा राज मत्तेकेने शारीरिक ओसो मानसिक श्रम नइमा अंतर कम आया परिंता।”

सब्बे पेकोर: “इद्रम बारांकु?”

बेरेल मर्रा: “माटु इद काम जबरदस्ती ते सिर्फ कानून बने कीसी आया परवो। इदिना काजे लोकुरा चेतना बेरसना जरूरी मंता। बस्के एवनल समाज ता वेल्ले लोकुर इदिन जीवा कीसी स्वीकार कीवोर अस्के एवनल इदिन लागू कियाना मुश्किल आंता।”

पेकोर: “अद्रमा।”

बेरेल मर्रा: “समाजवाद लोप्पा समाज तीरम-तीरम 5000 साल ता वर्गीय समाज ता गलतिंग नोर्सिंता, व्यापक जनता ना चेतना बेरसी कीसोर ओरा दिमाग ते मोदोल अरसी मत्ता कड़िया-पुड़ियता विचार कुन तेहकसी वाटिंता अनि असल मानवता, समानता, सहयोग लेक्कटा विचार कुन पाले कींता। पूंजीवाद ता सब्बे अवशेष खत्म आंता अनि इद्रमे दुनिया ता वेल्ले देश कुना लोप्पा आंता अस्केने समाज कम्युनिज्म युग ते नेगिंता।

असल ते सही तरीका ते मानव समाज ता जन्न कम्युनिज्म समाज लोप्पाए आंता, हर मानेय तन्ना पूरा क्षमतांग विकसित किया परिंता अनि समाज ओरा क्षमतांग ना पूरा इस्तेमाल किया परिंता।”

पेकोर: “इद्रम ता समाज जल्दी बने मातेके बचोन बेस आयर।”

बेरेल मर्रा: “बनेमायर, जरूर बनेमायर मति इदिना काजे इंजे वेल्ले मेहनत किया लागियर। सिर्फ सपना हूइतेके इद्रम ता समाज बनेमाया परवो। मीटु इव सब्बे पोल्लो ना पोरो गंभीरता ते समजेमाया लागियर अनि संगेने देश ता व्यापक जनता तुन इविना बारे ते समजेमाया लागियर। ज्यादातर लोकुर इव सब्बे पोल्लोंग कुन समजेमायला परिंता अस्के इद्रम ता समाज बनेमायला ज्यादा टाईम लागो आयर।”

रवि: “निम्मा उंदी बेरा एक-तिहाई दुनिया लोप्पा समाजवाद स्थापित आत्ता इंजी वेहतिन। अगा बाताल आत्ता? अदु कम्युनिज्म बगिल दाया परता

या? बेरेल मर्रा कव्वता। अदु मोय्योल पोरो हूइसोर, पिट्टेग तम्मा लोन दाया मंतांग। पोइद पश्चिम ते हत्ता।”

बेरेल मर्रा इत्ता: “अरे नावा लेक्कटा मुयतोना पोरो उचुन जीवा नोयिह कीमूट। नन्ना बचोन जोम तल वड़का मंतान मति मीवा पोट्टाए निंडसोर हिल्ले। इंजे रोमी कीमूट! नन्ना वेल्ले दोगतान। पिस्ता पोल्लो पेरके बस्केने कियाकाल।”

सब्बे पेकोर: “पेरके बस्केने आयो, नाइ वेने मावा छुट्टी मंता। माटु नाड़ी नरकुम वायकोम।”

बेरेल मर्रा: “हूं। अद्रमा, बेसे।” सब्बे पेकोर बेरेल मर्रा तुन प्रणाम इंजोरे तम्मा लोन दायला पेस्तोर। बेरेल मर्रा आशापूर्वक ओरकिन दायानास्के हूइसोर कोंडांग पिहता।

इंजे पोइद पेस्ता इत्तेकेने पेकोरा कोल्हार केंजा वात्ता। बेरेल मर्रा हक्के हूइतेके निज्जेमे वाया मंतोर। अदु लोप्पा-लोप्पा आल्सता पेकोरा लोप्पा ज्ञान ता वेल्ले करुवु मंता। नेटा अध्यापक लोर पोल्लो तुन बद्रम समजेमायोर। बारांकु ओरा रट्टे कीसी ओरा विद्या ता करवु तुन हौकिंतोर। पेकोर किन शिक्षा हियाना सही तरीका चुने कीतेके सही तरीका ते पेकोर किन समजे कीतेके ओरु बाता-बाता किया परवोर आंतोर? बेरेल मर्रा तन्ना विचार ते मुइंदसी मत्ता अस्केने सब्बे पेकोर अगा एवतोर। सब्बे तोर बेरेल मर्रा तुन प्रणाम कितोर।

बेरेल मर्रा चिप्प-चिप्प कीसोर इत्ता: “ओह! मीटु नेंडु हुंजवा लेक्का मंता।”

सबसे कम उम्र ता हरीश इत्तोर: “माटु निन्ने ने प्लान कीसी मत्तोम अदिनके सब्बे तो तम्मा लोन नरकुम क्रिकेट मैच मंता, जल्दी दायकोम इंजी वेहतोम। मीवा पोल्लो वेने बेस। नरकापल्लिंग नन्ना तो सपना हूइसोर मत्तान।”

बेरेल: “सपना ते बाता हूइतिन?”

हरिश: “वेल्ले बेसता सपना मत्ता, उंदी सपना लोप्पा वरोर पूंजीपतिरिन रस्सि ते दोहतोम अनि माट सब्बे तोर ओन किन वेल्ले काम कियाला वेहतोम। उंदी सपना लोप्पा माटु सब्बे कम्युनिस्ट समाज लोप्पा

एवतोम अनि अगा नन्ना मना नेता लोर वेल्ले भाषण हीसोर मत्तादू हूइतोम, ओरु वियार हैय्यना काम किया मंतोर। इद्रमे ओसो बचोनो सपनांग मंतांग।”

सब्बे तोर जोर-जोर ते कव्वतोर।

रवि: “बेरल मर्रा, निम्मा वड़कना शुरू कीमु।”

बेरल मर्रा: “अरे, उचुन नेस्कला तो हीमुट। हूड़ाटू, नावा टोंडांग बचोन लाटिंग आतांग। निम्माट इविना ऊकाड़ पंडसी बारांकु ऊंगविर।”

सौरभ: “मीटु वड़कला दोगतास्के माटु करसकोम। इद्रम कीतेके माकिन आराम वेने दोरकियर अनि मावा करसना वेने आयार।”

बेरल मर्रा: “मीटु सब्बे तोर वेल्ले समझदार आतिर। वाटु चर्चा शुरू कियाकाल।”

सब्बे पेकोर ध्यान हीसी केंजला बेरल जोतांग पोरो, कांदिंग पोरो भूम तल पेस्ता बेहरा हीरकुना पोरो उदितोर।

बेरल मर्रा: “रूस ते समाजवाद 1953 पेस्के पूंजीवादी समाज लोप्पा बदलेमाता। रूस पेस्के पूरा पूर्वी यूरोप वेने अदे हर्दे पेस्ता। 25 साल पेस्के चीन वेने पूंजीवादी समाज बनेमायना हर्दे हत्ता। इदे परिस्थिति बाकी देश कुना वेने मत्ता। कुल मिले कीसी 1917 तल 1976 एवनल लगभग 60 साल दुनिया ता बदे उंदी लेवेके दूसरा देश लोप्पा समाजवादी व्यवस्था बनेमाता अनि ताना पेस्के इव देश कुना लोप्पा दुबारा पूंजीपति व्यवस्था वात्ता।”

मंदीप: “मति नन्ना चीन लोप्पा इंजे वेने कम्युनिस्ट सरकार मंता इंजी पढ़ेमातान।”

बेरल मर्रा: “ओरु सिर्फ पोरोल ता कम्युनिस्ट लोर आंदुर, काम ता कम्युनिस्ट आयोर। ओरा समाजवाद ता सब्बे सिद्धांत, विचार कुन विड़चसी पूंजीवादी सिद्धांत, विचार कुन पोयसी मत्ता। मीटु इद्रम ता लोकुर भेष बदले कीसी मत्ता डकैत लोर आंदुर इंजी इंदा परितिर।”

सब्बे पेकोरा मुक्कम किल्लना लेक्का दिस्सलातांग। इद वेल्ले गलत ता। “मति इद्रम बद्रम आत्ता?”

बेरल मर्रा: “नन्ना मुन्ने वेहता लेक्का 5000 साल ता शोषक लोरा शासन पेस्के पहली बेरा मजदूर लोरा शासन स्थापित आसी मत्ता। इद

पोल्लो शोषक पूंजीपति वर्ग तुन बद्रम जीरेमाया परित्ता। मजदूर लोरा सत्ता तुन मुट्टी कियाला बचोनो साजिश शुरू आतांग।

दूसरा बगिल मजदूर शासक लोरा लेक्का पूराए अनुभवहीन मंदितोर अनि सबसे ज्यादा ओरु लागू कियाना नीतिंग व्यापक जनता ना हित ते मंदाना, इदिना काजे बदे पाड़ना अनुभव ओरिगा मन्नो आंता। हर वस्तु शुरू तल शुरू किया लागिंता।

इद प्रक्रिया लोप्पा रूस ओसो चीन रेंडासी देश कुना लोप्पा रेंडु रकम ता गलतिंग आतांग - पहली गलतिंग ना आधार पोरो वेहता बचोनो अनुभवहीनता मत्ता। मीटु बदे पूना काम शुरू कित्तास्के गलतिंग आयना स्वाभाविक मंता। बचोनो नीतिगत गलतिंग पूंजीपतिर किन समाज लोप्पा भ्रम फैले कियाना ओसो पूंजीवादी विचार कुन पुनर्स्थापित कियाना मौका हियाना ओसो अविना काजे ओसो उंदी बेरा सत्ता पोरो कब्जा कियाना संभव आयना लेक्का मत्तांग। दूसरा रकम ता गलतिंग समाजवादी विचारकु, शासक लोर अति-उत्साह, जल्दबाजी लेवेके परिघटनांग कुन सही तरीका ते समजेमायवा कारण ते आतांग। इव गलतिंग वेने पूंजीवाद तुन स्थापित आयला मदद कीतांग अनि पूंजीपतिर ओसो ओरा विचारक लोर किन पूना समाज ता आलोचना कियाला मौका हीतांग।”

रवि: “बवु गलतिंग मत्तांग, निम्मा वेहा परित्तिना, बेरेल मर्ग।”

बेरेले मर्ग: “इंजे मीवा काजे अव सब्बे समजेमायना मुश्किल आयना लेक्का मंता। अदिना काजे मीकिन अगाटा क्रांतिंग ना विस्तार ते अध्यायन किया लागियर। मति मीवा काजे अव गलतिंग कुन विस्तार ते समजेमायना जरूरी मंता। मीवा अध्यायन ओसो बेरसियर अस्के मीकिन इतिहास ता इव वेल्ले महत्वपूर्ण परिघटनांग ना समीक्षा किया लागियर, इद्रम कीतेके वायना कालम ते इव गलतिंग कियाना तुकू बचेमायमूड़ांता। पेकोर, मीटु इद पोल्लो तुन सुरता तासाट्ट, माटु इतिहास तुन मरंगतेके इतिहास माकिन मरंगिंता। माटु पोद्दिय गुमिया ते अरित्तोम। इंजे अव गलतिंग कुना विस्तार ते पुंदाना जरूरी हिल्ले।”

रवि आल्साइ ते अरतोर। बचोनो पुंदानदु पिस्ता। “नन्ना वेल्ले ध्यान हीसी ओसो मेहनत ते पढ़ेमायकान, अनि इतिहास ता इव लेस्किस् मत्ता पोल्लोग कुन समजेमायकाम अनि अविन हल कियाकान।”

बरेल मर्मा वड़कना जारी तासता, “इंदे आयवा इव देश कुना लोप्पा दुबारा पूंजीवाद तत्ताला काजे ओसो उंदी प्रक्रिया ता महत्वपूर्ण योगदान मत्ता। उचुन मुल खुद किन कम्युनिस्ट नेताल वेहची पूना-पूना विचारकु तत्तोर अवु असल ते कम्युनिस्ट सिद्धांत तुकू इनपड़े उल्टा मत्तांग। इव विचार कम्युनिस्ट पोरोल ते पेश कित्ताद मत्ता। अदिनके बचोनो लोकर इव विचार कुन वेने सही मानेमातोर अनि लागू कियाना शुरू कितोर। असल ते अवु चाशनी ते मुइंदसी मत्ता जहर लेक्का मत्तांग। इदिना कारण ते समाजवादी दुनिया ता उंदी बेहरा हिस्सा रेंडु तुकड़ांग आत्ता। उंदी हिस्सा सही सिद्धांत ओसो विचार पोयसी मुन्ने हंजोर मत्ता अनि दूसरा हिस्सा चाशनी मुइंदसी मत्ता जहर लोकर किन तूससोर मत्ता। अदिना कारण ते पूंजीपति वर्ग ओसो अदिना विचारधारा खिलाफ संघर्ष कमजोर आत्ता अनि ओरु ओसो उंदी बेरा सत्ता पोरो हावी आत्तोर।”

सौरभ: “इंजे बाताल आयर बेरेल मर्मा?”

बरेल मर्मा: “समाजवाद पेरके गुच्चना कारण ते पूंजीवादी व्यवस्था ओसो विचार कुन उंदी पूना पिस्वल दोरकिंता। ओरु पूंजीवादी व्यवस्थाए आखरी सच्चाई आंदू इतिहास ता बदे पिस्वल हिल्ले इंदाना शुरू कितोर। मति इद्रम बक्कव लोकर किया परितोर। तम्मा 5000 साल ता इतिहास तुन मरंगा मंतोर। नेंडु हिल्वेके नाड़ी इद भ्रम एक्सपोज आयर अनि मजदूर वर्ग तन्ना गलतिंग नल सबक एतसी मुन्ने दायर, कम्युनिस्ट समाज जरूर वायार, बारांकु इत्तेक इतिहास तुन रोमी कियमूझायो, उत्पादन शक्तिंग लगाताग विकास आसोर मंतांग अनि उत्पादन संबंध उत्पादन शक्तिंग कुन वेल्ले जोम दोहची तासा परवोंग।”

सब्बे पेकोर खुश आसी चपोटांग नेकिह कितोर। मति मंदीप बातालो आल्ससोर मत्तोर।

बरेल मर्मा: “बाताल आल्सा मंतिन पेका?” इंजी मंदीप किन पूछेमाता।

पेरके-मुन्ने आसोरे मंदीप इंतोर: “निम्मा निन्ने वेने इतिहास तन्ना तरीका ते मुन्ने दांता इंजी वेहतिन। मानेय ना कोशिश अदिना गति तुन तेज लेवेके तीरम किया परिंता मति अदिन निर्णायक रूप ते बदले किया परवो। इंजे निम्मा इतिहास तुन रोमी किया परमूझायो इंदा मंतिन। अद्रमासी नन्ना कन्फ्यूज आया मंतान। इदु किस्मत तुन मानेमायना लेक्का मंता। उचुन मुल किस्मत ते मत्ताते आंता इंतोर। मीवा पोल्लोंग केंजसी इतिहास लोप्पा बाता रासिस मंतायो अदे आयना लेक्का मंता।”

बेरल मर्ग: “बदे वेने बेहरा-सुडला बदलाव तन्ना-तन्नाए आयो आंता। अदिना काजे कोशिश किया लागिंता। प्रकृति लोप्पा आयना बदलाव काजे प्राकृतिक ताकत (वड़िय, एर, एद्दी, एद्दी-इरंगम) तन्ना प्रभाव वाटिंतांग अद्रमासी प्रकृति लोप्पा बदलाव आंता। अदिनके प्रकृति लोप्पा आयवा बदलाव कुना पेरकेटा कारण मंदिंता, बदे कारण हिल्वा अगा वेने बदलाव आयो आंता।

मानव समाज ओसो ज्यादा जटिल मंता। मानव समाज लोप्पा बदलाव तत्ताला काजे पूना विचार पुट्टना ओसो लोकर अव विचार कुन स्वीकार कियाना जरूरी मंता। मानेय खुद चेतनशील प्राणी मंतोर अदिनके मीटु पूना विचार पेश कीतेके मुन्ने मत्ता मानेय अव विचार कुन स्वीकार किया परिंतोर लेवेके अस्वीकार लेवेके, अविना खिलाफ विचार वेने पेश किया परिंतोर। पाइना विचार वेने समाज ताए बदे वर्ग ता हित कुन पूरा कीसोर मंदिंतांग। साधारण रूप ते अदु शोषक वर्ग मंदिंता अदिनके पूना विचार पेश कियवा मत्तेके पाइना विचार, पाइना रीति-रिवाज कुन जारी मंदिंतांग। पूना विचार कुना कमी ते हजारों साल एवनल इद्रमे ताकसोर मंदिंता। पूना विचार पेश कियाना मानेय समाज ता पाइना रिवाज कुना खिलाफ लड़ेमांतोर, ओरकिन माटु समाज ता पथ-प्रदर्शक, दार्शनिक, सिद्धांतवेता, लीडर इंतोम। मति वीरु पूना विचार तम्मा-तम्माए वड़िय ते पुट्टोंग आंतांग। उत्पादन शक्तिंग ना विकार पूना विचार कुना काजे उपजाऊ तोड़ियो लेक्का काम कींतांग। उत्पादन शक्तिंग ना उंदी सही विकास पेरके बोराई नेंडु लेवेके नाड़ी जरूर पूना विचार कुन जन्म हींतोर। उदारहण तुकू पूंजीवादी विकास तुकू मुन्ने मार्क्सवादी सिद्धांत वाया परवो आंता। मति इद सिद्धांत मार्क्स विकसित

कियानदू मत्ता बोरे दूसरोर किया परवोर इंदानदू गलत आंता। सिर्फ जर्मनी दार्शनिक कार्ल मार्क्स सबसे मुन्ने इद सिद्धांत तुन पेश कीतांके नेंडु माटु मार्क्सवाद पोरोल ते पुंतोम। इतिहास ता हर मंजिल तन्ना लीडर पुट्टी कींता मति ओरु श्रीमान **क** मंदिंतोर **ख** आयो इंदानदु निज्जम आयो। बोरे वेने तन्ना कालम ता परिस्थिति ना गंभीर ओसो सटीक विश्लेषण कींतोर, अदिना अनुसार सही फैसला कींतोर ओरु समाज ता लीडर ओसो पथ-प्रदर्शक लेक्का तेदसी वांतोर।

उत्पादन शक्तिंग ना उंदी स्तर ते विकास आत्ता पेरके पूना समाज ता निर्माण आयना जरूरी आंता। उदाहरण तुकू सामंतवाद लेवेक पूंजीवाद वायना जरूरी मत्ता लेक्का मति सामंतवाद लोप्पा तन्ना-तन्नाए वेल्ले रकम ता असमानतांग मंदिंतांग (भारत, यूरोप ता सामंतवाद लोप्पा असमानता मत्ता लेक्का, पूंजीवाद लोप्पा वेने बचोनो असमानतांग मंदिंता)। अमेरिका, इंग्लैंड, स्वीडन, फ्रांस लेक्कटविना पूंजीवाद उंदी लेक्का हिल्ले। इव असमानतांग विभिन्न जागा ना विभिन्न परिस्थितिंग ओसो विभिन्न रकम ता विचार कुना कारण ते मंतांग।

20वीं सदी ते एक तिहाई दुनिया ता समाजवादी हिस्सा ते शामिल आत्ता पेरके ओसो उंदी बेरा इव देश कुना लोप्पा पूंजीवाद स्थापिक आयाना जरूरी हिल्ला मत्ता। इगा मानवीय कोशिश ता महत्वपूर्ण भूमिका मीकिन स्पष्ट दिसिंत। इव देश कुना कम्युनिस्ट पार्टिंग गलतिंग आयवेके, सही तरीका ते समाजवादी समाज ता रक्षा आसी मतेके इतिहास नेंडु माकिन दिससोर मत्ता लेक्का मन्ना आसी मनवड़। मीटु इंजे इतिहास ता गति तुन किस्मत ता गति मानेमायना सही हिल्ले इंजी समजेमासी मंदाकिर।”

मंदीप पूरा समजेमायना कोशिश कीसोर मत्तोर। ओरु बेरेल मर्रा सही वड़का मंता इंजी आल्ससोर मत्तोर मति ओनकिन इंजे पूरा स्पष्ट रूप ते समजेमाताद वेने हिल्लेए। बेरेल मर्रा मंदीप ना परिस्थिति तुन समजेमाता।

अदु तन्ना वड़का जारी तासता, “तन्ना पोल्लो तुन ओसो ज्यादा स्पष्ट बने कियाला नन्ना भारत ता इतिहास लोप्पा ओयला आल्सा मंतान, वायकिरा?”

सब्बे पेकोर: “इंगो, इंगो, बारांकु वायोम?”

बरेल मर्रा: “भारत ता इतिहास, इतिहास ता गति तुन किस्मत मानेमायना बचोन गलत मंता इंजी वेहाला सबसे बेसता उदाहरण आंदू। नन्ना नावा पोल्लोंग लोप्पा मानव इतिहास तुन 5 मंजिल ते हूडकाल, भारत ता इतिहास हूडतेके माटु दूसरा मंजिल ते गुलाम समाज दिस्सो ओसो चौथी मंजिल ते पूंजीवाद दिसिंता। इदिनगडल माटु उत्पादन शक्तिंग ओसो उत्पादन संबंध कुना नइमा संघर्ष तल इतिहास ता दूसरा मंजिल ते एव्वना सिद्धांत गलत मंता इंजी निर्णय किया परितोम। इदे आयवा बद्रम मानवीय हस्तक्षेप इतिहास तुन प्रभावित कींता अनि इतिहास किस्मत संगे बदलेमायो इंजी साबित आंता।

भारत ता प्राचीन सभ्यता सिंधु घाटी सभ्यता पश्चिम उत्तर बगिल भारत व पाकिस्तान ते फैलेमाता उंदी वेल्ले समृद्ध नागरिक सभ्यता मत्ता अदु गुलाम प्रथा लेक्का विकसित आसोर मत्ता। इदिना पोरो बाहरी प्रभाव अरतेके मिस्र, मैसोपोटामिया लेक्का स्पष्ट गुलाम प्रथा लोप्पा बदलेमासी मनवड़। मति इदिना विकास प्रक्रिया लोप्पा मध्य एशिया तल वात्ता आर्य लोरा हमला ता कारण ते इद सभ्यता पूराए नष्ट आत्ता। इद्रम इदिना नैसर्गिक विकास अगाने रोमता।

दूसरा बगिल समाज लोप्पा आर्य कबिला इंजे वेने मत्ता, ओरु विकसित आसी मत्ता सिंधु घाटी सभ्यता ता सम्पर्क ते वात्तास्के ओरा वेने नैसर्गिक विकास प्रभावित आत्ता। ओरु स्थाई पिस्वल पिस्सना शुरू कितोर मति सिंधु घाटी सभ्यता ता निजी गुलाम लोर किन ओरु तम्मा निजी गुलाम बने कियवा लेवा ओरा क्षमता सार्वजनिक सेवक लोरा लेक्का बने कितोर। अद्रमासी भारत लोप्पा आर्य लोर वात्ता पेरके गुलाम प्रथा विशिष्ट रूप ते स्थापित आयवा अदिना जागा ते वेल्ले क्रूर अनि अलग रकम ता गुलामी-जाति व्यवस्था वात्ता इदिना असर नेड वेने मना समाज लोप्पा मंता।

जाति प्रथा ता आधार, जातीय शोषण ता आधार मानव श्रम ता आर्थिक लूट आंदू। इदिना लोप्पा 90 प्रतिशत भारतीय लोकुर किन शूद्र, अछूत लोरा श्रेणी ते वाटताद मंता अनि ओरकिन उच्च जाति ना सेवा कियाना ओरा कर्तव्य आंदू इंजी शक्षित किताद मंता। इद्रम जाति व्यवस्था शोषक वर्ग हल्कोए देश ता 90 प्रतिशत जनता ना मेहनत तुन लूटे कियाना

लेक्का कित्ता। जाति व्यवस्था तुन हिंदू धर्म संगे जोड़े कीसी हूइमूड़ांता, मति भारत ता मुसलमान, ईसाई ओसो सिख शासक लोर वेने जाति-प्रथा तुन खत्म कियवा लेवा तम्मा राज पाट तुन बचे कीसी तासला इस्तेमाल कितोर। मीटु दुनिया ता बाकी देश कुना मुसलमान ओसो ईसाई लोरा लोप्पा जाति व्यवस्था हिल्ले मति भारतीय उपमहाद्वीप लोप्पा हर धर्म ते जाति व्यवस्था मंता इंजी पुंजी आश्चर्य आयकिर।

इंजे माटु दूसरा उदाहरण हूइकाल। जाति-प्रथा भारत लोप्पा पूंजीवाद वायना तुकू उचुन जोम रोमी कित्ताद मंता। मीकिन नन्ना योरोप ता शिल्पी संघ ता बारे ते वेहतादू सुरता मंदियरे। इव शिल्पी संघ यूरोप ता पूंजीवाद ता नींव लेक्का मत्तांग। भारत लोप्पा जाति प्रथा इव शिल्पी संघ कुना विकार लोप्पा बचोनो सौ साल बाधा मत्तांग बारांकु इत्तेके शूद्र, अछूत जातिंग किन निजी सम्पत्ति तासना अधिकार हिल्वा मत्ता। ओरु पुट्टी कित्ता अतिरिक्त उत्पादन तुन सब्बे उच्च जातिंग हड़पे कियानवु। अदिन काजे अतिरिक्त पुट्टी कियाना ओसो इद्रम ता व्यापार तुन बेरसी कियाला ओरकिन वेल्ले मुश्किल तल वेंडा लागता मति जाति प्रथा ता भयंकर मजबूती वेने उत्पादन शक्तिंग ना विकास तुन हमेशा रोमी किया परवो आंता। यूरोपीयन भारत ते वात्तास्के एवनल भारत ता बचोनो हिस्सा ने शिल्पी संघ ओसो विनिर्माण इकाइंग ना स्थापना आसी मत्ता। बचोनो विनिर्माण इकाईंग 500 श्रमिक काम कियानाचोन बेहरा मत्तांग।

यूरोपीयन भारत लोप्पा वातेके, ईस्ट कंपनी भारत पोरो कब्जा कीयवेके, भारत लोप्पा वेने स्वतंत्र पूंजीवादी विकास आसी मनवड़ मति अंग्रेज लोर भारत पोरो कब्जा कीसी सिर्फ यूरोपीय रकम ता सामंतवाद तुन इगा स्थापित कीसी भारत ते विकसित आसोर मत्ता उद्योग किन वेने नष्ट कित्ता। भारत ता गेत्ते उद्योग, लौह उद्योग, जहाजरानी, कालीन, विभिन्न धातु उद्योग नष्ट आतांग। भात तुन अंग्रेज शासक लोर कच्चा माल ता स्रोत लेक्का बदले कितोर। इगा पुट्टना पूंजीपति वर्ग तुन तबाह कितोर। कंपनी ब्रिटिश फैक्टरींग किन कच्चा माल ता तच्ची हियानदु अनि इंग्लैंड ता फैक्टरींग लोप्पा तैयार माल भारत ता मंडिंग लोप्पा वम्मनदू। पेरके इंग्लैंड लोप्पा पूंजीवाद ओसो विकास आत्ता अनि अगा मशीन बने कियाना

कारखानांग वेने बनेमायना शुरू आत्तास्के अंग्रेज शासक लोर भारत लोप्पटा तम्मा दलाल लोरकिन मशीनकु वम्मतोर। इद्रम भारत लोप्पा पूना कारखानांग बनेमासी इंग्लैंड ता पूंजीवाद तुन मजबूत कीसोर मत्तांग। तकनीक विकास इंग्लैंड ते आत्ता। भारत ता इद्र पूंजीपति स्वतंत्र आयवा ब्रिटिश पूंजीपति अधीन वात्ता। विदेशी तकनीक ओसो पूंजी पोरो इद्रम ता दलाल वर्ग निर्भरत नेंड वेने खत्म आत्ताद हिल्ले। इद्रम मीटु ओसो उंदी बेरा मानवीय हस्तक्षेप ता कारण ते भारत लोप्पा यूरोप ते आत्ता लेक्का स्वतंत्र रकम ता पूंजीवाद स्थापित आया परवो आत्ता।

अदिन काजे भारत ता इतिहास नेंडु वेने बुनियादी रूप ते सामंती लेक्काने मंता ताना लोप्पा पोरोटल विदेशी पूंजी अनुकूल बेगा-बेगाने पूंजीवाद ता विकास आत्ता। माटु इतिहास तुन किस्मत ता जागा हीतेके भारत लोप्पा वेने जरूर गुलाम प्रथा ओसो पूंजीवाद वासी मनवड़ मति इद्रम आत्ताद हिल्ले।”

रवि: “बेरेल मर्ग, नावा वेने सुडला सवाल मंता। निम्मा मजदूर वर्ग संपत्ति तुन सामूहिक संपत्ति लोप्पा बदले कींता इत्तिन। अदु शासक बनेमाता परेके खुद पूंजीपति लेक्का अदिना मालिक बारांकु बनेमासी मनवड़?”

बेरेल मर्ग: “मना विचार माटु मंदाना भौतिक परिस्थिति लोप्पा पुट्टितांग। इद्रम ता पोल्लोंग गुलाम लेवेके भू-गुलाम लोरे आल्सा परितोर मति मजदूर लोरा भौतिक परिस्थिति ओरा उत्पादन साधन कन निजी संपत्ति लेक्का आयवा सामूहिक संपत्ति रूप ते विचार कियाना आधार हींता। मजदूर लोरा तम्मा बदे निजी संपत्ति मन्नो आंता। सामंतवाद समाज लोप्पा ओरा औजार, भूम, रेंडु-मुंडू एर्मिंग-कोंदांग वेने ऊंदनोर। पूंजीवादी व्यवस्था लोप्पा ओरा तम्मा रेंडु कै विड़चसी ओरगा बाताले हिल्ले। पूंजीपति लोरा निर्मम शोषण ओरा दिमाग ते निजी संपत्ति तासना सब्बे विचार कुन तेंडसी वाटिंता। दूसरा पूंजीवादी उत्पादन वेल्ले बेहरा स्तर ते मंता, बोरे वरोर मजदूर उत्पादन कियाला वेने आल्सोर आंतोर। इवे रेंडु कारण कुना कारण ते मजदूर उत्पादन ता सब्बे साधान कुन पूरा समाज ता सामूहिक संपत्ति लोप्पा बदले कींतोर अदिन निजी मालिकाना ते तासोर आंतोर।”

सौरभः “नन्ना उचुन मुल राम राज्य ते सब्बे समान मंतोर इंजी वड़कसोर मत्तादू केंजतान। मानेये आयवा, डुव्वल ओसो हेरेंग वेने उंदी घाटुम ता एर उंतांग। इंदानास्के राम राज्य कम्युनिस्ट समाज बद्रम मत्ता?”

बरेल मर्रा: “अरे आयो, इव सब्बे बदे आधार हिल्वा पोल्लोंग आंदुंग। राम राज्य सामंती समाज मत्ता। दशरथ ना मर्री राम राजाल बनेमातोर, ताना पेरके राम ना मर्री राजाल बनेमातोर। राम राज्य लोप्पा समीं समाज ता सब्बे लक्षण दिसिंतांग। आस्कु, दलित लोरा परिस्थिति दोयम दर्जा ता मत्ता। राजा लोर किसान लोरगडल लगान वसूल कियानोर अद्रमासी ओरा राडपाठ ता खर्च ओसो अश्वमेध यज्ञ लेक्कटा बेहरा ओसो वेल्ले खर्च संगे ताकना आयोजन कुना खर्चा ताकनादू। राजा लोर किन भगवा ता अंश मानेमायनोर, इंदान लेक्कटवु। अद समाज लोप्पा खेतिहर मजदूर, किसान, दलित, आस्कुन नेंडु मत्ताचोन अधिकार वेने हिल्वा मत्तांग। अदिन काजे कम्युनिस्ट समाज संगे तुलना कियाना वेल्ले जेक ता पोल्लो मंता।

नेंडु उचुन मुल राम राज्य स्थापना कियाना पोल्लोंग किया मंतोर। असल ते समाज तुन ओसो इतिहास तुन पेरके दोब्बना कोशिश कींता। स्वाभाविक रूप ते विकसित आत्ता उत्पादन शक्तिंग पूंजीवाद तल कम्युनिज्म बगिल दायला कंदरेमासोर मंतांग। बस्केने पूंजीवाद तल सामंतवाद बगिल वापिस वायोंग आयनुंग। लोकतांत्रिक चेतना वात्ता व्यापक लोकुरा लोप्पाटल अविना गुडंगा कोय्यना संभव हिल्ले। नेंडु बोरे वेने प्रधानमंती लेवेके मुख्यमंत्री ना मर्री किन सिर्फ ओरा मर्री इंजीए प्रधानमंत्री लेवेके मुख्यमंत्री बने कीतेके बाताल आयार इंजी बोरे स्वीकार कींतोरा?”

बरेल मर्रा: “ निम्मा निज्जम सवाल कीतिन। भारत लोप्पा इंजे वेने समाजवाद लेवेके कम्युनिज्म स्थापित आया परवो। इंजे भारत लोप्पा बदे लोकतांत्रिक पूंजीवादी देश कियाना सब्बे कार्यभार पूरा किया लागियर। व्यापक खेतिहर मजदूर ओसो किसान लोर किन सामंती शोषण तल मुक्त, स्वतंत्र उद्योग ता विकास, वैज्ञानिक, तार्किक शिक्षा, संस्कृति ता प्रचार प्रसार, दलित, आस्कुन सामंती उत्पीड़न तल मुक्ति, आधारभूत सरंचनांग ना विकास, तकनीक कुना विकास लेक्कटवु वेल्ले महत्वपूर्ण काम मंतांग।

इविन पूरा कियवा लेवा समाज तुन मुन्ने ओयना मुश्किल मंता अदिना काजे माटु असली लोकतंत्र ता जरूरत मंता।”

रवि: “बेरेल मर्रा, निम्मा वेल्ले बेसता पोल्लोंग कीतिन। मावा उंदी समस्या तुन हल कीतिर अनि दूसरा पूना समस्या मुन्ने तच्ची तासिंतिर। इंजे इद **असली लोकतंत्र**- इद बाताल आंदू। माटु मना पुस्तक लोप्पा 15 अगस्त 1947 ते भारत लोप्पा लोकतंत्र स्थापित आत्ता इंजी पढ़ेमातोम। माकिन उचुन विस्ता ते समजे कीमूट।”

बेरेल मर्रा: “इदिना काजे नन्ना उंदी बेहरा पीटो वेहाकाम। मति नेंडु अदिन काजे टाईम हिल्ले। निन्ने नुल्पेह बेरा वेल्ले जेक तल इरंगम मत्ता इलाका नल बचोनो पिट्टेंग नावगा वातांग, नन्ना अविना संगे वेने पोल्लोंग कियाकान।”

सब्बे पेकोर: “इंगो, बेरेल मर्रा, माटु ओसो वायकोम। जोहार।”

बेरेल मर्रा: “खुश मन्नुट पेकोर।”

अनुवादक ना बगिल तल

11-12 साल उमर ते मंदानास्केटल बेहरोर वड़कना पोल्लिंग केंजसोरे बेरसतान। बेरसोरे दायना संगे इव पोल्लिंग कुन पाटांग ओसो भाषण कुना लोप्पा वेने केंजा वात्ता। नन्ना सुडलास्केटल मंदाना नाटे ओसो नावा नालुंग बगिल ता वातावरण लोप्पा इद्रम ता बेहरा-बेहरा ओसो मावा रोज ता पिस्वल संगे जुड़ेमासी मत्ता पोल्लिंग केंजवा मत्तांकु, नावा लोप्पा इविन पुंदाना गिर्दा बेरससोर हत्ता। नावा काजे इव वेल्ले पूना पोल्लिंग मत्तांग।

सिर्फ केंजसिए बदे पोल्लो तुन पुंदाला कोशिश कियाना वेल्ले मुश्किल मंता। बारांकु इत्तेके हर बेरा, हर विषय, हर सवाल ता जवाब हियाला काजे वरोर सही मानेय संगे मदांना मुश्किल मंता। अदिनके नन्ना उचुन पढ़ेमायला अनि रासिला करियतान।

नावा इद यात्रा लोप्पा वेल्ले लोकुरा योगदान मंता। सबसे मुन्ने नावा यायाल मंता, अदु नाकिन कम से कम साईन कियानाचोन स्कूल करियाना इंजी सपना हूइता। मति अदिना सपना अदु हूइता लेक्का पूरा आया परवो आत्ता। बारांकु इत्तेके उंदी पेरके अरसी मत्ता इलाका ओसो नाटे स्कूल-कालेज पढ़ाई ता रिवाजे हिल्ले। इदिनकु बेहरा समस्या गरीबी ते पिस्वल पिस्नुदु मंता।

इद्रम ता परिस्थिति ते मंदानास्के नावा पिस्वल लोप्पा वरोर गुरुजी वात्तोर, नावा जीवा ता 'दादाल', नावा गुरुजी। ओरु नाकिन ओरा वेल्ले कीमती समय तिंची नावा काजे समय तेंडानोर, नाकिन प्राथमिक शिक्षा हियानोर, नाकिन जीवा कियानोर। नावा जीवा गेरे मत्ता 'मीना' दीदी नाकिन हिंदी भाषा रास्ला ओसो पढ़ेमायला करिहत्ता। इदे आयवा 'गेड़ा ते ताकना स्कूल' ता वेल्ले योगदान मंता। इदे आयवा बच्चोनों दादा-दीदीरा योगदान मंता। इव सब्बे पुस्तकिंग अनुवाद कीसोरे ओर सब्बे तोरकिन नन्ना सुरता कींदान। ओरा लोप्पा बच्चोनों जन इंजे माकिन विडिंसी हत्तोर। वेर सब्बेतोर इद यात्रा लोप्पा नावा संगे मंदानोर, ओसो वायना कालम ते वेने नावा संगे मंदानूरे। ओरा बारे ते बच्चोने पुस्तकिंग रासमुड़ आयर।

माटांग ओसो पाटांग लोप्पा केंजता पोल्लिंग, पुस्तक पढ़ेमायनास्के पुस्तक लोप्पा दोरकतास्के नावा गिर्दा तुकू हंदी हिल्ले आत्ता। नावा लेक्का पूना पोल्लिंग करियाला आल्सानोर ओसो केंजता पोल्लिंग कुन पुंदाला

कोशिश कियानोर वेल्लेतोर मंतोर। मति पोरो नन्ना वेहता लेक्का हर बेरा,
हर विषय, हर सवाल ता जवाब हियाला सही मानेय 'जीवा ता दादाल'
दोरकना मुश्किल मंता। अदिनके इद साहित्य ता परताचोन हिंदी तिंची गोंडी
भाषा ते अनुवाद कियाना इंजी आल्सतान।

मावा गोंडी भाषा वड़कानोर आंध्रा, ओड़िशा, छत्तीसगढ़, महाराष्ट्र,
मध्यप्रदेश, उत्तरप्रदेश लेक्कटा राज्यकुने अलग-अलग जागा ने पिस्सा
मंतोर। अदिनके मावा गोंडी भाषा पोरो अलग-अलग राज्यकुना भाषांग ना
वेल्ले प्रभाव मंता। नावा गोंडी पोरो हिंदी, मराठी ओसो छत्तीसगढ़ी ता प्रभाव
ज्यादा मंता। अनुवाद कियानास्के नाकिन पूना शब्द बने कियाना वेल्ले
कटला वात्ता, इतेके गोंडी लोप्पा पारिभाषिक शब्द कुन वेहाला शब्द हिल्ले,
अदिनके वेल्ले शब्द हिंदी ता इस्तेमाल कित्तान। वायना कालम ते जनता
लोप्पा हंजी ओसो ज्यादा गोंडी ता शब्दकु करियसी इदिन उचुन सुधरे कीमुड़
आयर। मति भाषा ता प्राकृति अनुसार दूसरा भाषा तल शब्द पोयाए लागिता।
अनुवाद कियानास्के नन्ना अंग्रेजी ओसो हिंदी रेंडु पुस्तकिंग ना मदद
एतित्तान।

नावा इद कब्बड़ लोप्पा संगे-संगे ताकसोर मत्ता नावा जीवन साथी ना
वेन्ने योगदान मंता। वीरू नाकिन इद काम कियाला गिर्दा कींतोर। नावा
लोप्पा जीवा मत्तादु सुरता किसींतोर, नावा कै पोयसी ताकिंतोर। वीरू इदिन
पुस्तक लेक्का डिजाईन कियाना ओसो प्रूफ कियाला मदद हितोर।

इव सब्बे पुस्तकिंग जनता नड़मा ओयला काजे जंगोम प्रेस पोरोल ते
उंदी प्रकाशन पोरोल हितोम। इद पोरोल मावा वीर पड़ियोर, गोंड जनता ना
हीरो, गड़चिरोली भूमि ता मर्री वीर बाबूराव शेड़माके ना सेना तल पोयत्तोम।
सब्बे शहीदीर किन सुरता कीसोरे इव सब्बे पुस्तकिंग इंजे मीवाव आत्तांग।

इद यात्रा जारी मंदियर.... इव पुस्तकुना गोंडी अनुवाद, डिजाईन पोरो
सब्बेतोरा सुझाव ओसो आलोचनाकुना वेल्ले जरूरत मंता। मीटू ओसो बदे
पुस्तक ता अनुवाद कीतेके बेस आयर इंजी वेने सुझाव हीतेके बेस आयर।

जीवा ता जोहार
मीवा - जनी

